Samantapāsādikāya Vinayaṭṭhakathāya

Atthavannanābhūtā

Bhadantasāriputtattherena katā

Sāratthadīpanīţīkā

(Pathamo bhāgo)



Buddhavasse 2552 Marammavasse 1370 AD. 2000

Romanized from Myanmar version published in 1981

© Buddhasāsana Society

Ţīkā Series 01

First published in 2008 by Ministry of Religious Affairs Yangon, Myanmar

THE PĀĻI ALPHABET IN BURMESE AND ROMAN CHARACTERS

C	FΙ	W	O	V
• •		vv	ι,	v

VOWELS													
න <i>ව</i>	ì :	නා ā	တ္တ	i	නු	ī	ը ս	l	දී ū		e e		သ ၀
CONSONANTS WITH VOWEL "A"													
		က	ka	ə k	tha	o ga	ì	ဃ ဥ	ha	c na			
		o (ca	ဆ	cha	е ja		ဈ jh	ıa	p_ña			
		•	a	_		ခု da							
						з da				•			
		οĮ	oa	o p	ha	ဗ ba	ì	ဘ b	ha	မ ma	ı		
ω y	a c	ra ra	∾ .	la	o V	'a	သေ S	a	တ h	a	ę ļa	•	ṁ
						IN CO							
_o .	_1 = ā	<u> </u>	i .	<u> </u>	τ	-(= u	īL	-[= [[]	Ū a	s- = e	. (ചേ ചീ	= O
თ ka	ကာ ka	ā ကိ	ki	ကိ	kī	ကု k	u	ကူ k	ū	ကေ k	(e	ကော ါ	02
ວ kha	อ์ khā											බේ kh	
				CON	JUN	CT-C	ONSC	NAN	ITS				
റ്റ്റ kka		င်္ဃ ṅgl	ha	a	g nth	na	ဓျ	dhya	l	ც p	la		လ္လ lla
ന്റ kkh	a	g cca		CI	b úqa	a	8	dhva		g p	ba		ભુ lya
നു kya		g cch	a	a	s init	a	နှီ တ	nta		ల్ల b	bha	Į.	လှ lha
ලී kri		g jja		a	ի inpa	a	8	ntva		ဗျ b	oya		9 vha
ස kla		g jjha	l	g	g tta		&	ntha		මු b	ora		ည္က sta
ფ kva		ည ñña	a	g	g ttha	a	8	nda		မွ n	npa		ධූ stra
จุ khya	L	ə ñha		o	g tva		୍ଷ	ndra		ଧୃ 11	npha	a	ગ્રૄ sna
g khva		g ñca		o	ą tya	ı	80	ndha	-	မွ n	nba		သျ sya
g gga		නූ ñch	a	0	g tra		8	nna		မ္တ 11	nbha	a	ဿ ssa
ვ ggha		g ñja		<u> </u>	dda		နျ	nya		မ္မ n	nma	l	သ္မ sma
၅ gya		g ñjha	a	3	ddha	a	ş	nha		မျ 11	nya		သွ sva
ြ gra		ş tta		अ	dya		ပ္ပ	ppa		မှ n	nha		_{ගු} hma
င်္က ṅka		g ttha		િલ	dra			ppha		ယျ	yya		ფ hva
å ṅkha		ð qqa		_ ვ	dva			pya			yha		g ļha
δ ṅga		~		J			•			-			
		Э	J	9	9	9	G	૧	၈	6	0		
		1	2	3	4	5	6	7	8	9	0		

Nidanakatha

.

Sirimatā amhākam Buddhena Bhagavatā Arahatā Sammāsambuddhena sakalalokapatthaṭamahākaruṇāsinehasiniddhahadayena sabbattha appaṭihatasabbaññutānāvaraṇādiñāṇobhāsasamujjalitena sanarāmaralokagurunā sadevakassa lokassa atthāya hitāya sukhāya dhammo ca vinayo ca desito paññatto, so pariyattipaṭipattipaṭivedhavasena vibhattesu tīsu saddhammesu pariyattisaddhammo nāma, tadeva ca sāsanaṭṭhitiyā pamāṇam, satiyeva hi tasmim itare uppajjanti, nāsati, vuttañhetam Aṅguttaraṭṭhakathāyam— (Am-Ṭṭha 1. 72 piṭṭhe)

"Suttantesu asantesu, pamuṭṭhe vinayamhi ca. Tamo bhavissati loko, sūriye atthaṅgate yathā.

Suttante rakkhite sante, paṭipatti hoti rakkhitā. Paṭipattiyaṁ ṭhito dhīro, yogakhemā na dhaṁsatī"ti.

Teneva ca saddhammaciraṭṭhitikāmino theravarā Mahākassapādayo pariyattisaddhammasaṅkhātaṁ Tepiṭakaṁ Buddhavacanaṁ saṅgītimāropetvā Buddhasāsanaṁ saṁrakkhiṁsu, taṁkālikā ca rājāno saddhammābhivuddhikāmā tesaṁ saṅgītikārānamanubalappadānena sahāyattamupāgamuṁ.

Tathā hi catūhādhikatimāsaparinibbute Bhagavati Mahākassapattherappamukhehi pañcahi arahantasatehi Rājagahe **paṭhamā dhammasaṅgīti** katā rañño Māgadhassa Ajātasattuno visesānuggahamādāya.

Vassasataparinibbute ca Bhagavati Mahāyasattherappamukhehi sattahi arahantasatehi Vesāliyaṁ **dutiyā dhammasaṅgīti** katā, tadā ca Kālāsoko mahīpati tesaṁ sahāyattamupāgato.

Tathāgataparinibbānato pana dvinnam vassasatānamupari pañcattimsatime vasse Mahāmoggaliputtatissattherappamukhehi arahantasahassehi Pāṭaliputte tatiyā dhammasaṅgīti katā sakalalokapatthaṭayasassa Dhammāsokassa bhūpatino niratisayānuggaham laddhāna.

Sammāsambuddhaparinibbutito pana catunnam vassasatānamupari paṇṇāse vasse Laṅkādīpe Vaṭṭagāmaṇirājino kāle Mātulajanapade Ālokaleṇe catutthī dhammasaṅgīti katā pañcahi arahantasatehi Mahādhammarakkhitattherappamukhehi, yā loke "potthakāropanasaṅgītī"ti pākaṭā.

Buddhavasse pana catussatādhikadvisahassānamupari pannarasamasankhyam sampatte imasmimpi Marammaraṭṭhe Mindonnāmassa mahādhammarājino kāle Mandalay itipākaṭe Ratanāpuñjanagare pañcamī dhammasangīti katā catussatādhikadvisahassattherehi Dakkhiṇārāmavāsītipiṭakadharabhadantajāgarattherappamukhehi tasseva rañño anavasesānuggahamādāya, yā loke "selakkharāropanasangītī"ti vuccati.

Ittham sudam Buddhassa Bhagavato sāsanam iddhanceva hoti phītanca vitthārikam bāhujannam puthubhūtam yāvajjatanā.

Cirakālato panetam Buddhavacanam lekhaparamparāya ceva muddaņaparamparāya ca anekakkhattum parivattiyābhatam na sakkā dāni vattum "paṭhamadutiyatatiyādisaṅgītimāropitākāreneva sabbaso parisuddhan"ti, aññadatthu panādhunikapotthakesu samvijjamānehi kehici pamādalekhādisañjātakhalitādhikaparibhaṭṭhapāṭhehi malīnamevetam, tathā hi nānādesiyapotthakesu aññamaññam samsandiyamānesu anekā visadisapāthā dissanti.

Tatoyeva ca Buddhavacanassa suparisuddhabhāvakāmino mahātherā sasatthantarapiṭakattayakovidā dhammavinayaṁ vācentāyeva te khalitādhikaparibhatthapāthe disvā evaṁ samacintesuṁ kathesuṁ ca—

"Advayavādino suparisuddhavacanassa tassa Bhagavato pāvacanam advayam suparisuddham nimmalamevassa, imesu pana pāvacanapotthakesu aññamaññam visadisā ceva aparisuddhā ca pāṭhā dissanti, nissamsayam kho ayameva mūlapāṭho, yo nesam yuttisampanno, tadañño pana pamādalekhapāṭhoyeva, tādisā ca dissanti ādhunikapāvacanapotthakesu kismiñci kismiñci thāne.

Kāmañcetedāni na tāva bahutarā, yāva yathābhūtam Pāļiyā attham paṭisedheyyum, etarahi pana asodhiyamānā te gacchante gacchante

kāle bahutarā bahutarā jāyeyyum, tamkālikā ca pacchimā janā te sodhetum asamatthā yathādhippetam Pāļiyā attham na sammā jāneyyum, evamete saddhammassa sammosāya antaradhānāya samvatteyyum.

Vuttam hetam **Anguttaranikāye**— (Am 1. 60 pitthe)

'Dveme bhikkhave dhammā saddhammassa sammosāya antaradhānāya samvattanti, katame dve, dunnikkhittam ca padabyañjanam attho ca dunnīto, dunnikkhittassa bhikkhave padabyañjanassa atthopi dunnayo hoti, ime kho bhikkhave dve dhammā saddhammassa sammosāya antaradhānāya samvattantī'ti.

Yamnuna mayam te sodhetva nimmalam parisuddham Buddhavacanam sampatiṭṭhapeyyama, tadassa saddhammaciraṭṭhitiya bahujanahitaya bahujanasukhaya ca, tam pana na sukaram sampadetum aññatra dhammikarajūnamanuggahena"ti.

Sā panāyam kathā patthaṭā sādhujanaparamparāya, sutā ca **U Nu** nāmadheyyaggamahāmaccappamukhehi Marammaraṭṭhissarehi, sutvāna te evam samacintesum sammantayimsu ca "na kho panetam amhākam patirūpam, ye mayam pubbakehi dhammikehi dhammarājūhi samanuggahitassa Buddhasāsanassa parihānikāraṇam passamānāyeva ajjhupekkhitvā appossukkā vihareyyāma, yamnūna mayam sāsanopakārupāye sampādetvā visesato ca ādhunikapāvacanapotthakesu dissamāne samsayaṭṭhānīye pamādalekhapāṭhe samsodhetukāmānam mahātherānam ajjhāsayam paripūretvā Buddhasāsanam anuggaṇheyyāmā"ti, atha te sabbepi sāsanānuggahāya katasanniṭṭhānā ahesum.

Anuggahitukāmehipi ca tehi na sakkā āṇāya kātuṁ vinā mahājanacchandasañjātopadesena, mahājanappatinidhibhūtā hi etarahi Marammikā rājāno, upadeso ca santhāgārasamitiyaṁ mahājanappatinidhibhūtānaṁ matisajīvānaṁ chandeneva samuppajjati, tasmā Buddhasāsanānuggahāya santhāgārasamitiyaṁ ekaṁ dhammupadesaṁ paññāpetvā Buddhasāsanasamiti nāma mahāsamiti samuṭṭhāpitā. Tassā kho pana samitiyā sabhāpati hoti *Thado*sirīsudhammopādhidhārī *Sir* U Thwinvhayo mahāseṭṭhi, upasabhāpati pana *Thado*sirīsudhammopādhidhārīyeva U Thein Maungvhayo padhānaḍḍavinicchayamandiramhi mahākkhadassādhipati, sabbakammavidhāyako pana

hitadharo *Thado*mahāsaresīthūpādhiko **U Chan Htun**vhayo upadesikādhipatipadhānanītivedimahāmantī. Bhaṇḍuppādako pana raṭṭhissarānaṁ patinidhibhūto **U Win** nāmadheyyo sāsanatthānikamahāmatto.

Atha te Buddhasāsanasamitikā "yāyeva kho panatthāya samuṭṭhāpitāyam samiti, tadatthamidāni visesato kāhāmā"ti Marammaraṭṭhebhipākaṭaguṇasamudayasamudite tattha tattha padhānanāyakabhūte paropaṇṇāsamahāthere dīghadassino nimantiya evamārocesum "ayam bhante amhākam Buddhasāsanamahāsamiti Buddhasāsanānuggahatthāyeva raṭṭhissarānam dhammupadesena samuṭṭhāpitā, sacedāni bhante pubbe viya dhammasaṅgītim katvā sāsanam paggaṇhitum yujjeyya, mahātherā ca tathā kātumiccheyyum, vissatthāva bhante karontu, mayam tattha kāyañāṇapaccayabalehi niravasesam byāvaṭā bhavissāmā"ti.

Atha kho te mahātherā "dhammasaṅgītiṁ karissāmā"ti katasanniṭṭhānā evaṁ pativedesuṁ "kattabbāyevesā dhammasaṅgīti, nesā na kattabbā, tasmā mayaṁ dāni piṭakapotthakāni pañcamasaṅgītisilālekhāya samānetvā tāniyeva sarīraṁ katvā Pāḷisaṁsodhanapubbaṅgamaṁ dhammasaṅgītiṁ kassāma, yāya ādhunikapotthakesu paramparāparivattanavasena sañjātā pamādalekhapāṭhā ca nirākarīyissanti, visodhitañca suparisuddhaṁ pāvacanamūlaṁ labhitvā taṁ muddāpetvā sakalaloke nānāraṭṭhesu nānādesesu byāpanavasena Buddhasāsanassa ciraṭṭhiti ca sādhiyissati, sabbe ca Theravādikā raṭṭhā Marammaraṭṭhasahitā ekato hutvā Buddhasāsanaṁ abhūtapubbapaggahena paggaṇhituṁ labhissanti, sā ca purimikā pañca saṅgītiyo upanidhāya chaṭṭhasaṅgīti nāma bhavissati, tañca sabbaṁ bhavissati bahujanahitāya bahujanasukhāya atthāya hitāya sukhāya devamanussānaṁ, bahūni panettha āvassakakiccāni paṭikacceva samādapetabbāni tumhākamāyattāni, tasmā saṅgītikālavavatthānādikiccaṁ tumhākaṁyeva bhāro hotū"ti.

Atha te Buddhasāsanasamitikā sāsanapālakānam mahātherānam chandañca ruciñca samādāya ovādañca sirasā sampaṭicchitvā therānam ceva attano ca kattabbakiccānam pariniṭṭhānasamayam sallakkhetvā "ayam chaṭṭhasaṅgīti Sammāsambuddhaparinibbānato catussatādhikānam dvinnam vassasahassānamupari

V

aṭṭhanavutime vasse vesākhapuṇṇamito paṭṭhāya ārabhitabbā, dve ca vassāni kattabbā, pañcannaṁ ca sāsanavassasahassānamupaḍḍhavasse vesākhapuṇṇamiyaṁyeva pariniṭṭhāpetabbā"ti saṅgītikālaṁ vavatthapesuṁ.

Tato paṭṭhāya ca te punappunam sannipatitvā sammantayitvā saṅgītiyā pubbakiccesu nirantaram byāvaṭā honti, "mahantam kho Jinasāsanam mahatiyāyevetam pūjāya pūjanīyan"ti mantvā tehi kārāpitāni mahantamahantāni sāsanamandirāni, tattha saṅgītim kurumānassa bhikkhusamghassa sukhasannisajjattham sannipātaṭṭhānabhūtam mahantam saṅgītimandiram Yangon nāma rājadhāniyam Sirīmaṅgalatthale Kaba Aye (Lokasāma) nāmakassa cetiyassa āsanne selapabbataguhāvesena kārāpitam tibhūmakam pāyaso silā-iṭṭhakāyomayam, evam mahantampetam ekasamvacchareneva pariniṭṭhāpitam iddhiyā maññe nimmitam, tañca bahi ṭhatvā apekkhattam sayamjātaselapabbato viya dissati, anto pavisitvā olokayatam pana olokitolokitaṭṭhānato dassanīyam pāsādikam ramaṇīyam atittikarameva hutvā devavimānamiva khāyati. Tassa panāvidūre aḍḍhateyyānam saṅgītikārabhikkhusahassānam nivāsappahonakā cattāro iṭṭhakamayā mahāpāsādā ceva iṭṭhakamayāyeva bhojanamahāsālā ca mahāsīmāpāsādādayo ca muddaṇayantasālā ca tatheva kārāpitā.

Mahātherāpi ca "saṅgītikiccam nāma therādheyyam, therānam ovādeneva kattabbam, na vinā tena, tasmā bhikkhusamghassa ceva upāsakānañca sabbampi sangītipatibaddhamovādam dātum bhavitabbamettha ovādadāyakasamghasabhāyapī"ti Marammaratthadhajūpame aggamahāpanditopādhidhārino ca ratthovādācariyasammate ca ratthavinayadharasammate ca aññe cābhipākatagarubhāvanīyādigunaganasamanginoti parosatam nāyakamahāthere uccinitvā "chatthasangītiovādācariyasamghanāyakasabham" nāmekam padhānamahāsamghasabham patitthāpesum, te ca nāyakamahātherā Sambuddhavacanaratanākarapārage vividhasatthantaragahanāsangacārine therānuthere pañcavīsatimatte samuccinitvā "chatthasangītidhurandharasabhā"ti ca sammannitvā tassā sabhāya bhāram niyyātesum sabbāni sangītipatibaddhakiccāni samvidahitum. Te ca sangītidhurandharasabhikā therā sakalamarammaratthe Nyaung Yan Sayadawti abhipākatam "Aggamahāpandito" pādhinā ceva "Abhidhajamahāratthagurū" pādhinā cāti dvīhi Marammaraṭṭhissarasamappitopādhīhi virājitam jātiyā āsītivassikam upasampadāya saṭṭhivassam "Bhadantarevatam" nāma mahātheravaram sabhāpatim katvā Tepiṭake Buddhavacane ceva nānāsatthesu ca kovide dhammācariyakavipadappatte bhikkhū uccinitvā aṭṭhadasādivaggavasena parosatam Pāṭivisodhakavagge ceva sambahule ca paṭivisodhakavagge bandhāpetvā visodhanappaṭivisodhanehi Buddhavacanam suparisuddhattam paṭipāpetvā dhammasaṅgītimakamsu yathā tam porāṇakasaṅgītikārā.

Evam sangītimāropitassa Tepiṭakassa Buddhavacanassa atthasamvaṇṇanābhūtā Aṭṭhakathāyo ca samvijjanti manoramāya tantinayānucchavikāya bhāsāya Ācariyabuddhaghosādīhi theravarehi katā.

Tāsampi Aṭṭhakathānaṁ sadesīyamūlehi ceva videsīyamūlehi ca saṁsanditvā Tepiṭakassa viya Buddhavacanassa visodhanapaṭivisodhanavasena mahātherā pāvacanadassino saṁvaṇṇanākovidā pāṭhasodhanamakaṁsu.

Iccevamaṭṭhakathāyo ca pamādakhalitādhika paribhaṭṭhapāṭhānaṁ nirākaraṇavasena visodhitā ceva paṭivisodhitā ca hutvā Buddhasāsanamuddaṇayantālaye samappitā suṭṭhu muddāpaṇāya.

Muddāpaṇakāle ca Piṭakattayamuddāpaṇe viya mahātheravarā mūlasodheyyapattapāṭhakehi gahaṭṭhapaṇḍitehi ceva dhammācariyabhikkhupaṇḍitehi ca anekavāraṁ parisodhitaṁ osānasodheyyapattaṁ paṭivisodhitamūlapotthakena ceva aññehi sadesa desantarika Aṭṭhakathāpotthakehi ca vividhabyākaraṇādisatthehi ca punappunaṁ saṁsandetvā suvisada paribyattakaṇḍavāra vākyaccheda saṅketatañca sampāpetvā mahatā parissamena osānasodhanamakaṁsu.

Evametāsampi ca suvisodhitānam Aṭṭhakathānam saṅgītibhāranitthārakā mahātherā nikhilamarammaraṭṭhe Maso Yein Sayadawti abhipākaṭam "Aggamahāpaṇḍito" pādhinā ceva "Abhidhajamahāraṭṭhagurū" pādhinā cāti dvīhi Marammaraṭṭhissarasamappitopādhīhi virājitam jātiyā chasattativassikam upasampadāya chappaññāsavassam "Bhadantasūriyābhivamsam" nāma mahātheravaram sabhāpatim katvā chaṭṭhasaṅgītikārakapariyāpannehi therānutherehi

saṅgamma paṭhanatthāya samārabhimsu yathā taṁ chaṭṭhasaṅgītidhammasaṅgāyanākāle.

Evametāsam Aṭṭhakathānam samsodhana-muddāpaṇa-sampaṭhanesu karīyamānesu raṭṭhissaragaṇe aggamahāmacco **U Nu** nāmadheyyo mahāsayo ceva Buddhasāsanasamitiyam sampati bhaṇḍuppādako raṭṭhissarānam patinidhibhūto **U Basaw** nāmadheyyo sāsanaṭṭhānikamahāmatto cāti-imepi tamkiccasampādanāya Pāḷisaṅgītikāle viya mahussāhena byāvaṭā honti.

Iccevametāpi Aṭṭhakathāyo theravādīnekāyikavibudhappamukhānam satthāgamaratanālayasāragāhīnam veyyākaraṇakesarīnam accantanimmalañāṇavārinā paridhovitā saṅgamma ca paṭhitā, tā vibudhappavarekagocarā vimuttirasassādadāyiniyo Piṭakattayassattham paribyattam pakāsentiyo ciram vilasantiyo lokatthasiddhim sādhayantūti.

Tenetam vuccati—

- Mūlakam pariyattīva, sāsanassa Mahesino.
 Pariyattippamānā hi, ciram saddhammasanthiti.
- Tasmā taṁ rakkhituṁ therā, dhammasaṅgāhakā purā.
 Rājāno upanissāya, akaṁsu dhammasaṅgahe.
- 3. **Paṭhamaṁ** dhammasaṅgītiṁ, **Ajātasattu**rājino. Anuggahena katvāna, pālayuṁ Jinasāsanaṁ.
- Dutiyam tu tathā katvā, Kālāsokassa rājino.
 Kāle tamupanissāya, pālayum Jinasāsanam.
- Tatiyampica katvāna, Dhammāsokassa rājino.
 Anuggahena Buddhassa, sāsanam abhipālayum.
- Catutthim pana Lankāyam, Vaṭṭagāmaṇirājino.
 Kālamhi potthakārulham, katvāna pālayum tathā.
- 7. Imasmim Marammaraṭṭhepi, **Mindon**nāma narādhipam. Rajjam samanusāsantam, ratanattayamāmakam.

viii Nidānakathā

- Sannissāya mahātherā, thirasīlā guṇākarā.
 Pañcamim dhammasangītim, karontā sāsanatthitim.
- Patthayantā likhāpetvā, silāpaṭṭesu peṭakaṁ.
 Vāyāmena mahantena, pālayuṁ Jinasāsanaṁ.
- 10. Ittham purā mahātherā, rājāno cāpi dhammikā. Sāsanam paripālesum, jīvitam viya attano.
- Tathāpi khalitādāni, dissanti Piṭakattaye.
 Paramparāya lekhāya, sañjātā muddanena ca.
- 12. Disvāna te mahātherā, vācentāva Tipeṭakaṁ. Vuccamānanayenevaṁ, cintesuṁ mantayiṁsu ca.
- 13. "Katvāna sādhukam gantha-suddhikam sāsanāyukam. Yamnūna dhammasangītim, kareyyāma mayam" iti.
- Etamattham sunitvāna, U Nu nāma mahāsayo.
 Marammavisaye agga-mahāmaccadhurandharo.
- "Sāsanāyattakiccāni, sampādentā visesato.
 Saṅgītiyañca therānam, sampūrentā manoratham.
- Yathā rakkhimsu porāṇā, surājāno tathā mayam.
 Samrakkheyyāma Sambuddha-sāsanam" iti cintiya.
- 17. Mahāmaccehi aññehi, saṅgamehi ca mantiya. Suppatiṭṭhāpayitvāna, **Buddhasāsana**saṅgamaṁ.
- 18. Mahātherānamādāya, chandaṁ idha nivāsinaṁ. Aññesu Sīhalādīsu, videsesu ca vāsinaṁ.
- 19. Kāretvā dhammasaṅgītim, sodhetvā Satthusāsanam. Saddhammānuggahatthāya, karam daļhaparakkamam.
- 20. **Sirīmaṅgala**vikhyāte, thalasmiṁ pavare subhe. Cetiyassāvidūramhi, **Kaba Aye** itisaññino.
- Guhāvesena kāretvā, mahāsaṅgītimandiraṁ.
 Āvāsādiñca bhikkhūnaṁ, kāresi muddaṇālayaṁ.

Nidānakathā ix

- 22. Ganthasamsodhanam dhamma-sangītiyā tu paṇḍitā. Mahātheravarākamsu, satimantā punappunam.
- 23. Muddāpente ca passitvā, mahātherehi pañcahi. Sodheyyapattamosānam, nimmalattam supāpitam.
- 24. Katvā suvisadam Buddha-bhāsitam Piṭakattayam. Yathā muddāpitam āsi, sāsanattham Mahesino.
- 25. Tathā Aṭṭhakathāyo ca, saṁsodhetvā punappunaṁ. Suṭṭhu muddāpitā honti, sabbalokatthasiddhiyāti.

$S\overline{a}ratthad\overline{\imath}pan\overline{\imath}t\overline{\imath}k\overline{a}$

Paṭhamabhāga

Mātikā		Piṭṭhaṅka		
Ganthārambhakathā		•••	1	
Bāhiranidānak	cathā			
Paṭhamamahāsaṅgītikathāvaṇṇanā			26	
Dutiyasangītikathāvannanā	•••		111	
Tatiyasaṅgītikathāvaṇṇanā	•••		116	
Ācariyaparamparakathāvaṇṇanā	•••		149	
Vinayānisamsakathāvaņņanā			189	
Verañjakaṇḍava	ıṇṇanā			
Paṭhamajjhānakathā			354	
Dutiyajjhānakathā		•••	364	
Tatiyajjhānakathā			369	
Catutthajjhānakathā	•••		376	
Pubbenivāsakathā	•••		380	
Dibbacakkhuñāṇakathā	•••		395	
Āsavakkhayañāṇakathā	•••		407	
Desanānumodanakathā	•••		411	
Pasannākārakathā	•••		413	
Saraṇagamanakathā	•••		415	
Saraṇagamanaphalakathā			419	
Saranagamanasamkilesahhedakathā			421	

Mātikā	Piṭṭha			
Upāsakattapaṭivedanākathā	 •••	422		
Dubbhikkhakathā	 	426		
Mahāmoggallānassa sīhanādakathā	 	435		
Vinayapaññattiyācanakathā	 	438		
Buddhāciṇṇakathā	 •••	452		

Sāratthadīpanīṭīkāya paṭhamabhāge mātikā niṭṭhitā.

Vinayapiṭaka

Sāratthadīpanīţīkā

Namo tassa Bhagavato Arahato Sammāsambuddhassa.

Ganthārambhakathā

Mahākāruṇikam **buddham, dhammañca** vimalam varam. Vande **ariyasaṃghañca,** dakkhiṇeyyam niraṅgaṇam.

Uļārapuñnatejena, katvā sattuvimaddanam. Pattarajjābhisekena, sāsanujjotanatthinā.

Nissāya sīhaļindena, yam **parakkamabāhunā.** Katvā nikāyasāmaggim, sāsanam suvisodhitam.

Kassapaṁ taṁ mahātheraṁ, saṁghassa pariṇāyakaṁ. Dīpasmiṁ tambapaṇṇimhi, sāsanodayakārakaṁ.

Paṭipattiparādhīnam, sadāraññanivāsinam. Pākaṭam gagane canda-maṇḍalam viya sāsane.

Samghassa pitaram vande, vinaye suvisāradam. Yam nissāya vasanto'ham, vuddhippatto'smi sāsane.

Anutheram mahāpuññam¹, **sumedham** sutivissutam². Avikhaṇḍitasīlādi-parisuddhaguṇodayam.

Bahussutam satimantam, dantam santam samāhitam. Namāmi sirasā dhīram, garum me gaṇavācakam. Āgatāgamatakkesu, saddasatthanayaññusu. Yassantevāsibhikkhūsu, sāsanam suppatiṭṭhitam.

Vinayaṭṭhakathāyā'ham, līnasāratthadīpanim. Karissāmi suviññeyyam, paripunnamanākulam.

Porāṇehi kataṁ yaṁ tu, līnatthassa pakāsanaṁ. Na taṁ sabbattha bhikkhūnaṁ, atthaṁ sādheti sabbaso.

Duviññeyyasabhāvāya, sīhaļāya niruttiyā. Gaṇṭhipadesvanekesu, likhitaṁ kiñci katthaci.

Māgadhikāya bhāsāya, ārabhitvāpi kenaci. Bhāsantarehi sammissam, likhitam kiñcideva ca.

Asāraganthabhāropi, tattheva bahu dissati. Ākulañca kataṁ yattha, suviññeyyampi atthato.

Tato aparipuṇṇena, tādisenettha sabbaso. Kathamattham vijānanti, nānādesanivāsino.

Bhāsantaram tato hitvā, sāramādāya sabbaso. Anākulam karissāmi, paripuṇṇavinicchayanti.

Ganthārambhakathāvannanā

Vinayasamvannanārambhe ratanattayam namassitukāmo tassa visiṭṭhagunayogasandassanattham "yo kappakoṭīhipī"ti-ādimāha. Visiṭṭhagunayogena hi vandanārahabhāvo, vandanārahe ca katā vandanā yathādhippetamattham sādheti. Ettha ca samvannanārambhe ratanattayapanāmakaranappayojanam tattha tattha bahudhā papañcenti ācariyā. Tathā hi vannayanti—

"Samvannanārambhe ratanattayavandanā samvannetabbassa dhammassa pabhavanissayavisuddhipaṭivedanattham, tam pana dhammasamvannanāsu viññūnam bahumānuppādanattham, tam sammadeva tesam uggahanadhāranādikkamaladdhabbāya sammāpatipattiyā sabbahitasukhanipphādanattham. Atha vā

maṅgalabhāvato, sabbakiriyāsu pubbakiccabhāvato, paṇḍitehi samācaritabhāvato, āyatiṁ paresaṁ diṭṭhānugati-āpajjanato ca saṁvaṇṇanāyaṁ ratanattayapaṇāmakiriyā"ti.

Mayam pana idhādhippetameva payojanam dassayissāma. Tasmā samvannanārambhe ratanattayapanāmakaranam yathāpaṭiññātasamvannanāya anantarāyena parisamāpanatthanti veditabbam. Idameva hi payojanam ācariyena idhādhippetam. Tathā hi vakkhati—

"Iccevamaccantanamassaneyyam, Namassamāno ratanattayam yam. Puññābhisandam vipulam alattham, Tassānubhāvena hatantarāyo"ti.

Ratanattayapaṇāmakaraṇena cettha yathāpaṭiññātasaṁvaṇṇanāya anantarāyena parisamāpanaṁ ratanattayapūjāya paññāpāṭavabhāvato¹, tāya paññāpāṭavañca rāgādimalavidhamanato². Vuttañhetaṁ—

"Yasmim mahānāma samaye ariyasāvako tathāgatam anussarati, nevassa tasmim samaye rāgapariyuṭṭhitam cittam hoti, na dosapariyuṭṭhitam cittam hoti, na mohapariyuṭṭhitam cittam hoti, ujugatamevassa tasmim samaye cittam hotī"ti-ādi³.

Tasmā ratanattayapūjanena vikkhālitamalāya paññāya pāṭavasiddhi.

Atha vā ratanattayapūjanassa paññāpadaṭṭhānasamādhihetuttā paññāpāṭavaṁ. Vuttañhi tassa samādhihetuttaṁ—

"Evam ujugatacitto kho mahānāma ariyasāvako labhati atthavedam, labhati dhammavedam, labhati dhammūpasamhitam pāmojjam, pamuditassa pīti jāyati, pītimanassa kāyo passambhati, passaddhakāyo sukham vediyati, sukhino cittam samādhiyatī"ti³.

Samādhissa ca paññāya padaṭṭhānabhāvo vuttoyeva "samāhito yathābhūtam pajānātī"ti⁴. Tato evam⁵ paṭubhūtāya paññāya

^{1.} Paññāpātavato (Sī, Syā) 2. Rāgādimalavigamanato (Sī, Syā) 3. Am 3. 531 pitthe.

^{4.} Sam 2. 302; Khu 11. 38 pitthesu.

^{5.} Tato eva (Ka)

paṭiññāmahattakataṁ¹ khedamabhibhuyya anantarāyena saṁvaṇṇanaṁ samāpayissati. Tena vuttaṁ "anantarāyena parisamāpanatthan"ti.

Atha vā ratanattayapūjāya āyuvaṇṇasukhabalavaḍḍhanato anantarāyena parisamāpanaṁ veditabbaṁ. Ratanattayapaṇāmena hi āyuvaṇṇasukhabalāni vaddhanti. Vuttañhetaṁ—

"Abhivādanasīlissa, niccam vuḍḍhāpacāyino. Cattāro dhammā vaddhanti, āyu vanno sukham balan"ti².

Tato āyuvaṇṇasukhabalavuḍḍhiyā hoteva kāriyaniṭṭhānamiti vuttaṁ "anantarāyena parisamāpanatthan"ti.

Atha vā ratanattayagāravassa paṭibhānāparihānāvahattā. Aparihānāvahañhi tīsupi ratanesu gāravam. Vuttañhetam—

"Sattime bhikkhave aparihāniyā dhammā. Katame satta? Satthugāravatā dhammagāravatā samghagāravatā sikkhāgāravatā samādhigāravatā kalyāṇamittatā sovacassatā"ti³.

Hoteva ca tato paṭibhānāparihānena yathāpaṭiññātaparisamāpanam.

Atha vā pasādavatthūsu pūjāya puññātisayabhāvato. Vuttañhi tassa puññātisayattaṁ—

"Pūjārahe pūjayato, buddhe yadi va sāvake.

Papañcasamatikkante, tinnasokapariddave.

Te tādise pūjayato, nibbute akutobhaye.

Na sakkā puñnam sankhātum, imettamapi kenacī"ti4.

Puññātisayo ca yathādhippetaparisamāpanupāyo. Yathāha—

"Esa devamanussānam, sabbakāmadado nidhi.

Yam yadevābhipatthenti, sabbametena labbhatī"ti⁵.

Upāyesu ca paṭipannassa hoteva kāriyaniṭṭhānaṁ. Ratanattayapūjā hi niratisayapuññakkhettasaṁbuddhiyā aparimeyyappabhavo puññātisayoti

^{1.} Mahattagatam (Syā)

^{2.} Khu 1. 29 pitthe.

^{3.} Am 2. 420 pitthe.

^{4.} Khu 1. 42; Khu 3. 147 pitthesu.

^{5.} Khu 1. 10 pitthe.

bahuvidhantarāyepi lokasannivāse antarāyanibandhanasakalasamkilesaviddhamsanāya pahoti, bhayādiupaddavañca nivāreti. Tasmā suvuttam "samvaṇṇanārambhe ratanattayapaṇāmakaraṇam yathāpaṭiññātasamvaṇṇanāya anantarāyena parisamāpanatthanti veditabban"ti.

Evam pana sappayojanam ratanattayavandanam kattu kāmo pathamam tāva bhagavato vandanam kātum tammūlakattā sesaratanānam "yo kappa -pa- mahākārunikassa tassā"ti āha. Ettha pana yassā desanāya samvannanam kattukāmo, sā yasmā karunāppadhanā, na suttantadesanā viya karunāpaññāppadhānā, nāpi abhidhammadesanā viya paññāppadhānā, tasmā karunāppadhānameva bhagavato thomanam āraddham. Esā hi ācariyassa pakati, yadidam ārambhānurūpathomanā. Teneva suttantadesanāya samvannanārambhe "karunāsītalahadayam, paññāpajjotavihatamohataman"ti karunāpaññāppadhānam, abhidhammadesanāya samvannanārambhe "karunā viya sattesu, paññā yassa mahesino"ti paññāppadhānañca thomanam āraddham. Karunāpaññāppadhānā hi suttantadesanā tesam tesam sattānam āsayānusayādhimutticariyādibhedaparicchindanasamatthāya paññāya sattesu ca mahākarunāya tattha sātisayappavattito. Suttantadesanāya hi mahākarunāsamāpattibahulo veneyyasantānesu tadajjhāsayānulomena gambhīramatthapadam patitthāpesi. Abhidhammadesanā ca kevalam paññāppadhānā paramatthadhammānam yathāsabhāvapativedhasamatthāya paññaya tattha satisayappavattito.

Vinayadesanā pana āsayādinirapekkham kevalam karuņāya pākatikasattenapi asotabbāraham suņanto apucchitabbāraham pucchanto avattabbārahañca vadanto bhagavā sikkhāpadam paññapesīti karuņāppadhānā. Tathā hi ukkamsapariyantagatahirottappopi bhagavā lokiyasādhujanehipi pariharitabbāni "sikharaņīsī"ti-ādīni vacanāni yathāparādhañca garahavacanāni vinayapiṭakadesanāya mahākaruṇāsañcoditamānaso mahāparisamajjhe abhāsi, tamtamsikkhāpadapaññattikāraṇāpekkhāya verañjādīsu sārīrikañca khedamanubhosi. Tasmā kiñcāpi bhūmantarapaccayākārasamayantarakathānam viya vinayapaññattiyāpi samuṭṭhāpikā paññā anaññasādhāraṇatāya atisayakiccavatī, karuṇāya kiccam pana tatopi

adhikanti karuṇāppadhānā vinayadesanā. Karuṇābyāpārādhikatāya hi desanāya karuṇāppadhānatā. Tasmā ārambhānurūpaṁ karuṇāppadhānameva ettha thomanaṁ katanti veditabbaṁ.

Karuṇāggahaṇena ca aparimeyyappabhāvā sabbepi buddhaguṇā saṅgahitāti daṭṭhabbā taṁmūlakattā sesabuddhaguṇānaṁ. Mahākaruṇāya vā chasu asādhāraṇañāṇesu aññatarattā taṁsahacaritasesāsādhāraṇañāṇānampi gahaṇasabbhāvato sabbepi buddhaguṇā nayato dassitāva honti. Esoyeva hi niravasesato buddhaguṇānaṁ dassanupāyo yadidaṁ nayaggāho. Aññathā ko nāma samattho bhagavato guṇe anupadaṁ niravasesato dassetuṁ.

Tenevāha—

"Buddhopi buddhassa bhaṇeyya vaṇṇaṁ, Kappampi ce aññamabhāsamāno. Khīyetha kappo ciradīghamantare, Vaṇṇo na khīyetha tathāgatassā"ti¹.

Teneva ca āyasmatā sāriputtattherenapi buddhaguņaparicchedanam patianuyuttena "no hetam bhante"ti paṭikkhipitvā "apica me bhante dhammanvayo vidito"ti² vuttam. Tasmā "yo kappakoṭīhipī"ti-ādinā karuṇāmukhena saṅkhepato sakalasabbaññuguṇehi bhagavantam abhitthavīti daṭṭhabbam. Ayamettha samudāyattho.

Ayam pana avayavattho—yoti aniyamavacanam. Tassa "nātho"ti iminā sambandho. "Kappakoṭīhipī"ti-ādinā pana yāya karuṇāya so "mahākāruṇiko"ti vuccati, tassā vasena kappakoṭigaṇanāyapi appameyyam kālam lokahitatthāya atidukkaram karontassa bhagavato dukkhānubhavanam dasseti. Karuṇāya baleneva hi so bhagavā hatthagatampi nibbānam pahāya samsārapanke nimuggam sattanikāyam tato samuddharaṇattham cintetumpi asakkuṇeyyam nayanajīvitaputtabhariyadānādikam atidukkaramakāsi. Kappakoṭīhipi appameyyam kālanti kappakoṭigaṇanāyapi 'ettakā kappakotiyo'ti pametum asakkuneyyam kālam, kappakotigananavasenapi

paricchinditumasakkuneyyattā aparicchinnāni

kappasatasahassādhikāni cattāri asaṅkhyeyyānīti vuttaṁ hoti.
Kappakoṭivaseneva hi so kālo appameyyo, asaṅkhyeyyavasena pana paricchinnoyeva. "Kappakoṭīhipī"ti apisaddo kappakoṭivasenapi tāva pametuṁ na sakkā, pageva vassagaṇanāyāti dasseti. "Appameyyaṁ kālan"ti accantasaṁyoge upayogavacanaṁ "māsamadhīte, divasaṁ caratī"ti-ādīsu viya. Karonto atidukkarānīti pañcamahāpariccāgādīni atidukkarāni karonto. Evamatidukkarāni karonto kiṁ vindīti ce? Khedaṁ gato, kāyikaṁ khedamupagato, parissamaṁ pattoti attho, dukkhamanubhavīti vuttaṁ hoti. Dukkhañhi khijjati sahitumasakkuṇeyyanti "khedo"ti vuccati. Lokahitāyāti "anamatagge saṁsāre vaṭṭadukkhena accantapīḷitaṁ sattalokaṁ tamhā dukkhato mocetvā nibbānasukhabhāgiyaṁ karissāmī"ti evaṁ sattalokassa hitakaraṇatthāyāti attho. Assa ca "atidukkarāni karonto"ti iminā sambandho. Lokahitāya khedaṁ gatoti yojanāyapi natthi doso. Mahāgaṇṭhipadepi hi "atidukkarāni karonto khedaṁ gato, kimatthanti ce? Lokahitāyā"ti vuttaṁ.

Yam pana evam yojanam asambhāventena **kenaci** vuttam "na hi bhagavā lokahitāya samsāradukkhamanubhavati. Na hi kassaci dukkhānubhavanam lokassa upakāram āvahatī"ti, tam tassa matimattam. Evam yojanāyapi atidukkarāni karontassa bhagavato dukkhānubhavanam lokahitakaranatthāyāti ayamattho viñnāyati, na tu dukkhānubhavaneneva lokahitasiddhīti. Paṭhamam vuttayojanāyapi hi na dukkarakaranamattena lokahitasiddhi. Na hi dukkaram karonto kanci sattam maggaphalādīsu patiṭṭhāpeti, atha kho tādisam atidukkaram katvā sabbannubhāvam sacchikatvā niyyānikadhammadesanāya maggaphalādīsu satte patiṭṭhāpento lokassa hitam sādheti.

Kāmañcettha sattasaṅkhārabhājanavasena tividho loko, hitakaraṇassa pana adhippetattā taṁvisayasseva sattalokassa vasena attho gahetabbo. So hi lokīyanti ettha puññapāpāni taṁvipāko cāti "loko"ti vuccati. Katthaci pana "sanarāmaralokagarun"ti-ādīsu samūhatthopi lokasaddo samudāyavasena lokīyati paññāpīyatīti.

Yam panettha **kenaci** vuttam "iminā sattalokañca jātilokañca sanganhāti, tasmā tassa sattalokassa idhalokaparalokahitam, atikkantaparalokānam vā ucchinnalokasamudayānam idha jātiloke okāsaloke vā diṭṭhadhammasukhavihārasankhātañca hitam sampinḍetvā lokassa, lokānam, loke vā hitanti sarūpekasesam katvā lokahitamiccevāhā"ti, na tam sārato paccetabbam diṭṭhadhammasukhavihārasankhātahitassapi sattalokavisayattā, sattalokaggahaneneva ucchinnamūlānam khīnāsavānampi sangahitattā.

Sabbattha "kenacī"ti vutte "vajirabuddhiṭīkākārenā"ti gahetabbam. "Mahāgaṇṭhipade"ti vā "majjhimagaṇṭhipade"ti vā "cūḷagaṇṭhipade"ti vā vutte "sīhaḷagaṇṭhipadesū"ti gahetabbam. Kevalam "gaṇṭhipade"ti vutte "māgadhabhāsāya likhite gaṇṭhipade"ti gahetabbam.

Nāthoti lokapaṭisaraṇo, lokasāmī lokanāyakoti vuttaṁ hoti. Tathā hi sabbānatthaparihārapubbaṅgamāya niravasesahitasukhavidhānatapparāya niratisayāya payogasampattiyā sadevamanussāya pajāya accantupakāritāya aparimitanirupamappabhāvaguṇavisesasamaṅgitāya ca sabbasattuttamo bhagavā aparimāṇāsu lokadhātūsu aparimāṇānaṁ sattānaṁ ekapaṭisaraṇo patiṭṭhā. Atha vā nāthatīti nātho, veneyyānaṁ hitasukhaṁ mettāyanavasena āsīsati patthetīti attho. Atha vā nāthati veneyyagate kilese upatāpetīti attho, nāthatīti vā yācatīti attho. Bhagavā hi "sādhubhikkhave bhikkhu kālena kālaṁ attasampattiṁ paccavekkheyyā"ti-ādinā¹ sattānaṁ taṁ taṁ hitapaṭipattiṁ yācitvāpi karuṇāya samussāhito te tattha niyojeti. Paramena vā cittissariyena samannāgato sabbasatte īsati abhibhavatīti paramissaro bhagavā "nātho"ti vuccati. Sabbopi cāyamattho saddasatthānusārato veditabbo.

Mahākāruņikassāti yo karuņāya kampitahadayattā lokahitattham atidukkarakiriyāya anekappakāram tādisam samsāradukkhamanubhavitvā āgato, tassa mahākāruņikassāti attho. Tattha

kiratīti karunā, paradukkham vikkhipati apanetīti attho. Dukkhitesu vā kirīyati pasārīyatīti karunā. Atha vā kinātīti karunā, paradukkhe sati kārunikam himsati vibādheti, vināseti vā parassa dukkhanti attho. Paradukkhe sati sādhūnam kampanam hadayakhedam karotīti vā karunā. Atha vā kamiti sukham, tam rundhatīti karuņā. Esā hi paradukkhāpanayanakāmatālakkhanā attasukhanirapekkhatāya kārunikānam sukham rundhati vibādhetīti. Karunāya niyuttoti kāruniko yathā "dovāriko"ti. Yathā hi dvāratthānato aññattha vattamānopi dvārapatibaddhajīviko puriso dvārānativattavuttitāya dvāre niyuttoti "dovāriko"ti vuccati, evam bhagavā mettādivasena karunāvihārato aññattha vattamānopi karunānativattavuttitāya karunāya niyuttoti "kāruniko"ti vuccati. Mahābhinīhārato patthāya hi yāva mahāparinibbānā lokahitatthameva lokanāthā titthanti. Mahanto kārunikoti mahākāruniko. Satipi bhagavato tadaññaguṇānampi vasena mahantabhāve kārunikasaddasannidhānena vuttattā karunāvasenettha mahantabhāvo veditabbo yathā "mahāveyyākaraņo"ti. Evañca katvā "mahākārunikassā"ti iminā padena puggalādhitthānena satthu mahākarunā vuttā hoti.

Atha vā karuṇā karuṇāyanaṁ sīlaṁ pakati etassāti kāruṇiko, pathavīphassādayo viya kakkhaļaphusanādisabhāvā karuṇāyanasabhāvo sabhāvabhūtakaruṇoti attho. Sesaṁ purimasadisameva. Atha vā mahāvisayatāya mahānubhāvatāya mahābalatāya ca mahatī karuṇāti mahākaruṇā. Bhagavato hi karuṇā niravasesesu sattesu pavattati, pavattamānā ca anaññasādhāraṇā pavattati, diṭṭhadhammikādibhedañca mahantameva sattānaṁ hitasukhaṁ ekantato nipphādeti, mahākaruṇāya niyuttoti mahākāruṇikoti sabbaṁ vuttanayeneva veditabbaṁ. Atha vā mahatī pasatthā karuṇā assa atthīti mahākāruṇiko. Pūjāvacano hettha mahantasaddo "mahāpuriso"ti-ādīsu viya. Pasatthā ca bhagavato karuṇā mahākaruṇāsamāpattivasenapi pavattito anaññasādhāranattāti

Evam karunāmukhena sankhepato sakalasabbaññugunehi bhagavantam thometvā idāni saddhammam thometum "asambudhan" ti-ādimāha. Tattha asambudhanti pubbakālakiriyāniddeso, tassa asambujihanto appativijihantoti attho, yathāsabhāvam appativijihanatoti vuttam hoti. Hetu-attho hettha antasaddo "pathanto nisīdatī" ti-ādīsu viya. **Yan**ti pubbakālakiriyāya aniyamato kammaniddeso. Buddhanisevitanti tassa visesanam. Tattha buddhasaddassa tāva "bujjhitā saccānīti buddho, bodhetā pajāyāti buddho"tiādinā niddesanayena¹ attho veditabbo. Atha vā savāsanāya aññānaniddāya accantavigamato, buddhiyā vā vikasitabhāvato buddhavāti buddho jāgaranavikasanatthavasena. Atha vā kassacipi ñeyyadhammassa anavabuddhassa abhāvena ñeyyavisesassa kammabhāvena aggahanato kammavacanicchāya abhāvena avagamanatthavaseneva kattuniddeso labbhatīti buddhavāti buddho. Atthato pana pāramitāparibhāvito sayambhūñānena saha vāsanāya vihataviddhamsitaniravasesakileso mahākarunāsabbaññutaññānādi-aparimeyyagunaganādhāro khandhasantāno buddho. Yathāha "buddhoti yo so bhagavā sayambhū anācariyako pubbe ananussutesu dhammesu sāmam saccāni abhisambujihi, tattha ca sabbaññutam patto balesu ca vasībhāvan"ti². Tena evam nirupamappabhāvena buddhena nisevitam gocarāsevanābhāvanāsevanāhi yathāraham nisevitam anubhūtanti attho.

Tattha nibbānam gocarāsevanāvaseneva nisevitam, maggo pana attanā bhāvito ca bhāvanāsevanāvasena sevito, parehi uppāditāni pana maggaphalāni cetopariyañāṇādinā yadā parijānāti, attanā uppāditāni vā paccavekkhaṇañāṇena paricchindati, tadā gocarāsevanāvasenapi sevitāni hontiyeva. Ettha ca pariyattidhammassapi pariyāyato dhammaggahaṇena gahaṇe sati sopi desanāsammasanañāṇagocaratāya gocarāsevanāya sevitoti sakkā gahetum. "Abhidhammanayasamuddam adhigacchati, tīṇi piṭakāni sammasī"ti ca aṭṭhakathāyam vuttattā pariyattidhammassapi sacchikiriyāya sammasanapariyāyo labbhatīti yam asambudham asambujjhanto asacchikarontoti atthasambhavato sopi idha vutto evāti daṭṭhabbam.

Tampi ca appaṭivijjhanto bhavābhavam gacchati, pariññātadhammavinayo pana tadatthapaṭipattiyā sammāpaṭipanno na cirasseva dukkhassantam karissati. Vuttañhetam—

"Yo imasmim dhammavinaye, appamatto vihassati. Pahāya jātisamsāram, dukkhassantam karissatī"ti¹.

Ettha ca kiñcāpi maggaphalanibbānāni paccekabuddhabuddhasāvakehipi gocarāsevanādinā sevitāni honti, tathāpi ukkaṭṭhaparicchedavasena "buddhanisevitan"ti vuttam. **Kenaci** pana buddhasaddassa sāmaññato buddhānubuddhapaccekabuddhānampi ettheva saṅgaho vutto.

Bhavābhavanti aparakālakiriyāya kammaniddeso, bhavato bhavanti attho. Atha vā bhavābhavanti sugatiduggativasena hīnapaṇītavasena ca khuddakaṁ mahantañca bhavanti attho. Vuddhatthopi hi a-kāro dissati "asekkhā dhammā"ti-ādīsu viya. Tasmā abhavoti mahābhavo vuccati. Atha vā bhavoti vuddhi, abhavoti hāni. Bhavoti vā sassatadiṭṭhi, abhavoti ucchedadiṭṭhi. Vuttappakāro bhavo ca abhavo ca bhavābhavo. Taṁ bhavābhavaṁ. Gacchatīti aparakālakiriyāniddeso. Jīvalokoti sattaloko. Jīvaggahaṇena hi saṅkhārabhājanalokaṁ nivatteti tassa bhavābhavagamanāsambhavato. Namo atthūti pāṭhaseso daṭṭhabbo.

Avijjādikilesajālaviddhamsinoti dhammavisesanam. Tattha avindiyam vindatīti avijjā. Pūretum ayuttaṭṭhena kāyaduccaritādi avindiyam nāma, aladdhabbanti attho. Tabbiparītato kāyasucaritādi vindiyam nāma, tam vindiyam na vindatīti vā avijjā, khandhānam rāsaṭṭham, āyatanānam āyatanaṭṭham, dhātūnam suññataṭṭham, indriyānam adhipatiyaṭṭham, saccānam tathaṭṭham aviditam karotīti vā avijjā, dukkādīnam pīļanādivasena vuttam catubbidham attham aviditam karotītipi avijjā, antavirahite samsāre sabbayonigatibhavaviññāṇaṭṭhitisattāvāsesu satte javāpetīti vā avijjā, paramatthato avijjamānesupi itthipurisādīsu javati, vijjamānesupi khandhādīsu na javatīti vā avijjā. Sā ādi yesam taṇhādīnam te avijjādayo,

bheyeva kilissanti etehi sattāti **kilesā**, teyeva ca sattānam bandhanaṭṭhena jālasadisāti **jālam**, tam viddhamseti sabbaso vināseti sīlenāti avijjādikilesajālaviddhamsī. Nanu cettha sapariyattiko navalokuttaradhammo adhippeto, tattha ca maggoyeva kilese viddhamseti, netareti ce? Vuccate. Maggassapi nibbānamāgamma kilesaviddhamsanato nibbānampi kilese viddhamseti nāma, maggassa kilesaviddhamsanakiccam phalena nipphannanti phalampi "kilesaviddhamsī"ti vuccati. Pariyattidhammopi kilesaviddhamsanassa paccayattā "kilesaviddhamsī"ti vattumarahatīti na koci doso.

Dhammavarassa tassāti pubbe aniyamitassa niyamavacanam. Tattha yathānusiṭṭham paṭipajjamāne catūsu apāyesu apatamāne dhāretīti **dhammo**.

"Ye keci dhammam saranam gatase, na te gamissanti apayabhumim. Pahaya manusam deham, devakayam paripuressanti"ti 1—

hi vuttam. Samsāradukkhe vā apatamāne katvā dhāretīti dhammo maggaphaluppattiyā sattakkhattuparamatādivasena samsārassa paricchinnattā. Apāyādinibbattakakilesaviddhamsanancettha dhāranam. Evañca katvā ariyamaggo tassa tadatthasiddhihetutāya nibbānañcāti ubhayameva nippariyayato dhareti, ariyaphalam pana tamsamucchinnakilesapatippassambhanena tadanugunatāya, pariyattidhammo tadadhigamahetutāyāti ubhayam pariyāyato dhāretīti veditabbam. Vuttappakāro dhammoyeva attano uttaritarābhāvena varo pavaro anuttaroti dhammavaro, tassa dhammavarassa namo atthūti sambandho. Ettävatä cettha amhehi särattho pakäsito. Yam panettha kenaci papañcitam, amhehi ca idha na dassitam, na tam sarato paccetabbam. Ito paresupi evameva datthabbam. Tasmā ito patthāya ettakampi avatvā sāratthameva dassayissāma. Yattha pana kenaci accantaviruddham likhitam, tampi katthaci dassayissāma. Ettha ca "avijjādikilesajālaviddhamsino"ti etena svākkhātatādīhi dhammam thometi, "dhammavarassā"ti etena aññassa visiṭṭhassa abhāvadīpanato paripuṇṇatāya. Paṭhamena vā pahānasampadam dhammassa dasseti, dutiyena pabhāvasampadam.

Evam sankhepeneva sabbadhammagunehi saddhammam thometvā idāni ariyasamgham thometum "gunehī"ti-ādimāha. "Gunehī"ti padassa "yutto"ti iminā sambandho. Idāni yehi gunehi yutto, te dassento "sīlasamādhī"tiādimāha. Tattha catupārisuddhisīlādi "sīlan"ti vuccati. Samādhīti pathamajihānādi. Samādhisīsena hi pathamajihānādayo vuttā. **Paññā**ti maggapaññā. Vimutti ca vimuttiñānañca vimuttivimuttiñānanti vattabbe ekadesasarūpekasesanayena "vimuttiñānan"ti vuttam. Ādi-saddapariyāyena pabhutisaddena vā vimuttiggahanam veditabbam. Tattha **vimuttī**ti phalam. Vimuttiñānanti paccavekkhanañānam. Pabhuti-saddena chalabhiññacatupatisambhidadayo guna sangahitati datthabbam. Ettha ca sīlādayo gunā lokiyā lokuttarā ca yathāsambhavam nidditthāti veditabbā. Yam panettha **kenaci** vuttam "sīlādayo kiñcāpi lokiyalokuttarā yathāsambhavam labbhanti, tathāpi ante 'ariyasamghan'ti vacanato sīlādayo cattāro dhammakkhandhā lokuttarāvā"ti, tam tassa matimattam. Na hi ariyasamghassa lokiyagunehipi thomanāya koci doso dissati, sabbaññubuddhassapi tāva lokiyalokuttaragunehi thomanā hoti, kimaṅgam pana ariyasamghassāti.

Kusalatthikānam janānam puññassa vuddhiyā khettasadisattā khettanti āha "khettam janānam kusalatthikānan"ti. Khittam bījam mahapphalabhāvakaraṇena tāyatīti hi khettam, pubbaṇṇāparaṇṇa-viruhanabhūmi, tamsadisattā ariyasamghopi "khettan"ti vuccati. Iminā ariyasamghassa anuttarapuññakkhettabhāvam dīpeti. "Anuttaram puññakkhettam lokassā"ti hi vuttam. Tanti pubbe "yo"ti aniyamena vuttassa niyamavacanam. Ariyasamghanti ettha ārakattā kilesehi, anaye na iriyanato, aye ca iriyanato ariyā niruttinayena. Atha vā sadevakena lokena saraṇanti araṇīyato upagantabbato upagatānañca tadatthasiddhito ariyā. Ariyānam samgho samūhoti ariyasamgho. Atha vā ariyo ca so yathāvuttanayena samgho ca diṭṭhisīlasāmañnena samhatabhāvatoti ariyasamgho, aṭṭha ariyapuggalā. Tam ariyasamgham. Bhagavato aparabhāge buddhadhammaratanānampi samadhigamo samgharatanādhīnoti ariyasamghassa bahūpakāratam dassetum idheva "sīrasā namāmī"ti vuttanti datthabbam.

Evam gāthāttayena sankhepato sakalaguņasamkittanamukhena ratanattayassa paṇāmam katvā idāni tam nipaccakāram yathādhippete payojane pariṇāmento āha "iccevam"iccādi. Iccevam yathāvuttanayena accantam ekantena namassaneyyam namassitabbam ratanattayam namassamāno kāyavācācitteti vandamāno aham vipulam yam puññābhisandam alatthanti sambandho. Tattha buddhādayo ratijananaṭṭhena ratanam. Tesañhi "itipi so bhagavā"ti-ādinā yathābhūtaguṇe āvajjentassa amatādhigamahetubhūtam anappakam pītipāmojjam uppajjati. Yathāha—

"Yasmim mahānāma samaye ariyasāvako tathāgatam anussarati, nevassa tasmim samaye rāgapariyuṭṭhitam cittam hoti, na dosapariyuṭṭhitam cittam hoti, na mohapariyuṭṭhitam cittam hoti, ujugatamevassa tasmim samaye cittam hoti, ujugatacitto kho pana mahānāma ariyasāvako labhati atthavedam, labhati dhammavedam, labhati dhammūpasamhitam pāmojjam, pamuditassa pīti jāyatī"ti-ādi¹.

Cittīkabhādibhāvo vā ratanaṭṭho. Vuttañhetaṁ—

"Cittīkatam mahagghañca, atulam dullabhadassanam. Anomasattaparibhogam, ratanam tena vuccatī"ti².

Cittīkatabhāvādayo ca anaññasādhāraṇā buddhādīsuyeva labbhantīti.

"Puññabhisandanti puññarāsim puññappavattam vā"ti mahāgaṇṭhipade vuttam. Majjhimagaṇṭhipade pana cūḷagaṇṭhipade ca "puññabhisandanti puññabhinisamsan"tipi attho vutto. Puññābhisandanti puññanadim, puññappavāhanti evam panettha attho veditabbo. Avicchedena pavattiyamānañhi puññam abhisandanaṭṭhena "puññābhisando"ti vuccati. Teneva sāratthapakāsiniyā saṃyuttanikāyaṭṭhakathāya³—

"Cattārome bhikkhave puññābhisandā kusalābhisandā sukhassāhārā. Katame cattāro? Idha bhikkhave ariyasāvako buddhe aveccappasādena samannāgato hoti

'itipi so bhagavā -pa- Buddho bhagavā'ti, ayam paṭhamo puññābhisando kusalābhisando sukhassāhāro''ti¹—

evamādikāya pāļiyā attham dassento "puññābhisandā kusalābhisandāti puññanadiyo kusalanadiyo"ti vuttam. Yam pana gaṇṭhipade vuttam "puññābhisandanti puññaphalan"ti, tam na sundaram. Na hi ratanattayam namassamāno tasmim khaṇe puññaphalam alattha, kintu anappakam puññarāsim tadā alabhi, tassa ca phalam paralokabhāgī², diṭṭhadhamme tu antarāyavighāto tassa ca puññassa ānisamsamattakam, "tassānubhāvena hatantarāyo"ti ca vuttam, na ca puññaphale anuppanne tassānubhāvena hatantarāyabhāvo na sijjhati, na cetam tasmimyeva khaṇe diṭṭhadhammavedanīyam ahosi. Tasmā tassa mahato puññappavāhassa ānubhāvena hatantarāyoti ayameva attho yujjati. Athāpi paṇāmakiriyāya janitattā puññameva puññaphalanti tassādhippāyo siyā, evam sati yujjeyya. So ca puññappavāho na appamattako, atha kho mahantoyevāti dassento āha "vipulan"ti, mahantam anappakanti vuttam hoti. Alatthanti alabhim, pāpuṇinti attho.

Tassānubhāvenāti tassa yathāvuttassa puññappavāhassa ānubhāvena balena. Hatantarāyoti taṁtaṁsampattiyā vibandhanavasena sattasantānassa antare vemajjhe eti āgacchatīti antarāyo, diṭṭhadhammikādi-anattho. Paṇāmapayojane vuttavidhinā hato viddhasto antarāyo upaddavo assāti hatantarāyo. Assa "vaṇṇayissaṁ vinayan"ti iminā sambandho, hatantarāyo hutvā vinayaṁ vaṇṇayissanti vuttaṁ hoti. Etena tassa puññappavāhassa attano pasādasampattiyā ratanattayassa ca khettatāvasampattiyā atthasaṁvannanāya upaghātaka-upaddavānaṁ hanane samatthataṁ dīpeti.

Evam ratanattayassa nipaccakārakaraņe payojanam dassetvā idāni yassa vinayapiṭakassa attham samvannetukāmo, tassa tāva bhagavato sāsanassa mūlapatiṭṭhānabhāvam dassetvā tampi thomento āha "yasmim ṭhite"ti-ādi. Aṭṭhitassa susaṇṭhitassa bhagavato sāsanam

yasmim thite patitthitam hotīti yojetabbam. Tattha yasmim vinayapiṭake. Thiteti pālito ca atthato ca anūnam hutvā lajjīpuggalesu pavattanaṭṭhena ṭhiteti attho. Sāsananti adhisīla-adhicitta-adhipaññāsankhātasikkhattayasangahitam sāsanam. Aṭṭhitassāti kāmasukhallikattakilamathānuyogasankhāte antadvaye aṭṭhitassāti attho. "Appatiṭṭham khvāham āvuso anāyūham oghamatarin"ti¹ hi vuttam. Ayañcattho tīsupi sīhalagaṇṭhipadesu vuttoyeva. Gaṇṭhipade pana "atthitassāti parinibbutassapi bhagavato"ti vuttam.

Patitthitam hotīti tesuyeva lajjīpuggalesu pavattanatthena patitthitam hoti. Susanthitassati etthatava tīsupi ganthipadesu idam vuttam "dvattimsamahāpurisalakkhana-asīti-anubyañjanehi samannāgamanavasena susanthānassāti attho. Anena assa rūpakāyasampattim nidassetī"ti. Ganthipade pana "yathāthāne patitthitehi lakkhanehi samannāgatattā rūpakāyena susanthito, kāyavankādirahitattā tādilakkhanasamannāgatattā ca nāmakāyenapī"ti vuttam. **Kenaci** pana "catubrahmavihāravasena sattesu sutthu sammā ca thitassāti atthavasena vā susanthitassa. Susanthitattā hesa kevalam sattānam dukkham apanetukāmo hitam upasamharitukāmo sampattiyā ca pamudito apakkhapatito ca hutvā vinayam deseti. Tasmā imasmim vinayasamvannanādhikāre sāruppāya thutiyā thomento āha 'susanthitassā'ti" vatvā "ganthipadesu vuttattho adhippetādhikārānurūpo na hotī"ti vuttam. Ayam panettha amhākam khanti—yathāvuttakāmasukhallikādi-antadvaye atthitattāyeva majjhimāya patipadāya sammā thitattā susanthitassāti evamattho gahetabboti. Evañhi sati ārambhānurūpathomanā katā hoti yathāvutta-antadvayam vivajietvā majjhimāya patipadāya vinayapaññattiyāyeva yebhuyyena pakāsanato.

Tanti pubbe "yasmin"ti aniyametvā vuttassa niyamavacanam, tassa "vinayan"ti iminā sambandho. Asammissanti bhāvanapumsakaniddeso, nikāyantaraladdhīhi asammissam katvā anākulam katvā vaṇṇayissanti vuttam hoti. Sikkhāpadapaññattiyā anurūpassa kālamattassapi dhammasenāpatisāriputtattherasadisenapi duviñneyyabhāvato kevalam buddhavisayam vinayapiṭakam

attano balena vaṇṇayissāmīti vacanamattampi aññehi vattumasakkuṇeyyattā "nissāya pubbācariyānubhāvan"ti āha. Pubbācariyānubhāvo nāma atthato pubbācariyehi saṁvaṇṇitā aṭṭhakathā, tatoyeva ca "pubbācariyānubhāvo aṭṭhakathā"ti sabbattha gaṇṭhipadesu vuttaṁ. Tasmā pubbācariyehi saṁvaṇṇitaṁ aṭṭhakathaṁ nissāya vaṇṇayissaṁ, na attanoyeva balaṁ nissāyāti vuttaṁ hoti.

Atha "porānatthakathāsu vijjamānāsu puna vinayasamvannanāya kim

payojanan"ti yo vadeyya, tassa porāṇaṭṭhakathāya anūnabhāvaṁ attano ca saṁvaṇṇanāya payojanaṁ dassento "kāmañcā"ti-ādimāha. Kāmanti ekantena, yathicchakaṁ vā, sabbasoti vuttaṁ hoti, tassa "saṁvaṇṇito"ti iminā sambandho. Kāmaṁ saṁvaṇṇitoyeva, no na saṁvaṇṇitoti attho. Kehi pana so vinayo saṁvaṇṇitoti āha "pubbācariyāsabhehī"ti.

Mahākassapattherādayo pubbācariyā eva akampiyaṭṭhena uttamaṭṭhena ca āsabhā, tehi pubbācariyāsabhehīti vuttaṁ hoti. Kīdisā panete pubbācariyāti āha "ñāṇambū"ti-ādi. Aggamaggañāṇasaṅkhātena ambunā salilena niddhotāni nissesato āyatiṁ anuppattidhammatāpādanena dhotāni vikkhālitāni visodhitāni rāgādīni tīṇi malāni kāmāsavādayo ca cattāro āsavā yehi te ñāṇambuniddhotamalāsavā, tehīti attho. Iminā ca na kevalaṁ etesu ācariyabhāvoyeva, atha kho rāgādimalarahitā khīṇāsavā visuddhasattā eteti dasseti.

Khīṇāsavabhāvepi na ete sukkhavipassakā, atha kho evarūpehipi ānubhāvehi samannāgatāti dassento āha "visuddhavijjāpaṭisambhidehī"ti. Visuddhā accantaparisuddhā vijjā catasso ca paṭisambhidā yesaṁ te visuddhavijjāpaṭisambhidā, tehi. Ekadesena paṭisambhidaṁ appattānaṁ ariyānameva abhāvato etehi adhigatapaṭisambhidā paṭutaraladdhappabhedāti dassetuṁ visuddhaggahaṇaṁ kataṁ. Vijjāti tisso vijjā, aṭṭha vijjā vā. Tattha dibbacakkhuñāṇaṁ pubbenivāsañāṇaṁ āsavakkhayañāṇañcāti imā tisso vijjā. Aṭṭha vijjā pana—

"Vipassanāñāṇamanomayiddhi, Iddhippabhedopi ca dibbasotam. Parassa cetopariyāyañāṇam, Pubbenivāsānugatañca ñāṇam. Dibbañca cakkhāsavasankhayo ca, Etāni ñānāni idhattha vijjā"ti—

evam vipassanāñaṇamanomayiddhīhi saddhim pariggahitā¹ cha abhiññāyeva. Atthapaṭisambhidā dhammapaṭisambhidā niruttipaṭisambhidā paṭibhānapaṭisambhidāti catasso paṭisambhidā. Tattha saṅkhepato hetuphale ñāṇam atthapaṭisambhidā, hetumhi ñāṇam dhammapaṭisambhidā, hetuhetuphalānurūpam vohāresu ñāṇam niruttipaṭisambhidā, idam ñāṇam imamattham jotayatīti iminā ākārena heṭṭhā vuttesu tīsu ñāṇesu pavattañāṇam paṭibhānapaṭisambhidā. Etāsam pana vitthārakathā atipapañcabhāvato idha na vuccati. Paṭisambhidāppattānam saddhammesu chekabhāvato āha "saddhammasamvaṇṇanakovidehī"ti. "Paṭisambhidāppattānampi dhammesu abhiyogavasena viseso hotīti laddhapaṭisambhidāsu sāsisayatam dassetum āhā"tipi vadanti. Saddhammasamvaṇṇanakovidehīti piṭakattayasaṅkhātassa saddhammassa saṁvannane sabbaso atthappakāsane kovidehi chekehi, kusalehīti attho.

Kilesajālam parikkhārabāhullam vā samlikhati tanum karotīti sallekho. Idha pana khīnāsavādhikārattā parikkhārabāhullassa sallikhanavaseneva attho gahetabbo, tatoyeva ca ganthipade "sallekhiye parimitaparikkhāravuttiyā"ti attho vutto. Sallekhassa bhāvo sallekhiyam, tasmim sallekhiye, sallekhapaṭipattiyanti vuttam hoti. Nosulabhūpamehīti asulabhūpamehi sallekhapaṭipattiyā asukasadisāti tesam upamāya anucchavikapuggalānam dullabhattā natthi sulabhā upamā etesanti nosulabhūpamā. Mahāvihārassāti cittalapabbata-abhayagirisesanikāyadvayam² paṭikkhipati. Dhajūpamehīti rathassa sañjānanahetukam rathe baddhadhajam viya ajānantānam "asukehi ca asukehi ca therehi

^{1.} Pariggaņitā (Sī, Syā)

nivāsito mahāvihāro nāmā"ti evam mahāvihārassa sañjānanahetuttā mahāvihārassa dhajūpamehi. **Samvaņņito**ti sammā anūnam katvā vaņņito. Samvaņņito ayam vinayoti padacchedo kātabbo. **Cittehi nayehī**ti anekappabhedanayattā vicittehi nayehi. **Sambuddhavaranvayehī**ti sabbaññubuddhavaram anugatehi, bhagavato adhippāyānugatehi nayehīti vuttam hoti. Atha vā buddhavaram anugatehi pubbācariyāsabhehīti sambandho kātabbo.

Evam porānatthakathāya anūnabhāvam dassetvā idāni attano samvannanāya payojanavisesam dassetum "samvannanā" ti-ādimāha. Idam vuttam hoti—kiñcāpi pubbācariyāsabhehi yathāvuttagunavisitthehi ayam vinayo sabbaso vannito, tathāpi tesam esā samvannanā sīhaladīpavāsīnam bhāsāya saṅkhatattā racitattā dīpantare bhikkhujanassa sīhaladīpato aññadīpavāsino bhikkhuganassa kiñci attham payojanam yasmā nābhisambhunāti na sampādeti na sādheti, tasmā imam samvannanam pālinayānurūpam katvā buddhasirittherena ajjhittho idāni samārabhissanti. Tattha samvanniyati attho etāyāti samvannanā, atthakathā. Sā pana dhammasangāhakattherehi pathamam tīni pitakāni sangāyitvā tassa atthavannanānurūpeneva vācanāmaggam āropitattā tisso sangītiyo ārulhoyeva buddhavacanassa atthasamvannanābhūto kathāmaggo. Soyeva ca mahāmahindattherena tambapannidīpam ābhato, pacchā tambapanniyehi¹ mahātherehi nikāyantaraladdhīhi sankarapariharanattham sīhalabhāsāya thapito. Tenāha "sīhaladīpakenā" ti-ādi. Sīhassa lānato gahanato sīhalo, sīhakumāro. Tamvamsajātatāya tambapannidīpe khattiyānam tesam nivāsatāya tambapaņņidīpassapi sīhaļabhāvo veditabbo, tasmim sīhaladīpe bhūtattā sīhaļadīpakena vākyena vacanena, sīhaļabhāsāyāti vuttam hoti.

Pāļinayānurūpanti pāļinayassa anūrūpam katvā, māgadhabhāsāya parivattitvāti² vuttam hoti. **Ajjhesanan**ti garuṭṭhāniyam payirupāsitvā garutaram payojanam uddissa abhipatthanā ajjhesanā, tam ajjhesanam, āyācananti attho. Tassa "samanussaranto"ti iminā sambandho. Kassa

ajjhesananti āha "buddhasirivhayassa therassā"ti. Buddhasirīti avhayo nāmaṁ yassa soyaṁ buddhasirivhayo, tassa, itthannāmassa therassa ajjhesanaṁ sammā ādarena samanussaranto hadaye thapentoti attho.

Idāni attano samvaṇṇanāya karaṇappakāram dassento "samvaṇṇanam tañcā"ti-ādimāha. Tattha tañca idāni vuccamānam samvaṇṇanam samārabhanto sakalāyapi mahā-aṭṭhakathāya idha gahetabbato mahā-aṭṭhakatham tassā idāni vuccamānāya samvaṇṇanāya sarīram katvā mahāpaccariyam yo vinicchayo vutto, tatheva kurundīnāmādīsu vissutāsu aṭṭhakathāsu yo vinicchayo vutto, tatopi vinicchayato yuttamattham apariccajanto antogadhattheravādam katvā samvaṇṇanam samārabhissanti padatthasambandho veditabbo. Ettha ca attho kathiyati etāyāti atthakathā, sāyeva aṭṭhakathā tthakārassa ṭṭhakāram katvā "dukkhassa pīļanaṭṭho"ti-ādīsu¹ viya. Mahāpaccariyanti ettha paccarīti uļumpam vuccati, tasmim nisīditvā katattā tameva nāmam jātam. Kurundivallivihāro nāma atthi, tattha katattā kurundīti nāmam jātanti vadanti. Ādisaddena andhakaṭṭhakatham saṅkhepaṭṭhakathañca saṅgaṇhāti. Vissutāsūti sabbattha patthaṭāsu, pākaṭāsūti vuttam hoti.

Yuttamatthanti ettha tāva majjhimagaņthipade cūļagaņthipade ca idam vuttam "yuttamatthanti samvaņņetabbaṭṭhānassa yuttamattham, na pana tattha ayuttampi atthīti vuttam hotī"ti. Mahāgaṇṭhipade panettha na kiñci vuttam. Kenaci pana "mahā-aṭṭhakathānayena vinayayuttiyā vā yuttamatthan"ti vuttam, tam yuttam viya dissati mahāpaccari-ādīsupi katthaci ayuttassāpi atthassa upari vibhāvanato. "Aṭṭhakathamyeva gahetvā samvaṇṇanam karissāmī"ti vutte aṭṭhakathāsu vuttattheravādānam bāhirabhāvo siyāti tepi antokattukāmo "antogadhatheravādan"ti āha, theravādepi antokatvāti vuttam hoti. Samvaṇṇananti aparakālakiriyāya kammaniddeso. Pubbe vuttam tu "samvaṇṇanan"ti vacanam tattheva "samārabhanto"ti pubbakālakiriyāya kammabhāvena yojetabbam. Sammāti vattabbe gāthābandhavasena rassabhāvo katoti veditabbo.

Evam karaṇappakāram dassetvā idāni sotūhi paṭipajjitabbavidhim dassento "tam me"ti-ādimāha. Idam vuttam hoti—idāni vuccamānam tam mama samvaṇṇanam dhammapadīpassa tathāgatassa dhammam sāsanadhammam pāļidhammam vā sakkaccam paṭimānayantā pūjentā thirehi sīlakkhandhādīhi samannāgatattā therā, acirapabbajitattā navā, tesam majjhe bhavattā majjhimā ca bhikkhū pasannacittā yathāvuttanayena sappayojanattā upari vakkhamānavidhinā pamāṇattā ca saddahitvā pītisomanassayuttacittā issāpakatā ahutvā nisāmentu suṇantūti. Tattha dhammappadīpassāti dhammoyeva sattasantānesu mohandhakāravidhamanato padīpasadisattā padīpo assāti dhammapadīpo, bhagavā. Tassa dhammapadīpassa.

Idāni attano samvannanāya āgamavisuddhim dassetvā pamānabhāvam dassento "buddhenā" ti-ādimāha. Yatheva buddhena yo dhammo ca vinayo ca vutto, so tassa buddhassa yehi puttehi dhammasenāpati-ādīhi tatheva ñāto, tesam buddhaputtānam matimaccajantā sīhalatthakathācariyā yasmā pure atthakathā akamsūti ayamettha sambandho. Tattha **dhammo**ti suttābhidhamme sanganhāti, vinayoti sakalam vinayapitakam. Ettāvatā ca sabbampi buddhavacanam niddittham hoti. Sakalanhi buddhavacanam dhammavinayavasena duvidham hoti. **Vutto**ti pālito ca atthato ca buddhena bhagavatā vutto. Na hi bhagavatā abyākatam nāma tantipadam atthi, sabbesamyeva attho kathito, tasmā sammāsambuddheneva tinnam pitakānam atthavannanākkamopi bhāsitoti datthabbam. Tattha tattha bhagavatā pavattitā pakinnakadesanāyeva hi atthakathā. Tatheva ñātoti yatheva buddhena vutto, tatheva ekapadampi ekakkharampi avināsetvā adhippāyañca avikopetvā ñāto viditoti attho. Tesam matimaccajantāti tesam buddhaputtanam adhippayam apariccajanta. Atthakatha akamsuti atthakathāyo akamsu. Katthaci "atthakathāmakamsū"ti pātho dissati, tatthāpi soyevattho, ma-kāro pana padasandhivasena āgatoti datthabbo. "Atthakatha"ti bahuvacananiddesena mahapaccariyadikam sanganhati.

Tasmāti yasmā tesam buddhaputtānam adhippāyam avikopetvā pure atthakathā akamsu, tasmāti attho. **Hī**ti nipātamattam

hetu-atthassa "tasmā"ti imināyeva pakāsitattā. Yadi aṭṭhakathāsu vuttam sabbampi pamāṇam, evam sati tattha pamādalekhāpi pamāṇam siyāti āha "vajjayitvāna pamādalekhan"ti. Tattha pamādalekhanti aparabhāge potthakāruļhakāle pamajjitvā likhanavasena pavattam pamādapāṭham. Idam vuttam hoti—pamādena satim apaccupaṭṭhapetvā adinnādānassa pubbapayoge "saccepi alikepi dukkaṭan"ti vuttavacanasadisam yam likhitam, tam vajjayitvā apanetvā sabbam pamāṇanti. Vakkhati hi tattha—

"Mahā-aṭṭhakathāyam pana saccepi alikepi dukkaṭameva vuttam, tam pamādalikhitanti veditabbam. Na hi adinnādānassa pubbapayoge pācittiyaṭṭhāne dukkaṭam nāma atthī"ti¹.

Kesam pamāṇanti āha "sikkhāsu sagāravānam idha paṇḍitānan"ti. Idhāti imasmim sāsane. Puna "yasmā"ti vacanassa ko sambandhoti ce? Ettha tāva mahāgaṇṭhipade gaṇṭhipade ca na kiñci vuttam, majjhimagaṇṭhipade pana cūlagaṇṭhipade ca idam vuttam "yasmā pamāṇam, tasmā nisāmentu pasannacittā"ti. Evamassa sambandho daṭṭhabbo². Yasmā aṭṭhakathāsu vuttam pamāṇam, tasmā idha vuttampi pamāṇamevāti pāṭhasesam katvā vajirabuddhitthero vadati. Tattha idhāti imissā samantapāsādikāyāti attho gahetabbo.

Tattha "yasmā"ti vacanassa paṭhamaṁ vuttasambandhavasena aṭṭhakathāsu vuttaṁ sabbampi pamāṇanti sādhitattā idāni vuccamānāpi saṁvaṇṇanā kevalaṁ vacanamatteneva bhinnā, atthato pana aṭṭhakathāyevāti dassetuṁ "tato ca bhāsantaramevā"ti-ādimāha. Pacchā vuttasambandhavasena pana idha vuttampi kasmā pamāṇanti ce? Yasmā vacanamattaṁ ṭhapetvā esāpi aṭṭhakathāyeva, tasmā pamāṇanti dassetuṁ "tato ca bhāsantaramevā"ti-ādimāha. Evamākulaṁ dubbiññeyyasabhāvañca katvā gaṇṭhipadesu sambandho dassito, anākulavacano ca bhadantabuddhaghosācariyo. Na hi so evamākulaṁ katvā vattumarahati, tasmā yathādhippetamatthamanākulaṁ suviññeyyañca katvā yathāṭhitassa sambandhavaseneva dassayissāma. Kathaṁ? Yasmā aṭṭhakathāsu vuttaṁ pamāṇaṁ, tasmā sakkaccaṁ anusikkhitabbāti evamettha sambandho datthabbo. Yadi nāma atthakathāsu vuttaṁ pamāṇaṁ, ayaṁ

pana idāni vuccamānā kasmā sakkaccam anusikhitabbāti āha "tato ca bhāsantarameva hitvā"ti-ādi. Idam vuttam hoti—yasmā aṭṭhakathāsu vuttam pamāṇam, yasmā ca ayam samvaṇṇanāpi bhāsantarapariccāgādimattavisiṭṭhā, atthato pana abhinnāva, tatoyeva ca pamāṇabhūtā hessati, tasmā sakkaccam ādaram katvā anusikhitabbāti. Tathā hi porāṇaṭṭhakathānam pamāṇabhāvo, imissā ca samvaṇṇanāya bhāsantarapariccāgādimattavisiṭṭhāya atthato tato abhinnabhāvoti ubhayampetam sakkaccam anusikhitabbabhāvahetūti daṭṭhabbam. Na hi kevalam porāṇaṭṭhakathānam satipi pamāṇabhāve ayam samvaṇṇanā tato bhinnā atthato aññāyeva ca sakkaccam anusikhitabbāti vattumarahati, nāpi imissā samvaṇṇanāya tato abhinnabhāvepi porāṇaṭṭhakathānam asati pamāṇabhāve ayam samvaṇṇanā sakkaccam anusikkhitabbāti vattum yuttarūpā hoti, tasmā yathāvuttanayena ubhayampetam sakkaccam anusikkhitabbabhāvahetūti datthabbam.

Tatoti aṭṭhakathāto. Bhāsantarameva hitvāti kañcukasadisaṁ sīhaļabhāsaṁ apanetvā. Vitthāramaggañca samāsayitvāti porāṇaṭṭhakathāsu upari vuccamānampi ānetvā tattha tattha papañcitaṁ "ñatticatutthena kammena akuppena ṭhānārahena upasampannoti bhikkhū"ti¹ ettha apalokanādīnaṁ catunnampi kammānaṁ vitthārakathā viya tādisaṁ vitthāramaggaṁ saṅkhipitvā vaṇṇayissāmāti adhippāyo. Tathā hi vakkhati—

"Ettha ca ñatticatutthakammam ekameva āgatam, imasmim pana ṭhāne ṭhatvā cattāri sanghakammāni nīharitvā vitthārato kathetabbānīti sabba-aṭṭhakathāsu vuttam, tāni ca 'apalokanakammam ñattikammam ñattidutiyakammam ñatticatutthakamman'ti paṭipāṭiyā ṭhapetvā vitthārena khandhakato parivārāvasāne kammavibhaṅgato ca pāṭim āharitvā kathitāni. Tāni mayam parivārāvasāne kammavibhaṅgeyeva vaṇṇayissāma. Evañhi sati paṭhamapārājikavaṇṇanā ca na bhāriyā bhavissati, yathāṭhitāya ca pāṭiyā vaṇṇanā suviñneyyā bhavissati, tāni ca ṭhānāni asuññāni bhavissanti, tasmā anupadavaṇṇanameva karomā"ti².

Vinicchayam sabbamasesayitvāti tamtamaṭṭhakathāsu vuttam sabbampi vinicchayam asesayitvā sesam akatvā, kiñcimattampi apariccajitvāti vuttam hoti. Vaṇṇitum yuttarūpam hutvā anukkamena āgatam pāļim apariccajitvā samvaṇṇanato sīhaļaṭṭhakathāsu ayuttaṭṭhāne vaṇṇitam yathāṭhāneyeva samvaṇṇanato ca vuttam "tantikkamam kiñci avokkamitvā"ti, kiñci pālikkamam anatikkamitvā anukkameneva vannayissāmāti adhippāyo.

Suttantikānam vacanānamatthanti suttantapāliyam āgatānampi vacanānamattham. Sīhalatthakathāsu "suttantikānam bhāro"ti vatvā avuttānampi verañjakandādīsu jhānakathā-ānāpānassatisamādhi-ādīnam suttantavacanānamattham tamtamsuttānurūpam sabbaso paridīpayissāmīti adhippāyo. Hessatīti bhavissati, kariyissatīti vā attho. Ettha ca pathamasmim atthavikappe bhāsantarapariccāgādikam catubbidham kiccam nipphādetvā suttantikānam vacanānamattham paridīpayantī ayam vannanā bhavissatīti vannanāya vasena samānakattukatā veditabbā. Pacchimasmim atthavikappe pana hetthāvuttabhāsantarapariccāgādim katvā suttantikānam vacanānamattham paridīpayantī ayam vannanā amhehi kariyissatīti evam ācariyavasena samānakattukatā veditabbā. **Vannanāpī**ti ettha **api**saddam gahetvā "tasmāpi sakkaccam anusikkhitabbāti yojetabban"ti cūlaganthipade vuttam. Tattha pubbe vuttappayojanavisesam pamānabhāvanca sampindetīti adhippāyo. Majjhimaganthipade pana "tasmā sakkaccam anusikkhitabbāpī"ti sambandho vutto. Ettha pana na kevalam ayam vannanā hessati, atha kho anusikkhitabbāpīti imamattham sampindetīti adhippāyo. Etthāpi yathāthitavaseneva apisaddassa attho gahetabboti amhākam khanti. Idam vuttam hoti—yasmā atthakathāsu vuttam pamānam, yasmā ca ayam vannanāpi tato abhinnattā pamānabhūtāyeva hessati, tasmā sakkaccam anusikkhitabbāti.

Ganthārambhakathāvannanā nitthitā.

Bāhiranidānakathā

Idāni "tam vaṇṇayissam vinayan"ti paṭiññātattā yathāpaṭiññātavinayasamvaṇṇanam kattukāmo samvaravinayapahānavinayādivasena vinayassa bahuvidhattā idha samvaṇṇetabbabhāvena adhippeto tāva vinayo vavatthapetabboti dassento āha "tatthā"ti-ādi. Tattha tatthāti tāsu gāthāsu. Tāva-saddo paṭhamanti imasmim atthe daṭṭhabbo. Tena paṭhamam vinayam vavatthapetvā pacchā tassa vaṇṇanam karissāmīti dīpeti. Vavatthapetabboti niyametabbo. Tenetam vuccatīti yasmā vavatthapetabbo, tena hetunā etam "vinayo nāmā"ti-ādikam niyāmakavacanam vuccatīti attho. Assāti vinayassa. Mātikāti uddeso. So hi niddesapadānam jananīṭhāne ṭhitattā mātā viyāti mātikāti vuccati.

Idāni vaṇṇetabbamatthaṁ mātikaṁ ṭhapetvā dassento āha "vuttaṁ yenā"ti-ādi. Idaṁ vuttaṁ hoti—etaṁ "tena samayena buddho bhagavā verañjāyaṁ viharatī"ti-ādinidānavacanapaṭimaṇḍitaṁ vinayapiṭakaṁ yena puggalena vuttaṁ, yasmiṁ kāle vuttaṁ, yasmā kāraṇā vuttaṁ, yena dhāritaṁ, yena ca ābhataṁ, yesu patiṭṭhitaṁ, etaṁ yathāvuttavidhānaṁ vatvā tato "tena samayenā"ti-ādipāṭhassa atthaṁ anekappakārato dassayanto vinayassa atthaফaṇṇanaṁ karissāmīti. Etha ca "vuttaṁ yena yadā yasmā"ti idaṁ vacanaṁ "tena samayena buddho bhagavā"ti-ādinidānavacanamattaṁ apekkhitvā vattukāmopi visuṁ avatvā "nidānena ādikalyāṇaṁ, 'idamavocā'ti nigamanena pariyosānakalyāṇan"ti ca vacanato nidānanigamanānipi satthudesanāya anuvidhānattā tadantogadhānevāti nidānassapi vinayapāṭiyaṁyeva antogadhattā "vuttaṁ yena yadā yasmā"ti idampi vinayapiṭakasambandhaṁyeva katvā mātikaṁ ṭhapeti. Mātikāya hi "etan"ti vuttaṁ vinayapiṭakaṁyeva sāmaññato sabbattha sambandhamupagacchati.

Idāni pana tam visum nīharitvā dassento "tattha vuttam yenā" tiādimāha. Tattha tatthāti tesu mātikāpadesu. Atha kasmā idameva vacanam sandhāya vuttanti āha "idañhī" ti-ādi. Idanti "tena samayena buddho bhagavā"ti-ādivacanam. **Hi-**saddo yasmāti atthe daṭṭhabbo, yasmā buddhassa bhagavato attapaccakkhavacanam na hoti, tasmāti vuttam hoti.

Attapaccakkhavacanam na hotīti attano¹ paccakkham katvā vuttavacanam na hoti, bhagavatā vuttavacanam na hotīti adhippāyo.

"Attapaccakkhavacanam na hotīti āhacca bhāsitam na hotīti adhippāyo"ti kenaci vuttam. Gaṇṭhipade pana "attapaccakkhavacanam na hotīti attano dharamānakāle vuttavacanam na hotī"ti likhitam. Tadubhayampi atthato samānameva. Idāni pañhakaraṇam vatvā anukkamena yathāvuttapañhavissajjanam karonto "āyasmatā"ti-ādimāha. Iminā puggalam niyameti, "tañcā"ti-ādinā kālam niyameti. Tañca upālittherena vuttavacanam kālato paṭhamamahāsaṅgītikāle vuttanti attho.

Pathamamahāsangītikathāvannanā

Idāni tam pathamamahāsangītim dassetukāmo tassā tanti-ārulhāya idha vacane kāranam dassento "pathamamahāsangīti nāma cesā -pa- veditabbā"ti āha. Pathamamahāsangīti nāma cesāti ca-saddo īdisesu thānesu vattabbasampindanattho, tañca pathamamahāsangītikāle vuttam, esā ca pathamamahāsangīti evam veditabbāti vuttam hoti. Upaññāsattho vā casaddo. **Upaññāso**ti ca vākyārambho vuccati. Esā hi ganthakārānam pakati, yadidam kiñci vatvā puna param vattumārabhantānam casaddappayogo. Yam pana **kenaci** vuttam "pathamamahāsangīti nāma cāti ettha ca-saddo atirekattho, tena aññāpi atthīti dīpetī"ti. Tadeva tassa ganthakkame akovidatam dasseti. Na hettha casaddena atirekattho viññayati. Yadi cettha etadatthoyeva ca-kāro adhippeto siyā, evam sati na kattabboyeva pathamasaddeneva aññāsam dutiyādisangītīnampi atthibhāvassa dīpitattā. Dutiyādim upādāya hi pathamasaddappayogo dīghādim upādāya rassādisaddappayogo viya. Yathāpaccayam tattha tattha desitattā paññattattā ca vippakinnānam dhammavinayānam sangahetvā gāyanam kathanam saṅgīti. Etena tamtamsikkhāpadānam suttānañca ādipariyosānesu antarantarā ca sambandhavasena thapitam

saṅgītikāravacanaṁ saṅgahitaṁ hoti. Mahāvisayattā pūjanīyattā ca mahatī saṅgīti **mahāsaṅgī**ti, paṭhamā mahāsaṅgīti **paṭhamamahāsaṅgīti. Nidānakosallatthan**ti nidadāti desanaṁ desakālādivasena aviditaṁ viditaṁ katvā nidassetīti nidānaṁ, tattha kosallaṁ nidānakosallaṁ, tadatthanti attho.

Sattānam dassanānuttariyasaraṇādipaṭilābhahetubhūtāsu vijjamānāsupi aññāsu bhagavato kiriyāsu "buddho bodheyyan"ti paṭiññāya anulomanato veneyyānam maggaphaluppattihetubhūtā kiriyā nippariyāyena buddhakiccanti āha "dhammacakkappavattanañhi ādim katvā"ti. Tattha saddhindriyādidhammoyeva pavattanaṭṭhena cakkanti dhammacakkam. Atha vā cakkanti āṇā, dhammato anapetattā dhammañca tam cakkancāti dhammacakkam, dhammena ñāyena cakkantipi dhammacakkam. Yathāha—

"Dhammañca pavatteti cakkañcāti dhammacakkam, cakkañca pavatteti dhammañcāti dhammacakkam, dhammana pavattetīti dhammacakkam, dhammacakkam, dhammacakkam."ti-ādi¹.

Katabuddhakicceti katam pariniṭṭhāpitam buddhakiccam yena, tasmim katabuddhakicce bhagavati lokanātheti sambandho. Etena buddhakattabbassa kassacipi asesitabhāvam dasseti. Tatoyeva hi so bhagavā parinibbutoti. Nanu ca sāvakehi vinītāpi vineyyā bhagavatāyeva vinītā honti, tathā hi sāvakabhāsitam suttam buddhavacananti vuccati, sāvakavineyyā ca na tāva vinītāti? Nāyam doso tesam vinayanūpāyassa sāvakesu ṭhapitattā. Tenevāha—

"Na tāvāham pāpima parinibbāyissāmi, yāva na bhikkhū viyattā vinītā visāradā bahussutā āgatāgamā dhammadharā vinayadharā mātikādharā uppannam parappavādam sahadhammena suniggahitam niggahetvā sappāṭihāriyam dhammam desessantī'ti-ādi².

"Kusinārāyan"ti-ādinā bhagavato parinibbutadesakālavisesadassanam, "aparinibbuto bhagavā"ti gāhassa micchābhāvadassanattham

loke jātasamvaddhabhāvadassanatthañca. Tathā hi manussabhāvassa supākatakaranattham mahābodhisattā carimabhave dārapariggahādīnipi karontīti. Kusinārāyanti evamnāmake nagare. Samīpatthe cetam bhummavacanam. Upavattane mallānam sālavaneti tassa nagarassa upavattanabhūtam mallarājūnam sālavanuyyānam dasseti. Tattha nagaram pavisitukāmā uyyānato upecca vattanti gacchanti etenāti upavattananti sālavanam vuccati. Yathā hi anurādhapurassa thūpārāmo dakkhinapacchimadisāyam, evam tam uyyānam kusinārāya dakkhinapacchimadisāya hoti. Yathā ca thūpārāmato dakkhinadvārena nagaram pavisanamaggo pācīnamukho gantvā uttarena nivattati, evam uyyānato sālapanti pācīnamukhā gantvā uttarena nivattā, tasmā tam "upavattanan"ti vuccati. Yamakasālānamantareti yamakasālānam vemajjhe. Tattha kira bhagavato paññattassa parinibbānamañcassa ekā sālapanti sīsabhāge hoti, ekā pādabhāge, tatrāpi eko tarunasālo sīsabhāgassa āsanno hoti, eko pādabhāgassa, tasmā "yamakasālānamantare"ti vuttam. Api ca "yamakasālā nāma mūlakkhandhavitapapattehi aññamaññam samsibbetvā thitasālā"tipi mahā-atthakathāyam vuttam.

Anupādisesāya nibbānadhātuyāti upādīyate kammakilesehīti upādi, vipākakkhandhā kaṭattā ca rūpam. So pana upādi kilesābhisaṅkhāramāranimmathanena nibbānappattiyam anossaṭṭho, idha khandhamaccumāranimmathanena ossaṭṭho nisesitoti ayam anupādisesā nibbānadhātu natthi etissā upādisesoti katvā. Nibbānadhātūti cettha nibbutimattam adhippetam, itthambhūtalakkhaṇe cāyam karaṇaniddeso. Parinibbāneti parinibbānaṭṭhāne, nimittatthe vā bhummavacanam, parinibbānahetusannipatitānanti attho. Saṃghassa thero saṃghatthero. So pana saṃgho kimparimāṇoti āha "sattannam bhikkhusatasahassānan"ti. Niccasāpekkhattā hi īdisesu samāso hotiyeva yathā "devadattassa garukulan"ti. Sattannam bhikkhusatasahassānanti ca saṃghattherānaṃyeva sattannam bhikkhusatasahassānam. Tadā hi "sannipatitā bhikkhū ettakā"ti pamāṇarahitā. Tathā hi veļuvagāme vedanāvikhambhanato paṭṭhāya "na cirena bhagavā parinibbāyissatī"ti sutvā tato tato āgatesu bhikkhūsu ekabhikkhupi pakkanto nāma natthi, tasmā gaṇanam vītivatto saṃgho ahosi.

Āyasmā mahākassapo dhammavinayasaṅgāyanatthaṁ bhikkhūnaṁ ussāhaṁ janesīti sambandho.

Tattha **mahākassapo**ti mahantehi sīlakkhandhādīhi samannāgatattā mahanto kassapoti mahākassapo, apica kumārakassapattheram upādāya ayam mahāthero "mahākassapo"ti vuccati. Atha kimattham āyasmā mahākassapo dhammavinayasangāyanattham ussāham janesīti āha "sattāhaparinibbute"ti-ādi. Satta ahāni samāhatāni sattāham, sattāham parinibbutassa assāti **sattāhaparinibbuto**, bhagavā, tasmim sattāhaparinibbute bhagavati, bhagavato parinibbānadivasato patthāya sattāhe vītivatteti vuttam hoti. Subhaddena vuddhapabbajitena vuttavacanam samanussarantoti sambandho. Tattha **subhaddo**ti tassa nāmam, vuddhakāle pana pabbajitattā vuddhapabbajitoti vuccati. "Alam āvuso"ti-ādinā tena vuttavacanam nidasseti. So hi sattāhaparinibbute bhagavati āyasmatā mahākassapattherena saddhim pāvāya kusināram addhānamaggappatipannesu pañcamattesu bhikkhusatesu avītarāge bhikkhū antarāmagge dittha-ājīvakassa santikā bhagavato parinibbānam sutvā pattacīvarāni chaddetvā bāhā paggayha nānappakāram paridevante disvā evamāha.

Kasmā pana so evamāha? Bhagavati āghātena. Ayam kira so khandhake¹ āgate ātumāvatthusmim nahāpitapubbako vuḍḍhapabbajito bhagavati kusinārato nikkhapitvā aḍḍhateļasehi bhikkhusatehi saddhim ātumam gacchante "bhagavā āgacchatī"ti sutvā āgatakāle "yāgudānam karissāmī"ti sāmaņerabhūmiyam thite dve putte etadavoca "bhagavā kira tātā ātumam āgacchati mahatā bhikkhusamghena saddhim aḍḍhateļasehi bhikkhusatehi, gacchatha tumhe tātā khurabhaṇḍam ādāya nāḷiyāvāpakena anugharakam anugharakam āhiṇḍatha, loṇampi telampi taṇḍulampi khādanīyampi samharatha, bhagavato āgatassa yāgudānam karissāmī"ti. Te tathā akamsu. Atha bhagavati ātumam āgantvā bhusāgārakam paviṭṭhe subhaddo sāyanhasamayam gāmadvāram gantvā manusse āmantetvā "hatthakammamattam me dethā"ti hatthakammam yācitvā "kim

bhante karomā"ti vutte "idañcidañca gaṇhathā"ti sabbūpakaraṇāni gāhāpetvā vihāre uddhanāni kāretvā ekam kāļakam kāsāvam nivāsetvā tādisameva pārupitvā "idam karotha, idam karothā"ti sabbarattim vicārento satasahassam vissajjetvā bhojjayāguñca madhugoļakañca paṭiyādāpesi. **Bhojjayāgu** nāma bhuñjitvā pātabbayāgu, tattha sappimadhuphāṇitamacchamamsapupphaphalarasādi yam kiñci khādanīyam nāma atthi, tam sabbam pavisati, kīļitukāmānam sīsamakkhanayoggā hoti sugandhagandhā.

Atha bhagavā kālasseva sarīrapaṭijagganam katvā bhikkhusamghaparivuto piṇḍāya caritum ātumābhimukho pāyāsi. Manussā tassa ārocesum "bhagavāpiṇḍāya gāmam pavisati, tayā kassa yāgu paṭiyāditā"ti. So yathānivatthapāruteheva tehi kāļakakāsāvehi ekena hatthena dabbiñca kaṭacchuñca gahetvā brāhmā viya dakkhiṇajāṇumaṇḍalam bhūmiyam patiṭṭhāpetvā vanditvā "paṭiggaṇhatu me bhante bhagavā yāgun"ti āha. Tato "jānantāpi tathāgatā pucchantī"ti khandhake¹ āgatanayena bhagavā pucchitvā ca sutvā ca tam vuḍḍhapabbajitam vigarahitvā tasmim vatthusmim akappiyasamādāpanasikkhāpadam khurabhaṇḍapariharaṇasikkhāpadañcāti dve sikkhāpadāni paññapetvā "bhikkhave anekakappakoṭiyo bhojanam pariyesanteheva vītināmitā, idam pana tumhākam akappiyam, adhammena uppannabhojanam imam paribhuñjitvā anekāni attabhāvasahassāni apāyesveva nibbattissanti, apetha mā gaṇhathā"ti bhikkhācārābhimukho agamāsi, ekabhikkhunāpi na kiñci gahitam.

Subhaddo anattamano hutvā "ayam 'sabbam jānāmī'ti āhiṇḍati, sace na gahetukāmo pesetvā ārocetabbam assa, pakkāhāro nāma sabbaciram tiṭṭhanto sattāhamattam tiṭṭheyya, idañca mama yāvajīvam pariyattam assa, sabbam kena nāsitam, ahitakāmo ayam mayhan"ti bhagavati āghātam bandhitvā dasabale dharamāne kiñci vattum nāsakkhi. Evam kirassa ahosi "ayam uccakulā pabbajito mahāpuriso, sace kiñci vakkhāmi, mamamyeva santajjessatī"ti. Svāyam ajja mahākassapattherena saddhim āgacchanto "parinibbuto bhagavā"ti sutvā

laddhassāso viya haṭṭhatuṭṭho evamāha. Thero pana taṁ sutvā hadaye pahāraṁ viya matthake patitasukkāsaniṁ viya maññi, dhammasaṁvego cassa uppajji "sattāhamattaparinibbuto bhagavā, ajjāpissa suvaṇṇaṁ sarīraṁ dharatiyeva, dukkhena bhagavatā ārādhitasāsane nāma evaṁ lahuṁ mahantaṁ pāpakasaṭaṁ kaṇṭako¹ uppanno, alaṁ kho panesa pāpo vaḍḍhamāno aññepi evarūpe sahāye labhitvā sāsanaṁ osakkāpetun"ti.

Tato thero cintesi "sace kho panāham imam mahallakam idheva pilotikam nivāsetvā chārikāya okirāpetvā nīharāpessāmi, manussā 'samanassa gotamassa sarīre dharamāneyeva sāvakā vivadantī'ti amhākam dosam dassessanti, adhivāsemi tāva. Bhagavatā hi desitadhammo asangahitapuppharāsisadiso, tattha yathā vātena pahatapupphāni yato vā tato vā gacchanti, evameva evarūpānam vasena gacchante gacchante kāle vinaye ekam dve sikkhāpadāni nassissanti vinassissanti, sutte eko dve pañhavārā nassissanti, abhidhamme ekam dve bhūmantarāni nassissanti, evam anukkamena mūle natthe pisācasadisā bhavissāma, tasmā dhammavinayasangaham karissāmi, evam sati dalhasuttena sangahitapupphāni viya ayam dhammavinayo niccalo bhavissati. Etadatthañhi bhagavā mayham tīni gāvutāni paccuggamanam akāsi, tīhi ovādehi upasampadam akāsi, kāyato cīvaraparivattanam akāsi, ākāse pānim cāletvā candopamapatipadam kathento maññeva sakkhim katvā kathesi, tikkhattum sakalasāsanaratanam paticchāpesi, mādise bhikkhumhi titthamāne ayam pāpo sāsane vaddhim mā alatthu, yāva adhammo na dippati, dhammo na patibāhīyati, avinayo na dippati, vinayo na patibāhīyati, adhammavādino na balavanto honti, dhammavādino na dubbalā honti, avinayavādino na balavanto honti, vinayavādino na dubbalā honti, tāva dhammañca vinayañca saṅgāyissāmi, tato bhikkhū attano attano pahonakaṁ gahetvā kappiyākappiye kathessanti, athāyam pāpo sayameva niggaham pāpuņissati, puna sīsam ukkhipitum na sakkhissati, sāsanam iddhanceva phītañca bhavissatī"ti. Cintetvā so "evam nāma mayham cittam uppannan"ti kassaci

anārocetvā bhikkhusamgham samassāsetvā atha pacchā dhātubhājanadivase dhammavinayasangāyanattham bhikkhūnam ussāham janesi. Tena vuttam "āyasmā mahākassapo sattāhaparinibbute -padhammavinayasangāyanattham bhikkhūnam ussāham janesī"ti.

Tattha alanti paṭikkhepavacanam. Āvusoti paridevante bhikkhū ālapati. Mā socitthāti citte uppannabalavasokena mā socittha. Māparidevitthāti vācāya mā paridevittha "paridevanam vilāpo"ti vacanato. Idāni asocanādīsu kāraṇam dassento "sumuttā mayan"ti-ādimāha. Tena mahāsamaṇenāti nissakke karaṇavacanam, tato mahāsamaṇato suṭṭhu muttā mayanti attho, upaddutā ca homa tadāti adhippāyo. Homāti vā atītatthe vattamānavacanam, ahumhāti attho, anussaranto dhammasamvegavasenāti adhippāyo. Dhammasabhāvacintāvasena pavattam sahottappañāṇam dhammasamvego. Vuttañhetam—

"Sabbasankhatadhammesu, ottappākārasanthitam. Ñāṇamohitabhārānam, dhammasamvegasañnitan"ti.

Ţhānaṁ kho panetaṁ vijjatīti tiṭṭhati ettha phalaṁ tadāyattavuttitāyāti ṭhānaṁ, hetu. Khoti avadhāraṇe, etaṁ kāraṇaṁ vijjateva, no na vijjatīti attho. Kiṁ taṁ kāraṇanti āha "yaṁ pāpabhikkhū"ti-ādi. Ettha yanti nipātamattaṁ, kāraṇaniddeso vā, yena kāraṇena antaradhāpeyyuṁ, tadetaṁ kāraṇaṁ vijjatīti attho. Pāpabhikkhūti pāpikāya lāmikāya icchāya samannāgatā bhikkhū. Atīto atikkanto satthā ettha, etassāti vā atītasatthukaṁ, pāvacanaṁ. Padhānaṁ vacanaṁ pāvacanaṁ, dhammavinayanti vuttaṁ hoti. Pakkhaṁ labhitvāti alajjīpakkhaṁ labhitvā. Na cirassevāti na cireneva. Yāva ca dhammavinayo tiṭṭhatīti yattakaṁ kālaṁ dhammo ca vinayo ca lajjīpuggalesu tiṭṭhati.

Vuttañhetaṁ bhagavatāti parinibbānamañcake nipannena bhagavatā bhikkhū ovadantena etaṁ vuttanti attho. Desito paññattoti dhammopi desito ceva paññatto ca. Suttābhidhammasaṅgahitassa hi dhammassa abhisajjanaṁ pabodhanaṁ desanā, tasseva pakārato ñāpanaṁ vineyyasantāne ṭhapanaṁ paññāpanaṁ, tasmā dhammopi desito ceva paññatto

cāti vutto. **Paññatto**ti ca ṭhapitoti attho. Vinayopi desito ceva paññatto ca. Vinayatantisaṅgahitassa hi atthassa kāyavācānaṁ vinayanato vinayoti laddhādhivacanassa atisajjanaṁ pabodhanaṁ desanā, tasseva pakārato ñāpanaṁ asaṅkarato ṭhapanaṁ paññāpanaṁ, tasmā vinayopi desito ceva paññatto cāti vuccati.

So vo mamaccayenāti so dhammavinayo tumhākam mamaccayena satthā. Idam vuttam hoti—mayā vo thiteneva "idam lahukam, idam garukam, idam satekiccham, idam atekiccham, idam lokavajjam, idam pannattivajjam. Ayam āpatti puggalassa santike vutthāti, ayam ganassa, ayam samghassa santike vutthātī"ti sattannam āpattikkhandhānam avītikkamanīyatāvasena otinnavatthusmim sakhandhakaparivāro ubhatovibhango mahāvinayo nāma desito, tam sakalampi vinayapitakam mayi parinibbute tumhākam satthukiccam sādhessati "idam vo kattabbam, idam vo na kattabban"ti kattabbākattabbassa vibhāgena anusāsanato. Thiteneva ca mayā "ime cattāro satipatthānā, cattāro sammappadhānā, cattāro iddhipādā, pañcindriyāni, pañca balāni, satta bojjhangāni, ariyo atthangiko maggo"ti tena tena vineyyānam ajjhāsayānurūpena pakārena ime sattatimsa bodhipakkhiyadhamme vibhajitvā suttantapitakam desitam, tam sakalampi suttantapitakam mayi parinibbute tumhākam satthukiccam sādhessati tamtamcariyānurūpam sammāpatipattiyā anusāsanato. Thiteneva ca mayā "pañcakkhandhā, dvādasāyatanāni, aṭṭhārasa dhātuyo, cattāri saccāni, bāvīsatindriyāni, nava hetū, cattāro āhārā, satta phassā, satta vedanā, satta saññā, satta cetanā, satta cittāni, tatrāpi ettakā dhammā kāmāvacarā, ettakā rūpāvacarā, ettakā arūpāvacarā, ettakā pariyāpannā, ettakā apariyāpannā, ettakā lokiyā, ettakā lokuttarā"ti ime dhamme vibhajitvā abhidhammapitakam desitam, tam sakalampi abhidhammapitakam mayi parinibbute tumhākam satthukiccam sādhessati, khandhādivibhāgena ñāyamānam catusaccasambodhāvahattā satthārā sammāsambuddhena kattabbakiccam nipphādessati. Iti sabbampetam abhisambodhito yāva parinibbānā pañcacattālīsa vassāni bhāsitam lapitam, tīni pitakāni, pañca nikāyā navangāni caturāsīti dhammakkhandhasahassānīti evam mahappabhedam hoti. Iti imāni

caturāsīti dhammakkhandhasahassāni tiṭṭhanti, aham ekova parinibbāyāmi, ahañca panidāni ekova ovadāmi anusāsāmi, mayi parinibbute imāni caturāsīti buddhasahassāni tumhe ovadissanti anusāsissanti ovādānusāsanīkiccassa nipphādanatoti.

Sāsananti pariyattipaṭipattipaṭivedhavasena tividhaṁ sāsanaṁ, nippariyāyato pana sattatiṁsa bodhipakkhiyadhammā. Addhaniyanti addhānamaggagāmīti addhaniyaṁ, addhānakkhamanti attho. Ciraṭṭhitikanti cīraṁ ṭhiti etassāti ciraṭṭhitikaṁ, sāsanaṁ, assa bhaveyyāti sambandho. Idaṁ vuttaṁ hoti—yathā yena pakārena idaṁ sāsanaṁ dīghamaddhānaṁ pavattituṁ samatthaṁ, tatoyeva ciraṭṭhitikaṁ assa, tathā tena pakārena dhammañca vinayañca saṅgāyeyyanti.

Idāni sammāsambuddhena attano katam anuggahavisesam vibhāvento āha "yañcāham bhagavatā"ti-ādi. Tattha "yañcāham"ti etassa "anuggahito"ti etena sambandho. Tattha yanti yasmā, yena kāraṇenāti vuttam hoti. Kiriyāparāmasanam vā etam, tena "anuggahito"ti ettha anuggaṇhanam parāmasati. Dhāressasīti-ādikam pana bhagavā aññatarasmim rukkhamūle mahākassapattherena paññattasaṅghāṭiyam nisinno tam cīvaram vikasitapadumapupphavaṇṇena pāṇinā antare parāmasanto āha. Vuttañhetam kassapasamyutte¹ mahākassapatthereneva ānandattheram āmantetvā kathentena—

"Atha kho āvuso bhagavā maggā okkamma yena aññataram rukkhamūlam tenupasankami, atha khvāham āvuso paṭapilotikānam sanghāṭim catugguṇam paññāpetvā bhagavantam etadavocam 'idha bhante bhagavā nisīdatu, yam mamassa dīgharattam hitāya sukhāyā'ti. Nisīdi kho āvuso bhagavā paññatte āsane nisajja kho mam āvuso bhagavā etadavoca 'mudukā kho tyāyam kassapa paṭapilotikānam sanghāṭī'ti. Paṭiggaṇhātu me bhante bhagavā paṭapilotikānam sanghāṭim anukampam upādāyāti. Dhāressasi pana me tvam kassapa sāṇāni pamsukūlāni nibbasanānīti. Dhāressāmaham bhante bhagavato sānāni

pamsukūlāni nibbasanānīti. So khvāham āvuso paṭapilotikānam saṅghāṭim bhagavato pādāsim, aham pana bhagavato sāṇāni pamsukūlāni nibbasanāni paṭipajjin"ti¹.

Tattha² mudukā kho tvāvanti mudukā kho te avam. Kasmā bhagavā evamāhāti? Therena saha cīvaram parivattetukāmatāya. Kasmā parivattetukāmo jātoti? Theram attano thāne thapetukāmatāya. Kimsāriputtamoggallānā natthīti? Atthi, evam panassa ahosi "ime na ciram thassanti, kassapo pana vīsavassasatāvuko, 'so mayi parinibbute sattapanniguhāyam vasitvā dhammavinayasangaham katvā mama sāsanam pañcavassasahassaparimānam kālam pavattanakam karissatī'ti attano nam thāne thapemi, evam bhikkhū kassapassa sussūsitabbam mañnissantī"ti, tasmā evamāha. Thero pana yasmā cīvarassa vā pattassa vā vanne kathite "imam tumhākam ganhathā"ti cārittameva, tasmā "patigganhātu me bhante bhagavā"ti āha. **Dhāressasi pana me tvam kassapā**ti kassapa tvam imāni paribhogajinnāni pamsukūlāni pārupitum sakkhissasīti vadati. Tañca kho na kāyabalam sandhāya, patipattipūranam pana sandhāya evamāha. Ayañhettha adhippāyo—aham imam cīvaram punnam nāma dāsim pārupitvā āmakasusāne chadditam tumbamattehi pānakehi samparikinnam te pānake vidhunitvā mahā-ariyavamse thatvā aggahesim, tassa me imam cīvaram gahitadivase dasasahassacakkavāļe mahāpathavī mahāravam viravamānā kampittha, ākāsam tatatatāyi, cakkavāladevatā sādhukāram adamsu "imam cīvaram ganhantena bhikkhunā jātipamsukūlikena jāti-ārañnikena jātiekāsanikena jātisapadānacārikena bhavitum vaṭṭati, tvam imassa cīvarassa anucchavikam kātum sakkhissasī''ti. Theropi attanā pañcannam hatthīnam balam dhāreti. So tam atakkayitvā "ahametam patipattim pūressāmī"ti ussāhena sugatacīvarassa anucchavikam kātukāmo "dhāressāmaham bhante"ti āha. **Patipajjin**ti patipannosim³. Evam pana cīvaraparivattanam katvā therena pārutacīvaram bhagavā pārupi, satthu cīvaram thero. Tasmim samaye mahāpathavī udakapariyantam katvā unnadantī kampittha.

Sānāni pamsukūlānīti matakalevaram parivethetvā chadditāni tumbamatte kimī papphotetvā gahitāni sāṇavākamayāni pamsukūlacīvarāni. Rathikasusānasankārakūtādīnam yattha katthaci pamsūnam upari thitattā abbhuggatatthena tesu pamsukūlamivāti pamsukūlam. Atha vā pamsu viya kucchitabhāvam ulati gacchatīti pamsukūlanti pamsukūlasaddassa attho datthabbo. Nibbasanānīti nitthitavasanakiccāni, paribhogajinnānīti attho. Ettha "kiñcāpi ekameva tam cīvaram, anekāvayavattā pana bahuvacanam katan"ti majihimaganthipade vuttam. Cīvare sādhāranaparibhogenāti ettha attanā sādhāranaparibhogenāti viññāyamānattā viññāyamānatthassa casaddassa payoge kāmācārattā¹ "attanā"ti na vuttam. "Dhāressasi pana me tvam kassapa sānāni pamsukūlānī"ti hi vuttattā attanāva sādhāranaparibhogo viññayati, naññena. Na hi kevalam saddatoyeva sabbattha atthanicchayo bhavissati atthapakaraṇādināpi yebhuyyena atthassa niyametabbattā. Acariyadhammapalattherena panettha idam vuttam "cīvare sādhāranaparibhogenāti ettha attanā samasamatthapanenāti idha attanāsaddam ānetvā cīvare attanā sādhāranaparibhogenāti yojetabbam.

Yassa yena hi sambandho, dūraṭṭhampi ca tassa tam. Atthato hyasamānānam, āsannatta'makāraṇan''ti.

Atha vā bhagavatā cīvare sādhāraṇaparibhogena bhagavatā anuggahitoti yojanīyam ekassapi karaṇaniddesassa sahayogakattutthajotakattasambhavatoti. Sabbattha "ācariyadhammapālattherenā"ti vutte suttantaṭīkākārenāti gahetabbam. Samānam dhāraṇametassāti sādhāraṇo, paribhogo. Sādhāraṇaparibhogena ceva samasamatthapanena ca anuggahitoti sambandho.

Idāni²—

"Aham bhikkhave yāvade ākankhāmi vivicceva kāmehi vivicca akusalehi dhammehi savitakkam savicāram vivekajam pītisukham paṭhamam jhānam upasampajja viharāmi. Kassapopi bhikkhave

yāvade ākaṅkhati vivicceva kāmehi vivicca akusalehi dhammehi savitakkaṁ savicāraṁ vivekajaṁ pītusukhaṁ paṭhamaṁ jhānaṁ upasampajja viharati.

Aham bhikkhave yāvade ākankhāmi vitakkavicārānam vūpasamā ajjhattam sampasādanam cetaso ekodibhāvam avitakkam avicāram samādhijam pītisukham dutiyam jhānam upasampajja viharāmi. Kassapopi bhikkhave yāvade ākankhati vitakkavicārānam vūpasamā -pa- dutiyam jhānam upasampajja viharati.

Aham bhikkhave yāvade ākankhāmi pītiyā ca virāgā upekkhako ca viharāmi, sato ca sampajāno sukhanca kāyena paṭisamvedemi, yam tam ariyā ācikkhanti 'upekkhako satimā sukhavihārī'ti, tatiyam jhānam upasampajja viharāmi. Kassapopi bhikkhave yāvade ākankhati pītiyā ca virāgā upekkhako ca viharati -pa- tatiyam jhānam upasampajja viharati.

Aham bhikkhave yāvade ākankhāmi sukhassa ca pahānā dukkhassa ca pahānā pubbeva somanassadomanassānam atthangamā adukkhamasukham upekkhāsatipārisuddhim catuttham jhānam upasampajja viharāmi. Kassapopi bhikkhave yāvade ākankhati sukhassa ca pahānā dukkhassa ca pahānā pubbeva -pa- catuttham jhānam upasampajja viharati.

Aham bhikkhave yāvade ākankhāmi sabbaso rūpasaññānam samatikkamā paṭighasaññānam atthangamā nānattasaññānam amanasikārā 'ananto ākāso'ti ākāsānañcāyatanam upasampajja viharāmi. Kassapopi bhikkhave yāvade ākankhati sabbaso rūpasaññānam samatikkamā -pa- ākāsānañcāyatanam upasampajja viharati.

Aham bhikkhave yāvade ākankhāmi sabbaso ākāsānancāyatanam samatikkamma 'anantam vinnānan'ti vinnānancāyatanam upasampajja viharāmi. Kassapopi bhikkhave yāvade ākankhati sabbaso ākāsānancāyatanam samatikkamma -pa- vinnānancāyatanam upasampajja viharati.

Aham bhikkhave yāvade ākankhāmi sabbaso viñnānancāyatanam samatikkamma 'natthi kincī'ti ākincannāyatanam upasampajja viharāmi. Kassapopi bhikkhave yāvade ākankhati -pa- ākincannāyatanam upasampajja viharati.

Aham bhikkhave yāvade ākankhāmi sabbaso ākincannāyatanam samatikkamma nevasannāsannāsannāyatanam upasampajja viharāmi. Kassapopi bhikkhave yāvade ākankhati -pa- nevasannāsannāyatanam upasampajja viharati.

Aham bhikkhave yāvade ākankhāmi sabbaso nevasañnānāsañnāyatanam samatikkamma sannāvedayitanirodham upasampajja viharāmi. Kassapopi -pa- sannāvedayitanirodham upasampajja viharati.

Aham bhikkhave yāvade ākankhāmi anekavihitam iddhividham paccanubhomi, ekopi hutvā bahudhā homi, bahudhāpi hutvā eko homi, āvibhāvam tirobhāvam tirokuṭṭam tiropākāram tiropabbatam asajjamāno gacchāmi seyyathāpi ākāse, pathaviyāpi ummujjanimujjam karomi seyyathāpi udake, udakepi abhijjamāne gacchāmi seyyathāpi pathaviyam, ākāsepi pallankena kamāmi seyyathāpi pakkhī sakuņo, imepi candimasūriye evammahiddhike evammahānubhāve pāṇinā parimasāmi parimajjāmi, yāva brahmalokāpi kāyena vasam vattemi. Kassapopi bhikkhave yāvade ākankhati anekavihitam iddhividham paccanubhoti -pa- yāva brahmalokāpi kāyena vasam vatteti.

Aham bhikkhave yāvade ākankhāmi dibbāya sotadhātuyā visuddhāya atikkantamānusikāya ubho sadde suṇāmi dibbe ca mānuse ca ye dūre santike ca. Kassapopi bhikkhave yāvade ākankhati dibbāya sotadhātuyā -pa- ye dūre santike ca.

Aham bhikkhave yāvade ākankhāmi parasattānam parapuggalānam cetasā ceto paricca pajānāmi, sarāgam vā cittam 'sarāgam cittan'ti pajānāmi, vītarāgam vā cittam 'vītarāgam cittan'ti pajānāmi, sadosam vā cittam -pa- vītadosam vā cittam -pa- samoham vā cittam -pa- vītamoham vā cittam -pa- samkhittam vā cittam -pa- vikkhittam vā cittam -pa- mahaggatam vā cittam -pa- amahaggatam vā cittam -pa- samāhitam vā cittam -pa- anuttaram vā cittam -pa- samāhitam vā cittam -pa- asamāhitam vā cittam -pa- vimuttam vā cittam -pa- avimuttam vā cittam 'avimuttam cittan'ti pajānāmi. Kassapopi bhikkhave yāvade ākankhati parasattānam parapuggalānam cetasā ceto paricca pajānāti, sarāgam vā cittam 'sarāgam cittan'ti pajānāti -pa- avimuttam vā cittam 'avimuttam cittan'ti pajānāti.

Aham bhikkhave yāvade ākankhāmi anekavihitam pubbenivāsam anussarāmi. Seyyathidam, ekampi jātim dvepi jātiyo tissopi jātiyo catassopi jātiyo pañcapi jātiyo dasapi jātiyo vīsampi jātiyo timsampi jātiyo cattālīsampi jātiyo paññāsampi jātiyo jātisatampi jātisahassampi jātisatasahassampi anekepi samvaṭṭakappe anekepi vivaṭṭakappe anekepi samvaṭṭavivaṭṭakappe 'amutrāsim evamnāmo evamgotto evamvaṇṇo evamāhāro evamsukhadukkhappaṭisamvedī evamāyupariyanto, so tato cuto amutra udapādim, tatrāpāsim evamnāmo evamgotto evamvaṇṇo evamāhāro evamsukhadukkhappaṭisamvedī evamāyupariyanto, so tato cuto idhūpapanno'ti. Iti sākāram sa-uddesam anekavihitam pubbenivāsam anussarāmi. Kassapopi bhikkhave yāvade ākankhati anekavihitam pubbenivāsam anussarati. Seyyathidam, ekampi jātim -pa-. Iti sākāram sa-uddesam anekavihitam pubbenivāsam anussarati.

Aham bhikkhave yāvade ākankhāmi dibbena cakkhunā visuddhena atikkantamānusakena satte passāmi cavamāne upapajjamāne

hīne paṇīte suvaṇṇe dubbaṇṇe sugate duggate, yathākammūpage satte pajānāmi 'ime vata bhonto sattā kāyaduccaritena samannāgatā vacīduccaritena samannāgatā manoduccaritena samannāgatā ariyānam upavādakā micchādiṭṭhikā micchādiṭṭhikammasamādānā, te kāyassa bhedā param maraṇā apāyam duggatim vinipātam nirayam upapannā. Ime vā pana bhonto sattā kāyasucaritena samannāgatā vacīsucaritena samannāgatā manosucaritena samannāgatā ariyānam anupavādakā sammādiṭṭhikā sammādiṭṭhikammasamādānā, te kāyassa bhedā param maraṇā sugatim saggam lokam upapannā'ti. Iti dibbena cakkhunā visuddhena atikkantamānusakena satte passāmi cavamāne upapajjamāne hīne paṇīte suvaṇṇe dubbaṇṇe sugate duggate, yathākammūpage satte pajānāmi. Kassapopi bhikkhave yāvade ākankhati dibbena cakkhunā visuddhena atikkantamānusakena satte passati cavamāne upapajjamāne hīne paṇīte suvaṇṇe dubbaṇṇe sugate duggate, yathākammūpage satte paṇāte suvaṇṇe dubbaṇṇe sugate duggate, yathākammūpage satte pajānāti.

Aham bhikkhave āsavānam khayā anāsavam cetovimuttim paññāvimuttim diṭṭheva dhamme sayam abhiññā sacchikatvā upasampajja viharāmi. Kassapopi bhikkhave āsavānam khayā anāsavam cetovimuttim paññāvimuttim diṭṭheva dhamme sayam abhiññā sacchikatvā upasampajja viharatīti—

evam navānupubbavihārachaļabhiññāppabhede uttarimanussadhamme attanā samasamaṭṭhapanatthāya bhagavatā vuttam kassapasamyutte āgatam pāļimimam peyyālamukhena ādiggahaņena ca sankhipitvā dassento āha "aham bhikkhave"ti-ādi.

Tattha **yāvade ākaṅkhāmī**ti yāvadeva icchāmīti attho. Tatoyeva hi **majjhimagaṇṭhipade cūḷagaṇṭhipade** ca "yāvadeti yāvadevāti vuttaṁ hotī"ti likhitaṁ. **Saṁyuttanikāyaṭṭhakathāyampi**¹ "yāvade

ākaṅkhāmīti yāvadeva icchāmī"ti attho vutto. Tathā hi tattha līnatthapakāsaniyaṁ **ācariyadhammapālatthereneva** vuttaṁ "yāvadevāti iminā samānatthaṁ yāvadeti idaṁ padan"ti. Potthakesu pana katthaci "yāvadevā"ti ayameva pāṭho dissati. Yāni pana ito paraṁ "vivicceva kāmehī"ti-ādinā nayena cattāri rūpāvacarakiriyajhānāni, "sabbaso rūpasaññānaṁ samatikkamā"ti-ādinā nayena catasso arūpasamāpattiyo, "sabbaso nevasaññānāsaññāyatanaṁ samatikkamma saññāvedayitanirodhan"ti-ādinā nayena nirodhasamāpatti, "anekavihitaṁ iddhividhan"ti-ādinā nayena abhiññā ca vuttā. Tattha yaṁ vattabbaṁ siyā, taṁ anupadavaṇṇanāya ceva bhāvanāvidhānena ca saddhiṁ **visuddhimagge**¹ sabbaso vitthāritaṁ. Idhāpi ca verañjakaṇḍe cattāri rūpāvacarajhānāni tisso ca vijjā āvi bhavissanti, tasmā tattha yaṁ vattabbaṁ, taṁ tattheva vannayissāma.

Navānupubbavihārachalabhiññāppabhedeti ettha navānupubbavihārā nāma anupatipātiyā samāpajjitabbabhāvato evamsaññitā nirodhasamāpattiyā saha attha samāpattiyo. Chalabhiññā nāma āsavakkhayañānena saddhim pañcābhiññāyoti evam lokiyalokuttarabhedā sabbā abhiññāyo. Uttarimanussadhammeti uttarimanussanam jhayinanceva ariyananca dhammo uttarimanussadhammo. Atha vā uttari manussadhammāti uttarimanussadhammo, manussadhammo nāma dasakusalakammapathadhammo. So hi vinā bhāvanāmanasikārena pakatiyāva manussehi nibbattetabbato manussattabhāvāvahato vā "manussadhammo"ti vuccati, tato uttari pana jhānādīni "uttarimanussadhammo"ti veditabbani. Attana samasamatthapanenati aham yattakam kālam yattake vā samāpattivihāre abhiññāyo ca vaļañjemi, tathā kassapopīti evam yathāvutta-uttarimanussadhamme attanā samasamam katvā thapanena. Idañca navānupubbavihārachalabhiññādibhāvasāmaññena pasamsāmattam vuttanti datthabbam. Na hi āyasmā mahākassapo bhagavā viya devasikam catuvīsatikotisatasahassasankhā samāpattiyo samāpajjati, yamakapāṭihāriyādivasena vā abhiññāyo vaļañjeti. Ettha ca "uttarimanussadhamme attanā samasamatthapanenā"ti idam nidassanamattanti veditabbam Tathā hi"Ovada kassapa bhikkhū, karohi kassapa bhikkhūnam dhammim katham, aham vā kassapa bhikkhū ovadeyyam tvam vā, aham vā kassapa bhikkhūnam dhammim katham kareyyam tvam vā"ti¹.

Evampi attanā samasamatthāne thapetiyeva, tassa kimaññam ānanyam bhavissati aññatra dhammavinayasangāyanāti adhippāyo. Tattha "tassāti tassa anuggahassā"ti majihimaganthipade vuttam. Tassa meti vā attho gahetabbo. Potthakesu hi katthaci "tassa me"ti pāṭhoyeva dissati, dhammavinayasangāyanam thapetvā aññam kinnāma tassa me ānanyam ananabhāvo bhavissatīti attho. "Nanu mam bhagavā"ti-ādinā vuttamevattham upamāvasena vibhāveti. **Sakakavaca-issarivānuppadānenā**ti ettha cīvarassa nidassanavasena kavacassa gahanam katam, samāpattiyā nidassanavasena issariyam gahitam. Kulavamsappatitthāpakanti kulavamsassa kulappaveniyā patitthāpakam. "Me saddhammavamsappatitthāpako"ti niccasāpekkhattā samāso datthabbo, me saddhammavamsassa patitthāpako pavattakoti vuttam hoti. Vuttavacanamanussaranto anuggahesīti cintayanto dhammavinayasangāyanattham bhikkhūnam ussāham janesīti sambandho, dhātubhājanadivase tattha sannipatitānam bhikkhūnam ussāham janesīti attho.

Idāni yathāvuttamattham pāļiyā vibhāvento āha "yathāhā"ti-ādi. Tattha ekamidāhanti ettha idanti nipātamattam. Ekam samayanti ca bhummatthe upayogavacanam, ekasmim samayeti vuttam hoti. Pāvāyāti pāvānagarato, tattha piṇḍāya caritvā kusināram gamissāmīti addhānamaggappaṭipannoti vuttam hoti. Addhānamaggoti ca dīghamaggo vuccati. Dīghapariyāyo hettha addhānasaddo. Mahatā bhikkhusamghena saddhinti guṇamahattenapi saṅkhyāmahattenapi mahatā. Bhikkhūnam saṃghena bhikkhusamghena, samaṇagaṇena saddhim ekatoti attho. "Pañcamattehī"ti-ādinā saṅkhyāmahattam vibhāveti. Matta-saddo cettha pamāṇavacano 'bhojane mattañnutā'ti-ādīsu viya. Sabbam subhaddakaṇḍam vitthārato veditabbanti sabbam subhaddakaṇḍam idha ānetvā vitthārato dassetabbanti adhippāyo.

"Tato paranti tato bhikkhūnam ussāhajananato paran"ti **ācariyadhammapālattherena** vuttam. **Mahāgaṇṭhipade** pana "tato paranti subhaddakaṇḍato paran"ti vuttam. Idamevettha sārato paccetabbanti no takko. Ayameva hi ussāhajananappakāro, yadidam "handa mayam āvuso dhammañca vinayañca saṅgāyeyyāma, pure adhammo dippatī"ti-ādi, tasmā ussāhajananato paranti na vattabbam heṭṭhā ussāhajananappakārassa pāḷiyam avuttattā. Ayañhettha pālikkamo—

"Atha kho āyasmā mahākassapo bhikkhū āmantesi, ekamidāham āvuso samayam pāvāya kusināram addhānamaggappaṭipanno mahatā bhikkhusamghena saddhim pañcamattehi bhikkhusatehi. Atha khvāham āvuso maggā okkamma aññatarasmim rukkhamūle nisīdim.

Tena kho pana samayena aññataro ājīvako kusinārāya mandāravapuppham gahetvā pāvam addhānamaggappaṭipanno hoti. Addasam kho-aham āvuso tam ājīvakam dūratova āgacchantam, disvāna tam ājīvakam etadavocam "apāvuso amhākam satthāram jānāsī"ti. Āma āvuso jānāmi, ajja sattāhaparinibbuto samaņo gotamo, tato me idam mandāravapuppham gahitanti. Tatrāvuso ye te bhikkhū avītarāgā, appekacce bāhā paggayha kandanti, chinnapātam papatanti āvaṭṭanti vivaṭṭanti, "atikhippam bhagavā parinibbuto, atikhippam sugato parinibbuto, atikhippam cakkhum loke antarahitan"ti. Ye pana te bhikkhū vītarāgā, te satā sampajānā adhivāsenti "aniccā sankhārā, tam kutettha labbhā"ti.

Atha khvāham āvuso te bhikkhū etadavocam "alam āvuso mā socitta mā paridevittha, nanvetam āvuso bhagavatā paṭikacceva akkhātam 'sabbeheva piyehi manāpehi nānābhāvo vinābhāvo aññathābhāvo, tam kutettha āvuso labbhā, yam tam jātam bhūtam sankhatam palokadhammam, tam vata mā palujjī'ti netamṭhānam vijjatī'ti.

Tena kho pana samayena āvuso subhaddo nāma vuḍḍhapabbajito tassaṁ parisāyaṁ nisinno hoti. Atha kho āvuso subhaddo vuḍḍhapabbajito te bhikkhū etadavoca "alaṁ āvuso mā socittha mā paridevittha, sumuttā mayaṁ tena mahāsamaṇena, upaddutā ca mayaṁ homa 'idaṁ vo kappati, idaṁ vo na kappatī'ti, idāni pana mayaṁ yaṁ icchissāma, taṁ karissāma, yaṁ na icchissāma, na taṁ karissāmā''ti. Handa mayaṁ āvuso dhammañca vinayañca saṅgāyeyyāma, pure adhammo dippati, dhammo paṭibāhīyati, avinayo pure dippati, vinayo paṭibāhīyati, pure adhammavādino balavanto honti, dhammavādino dubbalā honti, pure avinayavādino balavanto honti, vinayavādino dubbalā hontīti.

Tena hi bhante thero bhikkhū uccinatūti. Atha kho āyasmā mahākassapo ekenūnapañca-arahantasatāni uccini. Bhikkhū āyasmantam mahākassapam etadavocum "ayam bhante āyasmā ānando kiñcāpi sekkho, abhabbo chandā dosā mohā bhayā agatim gantum, bahu cānena bhagavato santike dhammo ca vinayo ca pariyatto, tena hi bhante thero āyasmantampi ānandam uccinatū"ti-ādi¹.

Tasmā tato paranti ettha subhaddakaņdato paranti evamattho daṭṭhabbo. "Sabbaṁ subhaddakaṇḍaṁ vitthārato veditabban"ti hi iminā "yaṁ na icchissāma, na taṁ karissāmā"ti etaṁ pariyantaṁ subhaddakaṇḍapāḷiṁ dassetvā idāni avasesaṁ ussāhajananappakārappavattaṁ pāḷimeva dassento "handa mayaṁ āvuso"ti-ādimāha.

Tattha **pure adhammo dippatī**ti ettha adhammo nāma dasakusalakammapathadhammapaṭipakkhabhūto adhammo. **Pure dippatī**ti api nāma dippati. Atha vā yāva adhammo dhammam paṭibāhitum samattho hoti, tato puretaramevāti attho. Āsanne hi anāgate² ayam puresaddo.

^{1.} Vi 4. 480 pitthādīsu. 2. Anadhippeto (Sī, Syā, Ka) Vajirabuddhitīkā passitabbā.

Dippatīti dippissati. Puresaddayogena hi anāgatatthe ayam vattamānapayogo yathā "purā vassati devo"ti. Keci panettha evam vaṇṇayanti "pureti pacchā anāgate yathā addhānam gacchantassa gantabbamaggo 'pure'ti vuccati, tathā idha daṭṭhabban"ti. Avinayoti pahānavinayasamvaravinayānam paṭipakkhabhūto avinayo. "Vinayavādino dubbalā hontī'ti evam iti-saddopi ettha daṭṭhabbo, "tato param āhā"ti iminā sambandho. Potthakesu pana katthaci iti-saddo na dissati, pāḷiyam pana dīghanikāyaṭṭhakathāyañca attheva iti-saddo.

Tena hīti uyyojanatthe nipāto. Uccinane uyyojentā hi tam mahākassapattheram evamāhamsu. Bhikkhū uccinatūti sangītiyā anurūpe bhikkhū-uccinitvā ganhātūti attho. "Sakalanavanga -pa- pariggahesī"ti etena sukkhavipassakakhīnāsavapariyantānam yathāvuttapuggalānam satipi āgamādhigamasabbhāve saha patisambhidāhi tevijjādiguņayuttānam āgamādhigamasampattiyā ukkamsagatattā sangītiyā bahūpakāratam dasseti. Tattha sakalanavangasatthusasanapariyattidhareti sakalam suttageyyadi navangam ettha, etassa vā atthīti sakalanavangam, satthusāsanam. Atthakāmena pariyāpunitabbato ditthadhammikādipurisattapariyattabhāvato ca parivattīti tīni pitakāni vuccanti, tam sakalanavangasatthusāsanasankhātam pariyattim dhārentīti sakalanavangasatthusāsanapariyattidharā, tādiseti attho. Bahūnam nānappakārānam kilesānam sakkāyaditthiyā ca avihatattā tā janenti, tāhi vā janitāti puthujjanā. Duvidhā puthujjanā andhaputhujjanā kalyānaputhujjanāti. Tattha yesam khandhadhātu-āyatanādīsu uggahaparipucchāsavanadhāranapaccavekkhanāni natthi, te andhaputhujjanā. Yesam tāni atthi, te kalyāṇaputhujjanā. Te idha "puthujjanā" ti adhippetā. Samathabhāvanāsinehābhāvena sukkhā lūkhā asiniddhā vipassanā etesanti sukkhavipassakā.

Tipiṭakasabbapariyattippabhedadhareti tiṇṇaṁ piṭakānaṁ samāhāro tipiṭakaṁ, tipiṭakasaṅkhātaṁ navaṅgādivasena anekadhā bhinnaṁ sabbapariyattippabhedaṁ dhārentīti tipiṭakasabbapariyattippabhedadharā, tādiseti attho. Anu anu taṁsamaṅgīnaṁ bhāveti vaḍḍhetīti anubhāvo,

anubhāvo eva ānubhāvo, pabhāvo¹. Mahanto ānubhāvo yesaṁ te **mahānubhāvā. Tevijjādibhede**ti tisso vijjāyeva tevijjā, tā ādi yesaṁ chaļabhiññādīnaṁ te tevijjādayo, te bhedā anekappakārā bhinnā etesanti tevijjādibhedā, khīṇāsavā, tādiseti attho. Atha vā tisso vijjā etassa atthīti tevijjo, so ādi yesaṁ chaļabhiññādīnaṁ te tevijjādayo, te bhedā yesaṁ khīṇāsavānaṁ te tevijjādibhedā, tādiseti attho. **Ye sandhāya idaṁ vuttan**ti ye bhikkhū sandhāya idaṁ "atha kho āyasmā"ti-ādivacanaṁ **saṅgītikkhandhake**² vuttanti attho.

Kissa panāti kasmā pana. Sikkhatīti sekkho, atha vā sikkhanam sikkhā, sāyeva tassa sīlanti sekkho. So hi apariyositasikkhattā ca tadadhimuttattā ca ekantena sikkhanasīlo na asekkho viya pariniṭṭhitasikkho tattha paṭipassaddhussāho, nāpi vissaṭṭhasikkho pacurajano viya tattha anadhimutto. Atha vā ariyāya jātiyā tīsu sikkhāsu jāto, tattha vā bhavoti sekkho. Atha vā ikkhati etāyāti ikkhā, maggaphalasammādiṭṭhi. Saha ikkhāyāti sekkho. Uparimaggattayakiccassa apariyositattā saha karaṇīyenāti sakaraṇīyo. Assāti anena. Asammukhā paṭiggahitaṁ nāma natthīti nanu ca—

"Dvāsīti buddhato gaṇhim, dve sahassāni bhikkhuto. Caturāsīti sahassāni, ye me dhammā payattino"ti³—

vuttattā kathametam yujjatīti? Dve sahassāni bhikkhutoti vuttampi bhagavato santike paṭiggahitamevāti katvā vuttanti nāyam virodho. **Bahukārattā**ti bahu-upakārattā. Upakāravacano hettha kārasaddo. **Assā**ti bhaveyya.

Ativiya vissatthoti ativiya vissāsiko. Nanti ānandattheram, "ovadatī"ti iminā sambandho. Ānandattherassa yebhuyyena navakāya parisāya vibbhamanena mahākassapatthero evamāha "na vāyam kumārako mattamaññāsī"ti. Tathā hi parinibbute satthari mahākassapatthero satthuparinibbāne sannipatitassa bhikkhusamghassa majjhe

nisīditvā dhammavinayasangāyanattham pañcasate bhikkhū uccinitvā "āvuso rājagahe vassam vasantā dhammavinayam sangāyeyyāma, tumhe pure vassūpanāyikāya attano attano palibodham pacchinditvā rājagahe sannipatathā"ti vatvā attanā rājagaham gato. Ānandattheropi bhagavato pattacīvaramādāya mahājanam saññāpento sāvatthim gantvā tato nikkhamma rājagaham gacchanto dakkhiṇagirismim cārikam cari. Tasmim samaye ānandattherassa timsamattā saddhivihārikā yebhuyyena kumārabhūtā ekavassikaduvassikabhikkhū ceva anupasampannā ca vibbhamimsu. Kasmā panete pabbajitā, kasmā vibbhamimsūti? Tesam kira mātāpitaro cintesum "ānandatthero satthuvissāsiko aṭṭha vare yācitvā upaṭṭhahati, icchiticchitaṭṭhānam satthāram gahetvā gantum sakkoti, amhākam dārake etassa santike pabbājessāma, so satthāram gahetvā āgamissati, tasmim āgate mayam mahāsakkāram kātum labhissāmā"ti iminā tāva kāraṇena nesam ñātakā te pabbājesum. Satthari pana parinibbute tesam sā patthanā upacchinnā, atha ne ekadivaseneva uppabbājesum.

Atha ānandattheram dakkhinagirismim cārikam caritvā rājagahamāgatam disvā mahākassapatthero evamāha "na vāyam kumārako mattamaññāsī"ti. Vuttañhetam kassapasamyutte—

"Atha kiñcarahi tvaṁ āvuso ānanda imehi navehi bhikkhūhi indriyesu aguttadvārehi bhojane amattaññūhi jāgariyaṁ ananuyuttehi saddhiṁ cārikaṁ carasi, sassaghātaṁ maññe carasi, kulūpaghātaṁ maññe carasi, olujjati kho te āvuso ānanda parisā, palujjanti kho te āvuso navappāyā, na vāyaṁ kumārako mattamaññāsīti.

Api me bhante kassapa sirasmim palitāni jātāni, atha ca pana mayam ajjāpi āyasmato mahākassapassa kumārakavādā na muccāmāti. Tathā hi pana tvam āvuso ānanda imehi navehi bhikkhūhi indriyesu aguttadvārehi bhojane amattaññūhi jāgariyam ananuyuttehi saddhim cārikam carasi, sassaghātam maññe carasi, kulūpaghātam maññe carasi, olujjati

kho te āvuso ānanda parisā, palujjanti kho te āvuso navappāyā, na vāyam kumārako mattamaññasī"ti¹.

Tattha² sassaghātaṁ maññecarasīti sassaṁ ghātento viya āhiṇḍasi. Kulūpaghātaṁ maññe carasīti kulāni upaghātento viya hananto viya āhananto viya āhiṇḍasi. Olujjatīti palujjati bhijjati. Palujjanti kho te āvuso navappāyāti āvuso evaṁ ete tuyhaṁ pāyena yebhuyyena navakā ekavassikaduvassikadaharā ceva sāmaṇerā ca palujjanti. Na vāyaṁ kumārako mattamaññāsīti ayaṁ kumārako attano pamāṇaṁ na vata jānātīti theraṁ tajjento āha. Kumārakavādā na muccāmāti kumārakavādato na muccāma. Tathā hi pana tvanti idamassa evaṁ vattabbatāya kāraṇadassanatthaṁ vuttaṁ. Ayañhettha adhippāyo—yasmā tvaṁ imehi navakehi bhikkhūhi indriyasaṁvararahitehi saddhṁ vicarasi, tasmā kumārakehi saddhiṁ caranto "kumārako"ti vattabbataṁ arahasīti.

"Na vāyam kumārako mattamaññāsī"ti ettha **vā**-saddo padapūraņe. **Vā**-saddo hi upamānasamuccayasamsayavavassaggapadapūraņavikappādīsu bahūsu atthesu dissati. Tathā hesa "paṇḍito vāpi tena so"ti-ādīsu³ upamāne dissati, sadisabhāveti attho. "Tam vāpi dhīrā muni vedayantī"ti-ādīsu⁴ samuccaye. "Ke vā ime kassa vā"ti-ādīsu⁵ samsaye. "Ayam vā imesam samaṇabrāhmaṇānam sabbabālo sabbamūļho"ti-ādīsu⁶ vavassagge. "Ye hi keci bhikkhave samaṇā vā brāhmaṇā vā"ti-ādīsu⁶ vavassagge. "Ye hi keci bhikkhave samaṇā vā brāhmaṇā vā"ti-ādīsuʻ vikappeti. Idha pana padapūraṇe daṭṭhabbo. Teneva ca **ācariyadhammapālattherena** vuttam "vāsaddassa atthuddhāram karontena 'na vāyam kumārako mattamaññāsī'ti-ādīsuʻ padapūraṇe"ti. Aṭṭhakathāyampiʻ ettakameva vuttam "na vāyam kumārako mattamaññāsīti ayam kumārako attano pamāṇam na vata jānātīti theram tajjento āhā''ti. Etthāpi **vatā**ti vacanasiliṭṭhatāya vuttam. Yam panettha **kenaci** vuttam "na vāyanti ettha vāti vibhāsā, aññāsipi na aññāsipīti

^{1.} Sam 1. 418 pitthe.

^{2.} Sam-Ţţha 2. 166 piţţhe.

^{3.} Khu 1. 22 pitthe.

^{4.} Khu 1. 309 pitthe.

^{5.} Vi 1. 197 pitthe.

^{6.} Dī 1. 55 pitthe.

^{7.} Ma 1. 122; Sam 1. 255 pitthesu.

^{8.} Sam 1. 418 pitthe.

^{9.} Sam-Ttha 2. 166 pitthe.

attho"ti. Taṁ tassa matimattanti daṭṭhabbaṁ. Na hettha ayamattho sambhavati, tasmā attano pamāṇaṁ nāññāsīti evamattho veditabbo. **Tatrā**ti evaṁ sati. **Chandāgamanaṁ viyā**ti ettha chandā āgamanaṁ viyāti padacchedo kātabbo, chandena āgamanaṁ pavattanaṁ viyāti attho, chandena akattabbakaraṇaṁ viyāti vuttaṁ hoti. Chandaṁ vā āgacchati saṃpayogavasenāti chandāgamanaṁ, tathā pavatto apāyagamanīyo akusalacittuppādo. Atha vā ananurūpaṁ gamanaṁ agamanaṁ, chandena agamanaṁ chandāgamanaṁ, chandena sinehena ananurūpaṁ gamanaṁ pavattanaṁ akattabbakaraṇaṁ viyāti vuttaṁ hoti.

Asekkhapaţisambhidāppatteti asekkhabhūtā paţisambhidā asekkhapaţisambhidā, taṁ patte, paţiladdha-asekkhapaţisambhideti attho. Anumatiyāti anuññāya, yācanāyāti vuttaṁ hoti.

"Kiñcāpi sekkho"ti idam na sekkhānam agatigamanasabbhāvena vuttam, asekkhānamyeva pana uccinitattāti datthabbam. Pathamamaggeneva hi cattāri agatigamanāni pahīyanti, tasmā kiñcāpi sekkho, tathāpi thero āyasmantampi ānandam uccinatūti evamettha sambandho veditabbo. Na pana kiñcāpi sekkho, tathāpi abhabbo agatim gantunti yojetabbam. "Abhabbo"ti-ādinā pana dhammasaṅgītiyā tassa arahabhāvaṁ dassentā vijjamāne guņe kathenti. Tattha **chandā**ti chandena, sinehenāti attho. **Agatim** gantunti agantabbam gantum, akattabbam katunti vuttam hoti. Imani pana cattāri agatigamanāni bhandabhājanīye ca vinicchayatthāne ca labbhanti. Tattha bhandabhājanīye tāva attano bhārabhūtānam bhikkhūnam amanāpe bhande sampatte tam parivattitvā manāpam dento chandāgatim gacchati nāma. Attano pana abhārabhūtānam manāpe bhande sampatte tam parivattitvā amanāpam dento dosāgatim gacchati nāma. Bhandesu bhājanīyavatthuñca thitikañca ajānanto mohāgatim gacchati nāma. Mukharānam vā rājādinissitānam vā "ime me amanāpe bhande dinne anattham kareyyun"ti bhayena parivattitvā manāpam dento bhayāgatim gacchati nāma. Yo pana evam na gacchati, sabbesam tulābhūto pamāṇabhūto majjhattova hutvā yam yassa pāpuṇāti, tadeva tassa deti, ayam catubbidhampi agatim na gacchati nāma. Vinicchayatthāne pana attano bhārabhūtassa garukāpattim lahukāpattim katvā kathento chandāgatim gacchati nāma. Itarassa lahukāpattim

garukāpattim katvā kathento dosāgatim gacchati nāma. Āpattivuṭṭhānam pana samuccayakkhandhakañca ajānanto mohāgatim gacchati nāma. Mukharassa vā rājapūjitassa vā "ayam me garukam katvā āpattim kathentassa anatthampi kareyyā"ti garukameva lahukāpattim kathento bhayāgatim gacchati nāma. Yo pana sabbesam yathābhūtameva kathesi, ayam catubbidhampi agatigamanam na gacchati nāma. Theropi tādiso catunnampi agatigamanāmam paṭhamamaggeneva pahīnattā, tasmā saṅgāyanavasena dhammavinayampi vinicchaye sampatte chandādivasena aññathā akathetvā yathābhūtameva kathetīti vuttam "abhabbo -pa- agatim gantun"ti. Pariyattoti adhīto, uggahitoti attho.

Uccinitenāti uccinitvā gahitena. Etadahosīti etam parivitakkanam ahosi. Rājagaham kho mahāgocaranti ettha "rājagahanti rājagahasāmantam gahetvā vuttan"ti cūļagaṇṭhipade majjhimagaṇṭhipade ca vuttam. Gāvo caranti etthāti gocaro, gocaro viya gocaro, bhikkhācaraṇaṭṭhānam. So mahanto assa, etthāti vā mahāgocaram, rājagaham. Thāvarakammanti ciraṭṭhāyikammam. Visabhāgapuggalo subhaddasadiso. Ukkoṭeyyāti nivāreyyāti attho. Ñattidutiyena kammena sāvesīti—

"Suṇātu me āvuso saṃgho, yadi saṃghassa pattakallaṃ, saṃgho imāni pañca bhikkhusatāni sammanneyya 'rājagahe vassaṃ vasantāni dhammañca vinayañca saṅgāyituṁ, na aññehi bhikkhūhi rājagahe vassaṁ vasitabban'ti, esā ñatti.

Suṇātu me āvuso saṁgho, saṁgho imāni pañca bhikkhusatāni sammannati 'rājagahe vassaṁ vasantāni dhammañca vinayañca saṅgāyituṁ, na aññehi bhikkhūhi rājagahe vassaṁ vasitabban'ti, yassāyasmato khamati imesaṁ pañcannaṁ bhikkhusatānaṁ sammuti 'rājagahe vassaṁ vasantānaṁ dhammañca vinayañca saṅgāyituṁ, na aññehi bhikkhūhi rājagahe vassaṁ vasitabban'ti, so tuṇhassa. Yassa nakkhamati, so bhāseyya.

Sammatāni samghena imāni pañca bhikkhusatāni 'rājagahe vassam vasantāni dhammañca vinayañca sangāyitum, na aññehi bhikkhūhi rājagahe

vassam vasitabban'ti, khamati samghassa, tasm \bar{a} tuṇh \bar{i} , evametam dh \bar{a} ray \bar{a} m \bar{i} "ti 1 —

evam ñattidutiyena kammena sāveti. Idam sandhāya vuttam "tam sangītikkhandhake vuttanayeneva ñātabban"ti.

Ayam pana kammavācā tathāgatassa parinibbānato ekavīsatime divase katā. Vuttañhetam dīghanikāvatthakathāvam² "ayam pana kammavācā tathāgatassa parinibbānato ekavīsatime divase katā. Bhagavā hi visākhapunnamāyam paccūsasamaye parinibbuto, athassa sattāham suvannavannam sarīram gandhamālādīhi pūjayimsu. Evam sattāham sādhukīlanadivasā nāma ahesum. Tato sattāham citakāya agginā jhāyi, sattāham sattipanjaram katvā santhāgārasālāyam dhātupūjam karimsūti ekavīsati divasā gatā. Jetthamūlasukkapakkhapañcamiyam pana dhātuyo bhājayimsu. Etasmim dhātubhājanadivase sannipatitassa mahābhikkhusamghassa subhaddena vuddhapabbajitena katam anācāram ārocetvā vuttanayeneva bhikkhū uccinitvā ayam kammavācā katā. Imañca pana kammavācam katvā thero bhikkhū āmantesi 'āvuso idāni tumhākam cattālīsadivasā okāso, tato param ayam nāma no palibodho atthīti vattum na labbhā, tasmā etthantare yassa rogapalibodho vā ācariyupajjhāyapalibodho vā mātāpitupalibodho vā atthi, pattam vā pana pacitabbam cīvaram vā kātabbam, so tam palibodham chinditvā karanīyam karotū'ti. Evanca pana vatvā thero attano pañcasatāya parisāya parivuto rājagaham gato, aññepi mahātherā attano attano parivāram gahetvā sokasallasamappitam mahājanam assāsetukāmā tam tam disam pakkantā. Punnatthero pana sattasatabhikkhuparivāro 'tathāgatassa parinibbānaṭṭhānam āgatāgatam mahājanam assāsessāmī'ti kusinārāyameva atthāsi. Āyasmā ānando yathā pubbe aparinibbutassa, evam parinibbutassapi bhagavato sayameva pattacīvaramādāya pañcahi bhikkhusatehi saddhim yena sāvatthi tena cārikam pakkāmi. Gacchato panassa parivārā bhikkhū gananapatham vītivattā"ti. Tasmā tathāgatassa

parinibbānato tīsu sattāhesu atikkantesu ekavīsatime divase imam kammavācam sāvetvā thero rājagaham pakkantoti veditabbam.

Yadi evam kasmā pana idha maṅgalasuttaṭṭhakathāyañca "sattasu sādhukīļanadivasesu sattasu ca dhātupūjādivasesu vītivattesū"ti vuttaṁ? Sattasu dhātupūjādivasesu gahitesu tadavinābhāvato majjhe citakāya jhāpanasattāhampi gahitamevāti katvā visuṁ na vuttaṁ viya dissati. Yadi evaṁ atha kasmā "aḍḍhamāso atikkanto, diyaḍḍhamāso seso"ti ca vuttanti? Nāyaṁ doso. Appakaṁ² hi ūnamadhikaṁ vā gaṇanūpagaṁ na hoti, tasmā samudāyo appakena adhikopi anadhiko viya hotīti katvā aḍḍhamāsato adhikepi pañca divase "aḍḍhamāso atikkanto"ti vuttaṁ "dvāsītikhandhakavattānaṁ katthaci asītikhandhakavattānī"ti vacanaṁ viya. Tathā appakena ūnopi ca samudāyo anūno viya hotīti katvā "diyaṭṭhamāsato ūnepi pañca divase diyaḍḍhamāso seso"ti ca vuttaṁ.

Satipaṭṭhānavibhaṅgaṭṭhakathāyaṁ³ hi chamāsato ūnepi aḍḍhamāse "cha māse sajjhāyo kātabbo"ti vuttavacanaṁ viya. Tattha hi tacapañcakādīsu catūsu pañcakesu dvīsu ca chakkesu ekekasmiṁ anulomato pañcāhaṁ, paṭilomato pañcāhaṁ, anulomapaṭilomato pañcāhaṁ, tathā purimapurimehi pañcakachakkehi saddhiṁ anulomato pañcāhaṁ, paṭilomato pañcāhaṁ, anulomapaṭilomato pañcāyanti evaṁ visuṁ tipañcāhaṁ ekato tipañcāhaṁca sajjhāyaṁ katvā chamāsaṁ sajjhāyo kātabboti vacanaṁ viya. Tattha hi vakkapañcakādīsu tīsu pañcakesu dvīsu ca chakkesu visuṁ heṭṭhimehi ekato ca sajjhāye pañcannaṁ pañcannaṁ⁴ pañcakānaṁ vasena pañcamāsaparipuṇṇā labbhanti, tacapañcake pana visuṁ tipañcāhamevāti aḍḍhamāsoyeveko labbhatīti aḍḍhamāsādhikapañcamāsā labbhanti.

Evam sati yathā tattha aḍḍhamāse ūnepi māsaparicchedena paricchijjamāne sajjhāye cha māsā paricchedakā hontīti paricchijjamānassa sajjhāyassa sattamāsādimāsantaragamananivāraṇattham chamāsaggahaṇam katam, na sakalachamāse sajjhāyappavattidassanattham, evamidhāpi māsavasena kāle paricchijjamāne ūnepi pañcadivase diyaḍḍhamāso paricchedako hotīti

^{1.} Khuddakapātha-Ţtha 79 pitthe.

^{3.} Abhi-Ttha 2. 237 pitthe.

^{2.} Appakena (Sī)

^{4.} Channam channam (Sī, Syā)

paricchijjamānassa kālassa dvimāsādimāsantaragamananivāranattham "diyaddhamāso seso"ti diyaddhamāsaggahanam katanti evamettha attho gahetabbo. Aññathā ca atthakathāvacanānam aññamaññavirodho āpajjati. Ekāhameva vā bhagavato sarīram citakāya jhāyīti khuddakabhānakānam adhippāvoti gahetabbam. Evañhi sati parinibbānato sattasu sādhukīlanadivasesu vītivattesu atthamiyam citakāya bhagavato sarīram jhāpetvā tato param sattasu divasesu dhātupūjam akamsūti addhamāso atikkanto, gimhānam divaddho ca māso seso hoti. Parinibbānasuttantapāliyampi hi citakāya jhāpanasattāham na āgatam, dveyeva sattāhāni āgatāni, upaparikkhitvā pana yam ruccati, tam gahetabbam. Ito aññena vā pakārena yathā na virujihati, tathā kāranam pariyesitabbam. Yam panettha kenaci vuttam "addhamāso atikkantoti ettha eko divaso nattho. So pātipadadivaso kolāhaladivaso nāma, tasmā idha na gahito"ti. Tam na sundaram parinibbānasuttantapāliyam pātipadadivasatoyeva patthāya sattāhassa vuttattā atthakathāyañca parinibbānadivasenapi saddhim tinnam sattāhānam gahitattā. Tathā hi parinibbānadivasena saddhim tinnā sattāhānam gahitattā jetthamūlasukkapañcamī ekavīsatimo divaso hoti.

Sattasu sādhukīļanadivasesūti ettha sādhukīļanam nāma samvegavatthum kittetvā kittetvā aniccatāpaṭisamyuttāni gītāni gāyitvā pūjāvasena kīļanato sundaram kīļananti sādhukīļanam. Atha vā saparahitasādhanaṭṭhena sādhu, tesam samvegavatthum kittetvā kittetvā kīļanam sādhukīļanam, uļārapuññapasavanato samparāyikatthāvirodhikīļāvihāroti attho. Ettha ca purimasmim sattāhe sādhukīļāya ekadesena katattā sādhukīļanadivasā nāma te jātā. Visesato pana dhātupūjādivasesuyeva sādhukīļanam¹ akamsu. Tatoyeva ca mahāparinibbānasuttantapāļiyam²—

"Atha kho kosinārakā mallā bhagavato sarīrāni sattāham santhāgāre sattipañjaram karitvā dhanupākāram

parikkhipāpetvā naccehi gītehi vāditehi mālehi gandhehi sakkarimsu garum karimsu mānesum pūjesun"ti.

Etassa aṭṭhakathāyaṁ¹ vuttaṁ—

"Kasmā panete evamakamsūti? Ito purimesu dvīsu sattāhesu te bhikkhusamghassa ṭhānanisajjokāsam karontā khādanīyabhojanīyādīni samvidahantā sādhukīļikāya okāsam nalabhimsu. Tato nesam ahosi 'imam sattāham sādhukīļitam kīļissāma, ṭhānam kho panetam vijjati, yam amhākam pamattabhāvam ñatvā kocideva āgantvā dhātuyo ganheyya, tasmā ārakkham ṭhapetvā kīļissāmā'ti, tena te evamakamsū''ti.

Tasmā visesato sādhukīļikā dhātupūjādivasesuyevāti daṭṭhabbaṁ. Te pana dhātupūjāya katattā "dhātupūjādivasā"ti pākaṭā jātāti āha "sattasu ca dhātupūjādivasesū"ti. Upakaṭṭhāti āsannā. Vassaṁ upanenti upagacchanti etthāti vassūpanāyikā. Ekaṁ maggaṁ gatoti cārikaṁ caritvā mahājanaṁ assāsetuṁ ekena maggena gato. Evaṁ anuruddhattherādayopi tesu tesu janapadesu cārikaṁ caritvā mahājanaṁ assāsentā gatāti daṭṭhabbaṁ. Yena sāvatthi, tena cārikaṁ pakkāmīti yattha sāvatthi, tattha cārikaṁ pakkāmi, yena vā disābhāgena sāvatthi pakkamitabbā hoti, tena disābhāgena cārikaṁ pakkāmīti attho.

Tatrāti tassam sāvatthiyam. Sudanti nipātamattam.

Aniccatādipaṭisaṁyuttāyāti "sabbe saṅkhārā aniccā"ti-ādinayappavattāya. Asamucchinnataṇhānusayattā avijjātaṇhābhisaṅkhatena kammunā bhavayonigatiṭhitisattāvāsesu khandhapañcakasaṅkhātaṁ attabhāvaṁ janeti abhinibbattetīti jano, kilese janeti, ajani, janissatīti vā jano, mahanto janoti mahājano, taṁ mahājanaṁ, bahujananti attho. Saññāpetvāti samassāsetvā. Gandhakuṭiyā dvāraṁ vivaritvāti paribhogacetiyabhāvato gandhakuṭiṁ vanditvā gandhakuṭiyā dvāraṁ vivarīti veditabbaṁ. Teneva dīghanikāyaṭṭhakathāyaṁ² "gandhakuṭiṁ vanditvā"ti vuttaṁ. Milātaṁ mālākacavaraṁ³ milātamālākacavaraṁ. Yathāṭhāne ṭhapetvāti pathamathitatthānaṁ

^{1.} Dī-Ttha 2. 197 pitthe.

anatikkamitvā yathāṭhitaṭṭhāneyeva ṭhapetvāti attho. Bhagavato ṭhitakāle karaṇīyaṁ vatthaṁ sabbamakāsīti senāsane kattabbavattaṁ sandhāya vuttaṁ. Karonto ca nhānakoṭṭhake sammajjana-udakūpaṭṭhānādikālesu gandhakuṭiṁ gantvā "nanu bhagavā ayaṁ tumhākaṁ nhānakālo, ayaṁ dhammadesanākālo, ayaṁ bhikkhūnaṁ ovādadānakālo, ayaṁ sīhaseyyaṁ kappanakālo, ayaṁ mukhadhovanakālo"ti-ādinā nayena paridevamānova akāsi. Tamenaṁ aññatarā devatā "bhante ānanda tumhe evaṁ paridevamānā kathaṁ aññe assāsayissathā"ti saṁvejesi. So tassā vacanena saṁviggahadayo santhambhitvā tathāgatassa parinibbānato pabhuti ṭhānanisajjabahulatāya ussannadhātukaṁ kāyaṁ samassāsetuṁ khīravirecanaṁ pivi. Idāni taṁ dassento "atha thero"ti-ādimāha.

Ussannadhātukanti upacitasemhādidhātukam kāyam. Samassāsetunti santappetum. Dutiyadivaseti devatāya samvejitadivasato. "Jetavanavihāram paviṭṭhadivasato vā dutiyadivase''ti vadanti. Viriccati etenāti virecanam, osadhaparibhāvitam khīrameva virecananti khīravirecanam. Yam sandhāyāti yam bhesajjapānam sandhāya. Aṅgasubhatāya subhoti evam laddhanāmattā subhena māṇavena. Pahitam māṇavakanti "satthā parinibbuto ānandatthero kirassa pattacīvaram gahetvā āgato, mahājano ca tam dassanāya upasaṅkamatī''ti sutvā "vihāram kho pana gantvā mahājanamajjhe na sakkā sukhena paṭisanthāram vā kātum dhammakatham vā sotum, geham āgatamyeva nam disvā sukhena paṭisanthāram karissāmi, ekā ca me kaṅkhā atthi, tampi nam pucchissāmī''ti cintetvā subhena māṇavena pesitam māṇavakam. Etadavocāti etam "akālo kho"ti-ādikam ānandatthero avoca. Akālo khoti ajja gantum yuttakālo na hoti. Kasmāti ce āha "atthi me ajjā"ti-ādi. Bhesajjamattāti appamattakam bhesajjam.

Dutiyadivaseti khīravirecanam pītadivasato dutiyadivase.

Cetakattherenāti cetiyaraṭṭhe jātattā "cetako"ti evamladdhanāmena. Subhena
māṇavena puṭṭhoti "yesu dhammesu bhavam gotamo imam

lokam patiṭṭhāpesi, te tassa accayena naṭṭhā nu kho, dharanti, sace dharanti, ānando jānissati, handa nam pucchāmī'ti evam cintetvā "yesam so bhavam gotamo dhammānam vaṇṇavādī ahosi, yattha ca imam janatam samādapesi nivesesi patiṭṭhāpesi, katamesānam kho bho ānanda dhammānam so bhavam gotamo vaṇṇavādī ahosī''ti-ādinā¹ subhena māṇavena puṭṭho. Athassa thero tīṇi piṭakāni sīlakkhandhādīhi tīhi khandhehi saṅgahetvā dassento "tiṇṇam kho māṇava khandhānam so bhagavā vaṇṇavādī''ti-ādinā¹ subhasuttamabhāsi. Tam sandhāya vuttam "dīghanikāye subhasuttam nāma dasamam suttamabhāsī''ti.

Khaṇḍaphullapaṭisaṅkharaṇanti ettha khaṇḍanti chinnaṁ. Phullanti bhinnaṁ. Tesaṁ paṭisaṅkharaṇaṁ puna sammā pākatikakaraṇaṁ, abhinavakaraṇanti vuttaṁ hoti. Rājagahanti evaṁnāmakaṁ nagaraṁ. Tañhi mandhābhumahāgovindādīhi pariggahitattā "rājagahan"ti vuccati. Chaḍḍitapatita-uklāpāti chaḍḍitā ca patitā ca uklāpā ca ahesunti attho. Idaṁ vuttaṁ hoti—bhagavato parinibbānaṭṭhānaṁ gacchantehi bhikkhūhi chaḍḍitā vissaṭṭhā, tatoyeva ca upacikādīhi khāditattā ito cito ca patitā, sammajjanābhāvena ākiṇṇakacavarattā uklāpā ca ahesunti. Imamevatthaṁ dassento āha "bhagavato hī"ti-ādi. Paricchedavasena veṇiyati² dissatīti pariveṇaṁ. Tatthāti tesu vihāresu. Khaṇḍaphullapaṭisaṅkharaṇanti iminā sambandho. Paṭhamaṁ māsanti vassānassa paṭhamaṁ māsaṁ, accantasaṁyoge cetaṁ upayogavacanaṁ. Senāsanavattānaṁ paññattattā senāsanakkhandhake ca senāsanapaṭibaddhānaṁ bahūnaṁ vacanato "bhagavatā -pa- vaṇṇitan"ti vuttaṁ.

Dutiyadivaseti "khaṇḍaphullapaṭisaṅkharaṇaṁ karomā"ti cintitadivasato dutiyadivase. So ca vassūpanāyikadivasato dutiyadivasoti veditabbo. Te hi therā āsāṭhīpuṇṇamāya uposathaṁ katvā pāṭipade sannipatitvā vassaṁ upagantvā evaṁ cintesuṁ. **Ajātasattu rājā**ti ajāto hutvā pituno paccatthiko jātoti "ajātasattū"ti laddhavohāro rājā. Tasmiṁ kira kucchigate deviyā evarūpo dohaļo uppajji "aho vatāhaṁ rañño dakkhiṇabāhuto lohitaṁ

piveyyan"ti. Atha tassā kathetum asakkontiyā kisabhāvam dubbaṇṇabhāvañca disvā rājā sayameva pucchitvā ñatvā ca vejje pakkosāpetvā suvaṇṇasatthakena bāhum phāletvā suvaṇṇasarakena lohitam gahetvā udakena sambhinditvā pāyesi. Nemittakā tam sutvā "esa gabbho rañño sattu bhavissati, iminā rājā haññissatī"ti byākarimsu, tasmā "ajātoyeva rañño sattu bhavissatī"ti nemittakehi niddiṭṭhattā ajātasattu nāma jāto. Kinti kāraṇapucchanatthe nipāto, kasmāti attho. Paṭivedesunti nivedesum, jānāpesunti attho. Vissatthāti nirāsaṅkacittā. Āṇācakkanti āṇāyeva appaṭihatavuttiyā pavattanaṭṭhena cakkanti āṇācakkam. Sannisajjaṭṭhānanti sannipatitvā nisīdanaṭṭhānam.

Rājabhavanavibhūtinti rājabhavanasampattim. Avahasantamivāti avahāsam kurumānam viya. Siriyā niketamivāti siriyā vasanatthānamiva. Ekanipātatitthamiva ca devamanussanayanavihangānanti ekasmim pānīyatitthe sannipatantā pakkhino viya sabbesam janānam cakkhūni mandapeyeva nipatantīti devamanussānam nayanasankhātavihangānam ekanipātatitthamiva ca. Lokarāmaneyyakamiva sampinditanti ekattha sampinditam rāsikatam loke ramanīyabhāvam viya. Yadi loke vijjamānam ramanīyattam sabbameva ānetvā ekattha sampinditam siyā, tam viyāti vuttam hoti. "Datthabbasāramandanti pheggurahitasāram viya kasatavinimuttam pasannabhūtam viya ca datthabbesu datthum araharūpesu sārabhūtam pasannabhūtancā"ti tīsupi ganthipadesu vuttam. Datthabbo dassanīyo sārabhūto visitthataro mando mandanam alankāro etassāti datthabbasāramando, mandapoti evamettha attho gahetabboti amhākam khanti, upaparikkhitvā yuttataram gahetabbam. Mandam sūriyarasmim pāti nivāretīti mandapo. Vividha -pa- cāruvitānanti ettha kusumadāmāni ca tāni olambakāni cāti kusumadāma-olambakāni. Ettha ca visesanassa paranipāto datthabbo, olambakakusumadāmānīti attho. Tāni vividhāni anekappakārāni viniggalantam vamentam nikkhāmentamiva cāru sobhanam vitānam etthāti vividhakusumadāma-olambakaviniggalantacāruvitāno, mandapo, tam alankaritvāti yojetabbam. Ratanavicitramanikottimatalamivāti nānāpupphūpahāravicittasupariniţthitabhūmikammattāyeva

nānāratanehi vicittabhūtamaṇikoṭṭimatalamivāti attho. Ettha ca ratanavicittaggahaṇaṁ nānāpupphūpahāravicittatāya nidassanaṁ, maṇikoṭṭimatalaggahaṇaṁ supariniṭṭhitabhūmiparikammatāyāti veditabbaṁ. Maṇiyo koṭṭetvā katatalattā maṇikoṭṭanena nibbattatalanti maṇikoṭṭimatalaṁ. Nanti maṇḍapaṁ. Pupphūpahāro pupphapūjā. Uttarābhimukhanti uttaradisābhimukhaṁ. Āsanārahanti nisīdanārahaṁ. Dantakhacitanti dantehi racitaṁ, dantehi katanti vuttaṁ hoti. Etthāti āsane. Niṭṭhitaṁ bhante mama kiccanti mayā kattabbakiccaṁ niṭṭhitanti attho.

Tasmim pana divase ekacce bhikkhū āyasmantam ānandam sandhāya evamāhamsu "imasmim bhikkhusamghe eko bhikkhu vissagandham vāyanto vicaratī"ti. Thero tam sutvā "imasmim bhikkhusamghe añño vissagandham vāyanto vicaranakabhikkhu nāma natthi, addhā ete mam sandhāya vadantī"ti samvegam āpajji. Ekacce nam āhamsuyeva "sve āvuso sannipāto" ti-ādi. Idāni tam dassento āha "bhikkhū āyasmantam ānandam āhamsū"ti-ādi. Tenāti tasmā. Āvajjesīti upanāmesi. Anupādāyāti tanhāditthivasena kañci dhammam agahetvā, yehi vā kilesehi sabbehi vimuccati, tesam lesamattampi agahetvāti attho. Āsavehīti bhavato ābhavaggam dhammato vā āgotrabhum savanato pavattanato āsavasaññitehi kilesehi. Lakkhanavacanañcetam āsavehīti, tadekatthatāya pana sabbehipi kilesehi, sabbehipi pāpadhammehi cittam vimuccatiyeva. Cittam vimuccīti cittam arahattamaggakkhane āsavehi vimuccamānam katvā arahattaphalakkhaņe vimuccīti attho. Cankamenāti cankamanakiriyāya. Vivattūpanissayabhūtam katam upacitam puññam etenāti **katapuñño**, arahattādhigamāya katādhikāroti attho. Padhānamanuyuñjāti vīriyam anuyuñja, arahattādhigamāya anuyogam karohīti attho. **Kathādoso nāma natthī**ti kathāya aparajjham¹ nāma natthi. Accāraddham vīriyanti ativiya āraddham vīriyam. Uddhaccāyāti uddhatabhavaya. Vīriyasamatam yojemīti cankamanavīriyassa adhimattatta tassa pahānavasena samādhinā samarasatāpādanena vīriyasamatam yojemi.

Dutiyadivaseti therena arahattappattadivasato dutiyadivase.

Dhammasabhāyam sannipatitāti pakkhassa pañcamiyam sannipatimsu.

Attano arahattappattim ñāpetukāmoti "sekkhatāya dhammasangītiyā gahetum ayuttampi bahussutattā gaṇhissāmā"ti cintetvā nisinnānam therānam "idāni arahattappatto"ti somanassuppādanattham "appamatto hohī"ti dinna-ovādassa saphalatādīpanattham attupanāyikam akatvā aññabyākaraṇassa bhagavatā samvaṇṇitattā ca thero attano arahattappattim ñāpetukāmo ahosīti veditabbam. Yathāvuḍḍhanti vuḍḍhapaṭipāṭim

anatikkamitvā. **Eke**ti majjhimatānakānamyeva eke. Pubbe vuttampi hi

sabbam majjhimatānakā vadantiyevāti veditabbam. Dīghabhānakā¹ panettha

"Atha kho āyasmā ānando arahā samāno sannipātam agamāsi. Katham agamāsi? 'Idānimhi sannipātamajjham pavisanāraho'ti haṭṭhatuṭṭhacitto ekamsam cīvaram katvā bandhanā muttatālapakkam viya paṇḍukambale nikkhittajātimaṇi viya vigatavalāhake nabhe samuggatapuṇṇacando viya

bālātapasamphassavikasitareņupiñjaragabbham padumam viya ca parisuddhena pariyodātena sappabhena sassirikena mukhavarena attano arahattappattim ārocayamāno viya ca agamāsi. Atha nam disvā āyasmato mahākassapassa etadahosi 'sobhati vata bho arahattappatto ānando, sace satthā dhareyya, addhā ajja ānandassa sādhukāram dadeyya, handa imassāham idāni satthārā dātabbam sādhukāram dadāmī'ti tikkhattum sādhukāramadāsī"ti.

Ākāsena āgantvā nisīdītipi eketi ettha pana tesam tesam tathā tathā gahetvā āgatamattam thapetvā visum visum vacane aññam visesakāraṇam natthīti vadanti. Upatissatthero panāha "sattamāsam katāya dhammasangītiyā kadāci pathaviyam nimujjitvā āgakattā tam gahetvā eke vadanti. Kadāci ākāsena āgatattā tam gahetvā eke² vadantī"ti.

evam vadanti—

Bhikkhū āmantesīti bhikkhū ālapi abhāsi sambodhesīti ayamettha attho. Aññatra pana ñāpanepi hoti. Yathāha "āmantayāmi vo bhikkhave¹ pativedayāmi vo bhikkhave"ti2. Pakkosanepi dissati. Yathāha "ehi tvam bhikkhu mama vacanena sāriputtam āmantehī"ti3. Āvusoti āmantanākāradīpanam. Kam dhuram katvāti kam ietthakam katvā. Kim ānando nappahotīti atthakathācariyehi thapitapucchā. Nappahotīti na sakkoti. **Etadaggan**ti eso aggo. Lingavipallasena hi ayam niddeso. **Yadidan**ti ca yo ayanti attho, yadidam khandhapancakanti va yojetabbam. Sammannīti sammatam akāsi. Upālim vinayam puccheyyanti pucchadhātussa dvikammakattā vuttam. Bījanim gahetvāti ettha bījanīgahanam dhammakathikānam dhammatāti veditabbam. Bhagavāpi hi dhammakathikānam dhammatādassanatthameva vicittabījanim ganhāti. Na hi aññathā sabbassapi lokassa alankārabhūtam paramukkamsagatasikkhāsamyamānam buddhānam mukhacandamandalam paticchādetabbam hoti. "Pathamam āvuso upāli pārājikam kattha paññattan"ti kasmā vuttam, nanu tassa sangītiyā purimakāle pathamabhāvo na vuttoti? No na vutto bhagavatā paññattānukkamena pātimokkhuddesānukkamena ca pathamabhāvassa siddhattā. Yebhuyyena hi tīni pitakāni bhagavato dharamānakāle thitānukkameneva sangītāni, visesato vinayābhidhammapitakānīti datthabbam. Kismim vatthusmim methunadhammeti ca nimittatthe bhummayacanam.

Vatthumpi pucchīti-ādi "kattha paññattan"ti-ādinā dassitena saha tato avasiṭṭhampi saṅgahetvā dassanavasena vuttaṁ. Kiṁ panettha paṭhamapārājikapāḷiyaṁ kiñci apanetabbaṁ vā pakkhipitabbaṁ vā āsi nāsīti? Buddhassa bhagavato bhāsite apanetabbaṁ nāma natthi. Na hi tathāgatā ekabyañjanampi niratthakaṁ vadanti, sāvakānaṁ pana devatānaṁ vā bhāsite apanetabbampi hoti, taṁ dhammasaṅgāhakattherā apanayiṁsu, pakkhipitabbaṁ pana sabbatthāpi atthi, tasmā yaṁ yattha pakkhipituṁ yuttaṁ, taṁ tattha pakkhipiṁsuyeva. Kiṁ pana tanti ce? "Tena samayenā"ti vā "tena kho pana samayenā"ti vā "atha kho" iti vā "evaṁ vutte"ti vā "etadavocā"ti vā evamādikaṁ sambandhavacanamattaṁ. Evaṁ pakkhipitabbayuttaṁ pakkhipitvā pana idaṁ paṭhamapārājikanti

thapesum. Pathamapārājike sangahamārulhe pañca arahantasatāni sangaham āropitanayeneva gaņasajjhāyamakamsu. "Tena samayena buddho bhagavā verañjāyam viharatī''ti ca nesam sajjhāyārambhakāleyeva sādhukāram dadamānā viya mahāpathavī udakapariyantam katvā kampittha. Te eteneva nayena sesapārājikānipi saṅgahaṁ āropetvā "idaṁ pārājikakandan"ti thapesum. Evam terasa samghādisesāni "terasakan" ti-ādīni vatvā vīsādhikāni dve sikkhāpadasatāni "mahāvibhango"ti kittetvā thapesum. Mahāvibhangāvasānepi purimanayeneva mahāpathavī akampittha. Tato bhikkhunivibhange attha sikkhāpadāni "pārājikakandam nāmā"ti-ādīni vatvā tīni sikkhāpadasatāni cattāri ca sikkhāpadāni "bhikkhunivibhango"ti kittetvā "ayam ubhatovibhango nāma catusatthibhānavāro" ti thapesum. Ubhatovibhangāvasānepi vuttanayeneva pathavī akampittha. Etenevupāyena asītibhānavāraparimānam khandhakam pañcavīsatibhānavāraparimānam parivārañca sangaham āropetvā "idam vinayapiṭakam nāmā"ti ṭhapesum. Vinayapitakāvasānepi vuttanayeneva pathavīkampo ahosi. Tam āyasmantam upālittheram paticchāpesum "āvuso idam tuyham nissitake vācehī"ti evamettha avuttopi viseso veditabbo.

Evam vinayapiṭakam saṅgahamāropetvā suttantapiṭakam saṅgāyimsu. Idāni tam dassento āha "vinayam saṅgāyitvā"ti-ādi. Mahākassapatthero ānandattheram dhammam pucchīti ettha ayamanukkamo veditabbo—ānandatthere dantakhacitam bījanim gahetvā dhammāsane nisinne āyasmā mahākassapatthero bhikkhū pucchi "kataram āvuso piṭakam paṭhamam saṅgāyāmā"ti. Suttantapiṭakam bhanteti. Suttantapiṭake catasso saṅgītiyo, tāsu paṭhamam kataram saṅgītinti. Dīghasaṅgītim bhanteti. Dīghasaṅgītiyam catuttimsa suttāni, tayo ca vaggā, tesu paṭhamam kataram vagganti. Sīlakkhandhavaggam bhanteti. Sīlakkhandhavagge terasa suttantā, tesu paṭhamam kataram suttanti. Brahmajālasuttam nāma bhante tividhasīlālaṅkatam nānāvidhamicchājīvakuhanalapanādividdhamsanam dvāsaṭṭhidiṭṭhijālaviniveṭhanam dasasahassilokadhātupakampanam, tam paṭhamam saṅgāyāmāti. Atha kho āyasmā mahākassapo āyasmantam ānandam etadavoca "brahmajālam āvuso ānanda kattha bhāsitan"ti.

Antarā ca bhante rājagaham antarā ca nālandanti ettha antarāsaddo kāranakhanacittavemajjhavivarādīsu dissati. Tathā hi "tadantaram ko jāneyya aññatra tathāgatā"ti¹ ca, "janā saṅgamma mantenti, mañca tañca kimantaran"ti² ca ādīsu kārane antarāsaddo vattati. "Addassa mam bhante aññatarā itthī vijiantarikāva bhājanam dhovantī"ti-ādīsu³ khane. "Yassantarato na santi kopā"ti-ādīsu⁴ citte. "Antarā vosānamāpādī"ti-ādīsu⁵ vemajjhe. "Api cāyam tapodā dvinnam mahānirayānam antarikāya āgacchatī"ti-ādīsu⁶ vivare. Svāyamidha vivare vattati, tasmā rājagahassa ca nālandāya ca vivareti evamettha attho datthabbo, antarāsaddena pana yuttattā upayogavacanam katam. Īdisesu ca thānesu akkharacintakā "antarā gāmañca nadiñca yātī"ti evam ekameva antarāsaddam payujjanti, so dutiyapadenapi yojetabbo hoti. Ayojiyamāne upayogavacanam na pāpunāti sāmivacanappasange antarāsaddayogena upayogavacanassa icchitattā. Idha pana yojetvā evam vutto. **Rājāgāraķe**ti tattha rañño kīlanattham patibhānacittavicitram agāram akamsu, tam rājāgārakanti pavuccati, tasmim. Ambalatthikāti rañño uyyānam. Tassa kira dvārasamīpe taruņo ambarukkho atthi, tam ambalatthikāti vadanti. Tassa avidūrabhavattā uyyānampi ambalatthikātveva sankhyam gatam "varunānagaran"ti-ādīsu viya.

Suppiyañca paribbājakanti ettha suppiyoti tassa nāmam, paribbājakoti sañjayassa antevāsī channaparibbājako. Brahmadattañca māṇavakanti ettha brahmadattoti tassa nāmam. Māṇavoti sattopi coropi taruṇopi vuccati. Tathā hi—

"Coditā devadūtehi, ye pamajjanti māṇavā.
Te dīgharattam socanti, hīnakāyūpagā narā"ti⁷—

ādīsu satto māṇavoti vutto. "Māṇavehipi samāgacchanti katakammehipi akatakammehipī"ti-ādīsu⁸ coro. "Ambaṭṭhamāṇavo aṅgako māṇavo"ti-ādīsu⁹ taruṇo māṇavoti vutto. Idhāpi

```
    Am 2. 308; Am 3. 367 piṭṭhesu.
    Sam 1. 203 piṭṭhe.
    Ma 2. 112 piṭṭhe.
    Ma 2. 112 piṭṭhe.
    Ma 3. 225; Am 1. 141 piṭṭhesu.
    Ma 2. 112 piṭṭhe.
    Vi 1. 149 piṭṭhe.
    Dī 1. 84, 116 piṭṭhesu.
```

ayameva adhippeto. Idam vuttam hoti "brahmadattam nāma taruṇapurisam ārabbhā"ti. Jīvakambavaneti jīvakassa komārabhaccassa ambavane. Atha "kam ārabbhā"ti avatvā "kena saddhin'ti kasmā vuttam? Na etam suttam bhagavatā eva vuttam, raññāpi "yathā nu kho imāni puthusippāyatanānī"tiādinā kiñci kiñci vuttam atthi, tasmā evam vuttanti daṭṭhabbam. Vedehiputtenāti ayam kosalarañño dhītāya putto, na videharañño, "vedehī"ti

pana paṇḍitādhivacanametaṁ. Vidanti etenāti vedo, ñāṇassetaṁ adhivacanaṁ. Vedena īhati ghaṭati vāyamatīti vedehī, vedehiyā putto vedehiputto, tena.

Etenevupāyena pañca nikāye pucchīti ettha ayamanukkamo veditabbo. Vuttanayena brahmajālassa pucchāvisajjanāvasāne pañca arahantasatāni sajjhāyamakamsu. Vuttanayeneva ca pathavīkampo ahosi. Evam brahmajālam sangāvitvā tato param "sāmannaphalam panāvuso ānanda kattha bhāsitan"ti-ādinā pucchāvisajjanānukkamena saddhim brahmajālena terasasuttantam sangāyitvā "ayam sīlakkhandhavaggo nāmā" ti kittetvā thapesum. Tadanantaram mahāvaggam, tadanantaram pāthikavagganti evam tivaggasangaham catuttimsasuttantapatimanditam catusatthibhānavāraparimānam tantim sangāyitvā "ayam dīghanikāyo nāmā"ti vatvā āyasmantam ānandattheram paticchāpesum "āvuso imam tuyham nissitake vācehī"ti. Tato anantaram asītibhānavāraparimānam majjhimanikāyam sangāyitvā dhammasenāpatisāriputtattherassa nissitake paticchāpesum "imam tumhe pariharathā"ti. Tadanantaram bhāṇavārasataparimāṇam samyuttanikāyam sangāyitvā mahākassapattheram paticchāpetum "bhante imam tumhākam nissitake vācethā"ti. Tadanantaram vīsatibhānavārasataparimānam anguttaranikāyam sangāyitvā anuruddhattheram paticchāpesum "imam tumhākam nissitake vācethā"ti.

Tadanantaram—

"Dhammasanganim vibhanganca, kathavatthunca puggalam. Dhatuyamakam patthanam, abhidhammoti vuccatī"ti—

evam samvannitam sukhumañānagocaram tantim sangāvitvā "idam abhidhammapitakam nāmā"ti vatvā pañca arahantasatāni sajjhāyamakamsu. Vuttanayeneva pathavīkampo ahosi. Tato param jātakam mahāniddeso patisambhidāmaggo apadānam suttanipāto khuddakapātho dhammapadam udānam itivuttakam vimānavatthu petavatthu theragāthā therīgāthāti imam tantim sangāyitvā "khuddakagantho nāma ayan"ti ca vatvā abhidhammapitakasmimyeva sangaham aropayimsuti dighabhanaka vadanti. Majjhimabhānakā pana "cariyāpitakabuddhavamsehi saddhim sabbampi tam khuddakagantham suttantapitake pariyapannan''ti vadanti. Ayamettha adhippāyo—jātakādike khuddakanikāyapariyāpanne yebhuyyena ca dhammaniddesabhūte tādise abhidhammapitake sanganhitum yuttam, na pana dīghanikāyādippakāre suttantapitake, nāpi pañnattiniddesabhūte vinayapitaketi. Dīghabhānakā "jātakādīnam abhidhammapitake sangahoti"ti vadanti. Cariyāpitakabuddhavamsānañcettha aggahanam jātakagatikattā. Majjhimabhānakā pana atthuppattivasena desitānam jātakādīnam vathānulomadesanābhāvato tādise suttantapitake saṅgaho yutto, na pana sabhāvadhammaniddesabhūte yathādhammasāsane abhidhammapitaketi jātakādīnam suttapariyāpannatam vadanti. Tattha yuttam vicāretvā gahetabbam. Khuddakanikāyassa sesanikāyānam viya apākatattā sese thapetvā khuddakanikāyam pākatam katvā dassento "tattha khuddakanikāyo nāmā"ti-ādimāha. Tatthāti tesu nikāyesu. Tatthāti khuddakanikāye.

Evam nimittapayojanakāladesakārakakaraṇappakārehi paṭhamamahāsaṅgītim dassetvā idāni tattha vavatthāpitesu dhammavinayesu nānappakārakosallattham ekavidhādibhede dassetum "tadetam sabbampī"tiādimāha. Tattha anuttaram sammāsambodhinti ettha anāvaraṇañāṇapadaṭṭhānam maggañāṇam maggañāṇapadaṭṭhānañca anāvaraṇañāṇam "sammosambodhī"ti vuccati. Paccavekkhantena vāti udānādivasena pavattadhammam sandhāyāha. Vimuttirasanti arahattaphalassādam vimuttisampattikam vā aggaphalanipphādanato, vimuttikiccam vā kilesānam accantavimuttisampādanato.

Kiñcāpi avisesena sabbampi buddhavacanam kilesavinayanena vinayo, yathānusittham patipajjamāne apāyapatanādito dhāranena dhammo ca

hoti, idhādhippete pana dhammavinaye niddhāretuṁ "tattha vinayapiṭakan"ti-ādimāha. Khandhādivasena sabhāvadhammadesanābāhullato āha "avasesaṁ buddhavacanaṁ dhammo"ti. Atha vā yadipi dhammoyeva vinayo pariyatti-ādibhāvato, tathāpi vinayasaddasannidhāno¹ abhinnādhikaraṇabhāvena payutto dhammasaddo vinayatantiviparītaṁ tantiṁ dīpeti yathā "puññañānasambhāro, gobalībaddan"ti-ādi.

Anekajātisamsāranti ayam gāthā bhagavatā attano sabbaññutaññāṇapadaṭṭhānam arahattappattim paccavekkhantena ekūnavīsatimassa paccavekkhaṇañāṇassa anantaram bhāsitā. Tenāha "idam paṭhamabuddhavacanan"ti. Idam kira sabbabuddhehi avijahita-udānam. Ayamassa saṅkhepattho²—aham imassa attabhāvagehassa kārakam taṇhāvaḍḍhakim gavesanto yena ñāṇena tam daṭṭhum sakkā, tassa bodhiñāṇassatthāya dīpaṅkarapādamūle katābhinīhāro ettakam kālam anekajātisamsāram anekajātisatasahassasaṅkhyam saṁsāravaṭṭam anibbisam anibbisanto tam ñāṇam avindanto alabhantoyeva sandhāvissam saṁsarim. Yasmā jarābyādhimaraṇamissatāya jāti nāmesā punappunam upagantum dukkhā, na ca sā tasmim adiṭṭhe nivattati, tasmā tam gavesanto sandhāvissanti attho.

Diţţhosīti idāni mayā sabbaññutaññāṇaṁ paṭivijjhantena diţtho asi. Puna gehanti puna imaṁ attabhāvasaṅkhātaṁ mama gehaṁ na kāhasi na karissasi. Tava sabbā anavasesā kilesaphāsukā mayā bhaggā. Imassa tayā katassa attabhāvagehassa kūṭaṁ avijjāsaṅkhātaṁ kaṇṇikamaṇḍalaṁ visaṅkhataṁ viddhaṁsitaṁ. Visaṅkhāraṁ nibbānaṁ ārammaṇakaraṇavasena gataṁ anupaviṭṭhaṁ idāni mama cittaṁ, ahañca taṇhānaṁ khayasaṅkhātaṁ arahattamaggaṁ arahattaphalaṁ vā ajjhagā adhigato pattosmīti attho. Gaṇṭhipadesu pana "visaṅkhāragatanti cittameva taṇhānaṁ khayasaṅkhātaṁ arahattamaggaṁ arahattaphalaṁ vā ajjhagā adhigato patto"ti evampi attho vutto. Ayaṁ manasā pavattitadhammānaṁ ādi. "Yadā have pātubhavanti dhammāti ayaṁ pana vācāya pavattitadhammānaṁ ādī"ti vadanti. Antojappanavasena kira bhagavā "anekajātisaṁsāran"ti-ādimāha.

^{1.} Vinayasaddasannidhāne (Syā) 2. Dhammapada-Ttha 2. 80 pitthepi passitabbam.

Kecīti khandhakabhānakā. Pathamam vutto pana dhammapadabhānakānam adhippāyoti veditabbo. Ettha ca khandhakabhānakā vadanti "dhammapadabhānakānam gāthā manasā desitattā tadā mahato janassa upakārāya na hoti, amhākam pana gāthā vacībhedam katvā desitattā tadā sunantānam devabrahmānam upakārāya ahosi, tasmā idameva pathamabuddhavacanan"ti. Dhammapadabhānakā pana "desanāya janassa upakārānupakārabhāvo lakkhanam na hoti, bhagavatā manasā desitattāyeva idam pathamabuddhavacanan"ti vadanti, tasmā ubhayampi aññamaññam viruddham na hotīti veditabbam. Nanu ca yadi "anekajātisamsāran"ti manasā desitam, atha kasmā dhammapadaatthakathāyam¹ "anekajātisamsāranti imam dhammadesanam satthā bodhirukkhamule nisinno udanavasena udanetva aparabhage anandattherena puttho kathesī"ti vuttanti? Tatthāpi manasā udānetvāti evamattho gahetabbo. Atha vā² manasāva desitanti evam gahane kim kārananti ce? Yadi vacībhedam katvā desitam siyā, udānapāliyam ārulham bhaveyya, tasmā udānapāliyam anārulhabhāvoyeva vacībhedam akatvā manasā desitabhāve kārananti vadanti.

Yadā have pātubhavanti dhammāti ettha itisaddo ādi-attho. Tena "ātāpino jhāyato brāhmanassa, athassa kankhā vapayanti sabbā. Yato pajānāti sahetudhamman"ti-ādigāthāttayam sanganhāti. Udānagāthanti pana jātiyā ekavacanam, tatthāpi pathamagāthamyeva vā gahetvā vuttanti veditabbam. Ettha pana yam vattabbam, tam khandhake āvi bhavissati. Pātipadadivaseti idam "sabbañnubhāvappattassā"ti na etena sambandhitabbam, "paccavekkhantassa uppanna"ti etena pana sambandhitabbam. Visākhapunnamāyameva hi bhagavā paccūsasamaye sabbaññutam pattoti. **Somanassamayañānenā**ti somanassasampayuttañānena. Āmantayāmīti nivedayāmi, bodhemīti attho. Vayadhammāti aniccalakkhanamukhena dukkhānattalakkhanampi sankhārānam vibhāveti "yadaniccam tam dukkham, yam dukkham tadanatta" ti³ vacanato. Lakkhanattayavibhavananayeneva tadarammanam vipassanam dassento sabbatitthiyānam avisayabhūtam buddhāvenikam catusaccakammatthānādhitthānam aviparītam nibbānagāminim patipadam pakāsetīti datthabbam.

^{1.} Dhammapada-Ttha 2. 80 pitthe. 2. Atha tam (Sī, Syā)

Idāni tattha sammāpaṭipattiyaṁ niyojeti "appamādena sampādethā"ti. Atha vā "vayadhammā saṅkhārā"ti etena saṅkhepena saṁvejetvā "appamādena sampādethā"ti saṅkhepeneva niravasesaṁ sammāpaṭipattiṁ dasseti. Appamādapadañhi sikkhattayasaṅgahitaṁ kevalaparipuṇṇaṁ sāsanaṁ pariyādiyitvā titthatīti. Antareti antarāle, vemajiheti attho.

Suttantapitakanti ettha yathā kammameva kammantam, evam suttameva suttantanti veditabbam. Asangītanti sangītikkhandhakakathāvatthuppakaranādi. Keci pana "subhasuttampi pathamasangītiyam asangītan"ti vadanti, tam na yujjati. "Pathamasangītito puretarameva hi āyasmatā ānandattherena jetavane viharantena subhassa mānavassa desitan"ti **ācariyadhammapālattherena** vuttam. Subhasuttam pana "evam me sutam ekam samayam āyasmā ānando sāvatthiyam viharati jetavane anāthapindikassa ārāme aciraparinibbute bhagavatī"ti-ādinā¹ āgatam. Tattha "evam me sutan"ti-ādivacanam pathamasangītiyam āyasmatā ānandatthereneva vattum yuttarūpam na hoti. Na hi ānandatthero sayameva subhasuttam desetvā "evam me sutan" ti-ādīni vadati. Evam pana vattabbam siyā "ekamidāham bhante samayam sāvatthiyam viharāmi jetavane anāthapindikassa ārāme"ti, tasmā dutivatativasangītikārakehi "evam me sutan"ti-ādinā subhasuttam sangītimāropitam viya dissati. Atha **ācariyadhammapālattherassa** evamadhippāyo siyā "ānandatthereneva vuttampi subhasuttam pathamasangītim āropetvā tantim thapetukāmehi mahākassapattherādīhi aññesu suttesu āgatanayeneva 'evam me sutan'tiādinā tanti thapitā"ti, evam sati yujjeyya. Atha vā āyasmā ānandatthero subhasuttam sayam desentopi sāmañnaphalādīsu bhagavatā desitanayeneva desesīti bhagavato sammukhā laddhanaye thatvā desitattā bhagavatā desitam dhammam attani adahanto² "evam me sutan"ti-ādimāhāti evamadhippāyo veditabbo.

Ubhayāni pātimokkhānīti bhikkhubhikkhunīpātimokkhavasena. Dve vibhaṅgānīti bhikkhubhikkhunīvibhaṅgavaseneva dve vibhaṅgāni. Dvāvīsati khandhakānīti mahāvaggacūļavaggesu āgatāni dvāvīsati khandhakāni. Soļasaparivārāti

solasahi parivārehi upalakkhitattā solasaparivārāti vuttam. Tathā hi parivārapāliyam "yam tena bhagavatā jānatā passatā arahatā sammāsambuddhena pathamam pārājikam kattha paññattan"ti-ādinā¹ paññattivaro, tato param "methunam dhammam patisevanto kati apattiyo āpajjatī''ti-ādinā² katāpattivāro, "methunam dhammam patisevantassa āpattiyo catunnam vipattīnam kati vipattiyo bhajantī"ti-ādippabhedo³ vipattivāro, "methunam dhammam patisevantassa āpattiyo sattannam āpattikkhandhānam katihi āpattikkhandhehi sangahitā"ti-ādippabhedo⁴ sangahavaro, "methunam dhammam patisevantassa apattiyo channam āpattisamutthānānam katihi samutthānehi samutthantī"ti-ādinā⁴ samutthānavāro, "methunam dhammam patisevantassa āpattiyo catunnam adhikaranānam katamam adhikaranan"ti-ādinā⁵ adhikaranavāro, "methunam dhammam patisevantassa āpattivo sattannam samathānam katihi samathehi sammantī''ti-ādippabhedo⁵ samathavāro, tadanantaram samuccayavāro cāti attha vārā vuttā. Tato param "methunam dhammam patisevanapaccayā pārājikam kattha paññattan"ti-ādinā⁶ nayena puna paccayavasena eko paññattivaro, tassa vasena purimasadisa eva katapattivaradayo satta varati evam aparepi attha vārā vuttā. Iti imāni attha, purimānipi atthāti mahāvibhange solasa vārā dassitā. Tato param teneva nayena bhikkhunivibhangepi solasa vārā āgatāti imehi solasahi vārehi upalakkhitattā solasaparivārāti vuccati. Potthakesu pana katthaci "parivāro"ti ettakameva dissati, bahūsu pana potthakesu dīghanikāyatthakathāyam adhidhammatthakathāyañca "solasaparivārā"ti evameva vuttattā ayampi pātho na sakkā patibāhitunti tassevattho vutto.

Brahmajālādicatuttimsasuttasangahoti brahmajālasuttādīni catuttimsasuttāni sangayhanti ettha, etenāti vā brahmajālādicatuttimsasutthasangaho. Vuttappamāṇānam vā suttānam sangaho etassāti brahmajālādicatuttimsasuttasangahoti. Evam sesesupi veditabbam.

^{1.} Vi 5. 1 pitthe.

^{2.} Vi 5. 55 pitthe.

^{3.} Vi 5. 79 pitthe.

^{4.} Vi 5. 80 pitthe.

^{5.} Vi 5. 81 pitthe.

^{6.} Vi 5. 83 pitthe.

Vividhavisesanayattāti imissā gāthāya attham vibhāvento āha "vividhā hī"ti-ādi. Daļhīkammasithilakaraṇappayojanāti yathākkamam lokavajjesu sikkhāpadesu daļhīkammappayojanā, paṇṇattivajjesu sithilakaraṇappayojanāti veditabbam. Ajjhācāranisedhanatoti saññamavelam abhibhavitvā pavatto ācāro ajjhācāro, vītikkamo, tassa nisedhanatoti attho. Tenāti vividhanayatthādihetunā. Etanti "vividhavisesanayattā"ti-ādigāthāvacanam. Etassāti vinayassa. Itaram panāti suttam.

Idāni atthānam sūcanatoti-ādigāthāya attham pakāsento āha "tañhī"tiādi. Attatthaparatthādibhedeti yo tam suttam sajjhāyati suņāti vāceti cinteti deseti ca, suttena saṅgahito sīlādi-attho tassapi hoti, tena parassa sādhetabbato¹ parassapi hotīti tadubhayam² tam suttam sūceti dīpeti. Tathā diṭṭhadhammikasamparāyikatthe lokiyalokuttaratthe cāti evamādibhede atthe ādisaddena saṅgaṇhāti. Atthasaddo cāyam hitapariyāya vacano, na bhāsitatthavacano. Yadi siyā, suttam attanopi bhāsitattham sūceti parassapīti ayamattho vutto siyā, suttena ca yo attho pakāsito, so tasseva hoti, na tena parattho sūcito hotīti. Tena sūcetabbassa paratthassa nivattetabbassa abhāvā attaggahaṇañca³ na kattabbam. Attatthaparatthavinimuttassa bhāsitatthassa abhāvā ādiggahaṇañca na kattabbam, tasmā yathāvuttassa hitapariyāyassa atthassa sutte asambhavato suttādhārassa puggalassa vasena attatthaparatthā vuttā.

Atha vā suttaṁ anapekkhitvā ye attatthādayo atthappabhedā "na ha'ññadattha'tthi pasaṁsalābhā"ti etassa padassa **niddese**⁴ vuttā attattho, parattho, ubhayattho, diṭṭhadhammiko attho, samparāyiko attho, uttāno attho, gambhīro attho, guļho attho, paṭicchanno attho, neyyo attho, nīto attho, anavajjo attho, nikkileso attho, vodāno attho, paramatthoti, te atthe suttaṁ sūcetīti

^{1.} Sāvetabbato (Sī)

^{3.} Atthaggahaṇañca (Sī)

^{2.} Tadubhayattham (Sī)

^{4.} Khu 7. 131 pitthe.

attho gahetabbo. Tathā hi kiñcāpi suttanirapekkhaṁ attatthādayo vuttā suttatthabhāvena aniddiṭṭhattā, tesu pana ekopi atthappabhedo suttena dīpetabbataṁ nātikkamati, tasmā te atthe suttaṁ sūcetīti vuccati. Imasmiñca atthavikappe attha-saddoyaṁ bhāsitatthapariyāyopi hoti. Ettha hi purimakā pañca atthappabhedā hitapariyāyā, tato pare cha bhāsitatthabhedā, pacchimakā pana ubhayasabhāvā. Tattha duradhigamatāya vibhāvane agādhabhāvo gambhīro, na vivaṭo guļho, mūludakādayo viya paṁsunā akkharasannivesādinā tirohito paṭicchanno. Niddhāretvā ñāpetabbo neyyo, yathārutavasena veditabbo nīto. Anavajjanikkilesavodānā pariyāyavasena vuttā, kusalavipākakiriyadhammavasena vā. Paramattho nibbānaṁ, dhammānaṁ aviparītasabhāvo eva vā.

Atha vā attanā ca appiccho hotīti attattham, appicchākathanca paresam kattā hotīti parattham sūceti. Evam "attanā ca pāṇātipātā paṭivirato hotī"tiādīni suttāni¹ yojetabbāni. Vinayābhidhammehi ca visesetvā suttasaddassa attho vattabbo, tasmā veneyyajjhāsayavasappavattāya desanāya attahitaparahitādīni sātisayam pakāsitāni honti tappadhānabhāvato, na āṇādhammasabhāvavasappavattāyāti idameva atthānam sūcanato suttanti vuttam. Evanca katvā "ettakam tassa bhagavato suttāgatam suttapariyāpannan"ti² ca "sakavāde panca suttasatānī"ti³ ca evamādīsu suttasaddo upacaritoti gahetabbo.

Suttesu āṇādhammasabhāvā ca veneyyajjhāsayaṁ anuvattanti, na vinayābhidhammesu viya veneyyajjhāsayo āṇādhammasabhāve, tasmā veneyyānaṁ ekantahitapaṭilābhasaṁvattanikā suttantadesanā hotīti "suvuttā cettha atthā"ti-ādi vuttaṁ. "Ekantahitapaṭilābhasaṁvattanikā suttantadesanā"ti idampi veneyyānaṁ hitasampāpane suttantadesanāya tapparabhāvaṁyeva sandhāya vuttaṁ. Tapparabhāvo ca veneyyajjhāsayānulomato daṭṭhabbo. Tenevāha "veneyyajjhāsayānulomena

vuttattā"ti. Vinayadesanam viya issarabhāvato āṇāpatiṭṭhāpanavasena adesetvā veneyyānam ajjhāsayānulomena cariyānurūpam vuttattā desitattāti attho.

Anupubbasikkhādivasena kālantare abhinipphattim dassento āha "sassamiva phalan"ti. Pasavatīti phalati, nipphādetīti attho. Upāyasamaṅgīnaṁyeva nipphajjanabhāvaṁ dassento "dhenu viya khīran"tiāha. Dhenutopi hi upāyavantānaṁyeva khīrapaṭilābho hoti. Anupāyena hi akāle ajātavacchaṁ dhenuṁ dohanto kālepi vā visāṇaṁ gahetvā dohanto neva khīraṁ paṭilabhati. "Suttāṇā"ti etassa atthaṁ pakāsetuṁ "suṭṭhu ca ne tāyatī"ti vuttaṁ.

Suttasabhāganti suttasadisam. Suttasabhāgatamyeva dassento āha "yathā hī"ti-ādi. Tacchakānam suttanti vaḍḍhakīnam kāļasuttam. Pamāṇam hotīti tadanusārena tacchanato. Evametampi viññūnanti yathā kāļasuttam pasāretvā saññāṇe kate gahetabbam vissajjetabbañca paññāyati, evam vivādesu uppannesu sutte ānītamatte "idam gahetabbam, idam vissajjetabban"ti viññūnam pākaṭattā vivādo vūpasammatīti etampi suttam viññūnam pamāṇam hotīti attho. Idāni aññathāpi suttasabhāgatam dassento āha "yathā cā"ti-ādi. Suttam viya pamāṇattā saṅgāhakattā ca suttamiva suttanti vuttam hoti. Ettha ca attatthādividhāne suttassa pamāṇabhāvo attatthādīnamyeva ca saṅgāhakattam yojetabbam tadatthappakāsanapadhānattā suttassa. Vinayābhidhammehi visesattañca¹ pubbe vuttanayeneva yojetabbam. Etanti "atthānam sūcanato"ti-ādikam atthavacanam. Etassāti suttassa.

Yanti yasmā. Etthāti abhidhamme. Abhikkamantīti ettha abhi-saddo kamanakiriyāya vuḍḍhibhāvaṁ atirekataṁ dīpetīti āha "abhikkamantīti-ādīsu vuḍḍhiyaṁ āgato"ti. Abhiññātāti aḍḍhacandādinā kenaci saññāṇena ñātā paññātā² pākaṭāti attho. Aḍḍhacandādibhāvo hi rattiyā upalakkhaṇavasena saññāṇaṁ³ hoti, yasmā aḍḍho cando, tasmā aṭṭhamī, yasmā ūno, tasmā cātuddasī, yasmā puṇṇo,

tasmā pannarasīti. **Abhilakkhitā**ti etthāpi ayamevattho veditabbo. Abhilakkhitasaddapariyāyo abhiññātasaddoti āha "abhiññātā abhilakkhitātiādīsu lakkhaņe"ti¹. Ettha ca vācakasaddantarasannidhānena nipātānam tadatthajotakamattattā lakkhitasaddatthajotako abhisaddo lakkhaņe² vattatīti vutto. **Rājābhirājā**ti rājūhi pūjetum araho rājā. **Pūjite**ti pūjārahe.

Abhidhammeti "supinantena sukkavissatthiyā anāpattibhāvepi akusalacetanā upalabbhatī"ti-ādinā vinayapaññattiyā sankaravirahite dhamme. "Pubbāparavirodhābhāvato dhammānamveva ca aññamaññasankaravirahite dhamme"tipi vadanti. "Pānātipāto akusalan"ti evamādīsu ca maranādhippāyassa jīvitindriyupacchedakapayogasamutthāpikā cetanā akusalam, na pānasankhātajīvitindriyassa upacchedasankhāto atipāto, tathā adinnassa parasantakassa ādānasankhātā vinnatti abyākato dhammo, tamviññattisamutthāpikā theyyacetanā akusalo dhammoti evamādināpi aññamaññasankaravirahite dhammeti attho veditabbo. Abhivinayeti ettha "jātarūparajatam na patiggahetabban"ti vadanto vinaye vineti nāma. Ettha "evam patigganhato pācittiyam, evam dukkatanti vadanto ca abhivinaye vineti nāmā"ti vadanti. Tasmā jātarūparajatam theyyacittena parasantakam ganhantassa yathāvatthu pārājikathullaccayadukkatesu aññataram, bhandāgārikasīsena ganhantassa pācittiyam, attatthāya ganhantassa nissaggiyam pācittiyam. Kevalam lokatāya ganhantassa anāmāsadukkatam, rūpiyachaddakassa sammatassa anāpattīti evam aññamaññasankaravirahite vinaye patibalo vinetunti attho veditabbo. Abhikkantenāti ettha kantiyā adhikattam abhisaddo dīpetīti āha "adhike"ti.

Nanu ca "abhikkamantī"ti ettha abhisaddo kamanakiriyāya vuḍḍhibhāvaṁ atirekataṁ dīpeti, "abhiññātā abhilakkhitā"ti ettha ñāṇalakkhaṇakiriyānaṁ supākaṭattā visesaṁ, "abhikkantenā"ti ettha kantiyā adhikattaṁ visiṭṭhataṁ dīpetīti idaṁ tāva yuttaṁ kiriyāvisesakattā upasaggassa, "abhirājā abhivinayo"ti pana pūjitaparicchinnesu rājavinayesu abhisaddo vattatīti kathametaṁ yujjeyyāti ce? Idhāpi

natthi doso pūjanaparicchedanakiriyādīpanato, tāhi ca kiriyāhi rājavinayānam yuttattā, tasmā ettha atimālādīsu atisaddo viya abhisaddo saha sādhanena kiriyam vadatīti abhirāja-abhivinayasaddā siddhā, evam abhidhammasadde abhisaddo saha sādhanena vuḍḍhiyādikiriyam dīpetīti ayamattho dassitoti datthabbam.

Ettha cāti abhidhamme. Bhāvetīti cittassa vaḍḍhanaṁ vuttaṁ. Pharitvāti ārammaṇassa vaḍḍhanaṁ vuttaṁ. Vuḍḍhimantoti bhāvanāpharaṇavuḍḍhīhi vuḍḍhimantopi dhammā vuttāti attho. Ārammaṇādīhīti ārammaṇasampayuttakammadvārapaṭipadādīhi. Lakkhaṇīyattāti¹ sañjānitabbattā. Ekantato lokuttaradhammānaṁyeva pūjārahattā "sekkhā dhammā"ti-ādinā lokuttarāyeva pūjitāti dassitā. Sabhāvaparicchinnattāti phusanādisabhāvena paricchinnattā. Adhikāpi dhammā vuttāti ettha kāmāvacarehi mahantabhāvato mahaggatā dhammāpi adhikā nāma hontīti tehi saddhiṁ adhikā dhammā vuttā.

Yaṁ panettha avisiṭṭhaṁnti ettha vinayādīsu tīsu aññamaññavisiṭṭhesu yaṁ avisiṭṭhaṁ samānaṁ, taṁ piṭakasaddanti attho. Vinayādayo hi tayo saddā aññamaññaṁ asādhāraṇattā visiṭṭhā nāma, piṭakasaddo pana tehi tīhipi sādhāraṇattā avisiṭṭhoti vuccati. Mā piṭakasampadānenāti pāṭisampadānavasena mā gaṇhathāti vuttaṁ hoti. Kudālañca piṭakañca kudālapiṭakaṁ. Tattha ku vuccati pathavī, tassā dālanato vidālanato ayomayo upakaraṇaviseso kudālaṁ nāma, tālapaṇṇavettalatādīhi kato bhājanaviseso piṭakaṁ nāma, taṁ ādāya gahetvāti attho. Yathāvuttenāti "evaṁ duvidhatthenā"ti-ādinā vuttappakārena.

Desanāsāsanakathābhedanti ettha kathetabbānam atthānam desakāyattena āṇādividhinā abhisajjanam pabodhanam **desanā.**Sāsitabbapuggalagatena yathāparādhādinā sāsitabbabhāvena anusāsanam vinayanam

sāsanam. Kathetabbassa samvarāsamvarādino atthassa kathanam vacanapatibaddhatākaranam kathāti vuccati. Tasmā desitāram bhagavantamapekkhitvā desanā, sāsitabbapuggalavasena sāsanam, kathetabbassa atthassa vasena kathāti evamettha desanādīnam nānākaranam veditabbam. Ettha ca kiñcāpi desanādayo desetabbādinirapekkhā na honti, āṇādayo pana visesato desakādi-adhīnāti tamtamvisesayogavasena desanādīnam bhedo vutto. Tathā hi ānāvidhānam visesato ānārahādhīnam tattha kosallayogato. Evam vohāraparamatthavidhānāni ca vidhāyakādhīnānīti ānādividhino desakāyattatā vuttā. Aparādhajjhāsayānurūpam viya dhammānurūpampi sāsanam visesato, tathā vinetabbapuggalapekkhanti sasitabbapuggalavasena sasanam vuttam. Samvarāsamvaranāmarūpānam viya vinivethetabbāya ditthiyāpi kathanam sati vācāvatthusmim nāsatīti visesato tadadhīnanti kathetabbassa atthassa vasena kathā vuttā. Bhedasaddo visum visum vojetabbo "desanābhedam sāsanabhedam kathābhedanca yathāraham paridīpaye"ti. **Bhedan**ti ca nānattanti attho. Tesu pitakesu sikkhā ca pahānāni ca gambhīrabhāvo ca sikkhāpahānagambhīrabhāvam, tañca yathāraham paridīpayeti attho. Pariyattibhedañca vibhāvayeti sambandho.

Pariyattibhedanti ca pariyāpuṇanabhedanti attho. Yahinti yasmim vinayādike piṭake. Yaṁ sampattiñca vipattiñca yathā pāpuṇāti, tampi sabbaṁ vibhāvayeti sambandho. Atha vā yaṁ pariyattibhedaṁ sampattiñca vipattiñcāpi yahiṁ yathā pāpuṇāti, tampi sabbaṁ vibhāvayeti yojetabbaṁ. Ettha yathāti yehi upārambhādihetupariyāpuṇanādippakārehi upārambhanissaraṇadhammakosakarakkhaṇahetupariyāpuṇanaṁ suppaṭipattiduppaṭipattīti etehi pakārehīti vuttaṁ hoti.

Paridīpanā vibhāvanā cāti heṭṭhā vuttassa anurūpato vuttaṁ, atthato pana ekameva. Āṇārahenāti āṇaṁ ṭhapetuṁ arahatīti āṇāraho, bhagavā. So hi sammāsambuddhatāya mahākāruṇikatāya ca aviparītahitopadesakabhāvena pamāṇavacanattā āṇaṁ paṇetuṁ arahati, vohāraparamatthānampi sambhavato āha "āṇābāhullato"ti. Ito paresupi eseva nayo.

Paṭhamanti vinayapiṭakaṁ. Pacurāparādhā seyyasakattherādayo. Te hi dosabāhullato "pacurāparādhā"ti vuttā. Pacuro bahuko¹ bahulo aparādho doso vītikkamo yesaṁ te pacurāparādhā. Anekajjhāsayāti-ādīsu āsayova ajjhāsayo. So ca atthato diṭṭhi ñāṇañca, pabhedato pana catubbidhaṁ hoti. Tathā hi pubbacariyavasena āyatiṁ sati paccaye uppajjamānārahā sassatucchedasaṅkhātā micchādiṭṭhi saccānulomikañāṇakammassakataññāṇasaṅkhātā sammādiṭṭhi ca "āsayo"ti vuccati. Vuttañhetaṁ—

"Sassatucchedadiṭṭhi ca, khanti cevānulomikā. Yathābhūtañca yaṁ ñāṇaṁ, etaṁ āsayasaññitan"ti².

Idañca catubbidham āsayanti ettha sattā nivasantīti āsayoti vuccati. Anusayā kāmarāgabhavarāgadiṭṭhipaṭighavicikicchāmānāvijjāvasena satta. Mūsikavisam viya kāraṇalābhe uppajjanārahā anāgatā kilesā, atītā paccuppannā ca tatheva vuccanti. Na hi kālabhedena dhammānam sabhāvabhedo atthīti. Cariyāti rāgacariyādikā cha mūlacariyā, antarabhedena anekavidhā, samsaggavasena pana tesaṭṭhi honti. Atha vā cariyāti caritam, tam sucaritaduccaritavasena duvidham. "Adhimutti nāma 'ajjeva pabbajissāmi, ajjeva arahattam gaṇhissāmī'ti-ādinā tanninnabhāvena pavattamānam sanniṭṭhānan"ti gaṇṭhipadesu vuttam.

Ācariyadhammapālattherena pana "sattānam pubbacariyavasena abhirucī"ti vuttam. Sā duvidhā hīnapaṇītabhedena. Yathānulomanti ajjhāsayādīnam anurūpam. Aham mamāti saññinoti diṭṭhimānataṇhāvasena aham mamāti evam pavattasaññino. Yathādhammanti natthettha atthā attaniyam vā, kevalam dhammamattametanti evam dhammasabhāvānurūpanti attho.

Samvarāsamvaroti ettha samvaraṇam samvaro, kāyavācāhi avītikkamo. Mahanto samvaro asamvaro. Vuḍḍhi-attho hi ayam a-kāro yathā "asekkhā dhammā"ti, tasmā khuddako mahanto ca samvaroti attho.

Diṭṭhiviniveṭhanāti diṭṭhiyā vimocanam. Adhisīlasikkhādīnam vibhāgo parato paṭhamapārājikasamvaṇṇanāya āvi bhavissati. Suttantapāḷiyam "vivicceva

kāmehī"ti-ādinā samādhidesanābāhullato "suttantapiṭake adhicittasikkhā"ti vuttam. Vītikkamappahānam kilesānamti samkilesadhammānam kammakilesānam vā yo kāyavacīdvārehi vītikkamo, tassa pahānam. Anusayavasena santāne anuvattantā kilesā kāraṇalābhe pariyuṭṭhitāpi sīlabhedavasena vītikkamitum na labhantīti¹ āha "vītikkamapaṭipakkhattā sīlassā"ti. Pariyuṭṭhānappahānanti okāsadānavasena kilesānam citte kusalappavattim pariyādiyitvā uṭṭhānam pariyuṭṭhānam, tassa pahānam cittasantānesu uppattivasena kilesānam pariyuṭṭhānassa pahānanti vuttam hoti. Anusayappahānanti appahīnabhāvena santāne anu anu sayanakā kāraṇalābhe uppatti-arahā anusayā. Te pana anurūpam kāraṇam laddhā uppajjanārahā thāmagatā kāmarāgādayo satta kilesā, tesam pahānam anusayappahānam. Te ca sabbaso ariyamaggapaññāya pahīyantīti āha "anusayapaṭipakkhattā paññāyā"ti.

Tadangappahānanti dīpālokeneva tamassa

dānādipuñākiriyavatthugatena tena tena kusalaṅgena tassa tassa akusalaṅgassa pahānaṁ "tadaṅgappahānan"ti vuccati. Idha pana tena tena susīlyaṅgena tassa tassa dussīlyaṅgassa pahānaṁ "tadaṅgappahānan"ti veditabbaṁ. Vikkhambhanasamucchedappahānānīti ettha upacārappanābhedena samādhinā pavattinivāraṇena ghaṭappahāreneva jalatale sevālassa tesaṁ tesaṁ nīvaraṇānaṁ dhammānaṁ² vikkhambhanavasena pahānaṁ vikkhambhanappahānaṁ. Catunnaṁ ariyamaggānaṁ bhāvitattā taṁtaṁmaggavato santāne samudayapakkhikassa kilesagaṇassa accantaṁ appavattisaṅkhātasamucchedavasena pahānaṁ samucchedappahānaṁ. Duccaritasaṁkilesassa pahānanti kāyaduccaritādi duṭṭhu caritaṁ, kilesehi vā dūsitaṁ caritanti duccaritaṁ. Tadeva yattha uppannaṁ, taṁ santānaṁ sammā kileseti bādhayati upatāpeti cāti saṁkileso, tassa pahānaṁ, kāyavacīduccaritavasena pavattasaṁkilesassa tadaṅgavasena pahānanti vuttaṁ hoti. Samādhissa kāmacchandapaṭipakkhattā suttantapiṭake taṇhāsaṁkilesassa pahānaṁ vuttaṁ.

Attādivinimuttasabhāvadhammappakāsanato abhidhammapiṭake diṭṭhisaṁkilesassa pahānaṁ vuttaṁ.

Ekamekasmiñcetthāti etesu tīsu pitakesu ekamekasmim pitaketi attho datthabbo. **Dhammoti pālī**ti ettha pakatthānam ukkatthānam sīlādi-atthānam bodhanato sabhāvaniruttibhāvato buddhādīhi bhāsitattā ca pakaṭṭhānam vacanappabandhānam ālīti pāli, pariyattidhammo. "Dhammoti pālīti ettha bhagavatā vuccamānassa atthassa vohārassa ca dīpano saddoyeva pāļi nāmā"ti ganthipadesu vuttam. Abhidhammatthakathāya likhite sīhaļaganthipade pana idam vuttam—sabhāvatthassa sabhāvavohārassa ca anurūpavasena bhagavatā manasā vavatthāpitā pannatti pālīti vuccati. Yadi saddoyeva pāli siyā, pāliyā desanāya ca nānattena bhavitabbam. Manasā vavatthāpitāya ca pāliyā vacībhedakaranamattam thapetvā desanāya nānattam natthi. Tathā hi desanam dassentena manasā vavatthāpitāya pāļiyā desanāti vacībhedakaranamattam vinā pāliyā saha desanāya anañnathā vuttā. Tathā ca upari "desanāti paññattī"ti vuttattā desanāya anaññabhāvena pāliyā pannattibhāvo kathito hoti. Apica yadi pāliyā aññāyeva desanā siyā, "pāliyā ca pāli-atthassa ca desanāya ca yathābhūtāvabodho"ti vattabbam siyā, evam pana avatvā "pāliyā ca pāli-atthassa ca yathābhūtāvabodho"ti vuttattā pāliyā desanāya ca anaññabhāvo dassito hoti. Evañca katvā upari "desanā nāma paññattī"ti dassentena desanāya anaññabhāvato pāliyā pannattibhāvo kathitova hotīti.

Ettha ca "saddoyeva pāļi nāmā"ti imasmim pakkhe dhammassapi saddasabhāvattā dhammadesanānam ko visesoti ce? Tesam tesam atthānam bodhakabhāvena ñāto uggahaṇādivasena ca pubbe vavatthāpito saddappabandho **dhammo**, pacchā paresam avabodhanattham pavattito tadatthappakāsako saddo **desanā**ti veditabbam. Atha vā yathāvuttasaddasamuṭṭhāpako cittuppādo **desanā** "desīyati samuṭṭhāpīyati saddo etenā"ti katvā musāvādādayo viya. Tatthāpi hi musāvādādisamuṭṭhāpikā cetanā musāvādādisaddena voharīyati.

Tīsupi cetesu ete dhammatthadesanāpaṭivedhāti ettha pāḷi-attho pāḷidesanā pāḷi-atthapaṭivedho cāti ime tayo pāḷivisayā

hontīti vinayapitakādīnam atthassa desanāya pativedhassa ca ādhārabhāvo yutto, pitakāni pana pāliyoyevāti tesam dhammassa ādhārabhāvo katham yujjeyyāti ce? Pālisamudāyassa avayavapāliyā ādhārabhāvato¹. Avayavassa hi samudāyo ādhārabhāvena vuccati yathā "rukkhe sākhā"ti. Ettha ca dhammādīnam dukkhogāhabhāvato tehi dhammādīhi vinayādayo gambhīrāti vinayādīnampi catubbidho gambhīrabhāvo vuttoyeva, tasmā dhammādayo eva dukkhogāhattā gambhīrā, na vinayādayoti na codetabbametam sammukhena visayavisayīmukhena ca vinayādīnamyeva gambhīrabhāvassa vuttattā. Dhammo hi vinayādayo, tesam visayo attho, dhammatthavisayā ca desanāpativedhāti. Tattha pativedhassa dukkarabhāvato dhammatthānam, desanāñānassa dukkarabhāvato desanāya ca dukkhāgāhabhāvo veditabbo. Pativedhassa pana uppādetum asakkuneyyattā tamvisayañānuppattiyā ca dukkarabhāvato dukkhāgāhatā veditabbā. Dukkhena ogayhantīti dukkhogāhā. Ekadesena ogāhantehipi mandabuddhīhi patitthā laddhum na sakkāti āha "alabbhaneyyapatitthā cā"ti. Ekamekasminti ekekasmim pitake. Etthāti etesu pitakesu. Niddhārane cetam bhummavacanam.

Idāni hetuhetuphalādīnam vasenapi gambhīrabhāvam dassento āha "aparo nayo"ti-ādi. Hetūti paccayo. So hi attano phalam dahati vidahatīti dhammoti vuccati. Dhammasaddassa cettha hetupariyāyatā katham viñnāyatīti āha "vuttañhetan"ti-ādi. Nanu ca "hetumhi ñāṇam dhammapaṭisambhidā"ti etena vacanena dhammassa hetubhāvo katham viñnāyatīti ce? Dhammapaṭisambhidāti etassa samāsapadassa avayavapadattham dassentena "hetumhi ñāṇan"ti vuttattā. "Dhamme paṭisambhidā dhammapaṭisambhidā"ti ettha hi "dhamme"ti etassa attham dassentena "hetumhī"ti vuttam, "paṭisambhidā"ti etassa attham dassentena "ñāṇan"ti, tasmā hetudhammasaddā ekatthā ñāṇapaṭisambhidāsaddā cāti imamattham vadantena sādhito dhammassa hetubhāvo. Hetuphale ñāṇam atthapaṭisambhidāti etena vacanena sādhito atthassa hetuphalabhāvopi evameva daṭṭhabbo. Hetuno phalam hetuphalam. Tañca yasmā

hetu-anusārena arīyati adhigamīyati sampāpuņīyati, tasmā atthoti vuccati.

Yathādhammanti ettha dhammasaddo hetum hetuphalañca sabbam sanganhāti. Sabhāvavācako hesa dhammasaddo, na pariyattihetubhāvavācako, tasmā **vathādhamma**nti yo yo avijjādisankhārādidhammo, tasmim tasminti attho. Dhammānurūpam vā yathādhammam. Desanāpi hi pativedho viya aviparītavisayavibhāvanato dhammānurūpam pavattati, tatoyeva ca aviparītābhilāpoti vuccati. Dhammābhilāpoti atthabyañjanako aviparītābhilāpo. Ettha ca abhilappatīti abhilāpoti saddo vuccati. Etena "tatra dhammaniruttābhilāpe ñānam niruttipatisambhidā"ti¹ ettha vuttam dhammaniruttim dasseti saddasabhāvattā desanāya. Tathā hi niruttipatisambhidāya parittārammanādibhāvo patisambhidāvibhangapāliyam¹ vutto. Atthakathāyañca² "tam sabhāvaniruttim saddam ārammanam katvā"ti-ādinā saddārammaņatā dassitā. Tathā hi imassa atthassa ayam saddo vācakoti vacanavacanatthe vavatthapetvā tamtamvacanatthavibhāvanavasena pavattito saddo desanāti vuccati. Adhippāyoti etena "desanāti paññattī"ti etam vacanam dhammaniruttābhilāpam sandhāya vuttam, na tato vinimuttam paññattim sandhāyāti adhippāyam dasseti. Desīyati attho etenāti hi desanā, pakārena ñāpīyati etena, pakārato ñāpetīti vā paññattīti dhammaniruttābhilāpo vuccati. Evam "desanā nāma saddo"ti imasmim pakkhe ayamattho veditabbo. "Desanāti paññattī"ti ettha paññattivādino pana evam vadanti—kiñcāpi "dhammābhilāpo"ti ettha abhilappatīti abhilāpoti saddo vuccati, na pannatti, tathāpi sadde vuccamāne tadanurūpam vohāram gahetvā tena vohārena dīpitassa atthassa jānanato sadde kathite tadanurūpā pannattipi kāranūpacārena kathitāyeva hoti. Atha vā "dhammābhilāpoti attho"ti avatvā "dhammābhilāpoti adhippāyo"ti vuttattā

Idāni paṭivedham niddisanto āha "paṭivedhoti abhisamayo"ti. Paṭivijjhatīti ñānam paṭivedhoti vuccati. Paṭivijjhanti etenāti vā

desanā nāma saddo na hotīti dīpitamevāti.

pativedho, abhisametīti abhisamayo, abhisamenti etenāti vā abhisamayo. Idāni abhisamayappabhedato abhisamayappakārato ārammanato sabhāvato ca pākatam kātum "so ca lokiyalokuttaro"ti-ādimāha. Visayato asammohato ca avabodhoti sambandho. Tattha visayato atthādi-anurūpam dhammādīsu avabodho nāma avijjādidhammārammaņo sankhārādi-atthārammaņo tadubhayapaññāpanārammano lokiyo avabodho. Asammohato atthādianurūpam dhammādīsu avabodho pana nibbānārammano maggayutto yathāvuttadhammatthapaññattīsu sammohaviddhamsano lokuttaro abhisamayo. Tathā hi "ayam hetu, idamassa phalam, ayam tadubhayānurūpo vohāro"ti evam ārammanakaranavasena lokiyañānam visayato pativijihati, lokuttarañanam pana hetuhetuphaladīsu sammohassa maggañanena samucchinnattā asammohato paţivijjhati. Atthānurūpam dhammesūti avijjā hetu, sankhārā hetusamuppannā, sankhāre uppādeti avijjāti evam kāriyānurūpam kāranesūti attho. Atha vā puññābhisankhāraapuññābhisankhāra-āneñjābhisankhāresu tīsu apuññābhisankhārassa sampayutta-avijjā paccayo, itaresam yathānurūpanti-ādinā kāriyānurūpam kāranesu pativedhoti attho. **Dhammānurūpam atthesū**ti "avijjāpaccayā sankhārā"ti-ādinā kāranānurūpam kāriyesu avabodhoti attho.

Paññattipathānurūpam paññattīsūti paññattiyā vuccamānadhammānurūpam paṇṇattīsu avabodhoti attho.

Yathāvuttehi dhammādīhi piṭakānaṁ gambhīrabhāvaṁ dassetuṁ "idāni yasmā etesu piṭakesū"ti-ādimāha. Dhammajātanti kāraṇappabhedo kāraṇameva vā. Atthajātanti kāriyappabhedo kāriyameva vā. Yā cāyaṁ desanāti sambandho. Yo cetthāti etāsu taṁtaṁpiṭakagatāsu dhammattadesanāsu yo paṭivedhoti attho. Dukkhogāhanti ettha avijjāsaṅkhārādīnaṁ dhammatthānaṁ duppaṭivijjhatāya dukkhogāhatā. Tesaṁ paññāpanassa dukkarabhāvato desanāya paṭivedhanasaṅkhātassa paṭivedhassa ca uppādanavisayīkaraṇānaṁ asakkuṇeyyatāya dukkhogāhatā veditabbā. Evampīti pisaddo pubbe vuttappakārantaraṁ sampiṇḍeti. Etthāti etesu tīsu piṭakesu. Vuttatthāti vutto saṁvaṇṇito attho assāti vuttatthā.

Tīsu pitakesūti ettha "ekekasmin"ti adhikārato pakaraņato vā veditabbam. Pariyattibhedoti pariyapunanam pariyatti. Pariyapunanavacako hettha pariyattisaddo, na pālipariyāyo, tasmā evamettha attho datthabbo "tīsu pitakesu ekekasmim pariyāpunanappakāro datthabbo ñātabbo"ti. Tatoyeva ca "pariyattiyo pariyapunanappakara"ti tīsupi ganthipadesu vuttam. Atha vā tīhi pakārehi pariyāpunitabbā pāliyo eva pariyattīti vuccanti, tatoyeva ca "pariyattiyo pālikkamā"ti abhidhammatthakathāya likhite sīhalaganthipade vuttam. Evampi hi alagaddūpamāpariyāpunanayogato alagaddūpamā pariyattīti pālipi sakkā vattum, evanca katvā "duggahitā upārambhādihetu pariyāputā alagaddūpamā"ti parato niddesavacanampi upapannam hoti. Tattha hi pāliyeva duggahitā pariyāputāti vattum vattati. **Alagaddūpamā**ti alagaddo alagaddaggahanam upamā etissāti alagaddūpamā. Alagaddassa gahanam hettha alagaddasaddena vuttanti datthabbam. "Āpūpiko"ti ettha apūpasaddena apūpakhādanam viva alagaddaggahanena gahitaparivatti upamīyati, na pana alagaddena. "Alagaddaggahanūpamā"ti vā vattabbe majjhe padalopam katvā "alagaddūpamā"ti vuttam "otthamukho"ti-ādīsu viva. Alagaddoti cettha āsīviso vuccati. Gadoti hi visassa nāmam. Tañca tassa alam paripunnam atthi, tasmā alam pariyatto paripunno gado assāti anunāsikalopam dakārāgamanca katvā "alagaddo"ti vuccati. Atha vā alam jīvitaharane samattho gado assāti alagaddo. Nissaranatthāti vattadukkhato nissaranam attho payojanam etissäti nissaranatthä. **Bhandāgārikapariyattī**ti ettha bhandagare niyutto bhandagariko, bhandagariko viya bhandagariko, dhammaratanānupālako. Aññam attham anapekkhitvā bhandāgārikasseva sato pariyatti bhandagarikapariyatti.

Duggahitāti duṭṭhu gahitā. Duggahitabhāvameva vibhāvento āha "upārambhādihetu pariyāpuṭā"ti, upārambhā itivādappamokkhādihetu uggahitāti attho. Lābhasakkārādihetu pariyāpuṇanampi ettheva saṅgahitanti daṭṭhabbaṁ. Vuttañhetaṁ alagaddasuttaṭṭhakathāyaṁ¹—

"Yo hi buddhavacanam 'evam cīvarādīni vā labhissāmi, catuparisamajjhe vā mam jānissantī'ti lābhasakkārādihetu pariyāpuṇāti, tassa sā pariyatti alagaddapariyatti nāma. Evam pariyāpuṇanato hi buddhavacanam apariyāpuṇitvā niddokkamanam varataran"ti.

Nanu ca alagaddaggahaṇūpamā pariyatti alagaddūpamāti vuccati, evañca sati suggahitāpi pariyatti alagaddūpamāti vattum vaṭṭati tatthāpi alagaddaggahanassa upamābhāvena pāliyam vuttattā. Vuttañhetam—

"Seyyathāpi bhikkhave puriso alagaddatthiko alagaddagavesī alagaddapariyesanam caramāno, so passeyya mahantam alagaddam, tamenam ajapadena daṇḍena suniggahitam niggaḥetyā gīvāya suggahitam gaṇheyya. Kiñcāpi so bhikkhave alagaddo tassa purisassa hattham vā bāham vā aññataram vā aṅgapaccaṅgam bhogehi paliveṭheyya, atha kho so neva tatonidānam maraṇam vā nigaccheyya maraṇattam vā dukkham. Tam kissa hetu, suggahitattā bhikkhave alagaddassa, evameva kho bhikkhave idhekacce kulaputtā dhammam pariyāpuṇanti suttam geyyan"ti-ādi¹.

Tasmā idha duggahitā eva pariyatti alagaddūpamāti ayam viseso kuto viñnāyati, yena duggahitā upārambhādihetu pariyāpuṭā alagaddūpamāti vuccatīti? Saccametam, idam pana pārisesanāyena vuttanti daṭṭhabbam. Tathā hi nissaraṇatthabhaṇḍāgārikapariyattīnam visum gahitattā pārisesato alagaddassa duggahaṇūpamā pariyatti alagaddūpamāti viñnāyati. Suggahaṇūpamā hi pariyatti nissaraṇatthā vā hoti bhaṇḍāgārikapariyatti vā, tasmā suvuttametam "duggahitā upārambhādihetu pariyāpuṭā alagaddūpamā"ti. Yam sandhāyāti yam pariyattiduggahaṇam sandhāya. Vuttanti alagaddasutte vuttam.

Alagaddatthikoti āsīvisattiko. Alagaddam gavesati pariyesati sīlenāti alagaddagavesī. Alagaddapariyesanam caramānoti alagaddapariyesanattham caramāno. Bhogeti sarīre. Hatthe vā

bāhāva vāti ettha manibandhako yāva agganakhā "hattho"ti veditabbo, saddhim aggabāhāya avasesā "bāhā"ti. Katthaci pana "kapparato patthāyapi yāva agganakhā hattho"ti vuccati. Aññatarasmim vā aṅgapaccaṅgeti vuttalakkhanam hatthañca bāhañca thapetvā avasesam sarīram "aṅgapaccaṅgan"ti veditabbaṁ. **Tatonidānan**ti taṁnidānaṁ, taṁkāranāti vuttam hoti. Purimapade hi vibhatti-alopam katvā niddeso. Tam hatthādīsu damsanam nidanam karanam etassati tamnidananti hi vattabbe "tatonidānan"ti purimapade paccatte nissakkavacanam katvā tassa ca lopam akatvā niddeso. Tam kissa hetūti yam vuttam hatthādīsu damsanam tamnidānañca maranādi-upagamanam, tam kissa hetu kena kāranenāti ce. **Idhā**ti imasmim sāsane. **Ekacce moghapurisā**ti ekacce tucchapurisā. Dhammanti pālidhammam. Pariyāpuņantīti uggaņhantīti attho, sajjhāyanti ceva vācuggatā karontā dhārenti cāti vuttam hoti. Atthanti yathābhūtam bhāsitattham payojanatthañca. Na upaparikkhantīti na parigganhanti na vicārenti. Idam vuttam hoti—"imasmim thāne sīlam kathitam, idha samādhi, idha paññā kathitā, mayañca tam pūressāmā"ti evam bhāsitattham payojanatthañca "sīlam samādhissa kāranam, samādhi vipassanāyā"ti-ādinā na parigganhantīti. **Anupaparikkhatan**ti anupaparikkhantānam. **Na** nijihānam khamantīti nijihānapaññam nakkhamanti, nijihāyitvā paññāya disvā rocetvā gahetabbā na hontīti adhippāyo. Tena imamattham dīpeti "tesam paññāya attham anupaparikkhantānam te dhammā na upatthahanti, 'imasmim thāne sīlam, samādhi, vipassanā, maggo, phalam, vattam, vivattam kathitan'ti evam jānitum na sakkā hontī"ti.

Te upārambhānisamsā cevāti te paresam vāde dosāropanānisamsā hutvā pariyāpuṇantīti attho. Itivādappamokkhānisamsācāti iti evam etāya pariyattiyā vādappamokkhānisamsā, attano upari parehi āropitavādassa niggahassa pamokkhappayojanā hutvā dhammam pariyāpuṇantīti attho. Idam vuttam hoti—parehi sakavāde dose āropite tam dosam evanca evanca mocessāmāti iminā ca kāraṇena pariyāpuṇantīti. Atha vā so so vādo itivādo, itivādassa pamokkho itivādappamokkho, itivādappamokkho ānisamso etesanti itivādappamokkhānisamsā, tamtamvādappamocanānisamsā cāti

attho. Yassa catthāya dhammam pariyāpuṇantīti yassa ca sīlādipūraṇassa maggaphalanibbānassa vā atthāya imasmim sāsane kulaputtā dhammam pariyāpuṇanti. Tañcassa attham nānubhontīti tañca assa dhammassa sīlādiparipūraṇasaṅkhātam attham ete duggahitagāhino nānubhonti na vindanti.

Atha vā yassa upārambhassa itivādappamokkhassa vā atthāya ye moghapurisā dhammam pariyāpuṇanti, te parehi "ayamattho na hotī"ti vutte duggahitattāyeva soyevatthoti paṭipādanakkhamā na hontīti parassa vāde upārambham āropetum attano vādā tam mocetunca asakkontāpi tam attham nānubhontiyevāti evamattho daṭṭhabbo. Dīgharattam ahitāya dukkhāya samvattantīti tesam te dhammā duggahitattā upārambhamānadappamakkhapalāsādihetubhāvena dīgharattam ahitāya dukkhāya samvattanti. Ettha hi kāraṇe phalavohārena "te dhammā ahitāya dukkhāya samvattantī"ti vuttam. Tathā hi kincāpi na te dhammā ahitāya dukkhāya samvattanti, tathāpi vuttanayena pariyāpuṇantānam sajjhāyakāle vivādasamaye ca tammūlakānam upārambhādīnam anekesam akusalānam uppattisabbhāvato "te dhammā ahitāya dukkhāya samvattantī"ti kāraṇe phalavohārena vuttam. Tam kissa hetūti ettha tanti yathāvuttassatthassa anabhisambhuṇanam tesanca dhammānam ahitāya dukkhāya samvattanam parāmasati.

Sīlakkhandhādipāripūrimyevāti ettha ādisaddena samādhivipassanādīnam sangaho veditabbo. Yo hi buddhavacanam uggaņhitvā sīlassa āgataṭṭhāne sīlam pūretvā samādhino āgataṭṭhāne samādhigabbham gaṇhāpetvā vipassanāya āgataṭṭhāne vipassanam paṭṭhapetvā maggaphalānam āgataṭṭhāne maggam bhāvessāmi, phalam sacchikarissāmīti uggaṇhāti, tasseva sā pariyatti nissaraṇatthā nāma hoti. Yam sandhāya vuttanti yam pariyattisuggahaṇam sandhāya alagaddasutte vuttam. Dīgharattam hitāya sukhāya samvattantīti sīlādīnam āgataṭṭhāne sīlādīni pūrentānampi arahattam patvā parisamajjhe dhammam desetvā dhammadesanāya pasannehi upanīte cattāro paccaye paribhuñjantānampi paresam vāde sahadhammena upārambham āropentānampi sakavādato dosam harantānampi dīgharattam hitāya sukhāya samvattanti. Tathā

hi na kevalam suggahitapariyattim nissāya maggabhāvanāphalasacchikiriyādīneva, paravādaniggahasakavādapatiṭṭhāpanānipi ijjhanti. Tathā ca vuttam "uppannam parappavādam sahadhammena suniggahitam niggahetvā"ti-ādi¹.

Pariññātakkhandhoti dukkhaparijānanena pariññātakkhandho.
Pahīnakilesoti samudayappahānena pahīnakileso. Paṭividdhākuppoti paṭividdha-arahattaphalo. Na kuppatīti akuppanti hi arahattaphalassetam nāmam. Satipi hi catunnam maggānam catunnanca phalānam akuppasabhāve sattannam sekkhānam sakasakanāmapariccāgena uparūpari nāmantarappattito tesam maggaphalāni "akuppānī"ti na vuccanti, arahā pana sabbadāpi arahāyeva nāmāti tasseva phalam "akuppan"ti vuttam. Iminā ca imamattham dasseti "khīṇāsavassevapariyatti bhaṇḍāgārikapariyatti nāmā"ti. Tassa hi apariññātam appahīnam abhāvitam asacchikatam vā natthi, tasmā buddhavacanam pariyāpuṇanto tantidhārako paveṇīpālako vamsānurakkhako ca hutvā uggaṇhāti. Tenevāha "paveṇīpālanatthāyā"ti-ādi. Tattha paveṇīti dhammasantati, dhammassa avicchedena pavattīti attho.

Vamsānurakkhanatthāyāti buddhassa bhagavato vamsānurakkhanattham. Tassa vamsopi atthato pavenīyevāti veditabbam.

Nanu ca yadi paveṇīpālanatthāya buddhavacanassa pariyāpuṇanaṁ bhaṇḍāgārikapariyatti, kasmā "khīṇāsavo"ti visesetvā vuttaṁ. Ekaccassa puthujjanassapi hi ayaṁ nayo labbhati. Tathā hi ekacco bhikkhu chātakabhayādīsu ganthadharesu ekasmiṁ ṭhāne vasituṁ asakkontesu sayaṁ bhikkhācārena akilamamāno atimadhuraṁ buddhavacanaṁ mā nassatu, tantiṁ dhāressāmi, vaṁsaṁ ṭhapessāmi, paveṇiṁ pālessāmīti pariyāpuṇāti, tasmā tassapi pariyatti bhaṇḍāgārikapariyatti nāma kasmā na hotīti? Vuccate—evaṁ santepi puthujjanassa pariyatti bhaṇḍāgārikapariyatti nāma na hoti. Kiñcāpi hi puthujjano "paveṇiṁ pālessāmī"ti ajjhāsayena pariyāpuṇāti, attano² pana bhavakantārato anittiṇṇattā tassa pariyatti nissaraṇapariyatti nāma hoti, tasmā puthujjanassa pariyatti alagaddūpamā vā hoti nissaraṇatthā vā, sattannaṁ sekkhānaṁ nissaraṇattāva, khīṇāsavānaṁ bhaṇḍāgārikapariyattiyevāti veditabbaṁ.

Khīṇāsavo ca bhaṇḍāgārikasadisattā bhaṇḍāgārikoti vuccati. Yathā hi bhaṇḍāgāriko alaṅkārabhaṇḍaṁ paṭisāmetvā pasādhanakāle tadupiyaṁ alaṅkārabhaṇḍaṁ rañño upanāmetvā alaṅkaroti, evaṁ khīṇāsavopi dhammaratanabhaṇḍaṁ sampaṭicchitvā mokkhādhigamassa bhabbarūpe sahetuke satte passitvā tadanurūpaṁ dhammadesanaṁ vaḍḍhetvā maggaṅgabojjhaṅgādisaṅkhātena lokuttarena alaṅkārena alaṅkarotīti bhandāgārikoti vuccati.

Evam tisso pariyattiyo vibhajitvā idāni tīsupi pitakesu yathāraham sampattivipattiyo vitthāretvā dassento āha "vinaye panā"ti-ādi. Sīlasampattim nissāya tisso vijjā pāpunātīti-ādīsu yasmā sīlam visujihamānam satisampajaññabalena kammassakataññānabalena ca samkilesamalato visujjhati, pāripūriñca gacchati, tasmā sīlasampadā sijjhamānā upanissayasampattibhāvena satibalam ñānabalanca paccupatthapetīti tassā vijjattayūpanissayatā veditabbā sabhāgahetusampadānato. Satibalena hi pubbenivāsavijjāsiddhi, sampajaññena sabbakiccesu suditthakāritāparicayena cutūpapātañānānubaddhāya dutiyavijjāya siddhi, vītikkamābhāvena samkilesappahānasabbhāvato vivattūpanissayatāvasena ajjhāsayasuddhiyā tatiyavijjāsiddhi. Puretarasiddhānam samādhipaññānam pāripūrim vinā sīlassa āsavakkhayañānūpanissayatā sukkhavipassakakhīnāsavehi dīpetabbā. "Samāhito yathābhūtam pajānātī"ti¹ vacanato samādhisampadā chalabhiññatāya upanissayo. "Yogā ve jāyati bhūrī"ti² vacanato pubbayogena garuvāsadesabhāsākosalla-uggahanaparipucchādīhi ca paribhāvitā paññāsampatti patisambhidāppabhedassa upanissayo. Ettha ca "sīlasampattim nissāyā"ti vuttattā yassa samādhivijambhanabhūtā anavasesā cha abhiñña na ijihanti, tassa ukkatthaparicchedavasena na samādhisampadā atthīti satipi vijjānam abhiññekadesabhāve sīlasampattisamudāgatā eva tisso vijjā gahitā. Yathā hi paññāsampattisamudāgatā catasso patisambhidā upanissayasampannassa maggeneva ijihanti maggakkhane eva tāsam patilabhitabbato. Evam sīlasampattisamudāgatā tisso vijjā samādhisampattisamudāgatā ca cha abhiññā

upanissayasampannassa maggeneva ijjhantīti maggādhigameneva tāsam adhigamo veditabbo. Paccekabuddhānam sammāsambuddhānanca paccekabodhisammāsambodhidhammasamadhigamasadisā hi imesam ariyānam ime visesādhigamāti.

Tāsaṃyeva ca tattha pabhedavacanatoti ettha tāsaṃyevāti avadhāraṇaṁ pāpuṇitabbānaṁ chalabhiññācatupaṭisambhidānaṁ vinaye pabhedavacanābhāvaṁ sandhāya vuttaṁ. Verañjakaṇḍe hi tisso vijjāva vibhattāti. Dutiye tāsaṃyevāti avadhāraṇaṁ catasso paṭisambhidā apekkhitvā kataṁ, na tisso vijjā. Tā hi chasu abhiññāsu antogadhattā sutte vibhattāyevāti. Tāsañcāti ettha ca-saddena sesānampi tattha atthibhāvaṁ dīpeti. Abhidhammapiṭake hi tisso vijjā cha abhiññā catasso ca paṭisambhidā vuttāyeva. Paṭisambhidānaṁ pana aññattha pabhedavacanābhāvaṁ tattheva ca sammā vibhattabhāvaṁ dīpetukāmo heṭṭhā vuttanayena avadhāraṇaṁ akatvā "tatthevā"ti parivattetvā avadhāraṇaṁ ṭhapesi.

Idāni "vinaye duppatipanno 'mudukānam attharanādīnam samphasso viya itthisamphassopi vattatī'ti methunavītikkame dosam adisvā sīlavipattim pāpuņātī"ti dassento āha "vinaye pana duppatipanno"ti-ādi. Tattha sukho samphasso etesanti sukhasamphassāni, attharaṇapāvuraṇādīni. Upādinnaphasso itthiphasso, methunadhammoti vuttam hoti. Vuttampi hetanti aritthena bhikkhunā vuttam. So hi bahussuto dhammakathiko kammakilesavipāka-upavāda-ānavītikkamavasena pañcavidhesu antarāyikesu sesantarāyike jānāti, vinaye pana akovidattā pannattivītikkamantarāyike na jānāti, tasmā rahogato evam cintesi "ime agārikā pañca kāmaguņe paribhuñjantā sotāpannāpi sakadāgāminopi anāgāminopi honti. Bhikkhūpi manāpikāni cakkhuviññeyyāni rūpāni passanti -pa- kāyaviñneyye photthabbe phusanti, mudukāni attharanapāvuranādīni paribhuñjanti, etam sabbam vattati, kasmā itthīnamyeva rūpasaddagandharasaphotthabbā na vattanti, etepi vattantī''ti anavajjena paccayaparibhuñjanarasena sāvajjakāmagunaparibhogarasam samsanditvā sacchandarāgaparibhogañca nicchandarāgaparibhogañca ekam katvā thūlavākehi saddhim atisukhumasuttam ghatento viya sāsapena saddhim sineruno sadisatam

upasamharanto viya pāpakam diṭṭhigatam uppādetvā "kim bhagavatā mahāsamuddam bandhantena viya mahatā ussāhena paṭhamapārājikam paññattam, natthi ettha doso"ti sabbaññutaññāṇena saddhim paṭivirujjhanto vesārajjañāṇam paṭibāhanto ariyamagge khāṇukaṇḍakādīni pakkhipanto "methunadhamme doso natthī"ti jinassa āṇācakke pahāramadāsi. Tenāha "tathāham bhagavatā dhammam desitam ājānāmī"ti-ādi.

Tattha antarāyikāti tamtamsampattiyā vibandhanavasena sattasantānassa antare vemajjhe eti āgacchatīti antarāyo, diṭṭhadhammikādi-anattho. Anatikkamanaṭṭhena tasmim antarāye niyuttā, antarāyam vā phalam arahanti, antarāyassa vā karaṇasīlāti antarāyikā, saggamokkhānam antarāyakarāti vuttam hoti. Te ca kammakilesavipāka-upavāda-āṇāvītikkamavasena pañcavidhā. Tesam vitthārakathā parato ariṭṭhasikkhāpade¹ āvi bhavissati. Ayam panettha padatthasambandho—ye ime dhammā antarāyikā antarāyakarāti bhagavatā vuttā desitā ceva paññattā ca, te dhamme paṭisevato paṭisevantassa yathā yena pakārena te dhammā antarāyāya saggamokkhānam antarāyakaraṇattham nālam samatthā na honti, tathā tena pakārenāham bhagavatā desitam dhammam ājānāmīti. Tato dussīlabhāvam pāpuṇātīti tato anavajjasaññībhāvahetuto vītikkamitvā dussīlabhāvam pāpuṇātī.

Cattārome bhikkhaveti-ādinā—

"Cattārome bhikkhave puggalā santo samvijjamānā lokasmim. Katame cattāro, attahitāya paṭipanno hoti, no parahitāya, parahitāya paṭipanno hoti, no attahitāya, neva attahitāya paṭipanno hoti no parahitāya, attahitāya ceva paṭipanno hoti parahitāya cā"ti2—

ādinā puggaladesanāpaṭisaṃyuttasuttantapāḷim nidasseti. **Adhippāyam ajānanto**ti "ayam puggaladesanā vohāravasena, na paramatthato"ti evam bhagavato adhippāyam ajānanto. Buddhassa hi bhagavato duvidhā

desanā sammutidesanā paramatthadesanā cāti. Tattha "puggalo satto itthī puriso khattiyo brāhmaņo devo māro"ti evarūpā **sammutidesanā**. "Aniccam dukkham anattā khandhā dhātuyo āyatanāni satipaṭṭhānā"ti evarūpā **paramatthadesanā**. Tattha bhagavā ye sammutivasena desanam sutvā attham paṭivijjhitvā moham pahāya visesamadhigantum samatthā, tesam sammutidesanam deseti. Ye pana paramatthavasena desanam sutvā attham paṭivijjhitvā moham pahāya visesamadhigantum samatthā, tesam paramatthadesanam deseti.

Tatrāyam upamā—yathā hi desabhāsākusalo tiṇṇam vedānam atthasamvaṇṇako ācariyo ye damiļabhāsāya vutte attham jānanti, tesam damiļabhāsāya ācikkhati, ye andhakabhāsādīsu aññatarāya, tesam tāya bhāsāya, evam te māṇavā chekam byattam ācariyamāgamma khippameva sippam uggaṇhanti. Tattha ācariyo viya buddho bhagavā, tayo vedā viya kathetabbabhāve ṭhitāni tīṇi piṭakāni, desabhāsāya kosallamiva sammutiparamatthakosallam, nānādesabhāsāmāṇavakā viya sammutiparamatthavasena paṭivijjhanasamatthā veneyyasattā, ācariyassa damiļabhāsādi-ācikkhanam viya bhagavato sammutiparamatthavasenapi desanā veditabbā. Āha cettha—

"Duve saccāni akkhāsi, sambuddho vadatam varo. Sammutim paramatthanca, tatiyam nūpalabbhati.

Saṅketavacanaṁ saccaṁ, lokasammutikāraṇā. Paramatthavacanaṁ saccaṁ, dhammānaṁ bhūtakāranā.

Tasmā vohārakusalassa, lokanāthassa satthuno. Sammutim voharantassa, musāvādo na jāyatī"ti¹.

Apica aṭṭhahi kāraṇehi bhagavā puggalakathaṁ katheti—hirottappadīpanatthaṁ kammassakatādīpanatthaṁ paccattapurisakāradīpanatthaṁ ānantariyadīpanatthaṁ brahmavihāradīpanatthaṁ pubbenivāsadīpanatthaṁ dakkhiṇāvisuddhidīpanatthaṁ lokasammutiyā appahānatthañcāti. "Khandhā dhātuyo āyatanāni hiriyanti ottappantī"ti vutte mahājano na jānāti, sammohamāpajjati, paṭisattu

hoti "kimidam khandhā dhātuyo āyatanāni hiriyanti ottappanti nāmā"ti. "Itthī hiriyati ottappati, puriso khattiyo brāhmaņo devo māro"ti vutte mahājano jānāti, na sammohamāpajjati, na paṭisattu hoti, tasmā bhagavā hirottappadīpanattham puggalakatham katheti. "Khandhā kammassakā dhātuyo āyatanānī"ti vuttepi eseva nayo. Tasmā bhagavā kammassakatādīpanattham puggalakatham katheti. "Veļuvanādayo mahāvihāro khandhehi kārāpitā, dhātūhi āyatanehī"ti vuttepi eseva nayo. Tasmā bhagavā paccattapurisakāradīpanattham puggalakatham katheti. "Khandhā mātaram jīvitā voropenti, pitaram arahantam, ruhiruppādakammam samghabhedam karonti, dhātuyo āyatanānī"ti vuttepi eseva nayo. Tasmā bhagavā ānantariyadīpanattham puggalakatham katheti.

"Khandhā mettāyanti, dhātuyo āyatanānī"ti vuttepi eseva nayo. Tasmā bhagavā brahmavihāradīpanattham puggalakatham katheti. "Khandhā pubbenivāsam anussaranti, dhātuyo āyatanānī"ti vuttepi eseva nayo. Tasmā bhagavā pubbenivāsadīpanattham puggalakatham katheti. "Khandhā dānam paṭiggaṇhanti, dhātuyo āyatanānī"ti vuttepi mahājano na jānāti, sammohamāpajjati, paṭisattu hoti "kimidam khandhā dhātuyo āyatanāni paṭiggaṇhanti nāmā"ti. "Puggalā paṭiggaṇhanti sīlavanto kalyāṇadhammā"ti vutte pana jānāti, na sammohamāpajjati, na paṭisattu hoti. Tasmā bhagavā dakkhiṇāvisuddhidīpanattham puggalakatham katheti. Lokasammutiñca buddhā bhagavanto na vijahanti, lokasamaññāya lokaniruttiyā lokābhilāpe ṭhitāyeva dhammam desenti. Tasmā bhagavā lokasammutiyā appahānatthampi puggalakatham katheti, tasmā iminā ca adhippāyena bhagavato puggaladesanā, na paramatthadesanāti evam adhippāyam ajānantoti vuttam hoti.

Duggahitam gaṇhātīti "tathāham bhagavatā dhammam desitam ājānāmi, yathā tadevidam viññāṇam sandhāvati samsarati, anaññan"ti-ādinā duggahitam katvā gaṇhāti, viparītam gaṇhatīti vuttam hoti. Duggahitanti hi bhāvanapumsakaniddeso. Yam sandhāyāti yam duggahitagāham sandhāya. Attanā duggahitena dhammenāti pāṭhaseso veditabbo. Atha vā duggahaṇam duggahitam. Attanāti ca sāmi-atthe karaṇavacanam, tasmā attano

duggahanena viparītagāhenāti vuttam hoti. **Amhe ceva abbhācikkhatī**ti amhākanca abbhācikkhanam karoti. **Attānanca khanatī**ti attano kusalamulāni khananto attānam khanati nāma.

Dhammacintanti dhammasabhāvavijānanam. Atidhāvantoti thātabbamariyādāyam aṭṭhatvā "cittuppādamattena dānam hoti, sayameva cittam attano ārammaṇam hoti, sabbam cittam asabhāvadhammārammaṇan"ti evamādinā atidhāvanto atikkamitvā pavattamāno. Cattārīti buddhavisaya-iddhivisayakammavipākalokavisayasankhātāni cattāri. Vuttañhetam—

"Cattārimāni bhikkhave acinteyyāni na cintetabbāni, yāni cintento ummādassa vighātassa bhāgī assa. Katamāni cattāri? Buddhānam bhikkhave buddhavisayo acinteyyo na cintetabbo, yam cintento ummādassa vighātassa bhāgī assa. Jhāyissa bhikkhave jhānavisayo acinteyyo na cintetabbo -pa-. Kammavipāko bhikkhave acinteyyo na cintetabbo -pa-. Lokacintā bhikkhave acinteyyā na cintetabbā -pa-. Imāni bhikkhave cattāri acinteyyāni na cintetabbāni, yāni cintento ummādassa vighātassa bhāgī assā"ti1.

Tattha "acinteyyānī"ti tesam sabhāvanidassanam. "Na cintetabbānī"ti tattha kattabbatānidassanam. Tattha acinteyyānīti cintetumasakkuņeyyāni, cintetum araharūpāni na hontīti attho. Acinteyyattā eva na cintetabbāni, kāmam acinteyyānipi cha asādhāraṇādīni anussarantassa kusaluppattihetubhāvato tāni cintetabbāni, imāni pana evam na hontīti aphalabhāvato na cintetabbānīti adhippāyo. Tenevāha "yāni cintento ummādassa vighātassa bhāgī assā"ti. Tesanti tesam piṭakānam.

Etanti etam buddhavacanam. Tivaggasangahānīti sīlakkhandhavaggamahāvaggapāthikavaggasankhātehi tīhi vaggehi sangaho etesanti tivaggasangahāni. Catuttimseva suttantāti gāthāya evamatthayojanā veditabbā—

yassa nikāyassa suttagaņanāto catuttimseva ca suttantā vaggasangahavasena tayo vaggā assa sangahassāti tivaggo sangaho. Esa paṭhamo nikāyo dīghanikāyoti **anulomiko** apaccanīko, atthānulomanato anvatthanāmoti vuttam hoti.

Atthānulomanato anulomiko, anulomikattamyeva vibhāvetum "kasmā panā"ti-ādimāha. Ekanikāyampīti ekasamūhampi. Evam cittanti evam vicittam. Yathayidanti yathā ime. Poņikā cikkhallikā ca khattiyā, tesam nivāso poņikanikāyo cikkhallikanikāyoti vuccati. Evamādīni cettha sādhakāni sāsanato ca lokato cāti evamādīni udāharaņāni ettha nikāyasaddassa samūhanivāsānam vācakabhāve sāsanato ca vohārato ca sādhakāni pamāṇānīti attho. Ettha paṭhamamudāharaṇam sāsanato sādhakavacanam, dutiyam lokatoti veditabbam.

Pañcadasavaggasaṅgahānīti mūlapariyāyavaggādīhi pañcadasahi vaggehi saṅgaho etesanti pañcadasavaggasaṅgahāni. Diyaḍḍhasataṁ dve ca suttānīti aḍḍhena dutiyaṁ diyaḍḍhaṁ, ekaṁ sataṁ dve paññāsasuttāni cāti attho. Yatthāti yasmiṁ nikāye. Pañcadasavaggapariggahoti pañcadasahi vaggehi pariggahito saṅgahitoti attho.

Suttantānam sahassāni sattasuttasatāni cāti pāṭhe suttantānam satta sahassāni satta satāni cāti yojetabbam. Katthaci pana "sattasuttasahassāni satta suttasatāni cā"tipi pāṭho. Samyuttasangahoti samyuttanikāyassa sangaho.

Pubbe nidassitāti suttantapiṭakaniddese nidassitā. Vuttameva pakārantarena saṅkhipitvā dassetuṁ "ṭhapetvā cattāro nikāye avasesaṁ buddhavacanan"ti vuttaṁ. Sakalaṁ vinayapiṭakanti-ādinā niddiṭṭhameva hi iminā pakārantarena saṅkhipitvā vuttaṁ. Tenevāha "ṭhapetvā caturopete"ti-ādi. Tadaññanti tehi catūhi nikāyehi aññaṁ avasesanti attho.

Sabbameva hidanti sabbameva idam buddhavacanam. Navappabhedanti ettha katham panetam navappabhedam hoti. Tathā hi navahi angehi vavatthitehi aññamaññasankararahitehi bhavitabbam, tathā ca sati asuttasabhāvāneva

geyyaṅgādīni siyuṁ, atha suttasabhāvāneva geyyaṅgādīni, evaṁ sati suttanti visuṁ suttaṅgameva na siyā, evaṁ sante aṭṭhaṅgaṁ sāsananti āpajjati. Apica¹ "sagāthakaṁ suttaṁ geyyaṁ, niggāthakaṁ suttaṁ veyyākaraṇan"ti aṭṭhakathāyaṁ vuttaṁ. Suttañca nāma sagāthakaṁ vā siyā niggāthakaṁ vāti aṅgadvayeneva tadubhayaṁ saṅgahitanti tadubhayavinimuttañca suttaṁ udānādivisesasaññārahitaṁ natthi, yaṁ suttaṅgaṁ siyā, athāpi kathañci visuṁ suttaṅgaṁ siyā, maṅgalasuttādīnaṁ suttaṅgasaṅgaho vā na siyā gāthābhāvato dhammapadādīnaṁ viya, geyyaṅgasaṅgaho vā siyā sagāthakattā sagāthakavaggassa viya, tathā ubhatovibhaṅgādīsu sagāthakappadesānanti? Vuccate—

Suttanti sāmaññavidhi, visesavidhayo pare. Sanimittā nirulhattā, sahatāññena² nāññato.

Yathāvuttassa dosassa, natthi etthāvagāhaṇaṁ. Tasmā asaṅkaraṁyeva, navaṅgaṁ satthusāsanaṁ.

Sabbassapi hi buddhavacanassa suttanti ayam sāmaññavidhi. Tathā hi "ettakam tassa bhagavato suttāgatam suttapariyāpannam, sāvatthiyā suttavibhange, sakavāde pañca suttasatānī"ti-ādivacanato vinayābhidhammapariyattivisesesupi suttavohāro dissati. Teneva ca āyasmā mahākaccāno nettiyam³ āha "navavidhasuttantapariyeṭṭhī"ti. Tattha hi suttādivasena navangassa sāsanassa pariyeṭṭhi pariyesanā atthavicāraṇā "navavidhasuttantapariyeṭṭhī"ti vuttā. Tadekadesesu pana geyyādayo visesavidhayo tena tena nimittena patiṭṭhitā. Tathā hi geyyassa sagāthakattam tabbhāvanimittam. Lokepi hi sasilokam sagāthakam vā cuṇṇiyagantham "geyyan"ti vadanti. Gāthāvirahe pana sati puccham katvā visajjanabhāvo veyyākaraṇassa tabbhāvanimittam. Pucchāvisajjanañhi "byākaraṇan"ti vuccati. Byākaraṇameva veyyākaraṇam. Evam sante sagāthakādīnampi puccham katvā visajjanavasena pavattānam veyyākaraṇabhāvo āpajjatīti? Nāpajjati. Geyyādisaññānam anokāsabhāvato sa-okāsato anokāsavidhi balavāti "gāthāvirahe satī"ti visesitattā ca. Tathā

^{1.} Atha vā (Sī)

^{2.} Sangatāñnena (Sī), Netti-Ţtha 13 piṭṭhādīsupi passitabbam.

^{3.} Khu 10. 1 pitthe.

hi dhammapadādīsu kevalam gāthābandhesu sagāthakattepi somanassañāṇamayikagāthāyuttesu "vuttañhetan"ti-ādivacanasambandhesu abbhutadhammapaṭisamyuttesu ca suttavisesesu yathākkamam gāthā-udāna-itivuttaka-abbhutadhammasaññā patiṭṭhitā. Ettha hi satipi saññantaranimittayoge anokāsasaññanam balavabhāveneva gāthādisaññā patiṭṭhitā, tathā satipi gāthābandhabhāve bhagavato atītāsu jātīsu cariyānubhāvappakāsakesu jātakasaññā patiṭṭhitā, satipi pañhāvisajjanabhāve sagāthakatte ca kesuci suttantesu vedassa labhāpanato vedallasaññā patiṭṭhitāti evam tena tena sagāthakattādinā nimittena tesu tesu suttavisesesu geyyādisaññā patiṭṭhitāti visesavidhayo suttaṅgato pare geyyādayo. Yam panettha geyyaṅgādinimittarahitam, tam suttaṅgam visesasaññāparihārena sāmaññasaññāya pavattanato.

Nanu ca evam santepi sagāthakam suttam geyyam, niggāthakam suttam veyyākarananti suttangam na sambhavatīti codanā tadavatthā evāti? Na tadavatthā. Sodhitattā. Sodhitañhi pubbe gāthāvirahe sati pucchāvisajjanabhāvo veyyākaranassa tabbhāvanimittanti. Yañca vuttam "gāthābhāvato maṅgalasuttādīnam suttaṅgasaṅgaho na siyā"ti, tam na, nirulhattāti. Nirulho hi mangalasuttādīnam suttabhāvo. Na hi tāni dhammapadabuddhavamsādayo viya gāthābhāvena paññātāni, atha kho suttabhāveneva. Teneva hi atthakathāyam suttanāmakanti nāmaggahanam katam. Yam pana vuttam "sagathakatta geyyangasangaho siya"ti, tampi natthi. Yasmā sahatāññena. Sahabhāvo hi nāma atthato¹ aññena hoti, saha gāthāhīti ca sagāthakam. Na ca mangalasuttādīsu gāthāvinimutto koci suttappadeso atthi, yo "saha gāthāhī"ti vucceyya. Nanu ca gāthāsamudāyo gāthāhi añño hoti, tathā ca tassa vasena saha gāthāhīti sagāthakanti sakkā vattunti? Tam na. Na hi avayavavinimutto samudāyo nāma koci atthi. Yampi vuttam "ubhatovibhangādīsu sagāthakappadesānam geyyangasangaho siya"ti, tampi na annato. Annayeva hi ta gatha jātakādipariyāpannattā. Atho na tāhi ubhatovibhangādīnam geyyangabhāvoti evam suttādīnam angānam annamannasankarābhāvo veditabbo.

Idāni suttādīni navaṅgāni vibhajitvā dassento āha "tattha ubhatovibhaṅganiddesakhandhakaparivārā"ti-ādi. Tattha niddeso nāma suttanipāte—

"Kāmam kāmayamānassa, tassa cetam samijjhati. Addhā pītimano hoti, laddhā macco yadicchatī"ti¹—

ādinā āgatassa aṭṭhakavaggassa,

"Kenassu nivuto loko, (iccāyasmā ajito.) Kenassu nappakāsati. Kissābhilepanam brūsi, Kimsu tassa mahabbhayan"ti²—

ādinā āgatassa pārāyanavaggassa,

"Sabbesu bhūtesu nidhāya daṇḍaṁ, Aviheṭhayaṁ aññatarampi tesaṁ. Na puttamiccheyya kuto sahāyaṁ, Eko care khaggavisāṇakappo"ti³—

ādinā āgatassa khaggavisāṇasuttassa ca tadatthavibhāgavasena satthukappena āyasmatā dhammasenāpati sāriputtattherena kato niddeso mahāniddeso cūļaniddesoti ca vuccati. Evamidha niddesassa suttaṅgasaṅgaho bhadantabuddhaghosācariyena dassitoti veditabbo. Aññatthāpi ca dīghanikāyaṭṭhakathādīsu sabbattha ubhatovibhaṅganiddesakhandhakaparivārāti niddesassa suttaṅgasaṅgaho eva dassito. Ācariyadhammapālattherenapi nettipakaraṇaṭṭhakathāyaṁ evametassa suttaṅgasaṅgahova kathito. Keci pana niddesassa gāthāveyyākaraṇaṅgesu dvīsu saṅgahaṁ vadanti. Vuttañhetaṁ niddesa-aṭṭhakathāyaṁ upasenattherena—

"Tadetam vinayapiṭakam suttantapiṭakam abhidhammapiṭakanti tīsu piṭakesu suttantapiṭakapariyāpannam, dīghanikāyo majjhimanikāyo samyuttanikāyo aṅguttaranikāyo khuddakanikāyoti pañcasu mahānikāyesu khuddakamahānikāye pariyāpannam, suttam geyyam

veyyākaraṇam gāthā udānam itivuttakam jātakam abbhutadhammam vedallanti navasu satthusāsanamgesu yathāsambhavam gāthāveyyākaraṇamgadvayasamgahitan"ti¹.

Ettha tāva katthaci pucchāvisajjanasabhāvato niddesekadesassa veyyākaraṇaṅgasaṅgaho yujjatu nāma, gāthaṅgasaṅgaho pana kathaṁ yujjeyyāti idamettha vīmaṁsitabbaṁ. Dhammapadādīnaṁ viya hi kevalaṁ gāthābandhabhāvo gāthaṅgassa tabbhāvanimittaṁ. Dhammapadādīsu hi kevalaṁ gāthābandhesu gāthāsamaññā patiṭṭhitā, niddese ca na koci kevalo gāthābandhappadeso upalabbhati. Sammāsambuddhena bhāsitānaṁyeva hi aṭṭhakavaggādisaṅgahitānaṁ gāthānaṁ niddesamattaṁ dhammasenāpatinā kataṁ. Atthavibhajanatthaṁ ānītāpi hi tā aṭṭhakavaggādisaṅgahitā niddisitabbā mūlagāthāyo suttanipātapariyāpannattā aññāyevāti na niddesasaṅkhyaṁ gacchanti ubhatovibhaṅgādīsu āgatabhāvepi taṁ vohāraṁ alabhamāno jātakādigāthāpariyāpannā gāthāyo viya, tasmā kāraṇantaramettha gavesitabbaṁ yuttataraṁ vā gahetabbaṁ.

Nālakasuttatuvaṭṭakasuttānīti ettha nālakasuttaṁ nāma padumuttarassa bhagavato sāvakaṁ moneyyapaṭipadaṁ paṭipannaṁ disvā tadatthaṁ abhikaṅkhamānena tato pabhuti kappasatasahassaṁ pāramiyo pūretvā āgatena asitassa isino bhāgineyyena nālakattherena dhammacakkappavattitadivasato sattame divase "aññātametan"ti-ādīhi dvīhi gāthāhi moneyyapaṭipadaṁ puṭṭhena bhagavatā "moneyyaṁ te upaññissan"ti-ādinā² nālakattherassa bhāsitaṁ moneyyapaṭipadāparidīpakaṁ suttaṁ. Tuvaṭṭakasuttaṁ¹ pana mahāsamayasuttantadesanāya sannipatitesu devesu "kā nu kho arahattappattiyā paṭipattī"ti uppannacittānaṁ ekaccānaṁ devatānaṁ tamatthaṁ pakāsetuṁ "pucchāmi taṁ ādiccabandhū"ti-ādinā⁴ nimmitabuddhena attānaṁ pucchāpetvā "mūlaṁ papañcasaṅkhāyā"ti-ādinā⁵ bhāsitaṁ suttaṁ. Evamidhasuttanipāte āgatānaṁ maṅgalasuttādīnaṁ suttaṅgasaṅgaho dassito, tattheva āgatānaṁ asuttanāmikānaṁ suddhikagāthānaṁ gāthaṅgasaṅgahañca dassayissati, evaṁ sati suttanipātatthakathārambhe6—

^{1.} Mahāniddesa-Ttha 8 pitthe.

^{2.} Khu 1. 388 pitthe.

^{3.} Tuvatakasuttam (Sī)

^{4.} Khu 1. 420 khu 7. 263 pitthesu.

^{5.} Khu 1. 421 pitthe.

^{6.} Suttanipāta-Ţţha 1. 1 piţţhe.

"Gāthāsatasamākiṇṇo, geyyabyākaraṇaṅkito. Kasmā suttanipātoti, saṅkhamesa gatoti ce"ti—

sakalassapi suttanipātassa geyyaveyyākaraṇaṅgasaṅgaho kasmā coditoti? Nāyaṁ virodho. Kevalañhi tattha codakena sagāthakattaṁ katthaci pucchāvisajjanamattañca gahetvā codanāmattaṁ katanti gahetabbaṁ. Aññathā suttanipāte niggāthakassa suttasseva abhāvato veyyākaraṇaṅgasaṅgaho na codetabbo siyāti. Sagāthāvaggo geyyanti yojetabbaṁ. "Aṭṭhahi aṅgehi asaṅgahitaṁ nāma paṭisambhidādī"ti tīsupi gaṇṭhipadesu vuttaṁ. Keci pana paṭisambhidāmaggassa geyyaveyyākaraṇaṅgadvayasaṅgahaṁ vadanti. Vuttañhetaṁ paṭisambhidāmaggaṭṭhakathāyaṁ¹ "navasu satthusāsanaṅgesu yathāsambhavaṁ geyyaveyyākaraṇaṅgadvayasaṅgahitan"ti.

Nosuttanāmikāti asuttanāmikā. "Suddhikagāthā nāma vatthugāthā"ti tīsu **gaṇṭhipadesu** vuttam. Tattha **vatthugāthā**ti—

"Kosalānam purā rammā, agamā dakkhiņāpatham. Ākiñcaññam patthayāno, brāhmano mantapāragū"ti²—

ādinā pārāyanavaggassa nidānam āropentena āyasmatā ānandattherena saṅgītikāle vuttā chappaññāsa ca gāthāyo, ānandatthereneva saṅgītikāle nālakasuttassa nidānam āropentena vuttā—

"Ānandajāte tidasagaņe patīte, Sakkañca indam sucivasane ca deve. Dussam gahetvā atiriva thomayante, Asito isi addasa divāvihāre"ti³—

ādikā vīsatimattā gāthāyo ca vuccanti. Tattha "nālakasuttassa vatthugāthāyo nālakasuttasaṅkhyaṁyeva gacchantī"ti aṭṭhakathāyaṁ vuttaṁ. Vuttañhetaṁ suttanipātaṭṭhakathāyaṁ⁴—

"Parinibbute pana bhagavati saṅgītiṁ karontena āyasmatā mahākassapena āyasmā ānando tameva moneyyapatipadaṁ

^{1.} Paţisam-Ţţha 1. 8 piţţhe.

^{3.} Khu 1. 385 pitthe.

^{2.} Khu 1. 429 pitthe.

^{4.} Suttanipāta-Ttha 2. 202 pitthe.

puṭṭho yena yadā ca samādapito nālako bhagavantaṁ pucchi, taṁ sabbaṁ pākaṭaṁ katvā dassetukāmo 'ānandajāte'ti-ādikā vīsati vatthugāthāyo vatvā abhāsi. Taṁ sabbampi nālakasuttanti vuccatī'ti.

Tasmā nālakasuttassa vatthugāthāyo nālakasuttaggahaņeneva saṅgahitāti pārāyanikavaggassa vatthugāthāyo idha suddhikagāthāti gahetabbaṁ. Tattheva panassa pārāyaniyavagge ajitamāṇavakādīnaṁ soļasannaṁ brāhmaṇānaṁ pucchāgāthā bhagavato visajjanagāthā ca idha suddhikagāthāti evampi vattuṁ yujjati. Tāpi hi pāļiyaṁ suttanāmena avatvā "ajitamāṇavakapucchā tissamettayyamāṇavakapucchā"ti-ādinā¹ āgatattā cuṇṇiyaganthehi amissattā ca nosuttanāmikā suddhikagāthā nāmāti vattuṁ vaṭṭati.

Idāni udānam sarūpato vavatthapento āha "somanassañāṇamayika gāthāpaṭisamyuttā"ti-ādi. Kenaṭṭhena² panetam "udānan"ti vuccati? Udānanaṭṭhena. Kimidam udānam nāma? Pītivegasamuṭṭhāpito udāhāro. Yathā hi yam telādi minitabbavatthu mānam gahetum na sakkoti vissanditvā gacchati, tam "avaseko"ti vuccati, yanca jalam taļākam gahetum na sakkoti, ajjhottharitvā gacchati, tam "mahogho"ti vuccati, evameva yam pītivegasamuṭṭhāpitam vitakkavipphāram hadayam sandhāretum na sakkoti, so adhiko hutvā anto asaṇṭhahitvā bahi vacīdvārena nikkhanto paṭiggāhakanirapekkho udāhāraviseso "udānan"ti vuccati. Dhammasamvegavasenapi ayamākāro labbhateva. Tayidam katthaci gāthābandhavasena katthaci vākyavasena pavattam. Tathā hi—

"Tena kho pana samayena bhagavā bhikkhū nibbānapaṭisaṁyuttāya dhammiyā kathāya sandasseti samādapeti samuttejeti sampahaṁseti. Tedha bhikkhū aṭṭhiṁ katvā manasi katvā sabbaṁ cetasā samannāharitvā ohitasotā dhammaṁ suṇanti. Atha kho bhagavā etamatthaṁ viditvā tāyaṁ velāyaṁ imaṁ udānaṁ

udānesi 'atthi bhikkhave tadāyatanam, yattha neva pathavī na āpo'ti"¹—

ādīsu somanassañāṇasamuṭṭhitavākyavasena pavattam.

Nanu ca udānam nāma pītisomanassasamuṭṭhāpito dhammasamvegasamuṭṭhāpito vā dhammapaṭiggāhakanirapekkho udāhāro tathā ceva sabbattha āgatam, idha kasmā bhagavā udānento bhikkhū āmantesīti? Tesam bhikkhūnam saññāpanattham. Nibbānapaṭisamyuttañhi bhagavā tesam bhikkhūnam dhammam desetvā nibbānaguṇānussaraṇena uppannapītisomanassena udānam udānento "idha nibbānavajjo sabbo sabhāvadhammo paccayāyattavuttikova upalabbhati, na paccayanirapekkho, ayam pana nibbānadhammo kathamappaccayo upalabbhatī"ti tesam bhikkhūnam cetoparivitakkamaññāya tesam ñāpetukāmo "atthi bhikkhave tadāyatanan"ti² ādimāha. Na ekantato te paṭiggāhake katvāti veditabbam.

"Sace bhāyatha dukkhassa, sace vo dukkhamappiyam.

Mākattha pāpakam kammam, āvi vā yadi vā raho"ti³—

evamādikam pana dhammasamvegavasappavattam udānanti veditabbam.

"Sukhakāmāni bhūtāni, yo daṇḍena vihimsati.

Attano sukhamesāno, pecca so na labhate sukhan"ti⁴—

idampi dhammasamvegavasappavatam udānanti vadanti. Tathā hi ekasmim samaye sambahulā gopālakā antarā ca sāvatthim antarā ca jetavanam ahim daṇḍehi hananti. Tena ca samayena bhagavā sāvatthim piṇḍāya gacchanto antarāmagge te dārake ahim daṇḍena hanante disvā "kasmā kumārakā imam ahim daṇḍena hanathā"ti pucchitvā "ḍamsanabhayena bhante"ti ca vutte "ime 'attano sukham karissāmā'ti imam paharantā nibbattaṭṭhāne dukkham anubhavissanti, aho avijjāya nikatikosallan"ti dhammasamvegam uppādesi. Teneva ca dhammasamvegena imam udānam udānesi. Evametam katthaci gāthābandhavasena katthaci vākyavasena katthaci somanassavasena katthaci

^{1.} Khu 1. 177 pitthe Udāne.

^{3.} Khu 1. 137 pitthe.

^{2.} Khu 1. 177 pitthe.

^{4.} Khu 1. 33, 89 pitthesu.

dhammasamvegavasena pavattanti veditabbam. Tasmā aṭṭhakathāyam "somanassañāṇamayikagāthāpaṭisamyuttānī"ti yam udānalakkhaṇam vuttam, tam yebhuyyavasena vuttanti gahetabbam. Yebhuyyena hi udānam gāthābandhavasena bhāsitam pītisomanassasamuṭṭhāpitañca.

Tayidam sabbaññubuddhabhāsitam paccekabuddhabhāsitam sāvakabhāsitanti tividham hoti. Tattha paccekabuddhabhāsitam—

"Sabbesu bhūtesu nidhāya daṇḍaṁ, Avihethayaṁ aññatarampi tesan"ti—

ādinā khaggavisāņasutte¹ āgatameva. Sāvakabhāsitānipi—

"Sabbo rāgo pahīno me, Sabbo doso samūhato. Sabbo me vihato moho, Sītibhūtosmi nibbuto"ti—

ādinā theragāthāsu²,

"Kāyena samvutā āsim, vācāya uda cetasā. Samūlam tanhamabbhuyha, sītibhūtāmhi nibbutā"ti—

therigāthāsu³ ca āgatāni. Aññānipi sakkādīpi devehi bhāsitāni "aho dānaṁ paramadānaṁ kassape supatiṭṭhitan"ti-ādīni⁴, soṇadaṇḍabrāhmaṇādīhi manussehi ca bhāsitāni "namo tassa bhagavato"ti-ādīni⁵ tisso saṅgītiyo āruļhāni udānāni santi eva, na tāni idha adhippetāni. Yāni pana sammāsambuddhena sāmaṁ āhaccabhāsitāni jinavacanabhūtāni, tāneva ca dhammasaṅgāhakehi "udānan"ti saṅgītaṁ. Etāniyeva ca sandhāya bhagavato pariyattidhammaṁ navavidhā vibhajitvā uddisantena udānanti vuttaṁ.

Yā pana "anekajātisaṁsāran"ti-ādigāthā bhagavatā bodhiyā mūle udānavasena pavattitā anekasatasahassānaṁ sammāsambuddhānaṁ udānabhūtā ca, tā aparabhāge dhammabhaṇḍāgārikassa bhagavatā

^{1.} Khu 1. 284 pitthe.

^{2.} Khu 2. 237 pitthe.

^{3.} Khu 2. 379 piṭṭhe.

^{4.} Khu 1. 111 pitthe.

^{5.} Dī 2. 230; Ma 1. 235 pitthesu.

desitattā dhammasaṅgāhakehi udānapāḷiyaṁ saṅgahaṁ anāropetvā dhammapade saṅgahitā. Yañca "aññāsi vata bho koṇḍañño"ti udānavacanaṁ dasasahassilokadhātuyā devamanussānaṁ pavedanasamatthanigghosavipphāraṁ bhagavatā bhāsitaṁ, tadapi paṭhamabodhiyaṁ sabbesaṁ eva bhikkhūnaṁ sammāpaṭipattipaccavekkhaṇahetukaṁ "ārādhayiṁsu vata maṁ bhikkhū ekaṁ samayan"ti-ādivacanaṁ¹ viya dhammacakkappavattanasuttadesanāpariyosāne attanā adhigatadhammekadesassa yathādesitassa ariyamaggassa sāvakesu sabbapaṭhamaṁ therena adhigatattā attano parissamassa saphalabhāvapaccavekkhaṇahetukaṁ pītisomanassajanitaṁ udāhāramattaṁ, na "yadā have pātubhavanti dhammā"ti-ādivacanaṁ² viya pavattiyā nivattiyā vā pakāsananti na dhammasaṅgāhakehi udānapāḷiyaṁ saṅgītanti datthabbaṁ.

Udānapāļiyañca bodhivaggādīsu aṭṭhasu vaggesu dasa dasa katvā asītiyeva suttantā saṅgītā, tatoyeva ca **udānaṭṭhakathāyaṁ**³ **ācariyadhammapālattherena** vuttaṁ—

"Asīti eva suttantā, vaggā aṭṭha samāsato. Gāthā ca pañcanavuti, udānassa pakāsitā.

Aḍḍhūnanavamattā⁴ ca, bhāṇavārā pamāṇato. Ekādhikā tathāsīti, udānassānusandhayo.

Ekavīsasahassāni, satameva vicakkhaņo. Padānetānudānassa, ganitāni viniddise.

Gāthāpādato pana—

Aṭṭhasahassamattāni, cattāreva satāni ca. Padānetānudānassa, tevīsati ca niddise.

Akkharānam sahassāni, saṭṭhi satta satāni ca. Tīni dvāsīti ca tathā, udānassa paveditā''ti.

Idha pana "dvāsīti suttantā"ti vuttam, tam na sameti, tasmā "asīti suttantā"ti pāthena bhavitabbam.

^{1.} Ma 1. 175 pitthe.

^{3.} Udāna-Ttha 4 pitthe.

^{2.} Vi 3. 2; Khu 1. 78 pitthesu.

^{4.} Addhanavamamattā (Sī, Syā)

Vuttam hetam bhagavatā "vuttamarahatāti me sutam. Ekadhammam bhikkhave pajahatha, aham vo pāṭibhogo anāgāmitāya. Katamam ekadhammam? Lobham bhikkhave ekadhammam pajahatha, aham vo pāṭibhogo anāgāmitāyā"ti evamādinā ekakadukatikacatukkavasena itivuttakapāṭiyam¹ saṅgahamāropitāni dvādasuttarasatasuttantāni itivuttakam nāmāti dassento āha "vuttañhetan"ti-ādi. Dasuttarasatasuttantāti etthāpi "dvādasuttarasatasuttantā"ti pāṭhena bhavitabbam. Tathā hi ekakanipāte tāva sattavīsati suttāni, dukanipāte dvāvīsati, tikanipāte paññāsa, catukkanipāte terasāti dvādasuttarasatasuttantāneva itivuttakapāṭiyam āgatāni. Tatoyeva ca pāṭiyam—

"Lobho doso ca moho ca, Kodho makkhena pañcamam. Māno sabbam puna māno, Lobho dosena terasa.

Moho kodho puna makkho, Nīvaraṇā taṇhāya pañcamaṁ. Dve sekkhabhedā sāmaggī, Padutthanirayena terasa.

Pasannā ekamābhāyi, puggalam atītena pañcamam. Evañce opadhikam puññam, sattavīsa pakāsitā"ti—

evamādinā uddānagāthāhi dvādasuttarasatasuttāni gaņetvā dassitāni teneva ca aṭṭhakathāyampi 2 —

"Suttato ekakanipāte tāva sattavīsati suttāni, dukanipāte dvāvīsati, tikanipāte paññāsa, catukkanipāte terassāti dvādasādhikasatasuttasaṅgahan"ti—

vuttam. Kāmañcettha appakam ūnamadhikam vā gaṇanūpagam na hotīti katvā "dvāsīti khandhakavattānī"ti vattabbe "asīti khandhakavattānī"ti vuttavacanam viya "dvādasuttarasatasuttantā"ti vattabbe "dasuttarasatasuttantā"ti vuttantipi

sakkā vattum, tathāpi īdise ṭhāne pamāṇam dassentena yāthāvatova niyametvā dassetabbanti "dvādasuttarasatasuttantā" icceva pāṭhena bhavitabbam.

Jātam bhūtam purāvuttham bhagavato pubbacaritam kāyati katheti pakāsetīti **iātakam.**

"Cattārome bhikkhave acchariyā abbhutā dhammā ānande. Katame cattāro? Sace bhikkhave bhikkhuparisā ānandam dassanāya upasankamati, dassanenapi sā attamanā hoti. Tattha ce ānando dhammam bhāsati, bhāsitenapi sā attamanā hoti, atittāva bhikkhave bhikkhuparisā hoti, atha ānando tuṇhī bhavati. Sace bhikkhunīparisā -pa- upāsakaparisā -pa- upāsikā parisā ānandam dassanāya upasankamati, dassanenapi sā attamanā hoti. Tattha ce ānando dhammam bhāsati, bhāsitenapi sā attamanā hoti, atittāva bhikkhave upāsikāparisā hoti, atha ānando tuṇhī bhavati. Ime kho bhikkhave cattāro acchariyā abbhutā dhammā ānande"ti¹ evamādinayappavattā sabbepi acchariya-abbhutadhammapaṭisamyuttā suttantā abbhutadhammam nāmāti dassento āha "cattārome bhikkhave"ti-ādi.

 ${f C\bar u}$ ļavedall ${f a}$ dīsu 2 visākhena nāma upāsakena puṭṭhāya dhammadinnāya nāma bhikkhuniyā bhāsitaṁ suttaṁ ${f c\bar u}$ ļavedallanti veditabbaṁ.

Mahāvedallam³ pana mahākoṭṭhikattherena pucchitena āyasmatā sāriputtattherena bhāsitam. **Sammādiṭṭhisuttam**pi⁴ bhikkhūhi puṭṭhena tenevāyasmatā sāriputtattherena bhāsitam. Etāni majjhimanikāyapariyāpannāni. **Sakkapañham**⁵ pana sakkena puṭṭho bhagavā abhāsi, tañca dīghanikāyapariyāpannanti veditabbam.

Mahāpuṇṇamasuttampi⁶ tadahuposathe pannarase puṇṇamāya rattiyā aññatarena bhikkhunā puṭṭhena bhagavatā bhāsitaṁ, taṁ pana majjhimanikāyapariyāpannanti veditabbaṁ. Vedanti ñāṇaṁ. Tuṭṭhinti yathābhāsitadhammadesanaṁ viditvā "sādhu ayye, sādhāvuso"ti-ādinā abbhanumodanavasappavattaṁ pītisomanassaṁ. Laddhā laddhāti labhitvā labhitvā, punappunaṁ labhitvāti vuttaṁ hoti.

^{1.} Am 1. 448 pitthe.

^{2.} Ma 1. 373 pitthe.

^{3.} Ma 1. 365 pitthe.

^{4.} Ma 1. 57 pitthe.

^{5.} Dī 2. 211 pitthe.

^{6.} Ma 3. 66 pitthe.

Evam angavasena sakalampi buddhavacanam vibhajitvā idāni dhammakkhandhavasena vibhajitvā kathetukāmo āha "katham dhammakkhandhavasenā''ti-ādi. Tattha dhammakkhandhavasenāti dhammarāsivasena. Dvāsīti sahassāni buddhato ganhim, dve sahassāni bhikkhuto ganhinti sambandho. Tattha **buddhato ganhin**ti sammāsambuddhato uggaņhim, dvesahassādhikāni asīti dhammakkhandhasahassāni satthu santikā adhiganhinti attho. **Dve sahassāni** bhikkhutoti dve dhammakkhandhasahassāni bhikkhuto ugganhim, dhammasenāpati-ādīnam bhikkhūnam santikā adhiganhim. Sāriputtattherādīhi bhāsitānam sammāditthisuttantādīnam vasena hi "dve sahassāni bhikkhuto"ti vuttam. Caturāsīti sahassānīti tadubhayam samodhānetvā catusahassādhikāni asīti sahassāni. Ye me dhammā pavattinoti ye dhamma mama pavattino pavattamana pagunavacuggata jivhagge parivattanti, te dhammā caturāsīti dhammakkhasahassānīti vuttam hoti. Keci pana "ye ime"ti padacchedam katvā "ye ime dhammā buddhassa bhagavato bhikkhūnañca pavattino, tehi pavattitā, tesvāham dvāsīti sahassāni buddhato ganhim, dve sahassāni bhikkhutoti evam caturāsīti dhammakkhandhasahassānī''ti eyamettha sambandham yadanti.

Ettha ca subhasuttam¹ gopakamoggallānasuttañca² parinibbute bhagavati ānandattherena vuttattā caturāsītidhammakkhandhasahassetu antogadham hoti, na hotīti? Tattha paṭisambhidāgaṇṭhipade tāva idam vuttam "sayam vuttadhammakkhandhānam bhikkhuto gahiteyeva saṅgahetvā evamāhāti daṭṭhabban"ti. Bhagavatā pana dinnanaye ṭhatvā bhāsitattā sayam vuttadhammakkhandhānampi "buddhato gaṇhin"ti ettha saṅgaham katvā vuttanti evamettha vattum yuttataram viya dissati. Bhagavatāyeva hi dinnanaye ṭhatvā sāvakā dhammam desenti. Teneva hi tatiyasaṅgītiyañca moggaliputtatissattherena bhāsitampi kathāvatthuppakaraṇam buddhabhāsitam nāma jātam, tatoyeva ca attanā bhāsitampi subhasuttādi saṅgītim āropentena āyasmatā ānandattherena "evam me sutan"ti vuttam.

Evam paridīpitadhammakkhandhavasenāti gopakamoggallānena brāhmaņena "tvam bahussutoti buddhasāsane pākaṭo, kittakā dhammā te satthārā bhāsitā, tayā dhāritā"ti pucchite tassa paṭivacanam dentena

āyasmatā ānandattherena evam "dvāsīti buddhato gaṇhin"ti-ādinā paridīpitadhammakkhandhānam vasena. **Ekānusandhikam suttam** satipaṭṭhānādi. Satipaṭṭhānasuttañhi "ekāyano ayam bhikkhave maggo sattānam visuddhiyā"ti-ādinā¹ cattāro satipaṭṭhāne ārabhitvā tesamyeva vibhāgadassanavasena pavattattā "ekānusandhikan"ti vuccati.

Anekānusandhikanti nānānusandhikam parinibbānasuttādi.

Parinibbānasuttañhi nānāṭhānesu nānādhammadesanānaṁ vasena pavattattā "anekānusandhikan"ti vuccati. **Gāthābandhesu pañhapucchanan**ti—

"Kati chinde kati jahe, kati cuttari bhāvaye.

Kati saṅgātigo bhikkhu, 'oghatiṇṇo'ti vuccatī"ti²—

evamādinayappavattaṁ pañhapucchanaṁ eko dhammakkhandhoti attho.

"Pañca chinde pañca jahe, pañca cuttari bhāvaye. Pañca saṅgātigo bhikkhu, 'oghatinno'ti vuccatī"ti²—

evamādinayappavattam visajjananti veditabbam. **Tikadukabhājanam** nikkhepakaṇḍa-aṭṭhakathākaṇḍavasena veditabbam. Tasmā "kusalā dhammā, akusalā dhammā, abyākatā dhammā, sukhāya vedanāya sampayuttā dhammā, dukkhāya vedanāya sampayuttā dhammā, adukkhamasukhāya vedanāya sampayuttā dhammā"ti evamādīsu tikesu kusalattikassa vibhajanavasena yam vuttam nikkhepakaṇḍe³—

"Katame dhammā kusalā. Tīṇi kusalamūlāni alobho adoso amoho, taṁsampayutto vedanākkhandho saññākkhandho saṅkhārakkhandho viññāṇakkhandho, taṁsamuṭṭhānaṁ kāyakammaṁ vacīkammaṁ manokammaṁ. Ime dhammā kusalā.

Katame dhammā akusalā. Tīṇi akusalamūlāni lobho doso moho, tadekaṭṭhā ca kilesā, taṁsampayutto vedanākkhandho -pa-manokammaṁ. Ime dhammā akusalā.

Katame dhammā abyākatā. Kusalākusalānam dhammānam vipākā kāmāvacarā rūpāvacarā arūpāvacarā apariyāpannā

vedanākkhandho -pa- viññāṇakkhandho, ye ca dhammā kiriyā neva kusalā nākusalā na ca kammavipākā sabbañca rūpaṁ asaṅkhatā ca dhātu. Ime dhammā abyākatā"ti,

ayameko dhammakkhandho. Evam sesattikānampi ekekassa tikassa vibhajanam ekeko dhammakkhandhoti veditabbam.

Tathā "hetū dhammā"ti evamādikesu dukesu ekekassa dukassa vibhajanavasena yam vuttam—

"Katame dhammā hetū. Tayo kusalā hetū, tayo akusalā hetū, tayo abyākatā hetū"ti 1 —

ādi, tatthāpi ekekassa dukassa vibhajanam ekeko dhammakkhandho. Puna atthakathākaṇḍe²—

"Katame dhammā kusalā. Catūsu bhūmīsu kusalam. Ime dhammā kusalā. Katame dhammā akusalā. Dvādasa akusalacittuppādā. Ime dhammā akusalā. Katame dhammā abyākatā. Catūsu bhūmīsu vipāko tīsu bhūmīsu kiriyābyākatam rūpañca nibbānañca. Ime dhammā abyākatā"ti—

evamādinā kusalattikādivibhajanavasena pavattesu tikabhājanesu ekekassa tikassa bhājanam ekeko dhammakkhandho. Tathā—

"Katame dhammā hetū. Tayo kusalā hetū, tayo akusalā hetū, tayo abyākatā hetū"ti³—

ādinayappavattesu dukabhājanesu ekamekam dukabhājanam ekeko dhammakkhandhoti evamettha tikadukabhājanavasena dhammakkhandhavibhāgo veditabbo.

Ekamekañca cittavārabhājananti ettha pana—

"Yasmim samaye kāmāvacaram kusalam cittam uppannam hoti somanassasahagatam ñāṇasampayuttam rūpārammaṇam vā -pa-. Tasmim samaye phasso hoti -pa- avikkhepo hotī"ti⁴—

^{1.} Abhi 1. 214 pitthe.

^{3.} Abhi 1. 274 pitthe.

^{2.} Abhi 1. 266 pitthe.

^{4.} Abhi 1. 17 pitthe.

evamādinayappavatte cittuppādakande ekamekam cittavārabhājanam ekeko dhammakkhandhoti gahetabbam. **Eko dhammakkhandho**ti ettha "ekekatikadukabhājanam ekamekam cittavārabhājanan"ti vuttattā ekeko dhammakkhandhoti attho veditabbo. "Ekeko"ti avuttepi hi ayamattho atthato viññāyamānova hotīti "eko dhammakkhandho"ti vuttam. Atthi vatthūtiādīsu **vatthu** nāma sudinnakandādi. **Mātikā**ti "yo pana bhikkhu bhikkhūnam sikkhāsājīvasamāpanno"ti-ādinā¹ tasmim tasmim ajjhācāre paññattasikkhāpadam. Padabhājanīyanti tassa tassa sikkhāpadassa "yo panāti yo yādiso"ti-ādinayappavattam² vibhajanam. **Antarāpattī**ti "patilātam ukkhipati, āpatti dukkatassā"ti³ evamādinā sikkhāpadantaresu paññattā āpatti. **Anāpattī**ti "anāpatti ajānantassa asādiyantassa ummattakassa khittacittassa vedanāttassa ādikammikassā"ti-ādinayappavatto⁴ anāpattivāro. **Tikacchedo**ti "dasāhātikkante atikkantasaññī nissaggiyam pācittiyam, dasāhātikkante vematiko nissaggiyam pācittiyam, dasāhātikkante anatikkantasaññī nissaggiyam pācittiyan"ti⁵ evamādinayappavatto tikapācittiyatikadukkatādibhedo tikaparicchedo.

Idāni evametam abhedato rasavasena ekavidhanti-ādinā "ayam dhammo, ayam vinayo -pa- imāni caturāsīti dhammakhandhasahassānī"ti buddhavacanam dhammavinayādibhedena vavatthapetvā saṅgāyantena mahākassapapamukhena vasīgaņena anekacchariyapātubhāvapaṭimaṇḍitāya saṅgītiyā imassa piṭakassa vinayabhāvo majjhimabuddhavacanādibhāvo ca vavatthāpitoti dasseti. Na kevalam imamevimassa yathāvuttappabhedam vavatthapetvā saṅgītam, atha kho aññampīti dassento āha "na kevalañca imamevā"ti-ādi. Tattha uddānasaṅgaho paṭhamapārājikādīsu āgatānam vinītavatthu-ādīnam saṅkhepato saṅgahadassanavasena dhammasaṅgāhakehi kathitā—

"Makkaṭī vajjiputtā ca, gihī naggo ca titthiyā.

Dārikuppalavannā ca, byañjanehipare duve"ti⁶—

^{1.} Vi 1. 28 pitthe.

^{2.} Vi 1. 28 piṭṭhādīsu.

^{3.} Vi 2. 154 pitthe.

^{4.} Vi 1. 41 pitthādīsu.

^{5.} Vi 1. 296 pitthe.

^{6.} Vi 1. 41 pitthe.

ādikā gāthāyo. Sīlakkhandhavaggamūlapariyāyavaggādivasena saṅgaho vaggasaṅgaho.

Uttarimanussadhammapeyyālanīlacakkapeyyālādivavatthāpanavasena **peyyālasaṅgaho.** Aṅguttaranikāyādīsu **ekakanipātādisaṅgaho.** Saṁyuttanikāye devatāsaṁyuttādivasena **saṁyuttasaṅgaho.** Majjhimanikāyādīsu mūlapaṇṇāsakādivasena **paṇṇāsakasaṅgaho.**

Assa buddhavacanassa saṅgītipariyosāne sādhukāraṁ dadamānā viyāti sambandho. Saṅkampīti uddhaṁ uddhaṁ gacchantī suṭṭhu kampi. Sampakampīti uddhaṁ adho ca gacchantī sampakampi. Sampavedhīti catūsu disāsu gacchantī suṭṭhu pavedhi. Accharaṁ paharituṁ yuttāni acchariyāni, pupphavassacelukkhepādīni. Yā paṭhamamahāsaṅgīti dhammasaṅgāhakehi mahākassapādīhi pañcahi satehi yena katā saṅgītā, tena pañcasatāni etissā atthīti "pañcasatā"ti ca, therehevakatattā therā mahākassapādayo etissā atthīti "therikā"ti ca loke vuccati, ayaṁ paṭhamamahāsaṅgīti nāmāti sambandho.

Evam paṭhamamahāsaṅgītim dassetvā yadattham sā idha nidassitā, tam nigamanavasena dassento "imissā"ti-ādimāha. Āyasmatā upālittherena vuttanti "tena samayenā"ti-ādi vakkhamānam sabbam nidānavacanam vuttam. Kimattham panettha dhammavinayasaṅgahe kathiyamāne¹ nidānavacanam vuttam, nanu ca bhagavatā bhāsitavacanasseva saṅgaho kātabboti? Vuccate—desanāya ṭhiti asammosasaddheyyabhāvasampādanattham. Kāladesadesakaparisāpadesehi upanibanditvā ṭhapitā hi desanā ciraṭṭhitikā hoti asammosadhammā saddheyyā ca, desakālakattuhetunimittehi upanibandho viya vohāravinichayo. Teneva ca āyasmatā mahākassapena "paṭhamapārājikam āvuso upāli kattha paññattan"ti-ādinā desādipucchāsu katāsu tāsam visajjanam karontena āyasmatā upālittherena "tena samayenā"ti-ādinā paṭhamapārājikassa nidānam bhāsitam.

Apica sāsanasampattipakāsanattham nidānavacanam. Ñāṇakaruṇāpariggahitasabbakiriyassa hi bhagavato natthi niratthakā patipatti attahitatthā vā, tasmā paresamyevatthāya pavattasabbakiriyassa sammāsambuddhassa sakalampi kāyavacīmanokammam yathāpavattam vuccamānam diṭṭhadhammikasamparāyikaparamatthehi yathāraham sattānam anusāsanaṭṭhena sāsanam, na kabbaracanā. Tayidam satthuracitam kāladesadesakaparisāpadesehi saddhim tattha tattha nidānavacanehi yathāraham pakāsīyati.

Apica satthuno pamāṇabhāvappakāsanena sāsanassa pamāṇabhāvadassanatthaṁ nidānavacanaṁ, tañcassa pamāṇabhāvadassanaṁ "buddho bhagavā"ti iminā padadvayena vibhāvitanti veditabbaṁ. **Buddho**ti hi iminā tathāgatassa anaññasādhāraṇasuparisuddhañāṇādiguṇavisesayogaparidīpanena, **bhagavā**ti ca iminā rāgadosamohādisabbakilesamaladuccaritādidosappahānadīpanena, tato eva ca sabbasattuttamabhāvadīpanena ayamattho sabbathā pakāsito hotīti idamettha nidānavacanappayojanassa mukhamattanidassanaṁ.

Tatrāyam ācariyaparamparāti tasmim jambudīpe ayam ācariyānam paramparā pavenī patipāti. **Upāli dāsako**ti-ādīsu **upālitthero** pākatoyeva, dāsakattherādayo pana evam veditabbā. Vesāliyam kira eko dāsako nāma brāhmaṇamāṇavo tiṇṇam antevāsikasakānam jetthantevāsiko hutvā ācariyassa santike sippam ugganhanto dvādasavassikoyeva tinnam vedānam pāragū ahosi. So ekadivasam antevāsikaparivuto dhammavinayam sangāyitvā vālikārāme nivasantam āyasmantam upālittheram upasankamitvā attano vesesu sabbāni ganthitthānāni theram pucchi. Theropi sabbam byākaritvā sayampi ekam panham pucchanto nāmam sandhāya imam pañham pucchi "ekadhammo kho māṇava sabbesu dhammesu anupatati, sabbepi māṇava dhammā ekadhammasmim osaranti, katamo nu kho so mānavaka dhammo"ti. Sopi kho mānavo pañhassa attham ajānanto "kimidam bho pabbajitā"ti āha. Buddhamantoyam mānavāti. Sakkā panāyam bho mayhampi dātunti. Sakkā mānava amhehi gahitapabbajjam ganhantassa dātunti. "Sādhu kho bho pabbajitā" ti mānavo sampaticchitvā attano mātaram pitaram ācariyanca anujānāpetvā tīhi antevāsikasatehi saddhim therassa santike pabbajitvā paripunnavīsativasso

upasampadam labhitvā arahattam pāpuņi. Thero tam dhuram katvā khīņāsavasahassassa piṭakattayam vācesi.

Soṇako pana dāsakattherassa saddhivihāriko. So kira kāsīsu ekassa vāṇijakassa putto hutvā pañcadasavassusiko ekam samayam mātāpitūhi saddhim vāṇijjāya giribbajam gato. Tato pañcapaññāsadārakehi saddhim veļuvanam gantvā tattha dāsakattheram saparisam disvā ativiya pasanno pabbajjam yācitvā therena mātāpitaro anujānāpetvā "pabbajāhī"ti vutto mātāpitusantikam gantvā tamattham ārocetvā tesu anicchantesu chinnabhatto hutvā mātāpitaro anujānāpetvā pañcapaññāsāya dārakehi saddhim therassa santike pabbajitvā laddhūpasampado arahattam pāpuṇi. Tam thero sakalam buddhavacanam uggaṇhāpesi. Sopi gaṇapāmokkho hutvā bahūnam dhammavinayam vācesi.

Siggavatthero pana sonakattherassa saddhivihāriko ahosi. So kira pātaliputte siggavo nāma amaccaputto hutvā tinnam utūnam anucchavikesu tīsu pāsādesu sampattim anubhavamāno ekadivasam attano sahāyena candavajjinā setthiputtena saddhim saparivāro kukkutārāmam gantvā tattha sonakattheram nirodhasamāpattim samāpajjitvā nisinnam disvā vanditvā attanā saddhim anālapantam natvā gantvā tam kāranam bhikkhusamgham pucchitvā bhikkhūhi "samāpattim samāpannā nālapantī"ti vutto "katham bhante samāpattito vutthahantī"ti puna pucchitvā tehi ca bhikkhūhi "satthuno ceva samghassa ca pakkosanāya yathāparicchinnakālato āyusankhayā ca vutthahantī"ti vatvā tassa saparivārassa upanissayam disvā samghassa vacanena nirodhā vutthāpitam sonakattheram disvā "kasmā bhante mayā saddhim nālapitthā"ti pucchitvā therena "bhuñjitabbakam kumāra bhuñjimhā"ti vutte "sakkā nu kho bhante amhehipi tam bhojetun"ti pucchitvā "sakkā kumāra amhādise katvā bhojetun"ti vutte tamattham mātāpitūnam ārocetvā tehi anuññāto attano sahāyena candavajjinā tehi ca pañcahi purisasatehi saddhim sonakattherassa santike pabbajitvā upasampanno ahosi. Tattha siggavo ca candavajjī ca

dve upajjhāyasseva santike dhammavinayam pariyāpuņitvā aparabhāge chaļabhiññā ahesum.

Tissassa pana moggaliputtassa anupubbakathā parato āvi bhavissati. Vijitāvinoti vijitasabbakilesapaṭipakkhattā vijitavanto. Paramparāyāti paṭipāṭiyā, anukkamenāti vuttam hoti. Jambusirivhayeti jambusadisanāme, jambunāmaketi vuttam hoti. Mahantena hi jamburukkhena abhilakkhitattā dīpopi "jambū"ti vuccati. Acchijjamānam avinassamānam katvā.

Vinayavamsanti-ādīhi tīhi vinayapāļiyeva kathitā pariyāyavacanattā. Pakataññutanti veyyattiyam, paṭubhāvanti vuttam hoti. Dhuraggāho ahosīti padhānaggāhī ahosi, sabbesam pāmokkho hutvā gaṇhīti vuttam hoti. Bhikkhūnam samudāyo samūho bhikkhusamudāyo, samaṇagaṇoti attho.

Iti samantapāsādikāya vinayaṭṭhakathāya sāratthadīpaniyaṁ Paṭhamamahāsaṅgītikathāvaṇṇanā samattā.

Dutiyasangītikathāvannanā

"Yadā nibbāyimsū"ti sambandho. **Jotayitvā ca sabbadhī**ti tameva saddhammam sabbattha pakāsayitvā. "Jutimanto"ti vattabbe gāthābandhavasena **"jutīmanto"**ti vuttam, paññājotisampannāti attho, tejavantoti vā, mahānubhāvāti vuttam hoti. **Nibbāyimsū**ti anupādisesāya nibbānadhātuyā parinibbāyimsu. Pahīnasabbakilesattā natthi etesam katthaci ālayo tanhāti **anālayā**, vītarāgāti vuttam hoti.

Vassasataparinibbute bhagavatīti vassasatam parinibbutassa assāti vassasataparinibbuto, bhagavā, tasmim parinibbānato vassasate atikkanteti vuttam hoti. Vesālikāti vesālīnivāsino. Vajjiputtakāti vajjiraṭṭhe vesāliyam kulānam puttā. Kappati singīloṇakappoti singena loṇam pariharitvā pariharitvā aloṇakapiṇḍapātena saddhim bhuñjitum kappati, na sannidhim karotīti adhippāyo. Kappati dvangulakappoti

dvangulam atikkantāya chāyāya vikāle bhojanam bhunjitum kappatīti attho. Kappati gāmantarakappoti "gāmantaram gamissāmī"ti pavāritena anatirittabhojanam bhunjitum kappatīti attho. Kappati āvāsakappoti ekasīmāyam nānāsenāsanesu visum visum uposathādīni samghakammāni kātum vattatīti attho. **Kappati anumatikappo**ti "anāgatānam āgatakāle anumatim gahessāmī''ti tesu anāgatesuyeva vaggena samghena kammam katvā pacchā anumatim gahetum kappati, vaggakammam na hotīti adhippāyo. **Kappati ācinnakappo**ti ācariyupajihāyehi ācinno kappatīti attho. So pana ekacco kappati dhammiko, ekacco na kappati adhammikoti veditabbo. **Kappati amathitakappo**ti yam khīram khīrabhāvam vijahitam dadhibhāvam asampattam, tam bhuttāvinā pavāritena anatirittam bhuñjitum kappatīti attho. **Kappati jalogim**¹ pātunti ettha jalogīti taruņasurā. Yam majjasambhāram ekato katam majjabhāvamasampattam, tam pātum vattatīti adhippāyo. **Jātarūparajatan**ti sarasato vikāram anāpajjitvā sabbadā jātam rūpameva hotīti jātam rūpametassāti jātarūpam, suvannam. Dhavalasabhāvatāya rājatīti rajatam, rūpiyam. Susunāgaputtoti susunāgassa putto.

Kākaṇḍakaputtoti kākaṇḍakabrāhmaṇassa putto. Vajjīsūti janapadavacanattā bahuvacanam katam. Ekopi hi janapado ruļhīsaddattā bahuvacanena vuccati. Yena vesālī, tadavasarīti yena disābhāgena vesālī avasaritabbā, yasmim vā padese vesālī, tadavasari, tam pattoti attho. Mahāvane kūṭāgārasālāyanti ettha mahāvanam nāma sayamjātamaropimam saparicchedam mahantam vanam. Kapilavatthusāmantā pana mahāvanam himavantena saha ekābaddham aparicchedam hutvā mahāsamuddam āhacca ṭhitam, idam tādisam na hotīti saparicchedam mahantam vananti mahāvanam. Kūṭāgārasālā pana mahāvanam nissāya kate ārāme kūṭāgāram anto katvā hamsavaṭṭakacchannena hamsamaṇḍalākārena katā.

Tadahuposatheti ettha tadahūti tasmim ahani, tasmim divaseti attho. Upavasanti etthāti uposatho, upavasitabbadivaso. Upavasantīti ca sīlena vā sabbaso āhārassa ca abhuñjanasankhātena

anasanena vā khīrapānamadhupānādimattena vā upetā hutvā vasantīti attho. So panesa divaso atthamīcātuddasīpannarasībhedena tividho. Katthaci pana pātimokkhepi sīlepi upavāsepi pañnattiyampi uposathasaddo āgato. Tathā hesa "āyāmāvuso kappina uposatham gamissāmā"ti-ādīsu pātimokkhuddese āgato. "Evam atthangasamannāgato kho visākhe uposatho upavuttho"tiādīsu¹ sīle. "Suddhassa ve sadā pheggu, suddhassuposatho sadā"ti-ādīsu² upavāse. "Uposatho nāma nāgarājā"ti-ādīsu³ pañnattiyanca āgato. Tattha upecca vasitabbato uposatho pātimokkhuddeso. Upetena samannāgatena hutvā vasitabbato santāne vāsetabbato uposatho sīlam. Asanādisamyamādim vā upecca vasantīti uposatho upavāso. Tathārūpe hatthi-assavisese uposathoti samaññāmattato uposatho paññatti. Idha pana "na bhikkhave tadahuposathe sabhikkhukā āvāsā"ti⁴ ādīsu viya uposathadivaso adhippeto, tasmā tadahuposatheti tasmim uposathadivaseti attho. Kamsapātinti suvannapātim. Kahāpanampīti-ādīsu kahāpanassa samabhāgo addho. Pādo catutthabhāgo. Māsakoyeva **māsakarūpam. Sabbam tāva vattabban**ti iminā sattasatikakkhandhake⁵ āgatā sabbāpi pāli idha ānetvā vattabbāti dasseti. Sā kuto vattabbāti āha "yāva imāya pana vinayasangitiyā"ti-ādi. Saṅgāyitasadisameva saṅgāyiṁsūti sambandho.

Pubbe katam upādāyāti pubbe katam paṭhamasaṅgītimupādāya. Sā panāyam saṅgītīti sambandho. Tesūti tesu saṅgītikārakesu theresu. Vissutāti gaṇapāmokkhatāya vissutā sabbattha pākaṭā. Tasmiñhi sannipāte aṭṭheva gaṇapāmokkhā mahātherā ahesum, tesu ca vāsabhagāmī sumanoti dve therā anuruddhattherassa saddhivihārikā, avasesā cha ānandattherassa. Etena pana sabbepi aṭṭha mahātherā bhagavantam diṭṭhapubbā. Idāni te there sarūpato dassento āha "sabbakāmī cā"ti-ādi. Sāṇasambhūtoti sāṇadesavāsī

^{1.} Am 3. 84 pitthe.

^{2.} Ma 1. 48 pitthe.

^{3.} Dī 2. 142; Ma 3. 212 piṭṭhesu.

^{4.} Vi 3. 187 pitthe.

^{5.} Vi 4. 491 pitthe.

sambhūtatthero. Dutiyo saṅgahoti sambandho. **Pannabhārā**ti patitakkhandhabhārā. "Bhārā have pañcakkhandhā"ti¹ hi vuttaṁ. **Katakiccā**ti catūsu saccesu catūhi maggehi kattabbassa pariññāpahānasacchikiriyābhāvanāsaṅkhātassa soḷasavidhassapi kiccassa parinitthitattā katakiccā.

Abbudanti upaddavam vadanti corakammampi bhagavato vacanam thenetvā attano vacanassa dīpanato. Gaṇṭhipade pana "abbudam gaṇḍo"ti vuttam. Imanti² vakkhamānanidassanam. Sandissamānā mukhā sammukhā. Uparibrahmalokūpapattiyā bhāvitamagganti uparibrahmaloke upapattiyā uppāditajjhānam. Jhānañhi tatrūpapattiyā upāyabhāvato idha "maggo"ti vuttam. Upāyo hi "maggo"ti vuccati. Vacanattho panettha—tam tam upapattim maggati gavesati janeti nipphādetīti maggoti evam veditabbo. Atthato cāyam maggo nāma cetanāpi hoti cetanāsampayuttadhammāpi tadubhayampi. "Nirayañcāham sāriputta jānāmi nirayagāmiñca maggan"ti³ hi ettha cetanā maggo nāma.

"Saddhā hiriyam kusalañca dānam, Dhammā ete sappurisānuyātā. Etam hi maggam diviyam vadanti, Etena hi gacchati devalokan"ti⁴—

ettha cetanāsampayuttadhammā maggo nāma. "Ayaṁ bhikkhave maggo ayaṁ paṭipadā"ti **saṅkhārūpapattisuttā**dīsu⁵ cetanāpi cetanāsampayuttadhammāpi maggo nāma. Imasmiṁ ṭhāne jhānassa adhippetattā cetanāsampayuttadhammā gahetabbā.

Moggalibrāhmaṇassāti lokasammatassa aputtakassa moggalināmabrāhmaṇassa. Nanu ca kathametaṁ nāma vuttaṁ "moggalibrāhmaṇassa gehe paṭisandhiṁ gahessatī"ti. Kiṁ uparūpapattiyā paṭiladdhasamāpattīnampi kāmāvacare uppatti hotīti? Hoti. Sā ca katādhikārānaṁ mahāpuññānaṁ cetopaṇidhivasena hoti, na sabbesanti daṭṭhabbaṁ. Atha mahaggatassa garukakammassa vipākaṁ paṭibāhitvā parittakammaṁ kathamattano vipākassa okāsaṁ karotīti? Ettha ca tāva tīsupi ganthipadesu

^{1.} Sam 2. 22 pitthe.

^{2.} Idanti (Sī, Syā)

^{3.} Ma 1. 106 pitthe.

^{4.} Am 3. 68; Abhi 4. 255 pitthesu.

^{5.} Ma 3. 141 pitthe.

idam vuttam "nikantibaleneva jhānā parihāyati, tato parihīnajjhānā nibbattantī"ti. Keci pana "anīvaraṇāvatthāya nikantiyā jhānassa parihāni vīmamsitvā gahetabbā"ti vatvā evamettha kāraṇam vadanti "satipi mahaggatakammuno vipākapaṭibāhanasamatthassa parittakammassapi abhāve 'ijjhati bhikkhave sīlavato cetopaṇidhi visuddhattā'ti¹ vacanato kāmabhave cetopaṇidhi mahaggatakammassa vipākam paṭibāhitvā parittakammuno vipākassa okāsam karotī"ti.

Sādhu sappurisāti ettha sādhūti āyācanatthe nipāto, taṁ yācāmāti attho. Haṭṭhapahaṭṭhoti cittapīṇanavasena punappunaṁ santuṭṭho. Udaggudaggoti sarīravikāruppādanapītivasena udaggudaggo. Pītimā hi puggalo kāyacittānaṁ uggatattā abbhuggatattā "udaggo"ti vuccati. Sādhūti paṭissuṇitvāti "sādhū"ti paṭivacanaṁ datvā. Tīretvāti niṭṭhapetvā. Puna paccāgamiṁsūti puna āgamiṁsu. Tena kho pana samayenāti yasmiṁ samaye dutiyasaṅgītiṁ akaṁsu, tasmiṁ samayeti attho. Navakāti vuttamevatthaṁ vibhāvetuṁ "daharabhikkhū"ti vuttaṁ. Taṁ adhikaraṇaṁ na sampāpuṇiṁsūti taṁ vajjiputtakehi uppāditaṁ adhikaraṇaṁ vinicchinituṁ na sampāpuṇiṁsu nāgamiṁsu. No ahuvatthāti sambandho. Idaṁ daṇḍakammanti idāni vattabbaṁ sandhāya vuttaṁ. Yāvatāyukaṁ ṭhatvā parinibbutāti sambandho, yāva attano attano āyuparimāṇaṁ, tāva ṭhatvā parinibbutāti attho.

Kim pana katvā te therā parinibbutāti āha "dutiyam sangaham katvā" tiādi. Anāgatepi saddhammavuḍḍhiyā hetum katvā parinibbutāti sambandho. Idāni "tepi nāma evam mahānubhāvā therā aniccatāya vasam gatā, kimangam pana aññe" ti samvejetvā ovadanto āha "khīṇāsavā" ti-ādi. Aniccatāvasanti aniccatāvasattam, aniccatāyattabhāvam aniccatādhīnabhāvanti vuttam hoti. Jammim lāmakam durabhisambhavam anabhibhavanīyam atikkamitum asakkuņeyyam aniccatam evam ñatvāti sambandho. Keci pana "durabhisambhavan" ti ettha "pāpuṇitum asakkuṇeyyan" ti imamattham gahetvā "yam durabhisambhavam niccam amatam padam, tam pattum vāyame dhīro" ti

sambandham vadanti. **Sabbākārenā**ti sabbappakārena vattabbam kiñcipi asesetvā dutiyasangīti samvannitāti adhippāyo.

Iti samantapāsādikāya vinayaṭṭhakathāya sāratthadīpaniyaṁ Dutiyasaṅgītikathāvaṇṇanā samattā.

Tatiyasangītikathāvannanā

Imissā pana saṅgītiyā dhammasaṅgāhakattherehi nikkaḍḍhitā te dasasahassā vajjiputtakā bhikkhū pakkhaṁ pariyesamānā attano attano anurūpaṁ dubbalapakkhaṁ labhitvā visuṁ mahāsaṁghikaṁ ācariyakulaṁ nāma akaṁsu, tato bhijjitvā aparāni dve ācariyakulāni jātāni gokulikā ca ekabyohārikā¹ ca. Gokulikanikāyato bhijjitvā aparāni dve ācariyakulāni jātāni paṇṇattivādā ca bāhuliyā ca. Bahussutikātipi tesaṁyeva nāmaṁ, tesaṁyeva antarā cetiyavādā nāma apare ācariyavādā uppannā. Evaṁ mahāsaṁghikācariyakulato dutiye vassasate pañcācariyakulāni uppannāni, tāni mahāsaṁghikehi saddhiṁ cha honti.

Tasmimyeva dutiye vassasate theravādato bhijjitvā dve ācariyavādā uppannā mahisāsakā² ca vajjiputtakā ca. Tattha vajjiputtakavādato bhijjitvā apare cattāro ācariyavādā uppannā dhammuttarikā bhaddayānikā channāgārikā samitikāti³. Puna tasmim yeva dutiye vassasate mahisāsakavādato bhijjitvā sabbatthivādā dhammaguttikāti dve ācariyavādā uppannā. Puna sabbatthivādakulato bhijjitvā kassapikā nāma jātā, kassapikesupi bhinnesu apare saṅkantikā nāma jātā, saṅkantikesu bhinnesu suttavādā nāma jātāti theravādato bhijjitvā ime ekādasa ācariyavādā uppannā, te theravādena saddhim dvādasa honti. Iti ime ca dvādasa mahāsaṃghikānañca cha ācariyavādāti sabbe aṭṭhārasa ācariyavādā dutiye

vassasate uppannā. Aṭṭhārasa nikāyātipi aṭṭhārasācariyakulānītipi etesamyeva nāmam. Etesu pana sattarasa vādā bhinnakā, theravādoveko asambhinnakoti veditabbo. Vuttampi cetam dīpavamse¹—

"Nikkaḍḍhitā pāpabhikkhū, therehi vajjiputtakā. Aññaṁ pakkhaṁ labhitvāna, adhammavādī bahū janā.

Dasasahassā samāgantvā, akamsu dhammasangaham. Tasmāyam dhammasangīti, mahāsangīti vuccati.

Mahāsaṅgītikā bhikkhū, vilomaṁ akaṁsu sāsane. Bhinditvā mūlasaṅgahaṁ, aññaṁ akaṁsu saṅgahaṁ.

Aññatra saṅgahitaṁ suttaṁ, aññatra akariṁsute. Atthaṁ dhammañca bhindiṁsu, vinaye nikāyesu ca pañcasu.

Pariyāyadesitañcāpi, atho nippariyāyadesitam. Nītatthañceva neyyattham, ajānitvāna bhikkhavo.

Aññaṁ sandhāya bhaṇitaṁ, aññaṁ atthaṁ ṭhapayiṁsu te. Byañjanacchāyāya te bhikkhū, bahuṁ atthaṁ vināsayuṁ.

Chaḍḍetvāna ekadesaṁ, suttaṁ vinayagambhiraṁ. Patirūpaṁ suttaṁ vinayaṁ, tañca aññaṁ² kariṁsute.

Parivāram atthuddhāram, abhidhammam chappakaraṇam. Paṭisambhidañca niddesam, ekadesañca jātakam. Ettakam vissajjetvāna, aññāni akarimsu te.

Nāmam lingam parikkhāram, ākappakaranāni ca. Pakatibhāvam vijahitvā, tanca annam akamsu te.

Pubbaṅgamā bhinnavādā, mahāsaṅgītikārakā. Tesañca anukārena, bhinnavādā bahū ahu.

Tato aparakālamhi, tasmim bhedo ajāyatha. Gokulikā ekabyohāri, dvidhā bhijjittha bhikkhavo. Gokulikānam dve bhedā, aparakālamhi jāyatha. Bahussutikā ca paññatti, dvidhā bhijjittha bhikkhavo.

Cetiyā ca punavādī, mahāsaṅgītibhedakā.

Pañca vādā ime sabbe, mahāsangītimūlakā.

Attham dhammañca bhindimsu, ekadesañca sangaham.

Ganthañca ekadesañhi, chaḍḍetvā aññaṁ akaṁsu te.

Nāmam lingam parikkhāram, ākappakaraṇāni ca.

Pakatibhāvam vijahitvā, tañca aññam akamsu te.

Visuddhattheravādamhi, puna bhedo ajāyatha.

Mahisāsakā vajjiputtakā, dvidhā bhijjittha bhikkhavo.

Vajjiputtakavādamhi, catudhā bhedo ajāyatha.

Dhammatturikā bhaddayānikā, channāgārikā ca samiti.

Mahisāsakānam dve bhedā, aparakālamhi ajāyatha.

Sabbatthivādā dhammaguttā, dvidhā bhijjittha bhikkhavo.

Sabbatthivādānam kassapikā, sankanti kassapikena ca.

Saṅkantikānaṁ suttavādī¹, anupubbena bhijjatha.

Ime ekādasa vādā, pabhinnā theravādato.

Attham dhammañca bhindimsu, ekadesañca sangaham.

Ganthañca ekadesañhi, chaḍḍetvā aññaṁ akaṁsu te.

Nāmam lingam parikkhāram, ākappakaraṇāni ca.

Pakatibhāvam vijahitvā, tañca aññam akamsu te.

Sattarasa bhinnavādā, ekavādo abhinnako.

Sabbevatthārasa honti, bhinnavādena te saha.

Nigrodhova mahārukkho, theravādānamuttamo.

Anūnam anadhikañca, kevalam jinasāsanam.

Kaṇṭakā² viya rukkhamhi, nibbattā vādasesakā.

Paṭhame vassasate natthi, dutiye vassasatantare. Bhinnā sattarasa vādā, uppannā jinasāsane"ti.

Aparāparam pana hemavatā rājagirikā siddhatthikā pubbaseliyā aparaseliyā vājiriyāti¹ aññepi cha ācariyavādā uppannā. Purimakānam pana aṭṭhārasannam ācariyavādānam vasena pavattamāne sāsane asoko dhammarājā paṭiladdhasaddho divase divase buddhapūjāya satasahassam, dhammapūjāya satasahassam, saṃghapūjāya satasahassam, attano ācariyassa nigrodhattherassa satasahassam, catūsu dvāresu bhesajjatthāya satasahassanti pañca satasahassāni pariccajanto sāsane uļāram lābhasakkāram pavattesi. Tadā hatalābhasakkārehi titthiyehi uppāditam anekappakāram sāsanamalam visodhetvā moggaliputtatissatthero tipiṭakapariyattidharānam pabhinnapaṭisambhidānam bhikkhūnam sahassamekam gahetvā yathā mahākassapatthero ca yasatthero ca dhammañca vinayañca saṅgāyimsu, evameva saṅgāyanto tatiyasaṅgītim akāsi. Idāni tam tatiyasaṅgītim mūlato pabhuti vitthāretvā dassento āha "tissopi kho mahābrāhmā brāhmalokato cavitvā moggalibrāhmaṇassa gehe paṭisandhim aggahesī"ti-ādi.

Tattha gehe paţisandhim aggahesīti moggalibrāhmaṇassa gehe brāhmaṇiyā kucchimhi paṭisandhim aggahesīti attho. Gehassa pana tannissayattā nissite nissayavohāravasena "gehe paṭisandhim aggahesī"ti vuttam yathā "mañcā ukkuṭṭhim karonti, sabbo gāmo āgato"ti. Sattavassānīti accantasamyoge upayogavacanam. Aticchathāti atikkamitvā icchatha, idha bhikkhā na labbhati, ito aññattha gantvā bhikkham pariyesathāti adhippāyo. "Bho pabbajitā"ti-ādi brāhmaṇo attano gehe bhikkhālābham anicchanto āha. Paṭiyāditabhattatoti sampādetvā ṭhapitabhattato. Tadupiyanti tadanurūpam. Upasamam disvāti therassa kāyacitta vūpasamam punappunam disvā, ñatvāti attho. Iriyāpathavūpasamasandassanena hi tannibandhino cittassa yoniso pavatti-upasamopi viññāyati. Bhiyyoso mattāya

pasīditvāti punappunam visesato adhikataram pasīditvā. Bhattavissaggakaraṇatthāyāti bhattakiccakaraṇatthāya. Adhivāsetvāti sampaticchitvā.

Soļasavassuddesikoti soļasavassoti uddisitabbo voharitabboti soļasavassuddeso, soyeva soļasavassuddesiko. Soļasavassoti vā uddisitabbatam arahatīti soļasavassuddesiko, soļasavassāni vā uddisitabbāni assāti soļasavassuddesiko, soļasavassoti uddeso vā assa atthīti soļasavassuddesiko, atthato pana soļasavassikoti vuttam hoti. Tiṇṇam vedānam pāragūti iruvedayajuvedasāmavedasankhātānam tiṇṇam vedānam paguṇakaraṇavasena pāram gatoti pāragū. Pāragūti cettha niccasāpekkhatāya samāsādikam veditabbam. Laggetvāti olambetvā. Na ca kācīti ettha casaddo avadhāraṇe, kāci kathā neva uppajjatīti attho. Pallankanti nisīditabbāsanam. Uppajjissatīti etthāpi "kathā"ti idam ānetvā sambandhitabbam. Kupito anattamanoti kopena kupito, anattamano domanassena. Domanassasamangī hi puggalo pītisukhehi na attamano na attacittoti anattamanoti vuccati. Na sakamanoti vā anattamano attano vase atthitacittattā.

Caṇḍikkabhāveti caṇḍiko vuccati caṇḍo thaddhapuggalo, tassa bhāvo caṇḍikkam, thaddhabhāvoti attho. Idha pana "caṇḍikkabhāve"ti vuttattā caṇḍikoyeva caṇḍikkanti gahetabbam, tena "caṇḍikkabhāve"ti ettha thaddhabhāveti attho veditabbo. Kiñci mantanti kiñci vedam. Aññe ke jānissantīti na keci jānissantīti adhippāyo. Pucchitvā sakkā jānitunti attano padesañāṇe ṭhitattā thero evamāha. Sabbaññubuddhā eva hi "puccha māṇava yadākaṅkhasī"ti-ādinā paccekabuddhādīhi asādhāraṇam sabbaññupavāraṇam pavārenti. Sāvakā pana padesañāṇe ṭhitattā "sutvā vedissāmā"ti vā "pucchitvā sakkā jānitun"ti vā vadanti.

Tīsu vedesūti-ādīsu tayo vedā pubbe vuttanayā eva. **Nighaṇḍū**ti nāma nighaṇḍurukkhādīnaṁ vevacanappakāsakaṁ satthaṁ, **vevacanappakāsakan**ti ca pariyāyasaddadīpakanti attho, ekekassa atthassa

anekapariyāyavacanavibhāvakanti vuttam hoti. Nidassanamattancetam anekesam atthānam ekasaddassa vacanīyatāvibhāvanavasenapi tassa ganthassa pavattattā. Vacanīyavācakabhāvena attham saddanca nikhandeti bhindati vibhajja dassetīti nikhandu, so eva idha khakārassa ghakāram katvā nighandūti vutto. **Ketubhan**ti kiriyākappavikappo kavīnam upakārasattham. Ettha ca kiriyākappavikappoti vacībhedādilakkhanā kiriyā kappīyati vikappīyati etenāti kiriyākappo, so pana vannapadabandhapadatthādivibhāgato bahuvikappoti kiriyākappavikappoti vuccati. Idañca mūlakiriyākappagantham sandhāya vuttam. So hi satasahassaparimāno nayādicariyādikam pakaranam. Vacanatthato pana kitati gameti kiriyādivibhāgam, tam vā anavasesapariyādānato gamento pūretīti ketubhanti vuccati, saha nighandunā ketubhena ca sanighanduketubhā, tayo vedā. Tesu sanighanduketutesu. Thānakaranādivibhāgato nibbacanavibhāgato ca akkharā pabhedīyanti etenāti akkharappabhedo, sikkhā ca nirutti ca. Saha akkharappabhedenāti sākkharappabhedā, tesu sākkharappabhedesu. Itihāsapañcamesūti athabbanavedam catuttham katvā "itiha āsa itita āsā"ti īdisavacanapatisamyutto purānakathāsankhāto itihāso pancamo etesanti itihāsapañcamā, tayo vedā. Tesu itihāsapañcamesu. **Neva attanā passatī**ti neva sayam passati, neva jānātīti attho. **Puccha, byākarissāmī**ti "sabbāpi pucchā vedesuyeva antogadhā"ti sallakkhento evamāha.

Yassa cittanti-ādipañhadvayam cuticittasamangino khīṇāsavassa cuticittassa uppādakkhaṇam sandhāya vuttam. Tattha paṭhamapañhe uppajjatīti uppādakkhaṇasamangitāya uppajjati. Na nirujjhatīti nirodhakkhaṇam appattatāya na nirujjhati. Tassa cittanti tassa puggalassa tato paṭṭhāya cittam nirujjhissati nuppajjissatīti pucchati. Yassa vā panātiādike pana dutiyapañhe nirujjhissatīti yassa cittam bhangakkhaṇam patvā nirujjhissatī. Nuppajjissatīti bhangato parabhāge sayam vā añnam vā nuppajjissati, tassa puggalassa cittam uppajjati na nirujjhatīti pucchati. Imesam pana pañhānam paṭhamo pañho vibhajjabyākaraṇīyo, tasmā "yassa cittam uppajjati na nirujjhatī, tassa cittam nirujjhissatī nuppajjissatī"ti 1

evam putthena satā evamayam panho ca vissajietabbo "pacchimacittassa¹ uppādakkhane tesam cittam uppajjati na nirujihati nirujihissati na uppajjissati, itaresam cittassa uppādakkhane tesam cittam uppajjati na niruijhati, niruijhissati ceva uppaijissati cā"ti². Yesañhi paricchinnavattadukkhānam khīnāsavānam sabbapacchimassa cuticittassa uppādakkhane³ vattati, tesam tadeva cuticittam nirujihissati nuppajjissatīti. Uppādappattatāva uppajjati nāma, bhangam appattatāva na nirujihati. Bhangam pana patvā tam tesam cittam nirujihissati, tato appatisandhikattā aññam na uppajjissati. Thapetvā pana pacchimacittasamangikhīnāsavam itaresam sekkhāsekkhaputhujjanānam uppādakkhanasamangicittam uppādappattatāva uppajjati nāma, bhangam appattatāva na nirujihati. Bhangam pana patvā nirujihissateva, annam pana tasmim vā annasmim vā attabhāve uppajjissati ceva nirujjhissati ca. Dutiyo pana pañho arahato cuticittassa uppādakkhane niyamitattā ekamsabyākaranīyo, tasmā "yassa vā pana cittam nirujihissati na uppajjissati, tassa cittam uppajjati na nirujihatī"ti putthena "āmantā" ti vattabbam. Khīnāsavassa hi uppādakkhanasamangicuticittam bhangam patvā nirujjhissati nāma, tato param nuppajjissati. Uppādakkhanasamangitāya pana uppajjati ceva bhangam appattatāya na nirujjhati cāti vuccati.

Ayam pana māṇavo evamime pañhe vissajjetumasakkonto vighātam pāpuṇi, tasmā vuttam "māṇavo uddham vā adho vā haritum asakkonto"tiādi. Tattha uddham vā adho vā haritum asakkonto"ti uparimapade vā heṭṭhimapadam, heṭṭhimapade vā uparimapadam atthato samannāharitum asakkontoti attho, pubbenāparam yojetvā pañhassa attham paricchinditum asakkontoti vuttam hoti. Dvattimsākārakammaṭṭhānam tāva ācikkhīti "atthi imasmim kāye"tiādikam dvattimsākārakammaṭṭhānam "mantassa upacāro ayan"ti paṭhamam ācikkhi. Sotāpannānam sīlesu paripūrakāritāya samādinnasīlato natthi parihānīti āha "abhabbo dāni sāsanato nivattitun"ti. Vaḍḍhetvāti uparimaggatthāya kammaṭṭhānam vaḍḍhetvā. Appossukko bhaveyya buddhavacanam gahetunti arahattappattiyā

^{1.} Arahantānam pacchimacittassa (Sī, Syā, Ka)

^{2.} Abhi 6. 301 pitthe.

^{3.} Uppādakkhano(Sī, Syā)

katakiccabhāvatoti adhippāyo. Vohāravidhimhi¹ chekabhāvatthaṁ **"upajjhāyo maṁ bhante tumhākaṁ santikaṁ pahiṇī"**ti-ādi vuttaṁ.

Udakadantaponam upatthapesīti paribhogatthaya udakanca dantakatthañca patiyādetvā thapesi. Dante punanti visodhenti etenāti dantaponam vuccati dantakattham. Gunavantanam sangahetabbabhavato thero sāmanerassa ca khantivīriya-upatthānādigune paccakkhakaranattham vināva abhiññāya pakatiyā vīmamsamāno puna sammajjanādim akāsi. "Sāmanerassa cittadamanattham akāsī"tipi vadanti. **Buddhavacanam** patthapesīti buddhavacanam ugganhāpetum ārabhi. Thapetvā vinayapitakanti ettha "sāmanerānam vinayapariyāpunanam cārittam na hotīti thapetvā vinayapitakam avasesam buddhavacanam ugganhāpesī"ti tīsupi ganthipadesu vuttam. Avassikova samānoti upasampadato patthāya aparipunna-ekavassoti adhippāyo. Moggaliputtatissattherassa hadaye patitthāpitampi buddhavacanam vohāravasena tassa hatthe patitthāpitam nāma hotīti katvā vuttam "hatthe sakalam buddhavacanam patitthāpetvā"ti. Yāvatāyukam thatvā parinibbāyimsūti moggaliputtatissattherassa hatthe sakalasāsanapatitthāpanena dutiyasangītikārakāropitadandakammato muttā hutvā yāvatāyukam thatvā parinibbāyimsu.

Bindusārassa rañño ekasataputtāti ettha bindusāro nāma sakyakulappasuto candaguttassa nāma rañño vutto. Tathā hi viṭaṭūbhasaṅgāme kapilavatthuto nikkhantasakyaputtehi māpite moriyanagare khattiyakulasambhavo candaguttakumāro pāṭaliputte rājā ahosi. Tassa putto bindusāro nāma rājakumāro pitu accayena rājā hutvā ekasataputtakānaṁ janako ahosi. Ekasatanti ekañca satañca ekasataṁ, ekenādhikaṁ satanti attho. Ekāva mātā assāti ekamātikaṁ, attanā² sahodaranti vuttaṁ hoti. Na tāva ekarajjaṁ katanti āha "anabhisittova rajjaṁ kāretvā"ti. Ekarajjābhisekanti sakalajambudīpe ekādhipaccavasena kariyamānaṁ abhisekaṁ. Puññappabhāvena pāpuṇitabbāpi rājiddhiyo arahattamaggena āgatā

paṭisambhidādayo avasesavisesā viya payogasampattibhūtā abhisekānubhāveneva āgatāti āha "abhisekānubhāvena cassa imā rājiddhiyo āgatā"ti.

Tattha rājiddhiyoti rājabhāvānugatappabhāvā. Yatoti yato solasaghatato. Sāsane uppannasaddhoti buddhasāsane patiladdhasaddho. Asandhimittāti tassāva nāmam. Tassā kira sarīre sandhāyo na paññāyanti tasmā evamnāmikā jātātipi vadanti. Devatā eva divase divase āharantīti sambandho. **Devasikan**ti divase divase. **Agadāmalakan**ti appakeneva sarīrasodhanādisamattham sabbadosaharanam osadhāmalakam. Agadaharītakampi tādisameva harītakam. Tesu kira dvīsu yathākāmamekam paribhuñjati. **Chaddantadahato**ti chaddantadahasamīpe thitadevavimānato kapparukkhato vā. "Chaddantadahe tādisā rukkhavisesā santi, tato āharantī"tipi vadanti. **Dibbañca pānakan**ti dibbaphalarasapānakañca. Asuttamayikanti kapparukkhato nibbattadibbadussattā suttehi na katanti asuttamayikam. Sumanapupphapatanti sabbattha sukhumam hutvā uggatapupphānam atthitāya sumanapupphapatam nāma jātam. Utthitassa sālinoti sayamjātasālino. Samudāyāpekkhañcettha ekavacanam, sālīnanti attho. Nava vāhasahassānīti ettha "catasso mutthiyo eko kuduvo, cattāro kuduvā eko pattho, cattāro patthā eko ālhako, cattāro ālhakā ekam donam, cattāro donā ekamānikā, catasso mānikā ekakhārī, vīsati khāriyo eko vāho, tadeva ekam sakatan"ti suttanipātatthakathādīsu¹ vuttam. Idha pana "dve sakatāni eko vāho"ti vadanti. Nitthusakaņe karontīti thusakundakarahite karonti. **Madhum karontī**ti āgantvā samīpatthāne madhum karonti. Balikammam karontīti sabbattha balikammakārakā ratthavāsino viya madhurasaram vikūjantā balim karonti. "Āgantvā ākāseveva saddam katvā attānam ajānāpetvā gacchantī"ti vadanti.

Suvaṇṇasaṅkhalikāyeva bandhanaṁ **suvaṇṇasaṅkhalikabandhanaṁ. Catunnaṁ buddhānan**ti kakusandhādīnaṁ catunnaṁ buddhānaṁ. **Adhigatarūpadassanan**ti paṭiladdharūpadassanaṁ. Ayaṁ kira kappāyukattā catunnampi buddhānaṁ rūpasampattiṁ paccakkhato addakkhi. **Kāļaṁ**

nāma nāgarājānam ānayitvāti ettha so pana nāgarājā gaṅgāyaṁ nikkhittasuvaṇṇasaṅkhalikāya gantvā attano pādesu patitasaññāya āgatoti veditabbo. Nanu ca asokassa rañño āṇā heṭṭhā yojanato upari pavattati, imassa ca vimānam yojanaparicchedato heṭṭhā patiṭṭhitam, tasmā kathaṁ ayaṁ nāgarājā rañño āṇāya āgatoti? Kiñcāpi attano vimānaṁ yojanaparicchedato heṭṭhā patiṭṭhitaṁ, tathāpi rañño āṇāpavattiṭṭhānena saha ekābaddhatāya tassa āṇaṁ akāsi. Yathā hi rajjasīmantaravāsino manussā tehi tehi rājūhi nippīḷiyamānā tesaṁ tesaṁ āṇāya pavattanti, evaṁsampadamidanti vadanti.

Āpātham karohīti sammukham karohi, gocaram karohīti attho. Tena nimmitam buddharūpam passantoti sambandho. Kīdisam tam buddharūpanti āha "sakalasarīravippakinnā" ti-ādi. Tattha puññappabhāvanibbattaggahanam tena nimmitānampi asītianubyañjanapatimanditānam dvattimsamahāpurisalakkhanānam bhagavato puññappabhāvanibbatta-asīti-anubyañjanādīhi sadisattā katanti datthabbam. Na hi tena tadā nimmitam anekākāraparipunnam buddharūpam bhagavato puññappabhāvena nibbattanti sakkā vattum. Asīti-anubyañjanam tambanakhatunganāsādi. Dvattimsamahāpurisalakkhanam suppatitthitapādatādi. Vikasita -pa- salilatalanti sūriyarasmisamphassena vikasitehi vikāsamupagatehi kam alankarotīti "kamalan"ti laddhanāmehi rattapadumehi nīluppalādibhedehi uppalehi ceva setapadumasankhātehi pundarīkehi ca patimanditam samantato sajjitam jalatalamiva. Tārāgana -pagaganatalanti sabbattha vippakinnatārakaganassa rasmijālavisadehi¹ vipphuritāya bhāsamānāya sobhāya kantiyā samujjalam sammā bhāsamānam gaganatalamiva ākāsatalamiva. **Sañjhāppabhā -pa- kanakagirisikharan**ti sañjhākālasañjātappabhānurāgehi indacāpehi vijjulatāhi ca parikkhittam samantato parivāritam kanakagirisikharamiva suvannapabbatakūtamiva. Vimalaketumālāti ettha "ketumālā nāma sīsato nikkhamitvā upari muddhani puñjo hutvā dissamānarasmirāsī"ti vadanti. "Muddhani majjhe paññāyamāno unnatappadesotipi vadantī"ti tīsupi ganthipadesu vuttam. Yasmā pana

asiko dhammarājā sañjātapītisomanasso sattāham nirāhāro hutvā yathāṭhitova avikkhittacitto pasādasommehi cakkhūhi nirantaram buddharūpameva olokesi, tasmā akkhīhi pūjā katā nāma hotīti āha "akkhipūjam nāma akāsī"ti. Atha vā cakkhūnam tādisassa iṭṭhārammaṇassa upaṭṭhāpanena akkhīnam pūjā katā nāma hotīti vuttam "akkhipūjam nāma akāsī"ti.

Iddhivibhāvanādhikārappasaṅgena cetaṁ vatthu vuttaṁ, nānukkamena. Ayaṁ hettha anukkamo—asoko kira mahārājā upari vakkhamānānukkamena sīhapañjarena olokento nigrodhasāmaṇeraṁ iriyāpathasampannaṁ nāgarajananayanāni ākaḍḍhantaṁ yugamattaṁ pekkhamānaṁ disvā pasīditvā sañjātapemo sabahumāno¹ āmantāpetvā setacchattassa heṭṭhā sīhāsane nisīdāpetvā bhojetvā sāmaṇerassa vacanādāse dissamānaṁ dasabalassa dhammakāyaṁ disvā ratanattaye pasīditvā sapariso saraṇasīlesu patiṭṭhāya tato paṭṭhāya abhivaḍḍhamānasaddho pubbe bhojiyamānāni titthiyasaṭṭhisahassāni nīharitvā bhikkhūnaṁ saṭṭhisahassānaṁ suvakāhatasālisampāditabhattaṁ paṭṭhapetvā devatopanītaṁ anotattasalilaṁ nāgalatādantakaṭṭhañca upanāmetvā niccasaṁghupaṭṭhānaṁ karonto ekadivasaṁ suvaṇṇasaṅkhalikabandhanaṁ vissajjetvā kāṭaṁ nāgarājānaṁ ānayitvā tena nimmitaṁ vuttappakāraṁ sirīsobhaggasampannaṁ buddharūpaṁ passanto dīghaputhulaniccalanayanappabhāhi sattāhaṁ akkhipūja makāsi.

Idāni pana yathānusandhim ghaṭetvā anukkamena tassa sāsanāvatāram dassento āha "rājā kira abhisekam pāpuṇitvā"ti-ādi. Bāhirakapāsaṇḍanti bāhirakappaveditam samayavādam. Bāhirakappaveditā hi samayavādā sattānam taṇhāpāsam diṭṭhipāsañca ḍenti oḍḍentīti "pāsaṇḍā"ti vuccanti. Pariggaṇhīti vīmamsamāno pariggahesi. Bindusāro brāhmaṇabhatto ahosīti attano pitu candaguttassa kālato paṭṭhāya brāhmaṇesu sambhatto ahosi. Candakena nāma kira brāhmaṇena samussāhito candaguttakumāro tena dinnanaye ṭhatvā sakalajambudīpe ekarajjamakāsi, tasmā tasmim brāhmaṇe sañjātabahumānavasena candaguttakālato paṭṭhāya saṭṭhisahassamattā brāhmanajātikā tasmim

rājakule niccabhattikā ahesum. Brāhmaṇānanti paṇḍaraṅgaparibbājakādibhāvamanupagate dasseti. Paṇḍaraṅgaparibbājakādayo ca brāhmaṇajātivantoti āha "brāhmaṇajātiyapāsaṇḍānan"ti. Ettha pana diṭṭhipāsādīnaṁ oḍḍanato paṇḍaraṅgādayova "pāsaṇḍā"ti vuttā. Sīhapañjareti mahāvātapāne. Upasamaparibāhirenāti upasamato paribāhirena, upasamarahitenāti attho. Antepuraṁ atiharathāti antepuraṁ pavesetha, ānethāti vuttaṁ hoti.

Amā saha bhavanti kiccesūti **amaccā**, rajjakiccavosāpanakā. **Devā**ti rājānaṁ ālapanti. Rājāno hi dibbanti kāmaguņehi kīļanti, tesu vā viharanti vijayasamatthatāyogena paccatthike vijetuṁ icchanti, issariyaṭhānādisakkāradānagahaṇaṁ taṁ taṁ atthānusāsanaṁ vā karonti voharanti, puññānubhāvappattāya jutiyā jotantīti vā "devā"ti vuccanti. Tathā hi te catūhi saṅgahavatthūhi janaṁ rañjentā sayaṁ yathāvuttehi visesehi rājanti dippanti sobhantīti "rājāno"ti ca vuccanti. **Nigaṇṭhādayo**ti ettha **nigaṇṭho** nāma "amhākaṁ gaṇṭhanakileso saṁsāre palibuddhanakicco rāgādikileso khettavatthuputtadārādivisayo natthi, kilesagaṇṭhirahitā mayan"ti evaṁ vāditāya "nigaṇṭhā"ti laddhanāmā titthiyā.

Uccāvacānīti uccāni ca avacāni ca, mahantāni ceva khuddakāni ca, atha vā visiṭṭhāni ceva lāmakāni cāti attho. Bhaddapīṭhakesūti vettamayapīṭhesu. Sāroti sīlādiguṇasāro. Rājaṅgaṇenāti rājanivesanadvāre vivaṭena bhūmippadesena. Aṅgaṇanti hi katthaci kilesā vuccanti "rāgo aṅgaṇan"tiādīsu¹. Rāgādayo hi aṅganti etehi taṁsamaṅgīpuggalā nihīnabhāvaṁ gacchantīti aṅgaṇānīti vuccanti. Katthaci malaṁ vā paṅko vā "tasseva rajassa vā aṅgaṇassa vā pahānāya vāyamatī"tiādīsu². Añjati sammakkhetīti hi aṅgaṇaṁ, malādi. Katthaci tathārūpo vivaṭappadeso "cetiyaṅgaṇaṁ bodhiyaṅgaṇan"tiādīsu. Añjati tattha ṭhitaṁ atisundaratāya abhibyañjetīti hi aṅgaṇaṁ, vivaṭo bhūmippadeso. Idhāpi soyeva adhippeto. Dantantiādīsu kilesavipphandarahitacittatāya dantaṁ, niccaṁ paccupaṭṭhitasatārakkhatāya guttaṁ,

cakkhādi-indriyānam santatāya **santindriyam**, pāsādikena iriyāpathena samannāgatattā **sampanna-iriyāpatham**. Idāni nigrodhasāmaņeram sarūpato vibhāvetukāmo āha **"ko panāyam nigrodho nāmā"**ti-ādi.

Tatrāyam anupubbikathāti ettha bindusārassa kira ekasataputtesu moriyavamsajāya dhammadeviyā asokatissanāmānam dvinnam puttānam majihe jettho asokakumāro avantirattham bhunjati. Pitarā pesito pātaliputtato paññāsayojanamatthake vitatūbhabhayāgatānam sākiyānamāvāsam vetiyam¹ nāma nagaram patvā tattha vetisam¹ nāma setthidhītaram ādāya ujjenīrājadhāniyam rajjam karonto mahindam nāma kumāram samghamittanca kumārikam labhitvā tehi saddhim rajjasukhamanubhavanto pituno gilānabhāvam sutvā ujjenim pahāya sīgham pātaliputtam upagantvā pitu upatthānam katvā tassa accayena rajjam aggahesi. Tam sutvā yuvarājā sumanābhidhāno kujjhitvā "ajja me maranam vā hotu rajjam vā"ti atthanavutibhātikaparivuto samvattasāgare jalatarangasanghāto viva ajjhottharanto upagacchati. Tato asoko ujjenīrājā sangāmam pakkhanditvā sattumaddanam karonto sumanam nāma rājakumāram gahetvā ghātesi. Tena vuttam "bindusārarañño kira dubbalakāleyeva asokakumāro attanā laddham ujjenīrajjam pahāya āgantvā sabbanagaram attano hatthagatam katvā sumanam nāma rājakumāram aggahesī"ti.

Paripuṇṇagabbhāti paripakkagabbhā. Ekaṁsālanti sabbaparicchannaṁ ekaṁ pāsādaṁ. "Devatāya pana ānubhāvena tasmiṁ pāsāde mahājanena adissamānā hutvā vāsaṁ kappesī"ti vadanti. Nibaddhavattanti "ekassa divasassa ettakan"ti niyāmetvā ṭhapitavattaṁ. Hetusampadanti arahattūpanissayapuññasampadaṁ. Khuraggeyevāti khurakammapariyosāneyeva, tacapañcakammaṭṭhānaṁ gahetvā taṁ pariggaṇhanto antimāya kesavaṭṭiyā voropanāya samakālameva ca arahattaṁ pāpuṇīti vuttaṁ hoti. Sarīraṁ jaggitvāti dantakaṭṭhakhādanamukhadhovanādīhi sarīraparikammaṁ katvā.

Sīhapañjare caṅkamatīti sīhapañjarasamīpe aparāparaṁ caṅkamati. **Taṅkhaṇaññevā**ti tasmiṁ khaṇeyeva. **Ayaṁ jano**ti rājaṅgaṇe caramānaṁ janaṁ

disvā vadati. Bhantamigappaṭibhāgoti anavaṭṭhitattā kāyacāpallena samannāgatattā bhantamigasadiso. Ativiya sobhatīti sambandho. Ālokitavilokitanti ettha ālokitaṁ nāma puratopekkhanaṁ. Abhimukholokanañhi "ālokitan"ti vuccati. Vilokitanti anudisāpekkhanaṁ, yaṁ disābhimukhaṁ oloketi, tadanugatadisāpekkhananti attho. Samiñjanaṁ pabbasaṅkocanaṁ. Pasāraṇañca tesaṁyeva pasāraṇaṁ. Lokuttaradhammoti sesajanesu avijjamāno visiṭṭhadhammo. Pemaṁ saṇṭhahīti pemaṁ patiṭṭhāsi, uppajjatīti attho. Vāṇijako ahosīti madhuvāṇijako ahosi.

Atīte kira tayo bhātaro madhuvāṇijakā ahesum. Tesu kaniṭṭho madhum vikkiṇāti, itare araññato āharanti. Tadā eko paccekabuddho paṇḍukarogāturo¹ ahosi. Aparo pana paccekabuddho tadattham madhubhikkhāya caramāno nagaram pāvisi. Paviṭṭhañca tam ekā kumbhādāsī udakaharaṇattham tittham gacchamānā addasa. Disvā ca pucchitvā āgatakāraṇañca ñatvā "ettha bhante madhuvāṇijakā vasanti, tattha gacchathā"ti hattham pasāretvā madhu-āpaṇam dassesi. So ca tattha agamāsi. Tam disvā kaniṭṭho madhuvāṇijo sañjātapītisomanasso "kenāgatāttha bhante"ti pucchitvā tamattham viditvā pattam gahetvā madhuno pūretvā dadamāno pattapuṇṇam madhum uggantvā mukhato vissanditvā bhūmiyam patamānam disvā pasannamānaso "imināham bhante puñākammena jambudīpe ekarajjam kareyyam, āṇā ca me ākāse pathaviyañca yojanappamāṇe ṭhāne pharatū"ti patthanamakāsi. Paccekabuddho ca "evam hotu upāsakā"ti vatvā gandhamādanam gantvā paccekabuddhassa bhesajjamakāsi.

Kaniṭṭho pana madhuvāṇijo madhuṁ datvā gehe nisinno itare araññato āgate disvā evamāha "tumhākaṁ bhātaro cittaṁ pasādetha, mamañca tumhākañca madhuṁ gahetvā īdisassa nāma paccekabuddhassa pattaṁ pūretvā adāsin"ti. Tesu jeṭṭho kujjhitvā evamāha "caṇḍālāpi kāsāvanivāsino honti, nanu tava hatthato madhuṁ paṭiggahetvā gato caṇḍālo bhavissatī"ti. Majjhimo pana kujjhitvā "tava paccekabuddhaṁ gahetvā parasamudde nikkhipāhī"ti āha. Pacchā pana tepi dve bhātaro kaniṭṭhena

vuccamānam dānānisamsapaţisamyuttakatham sutvā anumodimsuyeva. Sāpi ca kumbhadāsī "tassa madhudāyakassa aggamahesī bhaveyyan"ti patthanamakāsi. Tesu kaniṭṭho asiko dhammarājā ahosi, sā ca kumbhadāsī ativiya rūpasobhaggappattā asandhimittā nāma tassa aggamahesī ahosi. Parasamuddavādī pana majjhimo imasmimyeva tambapaṇṇidīpe devānampiyatisso nāma mahānubhāvo rājā ahosi. Jeṭṭho pana caṇḍālavāditāya caṇḍālagāme jāto nigrodho nāma sāmaṇero ahosi. Tena vuttam "pubbe hi¹ kira puññakaraṇakāle esa rañño jeṭṭhabhātā vāṇijako ahosī"ti.

Pubbe va sannivāsenāti ettha² gāthābandhavasena vā-saddassa rassattam katanti veditabbam, pubbe sannivāsena vāti vuttam hoti. Tattha pubbeti atītajātiyam. Sannivāsenāti sahavāsena. Sahasaddattho hi ayam samsaddo. Paccuppannahitena vāti paccuppanne vattamānabhave hitacaranena vā. Etam imehi dvīhi kāranehi sinehasankhātam pemam jāyate uppajjati. Idam vuttam hoti—pemam nāmetam dvīhipi kāranehi jāyati, purimabhave mātā vā pitā vā dhītā vā putto vā bhātā vā bhaginī vā pati vā bhariyā vā sahāyo vā mitto vā hutvā yo yena saddhim ekatthāne nivutthapubbo, tassa iminā pubbe vā sannivāsena bhavantarepi anubandhanto so sineho na vijahati, imasmim attabhave katena paccuppannena hitena vāti evam imehi dvīhi kāranehi tam pemam nāma jāyatīti. Kim viyāti āha "uppalam va yathodake"ti. Etthāpi vā-saddassa vuttanayeneva rassattam katanti datthabbam. Avuttasampindanattho cettha vāsaddo. Tena padumādayo sanganhāti. **Yathā**—saddo upamāyam. Idam vuttam hoti—yathā uppalanca sesanca padumādi udake jāyamānam dve kāranāni nissāya jāyati udakañceva kalalañca, tathā etehi dvīhi kāranehi pemam jāyatīti.

Rañño hattheti santikam upagatassa rañño hatthe. Rañño anurūpanti ekūnasatabhātukānam ghātitattā caṇḍapakatitāya rajje ṭhitattā ca "pamādavihārī ayan"ti maññamāno tadanurūpam dhammapade appamādavaggam

desetum ārabhi. Tattha¹ appamādoti satiyā avippavāso, niccam upaṭṭhitāya satiyā etam adhivacanam. Amatapadanti amatam vuccati nibbānam. Tañhi ajātattā na jīyati na mīyati, tasmā "amatan"ti vuccati. Amatassa padam amatapadam, amatassa adhigamupāyoti vuttam hoti. Pamādoti pamajjanabhāvo, muṭṭhassaccasankhātassa satiyā vossaggassetam nāmam. Maccunoti maraṇassa. Padanti upāyo maggo. Pamatto hi jātim nātivattati, jāto pana jīyati ceva mīyati cāti pamādo maccuno padam nāma hoti, maranam upanetīti vuttam hoti.

Aññātaṁ tāta, pariyosāpehīti iminā "sadā appamādena hutvā vattitabbanti ettakeneva mayā ñātaṁ, tumhe dhammadesanaṁ niṭṭhapethā"ti tasmiṁ dhamme attano paṭipajjitukāmataṁ dīpento dhammadesanāya pariyosānaṁ pāpetvā kathane ussāhaṁ janeti. Keci pana "abhāsīti ettha 'bhāsissāmi vitakkemī'ti atthaṁ gahetvā 'sabbaṁ appamādavaggaṁ bhāsissāmi'ti sallakkhitattā abhāsīti vuttaṁ, raññā pana aḍḍhagāthaṁ sutvāva 'aññataṁ tāta, pariyosāpehī'ti vuttattā 'upari na kathesī'ti"vadanti. "Taṁ pana yuttaṁ na hotī"ti tīsupi gaṇṭhipadesu vuttaṁ. Dhuvabhattānīti niccabhattāni². Vajjāvajjaṁ upanijjhāyatīti upajjhāyoti āha "vajjāvajjaṁ disvā codetā sāretā cā"ti. Tattha vajjāvajjanti khuddakaṁ mahantañca vajjaṁ. Codetāti "idaṁ tayā dukkaṭaṁ, idaṁ dubbhāsitan"ti-ādīni vatvā codetā. Sāretāti attano vajjaṁ assarantassa satiṁ uppādetā, sammāpatipattiyaṁ vā sāretā, pavattetāti attho.

"Evam tayā buddhavacanam sajjhāyitabbam, evam abhikkamitabbam, evam paṭikkamitabban"ti-ādinā ācārassa sikkhāpanato ācariyo nāmāti āha "imasmim sāsane sikkhitabbakadhammesu patiṭṭhāpetā"ti. Tattha sikkhitabbakadhammo nāma sakalam buddhavacanam sīlādayo ca dhammā. "Pabbajjā ca upasampadā cā"ti idam labbhamānavasena

^{1.} Dhammapada-Ṭṭha 1. 146 piṭṭhepi passitabbaṁ.

Dhurabhattānīti niccabhattāni, paṇītatāya visiṭṭhāni bhattāni dhurabhattāni, tam padhānam katvā dātabbabhattānīti vā dhurabhattāni, tumhe dhuram katvā aṭṭha bhattāni dammīti vuttam hoti (Sī, Syā)

vuttami¹. Ācariyupajjhāyānanti iminā pabbajjā upasampadā ca yojetabbā, mama cāti iminā pana pabbajjāva. Tadā sāmaņerabhūmiyam thitattā nigrodhassa bhāvinim vā upasampadam sandhāya ubhayampi yojetabbam. Saraṇagamanavasena pabbajjāsiddhito bhikkhusamghassapi pabbajjāya nissayabhāvo veditabbo. Bhaṇḍukammavasenapi nissayabhāvo labbhatevāti gahetabbam. Divase divase vaḍḍhāpentoti vuttanayeneva divase divase tato tato diguṇam katvā vaḍḍhāpento. Pothujjanikenāti puthujjanabhāvānurūpena. Nigrodhattherassa ānubhāvakittanādhikārattā pubbe vuttampi pacchā vattabbampi sampiṇḍetvā āha "puna rājā asokārāmam nāma mahāvihāram kāretvā"ti-ādi. Cetiyapaṭimaṇḍitānīti ettha cayitabbam pūjetabbanti cetiyam, iṭṭhakādīhi citattā vā cetiyam, cetiyehi paṭimaṇḍitāni vibhūsitānīti cetiyapaṭimaṇḍitāni. Dhammenāti dhammato anapetena.

Vuttamevattham vitthārato vibhāvento āha "ekadivasam kirā"ti-ādi. Asokārāme mahādānam datvāti ettha kate ārāme pacchā kārāpakassa rañño nāmavasena niruļham nāmapaṇṇattim sandhāya vuttam "asokārāme"ti. Keci pana "tasmim divase rājā attano ghareyeva sabbam bhikkhusamgham nisīdāpetvā bhojetvā imam pañham pucchī"ti vadanti. Mahādānam datvāti bhojetvā sabbaparikkhāradānavasena mahādānam datvā. Vuttañhetam dīpavamse²—

"Nivesanam pavesetvā, nisīdāpetvāna āsane.

Yāgum nānāvidham khajjam³, bhojanañca mahāraham.

Adāsi payatapāņi, yāvadattham yadicchakam.

Bhuttāvibhikkhusamghassa, onītapattapāņino.

Ekamekassa bhikkhuno, adāsi yugasāṭakam.

Pāda-abbhañjanam telam, chattañcāpi upāhanam.

Sabbam samanaparikkhāram⁴, adāsi phānitam madhum.

^{1.} Gahetabbam (Sī, Syā)

^{3.} Yāgudānam pūvakhajjam (Sī, Syā)

^{2.} Chatthaparicchede.

^{4.} Sāmanakam parikkhāram (Syā)

Abhivādetvā nisīdi, asokadhammo mahīpati. Nisajja rājā pavāresi, bhikkhusamghassa paccayam.

Yāvatā bhikkhū icchanti, tāva demi yadicchakam.

Santappetvā parikkhārena, pavāretvāna paccaye.

Tato apucchi gambhīram, dhammakkhandham sudesitan"ti.

Aṅgato mahārāja nava aṅgānīti-ādi moggaliputtatissattherena vuttanti vadanti. Navakammādhiṭṭhāyakaṁ adāsīti caturāsītivihārasahassesu kattabbassa navakammassa adhiṭṭhāyakaṁ vidhāyakaṁ katvā adāsi. Ekadivasameva sabbanagarehi paṇṇāni āgamiṁsūti sabbavihāresu kira rāhunā candassa gahaṇadivase navakammaṁ ārabhitvā puna rāhunā candassa gahaṇadivaseyeva niṭṭhāpesuṁ, tasmā ekadivasameva paṇṇāni āgamiṁsūti vadanti. Aṭṭha sīlaṅgānīti aṭṭha uposathaṅgasīlāni. "Sabbālaṅkāravibhūsitāyā"ti idaṁ asamādinnuposathaṅgānaṁ vasena vuttaṁ. Amaravatiyā rājadhāniyāti tāvatiṁsadevanagare. Alaṅkatapaṭiyattanti alaṅkatakaraṇavasena sabbasajjitaṁ.

Adhikam kāram adhikāram, adhikam kiriyanti vuttam hoti.

Lokavivaraṇam nāma pāṭihāriyam akamsūti ettha anekasahassasankhyassa okāsalokassa tannivāsīsattalokassa ca vivaṭabhāvakaraṇapāṭihāriyam lokavivaraṇam nāma. Tam pana karonto iddhimā andhakāram vā ālokam karoti, paṭicchannam vā vivaṭam, anāpātham vā āpātham karoti. Katham? Ayañhi yathā paṭicchannopi dūre ṭhitopi attā vā paro vā dissati, evam attānam vā param vā pākaṭam kātukāmo pādakajjhānato vuṭṭhāya "idam andhakāraṭṭhānam ālokajātam hotū"ti vā "idam paṭicchannam vivaṭam hotū"ti vā "idam anāpātham āpātham hotū"ti vā āvajjetvā puna pādakajjhānam samāpajjitvā vuṭṭhāya adhiṭṭhāti. Saha adhiṭṭhānena yathādhiṭṭhitameva hoti. Apare dūre ṭhitāpi passanti, sayampi passitukāmo passati bhagavā viya devorohaṇe. Bhagavā hi devaloke abhidhammadesanam niṭṭhapetvā saṅkassanagaram otaranto sinerumuddhani ṭhatvā puratthimam lokadhātum olokesi, anekāni cakkavāļasahassāni vivaṭāni viya hutvā

ekaṅgaṇaṁ viya hutvā pakāsiṁsu¹. Yathā ca puratthimena, evaṁ pacchimenapi uttarenapi dakkhiṇenapi sabbaṁ vivaṭamaddasa. Heṭṭhāpi yāva avīci upari ca yāva akaniṭṭhabhavanaṁ, tāva addasa. Manussāpi deve passanti, devāpi manusse. Tattha neva manussā uddhaṁ ullokenti, na devā adho olokenti, sabbe sammukhasammukhāva aññamaññaṁ passanti, taṁ divasaṁ lokavivaranaṁ nāma ahosi.

Apica tambapaṇṇidīpe taḷaṅgaravāsī² dhammadinnattheropi imaṁ pāṭihāriyaṁ akāsi. So kira ekadivasaṁ tissamahāvihāre cetiyaṅgaṇamhi nisīditvā "tīhi bhikkhave dhammehi samannāgato bhikkhu apaṇṇakapaṭipadaṁ paṭipanno hotī"ti **apaṇṇakasuttaṁ**³ kathento heṭṭhāmukhaṁ bījaniṁ akāsi, yāva avīcito ekaṅgaṇaṁ ahosi, tato uparimukhaṁ akāsi, yāva brahmalokā ekaṅgaṇaṁ ahosi. Thero nirayabhayena tajjetvā saggasukhena ca palobhetvā dhammaṁ desesi. Keci sotāpannā ahesuṁ, keci sakadāgāmī anāgāmī arahantoti evaṁ tasmiṁ divasepi lokavivaraṇaṁ nāma ahosi. Ime pana bhikkhū yathā asoko dhammarājā asokārāme ṭhito catuddisā anuvilokento samantato samuddapariyantaṁ jambudīpaṁ passati, caturāsīti ca vihārasahassāni uļārāya vihāramahapūjāya virocamānāni evaṁ adhiṭṭhahitvā lokavivaraṇaṁ nāma pāṭihāriyaṁ akaṁsu.

Vihāramahapūjāyāti vihāramahasankhātāya pūjāya. Vibhūtinti sampattim. Evarūpam pītipāmojjanti īdisam pariccāgamūlakam pītipāmojjam. Moggaliputtatissattherassa bhāramakāsīti therassa mahānubhāvattā "uttaripi ce kathetabbam atthi, tampi soyeva kathessatī"ti maññamāno bhikkhusamgho raññā pucchitapañhassa visajjanam therassa bhāramakāsi. Sāsanassa dāyādo homi, na homīti sāsanassa ñātako abbhantaro homi, na homīti attho. Yesam sāsane pabbajitā puttadhītaro na santi, na te sāsane kattabbakiccam attano bhāram katvā vahantīti imamattham sandhāya thero evamāha "na kho mahārāja ettāvatā sāsanassa dāyādo hotī"ti. Kathañcarahi bhante sāsanassa dāyādo hotīti ettha carahīti nipāto

akkhantim dīpeti. Idam vuttam hoti—yadi evarūpam pariccāgam katvāpi sāsanassa dāyādo na hoti, aññam kim nāma katvā hotīti.

Tissakumārassa pabbajitakālato pabhutīti yadā ca tissakumāro pabbajito, yena ca kāraņena pabbajito, tam sabbam vitthārato uttari āvi bhavissati. Sakkhasīti sakkhissasi. Pāmojjajātoti sañjātapāmojjo. Puttānam manam labhitvāti ettha puttīpi sāmañnato puttasaddena vuttāti veditabbā, putto ca dhītā ca puttāti evam ekasesanayena vā evam vuttanti daṭṭhabbam. Dhītusaddena saha payujjamāno hi puttasaddo ekova avasissati, dhītusaddo nivattatīti saddasatthavidū vadanti. Sikkhāya patiṭṭhāpesunti tasmimyeva sīmamaṇḍale sikkhāsammutim datvā pāṇātipātāveramaṇi-ādīsu vikālabhojanāveramaṇipariyosānāsu chasu sikkhāsu samādapanavasena sikkhāya patiṭṭhāpesum. Saṭṭhivassāyapi hi sāmaṇeriyā "pāṇātipātāveramaṇim dve vassāni avītikkamma samādānam samādiyāmī"tiādinā¹ cha sikkhāyo samādiyitvā sikkhitabbāyeva. Na hi etāsu chasu sikkhāpadesu dve vassāni asikkhitasikkham sāmaṇerim upasampādetum vaṭṭati. Cha vassāni abhisekassa assāti chabbassābhiseko, abhisekato paṭṭhāya atikkantachavassoti vuttam hoti.

Sabbaṁ theravādanti dve saṅgītiyo āruļhā pāļiyevettha "theravādo"ti veditabbā. Sā hi mahākassapapabhutīnaṁ mahātherānaṁ vādattā "theravādo"ti vuccati. Kontaputtatissattheroti² ettha kontasakuṇiyo nāma kinnarajātiyo. "Tāsu ekissā kucchiyaṁ sayito manussajātiko raññā posito kontaputtatissatthero nāmā"ti tīsupi gaṇṭhipadesu vuttaṁ. Mahāvaṁsepi³ cetaṁ vuttaṁ—

"Pure pāṭaliputtamhā, vane vanacaro caraṁ. Kontakinnariyā⁴ saddhiṁ, saṁvāsaṁ kira kappayi.

Tena samvāsamanvāya, sā putte janayī duve.

Tisso jettho kanittho tu, sumitto nāma nāmato.

^{1.} Vi 2. 420 pitthe.

^{3.} Pañcamaparicchede.

^{2.} Kuntaputtatissattheroti (Sī)

^{4.} Kuntakinnariyā (Sī)

Mahāvaruṇattherassa, kāle pabbaji santike. Arahattaṁ pāpuniṁsu, chalabhiññāgunaṁ ubho''ti.

Keci pana evam vadanti "kontā¹ nāma kaṭṭhavāhanarañño vamse jātā ekā rājadhītā. Tam garuļayantena araññagatam eko vanacarako ānetvā tāya saddhim samvāsam kappesi. Sā tassa ubho putte vijāyi. Tatrāyam jeṭṭhako mātunāmena kontaputto nāma jāto"ti. Kaṭṭhavāhanarañño kira nagare sabbepi vibhavasampannā nadīpabbatakīļādīsu garuļasakuṇasadisam yantam kāretvā kaṭṭhavāhanarājā viya garuļavāhanena vicaranti.

Byādhipaṭikammatthaṁ bhikkhācāravattena āhiṇḍanto pasatamattaṁ sappiṁ alabhitvāti tadā kira jeṭṭhassa kontaputtatissattherassa kucchivāto samuṭṭhāsi. Taṁ² bāṭhāya dukkhavedanāya pīṭitaṁ kaniṭṭho sumitto nāma thero disvā "kimettha bhante laddhuṁ vaṭṭatī"ti pucchi. Tissatthero "āvuso pasatamattaṁ sappiṁ laddhuṁ vaṭṭatī"ti vatvā rañño nivedanaṁ³ tassa gilānapaccayaṁ pacchābhattaṁ sappi-atthāya caraṇañca paṭikkhipitvā "bhikkhācāravelāyameva piṇḍāya carantena tayā yadi sakkā laddhuṁ, evaṁ vicaritvā yaṁ laddhaṁ, taṁ āharā"ti āha. Kaniṭṭhopi vuttanayeneva bhikkhācāravattena caranto pasatamattampi sappiṁ nālattha. So pana kucchivāto balavataro sappighaṭasatenapi vūpasametuṁ asakkuṇeyyo ahosi. Thero teneva byādhibalena kālamakāsi. Keci pana "vicchikanāmakena kīṭavisena ḍaṭṭho thero tassa visavegena adhimattāya dukkhavedanāya samannāgato taṁ vūpasametuṁ vuttanayeneva pasatamattaṁ sappiṁ alabhitvā parinibbuto"ti vadanti. Vuttañhetaṁ mahāvaṁse—

"Pāse kīṭavisenāti, ḍaṭṭho⁵ jeṭṭho savedano. Āha puṭṭho kaniṭṭhena, bhesajjaṁ pasataṁ ghataṁ. Rañño nivedanaṁ³ thero, gilānapaccayepi ca⁶. Sappi-atthañca caranaṁ, pacchābhattaṁ patikkhipi.

- 1. Kuntā (Sī)
- 2. Tankhanaññeva (Sī)
- 3. Nivesanam (Ka)

- 4. Pañcamaparicchede.
- 5. Phuttho (Sī)
- 6. Gilānavattatopi ca (Sī)

Piṇḍāya ce caraṁ sappiṁ, labhase tvaṁ tamāhara. Iccāha tissatthero so, sumittaṁ theramuttamaṁ.

Piṇḍāya caratā tena, na laddham pasatam ghatam. Sappikumbhasatenāpi, byādhi jāto asādhiyo.

Teneva byādhinā thero, patto āyukkhayantikam. Ovaditvappamādena, nibbātum mānasam akā.

Ākāsamhi nisīditvā, tejodhātuvasena so. Yathāruci adhitthāya, sarīram parinibbuto.

Jālā sarīrā nikkhamma, nimamsachārikam ḍahi. Therassa sakalam kāyam, atthikāni tu no ḍahī'ti.

Appamādena ovaditvāti "amhādisānampi evam paccayā dullabhā, tumhe labhamānesu paccayesu appamajjitvā samaṇadhammam karothā"ti evam appamādena ovaditvā. Pallankenāti samantato ūrubaddhāsanena. Itthambhūtalakkhaṇe cātam karaṇavacanam. Tejodhātum samāpajjitvāti tejodhātukasiṇārammaṇam jhānam samāpajjitvā. Therassa sakkāram katvāti therassa dhātusakkāram katvā. Catūsu dvāresu pokkharaṇiyo kārāpetvā bhesajjassa pūrāpetvāti ekasmim dvāre catasso pokkharaṇiyo kārāpetvā tattha ekam pokkharaṇim sappissa pūrāpetvā ekam madhuno, ekam phāṇitassa, ekam sakkarāya pūrāpesi. Sesadvāresupi evameva kārāpesīti vadanti.

Sabhāyam satasahassanti nagaramajjhe vinicchayasālāyam satasahassam. Iminā sakalanagarato samuṭṭhitam āyam nidasseti. Pañcasatasahassāni rañño uppajjantīti ca raṭṭhato¹ uppajjanakam āyam ṭhapetvā vuttam. Tatoti yathāvuttapañcasatasahassato. Nigrodhattherassa devasikam satasahassam visajjesīti katham pana therassa satasahassam visajjesi? Rājā kira divasassa tikkhattum sāṭake parivattento "therassa cīvaram nītan"ti pucchitvā "āma nītan"ti sutvāva parivatteti. Theropi divasassa tikkhattum ticīvaram parivatteti. Tassa hi ticīvaram hathikkhandhe thapetvā pañcahi

ca gandhasamuggasatehi pañcahi ca mālāsamuggasatehi saddhim pātova āharīyittha, tathā divā ceva sāyañca. Theropi na bhaṇḍikam bandhitvā ṭhapesi, sampattasabrahmacārīnam adāsi. Tadā kira jambudīpe bhikkhusamghassa yebhuyyena nigrodhattherasseva santakam cīvaram ahosi. Evam therassa divase divase satasahassam visajjesi. **Uļāro** lābhasakkāroti ettha labbhati pāpuṇīyatīti lābho, catunnam paccayānametam adhivacanam. Sakkaccam kātabbo dātabboti sakkāro, cattāro paccayāyeva. Paccayā eva hi paṇītapaṇītā sundarasundarā abhisamkharitvā katā "sakkāro"ti vuccanti. Atha vā parehi kātabbagāravakiriyā pupphādīhi pūjā vā sakkāro.

Ditthigatānīti ettha ditthiyeva ditthigatam "gūthagatam muttagatam¹, sankhāragatan"ti-ādīsu² viya. Gantabbābhāvato vā ditthiyā gatamattam ditthigatam, ditthiyā gahanamattanti attho. Ditthippakāro vā ditthigatam, ditthibhedoti vuttam hoti. Lokiyā hi vidhayuttagatappakārasadde samānatthe icchanti. Na kho panetam sakkā imesam majihe vasantena vūpasametunti tesañhi majjhe vasanto tesuyeva antogadhattā ādeyyavacano na hoti, tasmā evam cintesi. Tadā tasmim thāne vasantassa sukhavihārābhāvato tam pahāya icchitabbasukhavihāramattam gahetvā vuttam "attanā phāsukavihārena viharitukāmo"ti. Ahogangapabbatanti³ evamnāmakam pabbatam. Dhammena vinayena satthusāsanenāti ettha dhammoti bhūtam vatthu. Vinayoti codanā sāranā ca. Satthusāsananti ñattisampadā anusāvanasampadā ca, tasmā bhūtena vatthunā codetvā sāretvā ñattisampadāya anusāvanasampadāya ca ukkhepanīyādikammavasena niggayhamānāpīti vuttam hoti. Abbudam thenanatthena, malam kilitthabhavakaranatthena, kantakam vijihanatthena. Aggim paricarantīti aggihuttakā viya aggim pūjanti. Pañcātape tappantīti catūsu thānesu aggim katvā majjhe thatvā sūriyātapena tappanti. Ādiccam anuparivattantīti udayakālato pabhuti sūriyam olokayamānā yāvatthangamanā sūriyābhimukhāva parivattanti. Vobhindissāmāti pagganhimsūti vināsessāmāti ussāhamakamsu. **Avisahanto**ti asakkonto.

^{1.} Ma 2. 87 pitthe.

Sattadivasena rajjam sampaţicchāti sattadivase rajjasukham tāva anubhava. Tamattham saññāpesīti kukkuccāyitamattham bodhesi. Katham saññāpesīti āha "so kirā"ti-ādi. Cittarūpanti cittānurūpam, yathākāmanti vuttam hoti. Kissāti kena kāraņena. Are tvam nāma paricchinnamaraṇanti sattahi divasehi paricchinnamaraṇam. Vissatthoti¹ nirāsankacitto, maraṇasankārahito nibbhayoti vuttam hoti. Assāsapassāsanibaddham² maraṇam pekkhamānāti "aho vatāham tadantaram jīveyyam, yadantaram assasitvā passassāmi passasitvā vā assasāmi, bhagavato sāsanam manasi kareyyam, bahu vata me katam assā"ti evam maraṇassatiyā anuyuñjanato assāsapassāsappavattikālapaṭibaddham maraṇam pekkhamānā. Tattha assāsoti bahinikkhamananāsavāto. Passāsoti antopavisanavāto. Vuttavipariyāyenapi vadanti.

Migavam nikkhamitvāti migamāraṇatthāya "araññe migapariyesanam carissāmī"ti nikkhamitvā. (Tattha **migavan**ti migānam vānanato hesanato bādhanato "migavan"ti laddhasamaññam migavam.)³

Yonakamahādhammarakkhitattheranti yonakavisaye jātam idhāgantvā pabbajitam dhammarakkhitanāmadheyyam mahātheram. Hatthināgenāti mahāhatthinā. Mahantapariyāyopi hi nāgasaddoti vadanti. Ahināgādito vā visesanattham "hatthināgenā"ti vuttam. Tassāsayam tassa ajjhāsayam. Tassa passantassevāti anādare sāmivacanam, tasmim passanteyevāti attho. Ākāse uppatitvāti ettha ayam vikubbaniddhi na hotīti gihissapi imam iddhipāṭihāriyam dassesi. Sā hi "pakativaṇṇam vijahitvā kumārakavaṇṇam vā dasseti nāgavaṇṇam vā, vividhampi senābyūham dassetī"ti evam āgatā iddhi pakativaṇṇavijahanavikāravasena pavattattā vikubbaniddhi nāma. Adhiṭṭhāniddhiyā pana paṭikkhepo natthi. Tathā ca vakkhati khuddakavatthukkhandhakavaṇṇanāyam⁴ "iddhipāṭihāriyanti ettha vikubbaniddhipāṭihāriyam paṭikkhittam, adhiṭṭhāniddhi pana appaṭikkhittāti veditabbā"ti. Laggetvāti ākāse kāyabandhanam pasāretvā tattha cīvaram laggetvā.

^{1.} Vissatthoti (Ka)

^{2.} Assāsapassāsūpanibaddham (Sī, Syā)

^{3. ()} natthi Syāma-potthake.

^{4.} Vi-Ttha 4. 46 pitthe.

Chanavesanti tutthijananavesam, ussavavesanti attho. Pativādesunti "āgatakāle cīvarādīnam pariyesanam bhāriyan"ti pathamameva pattacīvarāni sampādesum. Padhānagharanti bhāvanānuyogavasena vīriyārambhassa anurūpam vivittasenāsanam. **Sopī**ti rañno bhāgineyyam sandhāya vuttam. Anupabbajitoti ulāravibhavena khattiyajanena anugantvā pabbajito. Gantvāti iddhiyā gantvā. **Kusalādhippāyo**ti manāpajjhāsayo. **Dvelhakajāto**ti "ime bhikkhū na ekamaggena kathentī''ti samsayamāpanno. Ekekam bhikkhusahassaparivāranti ekekassa ekekasahassaparicchinnam bhikkhuparivārañca. **Ganhitvā āgacchathā**ti vuttepi "sālanam pagganhitum samattho"ti vuttatta thera bhikkhu "dhammakamman"ti maññamana gata. Īdisesu hi thānesu kukkuccam na kātabbam. Kappiyasāsanañhetam na gihikammapatisamyuttam. Thero nāgacchīti kiñcāpi "rājā pakkosatī"ti vuttepi dhammakammatthāya āgantum vattati, dvikkhattum pana pesitepi na āgato kira. Thero hi¹ sabbattha vikhyātavasena sambhāvanuppattito sambhāvitassa ca uddham kattabbakiccasiddhito asāruppavacanalesena na āgacchīti. Mahallako nu kho bhante theroti kiñcāpi rājā theram ditthapubbo, nāmam pana sallakkhetum asakkonto evam pucchīti vadanti. Vayhanti upari mandapasadisam padaracchannam, sabbapaligunthimam vā chādetvā katam sakaṭavisesam vayhanti vadanti. Nāvāsanghāṭam bandhitvāti ettha nāvāti poto. So hi orato pāram patati gacchatīti poto, satte netīti nāvāti ca vuccati. Ekato sanghatitā nāvā nāvāsanghātam, tathā tam bandhitvāti attho.

Sāsanapaccatthikānam bahubhāvato āha "ārakkham samvidhāyā"ti. Yanti yasmā, yena kāraņenāti attho. "Āgum na karotīti nāgo"ti² vacanato pāpakaraņābhāvato samaņo idha nāgo nāmāti maññamāno "eko tam mahārāja samaṇanāgo dakkhiṇahatthe gaṇhissatī"ti byākarimsu. Abbāhimsūti ākaḍḍhimsu. "Rañño hatthaggahaṇam līļāvasena katam viya hotīti kasmāti-ādicodanam katan"ti vadanti. Bāhiratoti uyyānassa bāhirato. Passantānam atidukkaram hutvā paññāyatīti āha "padesapathavīkampanam dukkaran"ti. Adhiṭṭhāne panettha visum dukkaratā nāma natthi. Sīmam akkamitvāti antosīmam

sīmāya abbhantaram akkamitvā. Abhiññāpādakanti abhiññāya patiṭṭhābhūtam. Vikubbaniddhiyā eva paṭikkhittattā pathavīcalanam adhiṭṭhahi. Rathassa antosīmāya ṭhito pādova calīti ettha pādoti rathacakkam sandhāya vuttam. Tañhi rathassa gamanakiccasādhanato pādasadisattā idha "pādo"ti vuttam. Sakkhatīti sakkhissati. Etamatthanti vinā cetanāya pāpassa asambhavasankhātam attham. Cetanāhanti ettha "cetanam ahan"ti padacchedo kātabbo. Cetayitvāti cetanam pavattayitvā.

Dīpakatittiroti attano nisinnabhāvassa dīpanato evamladdhanāmo tittiro.
Yam araññam netvā sākuniko tassa saddena āgatāgate tittire ganhāti.

Tāpasam pucchīti atīte kira ekasmim paccantagāme eko sākuņiko ekam dīpakatittiram gahetvā sutthu sikkhāpetvā pañjare pakkhipitvā patijaggati. So tam araññam netvā tassa saddena āgatāgate tittire ganhāti. Tittiro "mam nissāya bahū mama ñātakā nassanti, mayhetam pāpan"ti nissaddo ahosi. So tassa nissaddabhāvam natvā velupesikāva tam sīse paharati. Tittiro dukkhāturatāya saddam karoti. Evam so sākuniko tam nissāya tittire gahetvā jīvikam kappesi. Atha so tittiro cintesi "ime marantūti mayham cetanā natthi, paticca kammam pana mam phusati. Mayi saddam akaronte hi ete nāgacchanti, karonteyevāgacchanti, āgatāgate ayam gahetvā jīvitakkhayam pāpesi, atthi nu kho ettha mayham pāpam, natthī"ti. So tato patthāya "ko nu kho me imam kankham chindeyyā"ti tathārūpam panditam upadhārento carati. Athekadivasam so sākuniko bahuke tittire gahetvā pacchim pūretvā "pānīyam pivissāmī"ti bodhisattassa tāpasapabbajjāya pabbajitvā jhānābhiññāyo nibbattetvā araññe vasantassa assamam gantvā tam pañjaram bodhisattassa santike thapetvā pānīyam pivitvā vālikātale nipanno niddam okkami. Tittiro tassa niddamokkantabhāvam ñatvā "mama kankham imam tāpasam pucchissāmi, jānanto me kathessatī"ti pañjare nisinnoyeva—

"Ñātako no nisinnoti, bahu āgacchate jano.

Paṭicca kammaṁ phusati, tasmiṁ me saṅkate mano"ti¹—

tāpasam pucchi. Tassattho¹—bhante sacāham saddam na kareyyam, ayam tittirajano na āgaccheyya, mayi pana saddam karonte "ñātako no nisinno"ti ayam bahujano āgacchati, tam āgatāgatam luddo gahetvā jīvitakkhayam pāpento mam paṭicca mam nissāya etam pāṇātipātakammam phusati paṭilabhati vindati, tasmim mam paṭicca kate pāpe "mama nu kho etam pāpan"ti evam me mano sankati parisankati kukkuccam āpajjatīti.

Na paţicca kammam phusatīti-ādikāya pana tāpasena vuttagāthāya ayamattho—yadi tava pāpakiriyāya mano na padussati, tanninno tappoņo na hoti, evam sante luddena tam paţicca katampi pāpakammam tam na phusati na allīyati. Pāpakiriyāya hi appossukkassa nirālayassa bhadrassa parisuddhassa sato tava pāṇātipātacetanāya abhāvā tam pāpam na upalimpati, tava cittam na allīyatīti.

Samayam ugganhāpesīti attano sammāsambuddhassa laddhim ugganhāpesi. Sānipākāram parikkhipāpetvāti ettha sānipākāranti karanatthe upayogavacanam, attānanca theranca yathā te bhikkhū na passanti, evam sāṇipākārena samantato parikkhipāpetvāti attho, sānipākāram vā samantato parikkhipāpetvāti evamettha attho gahetabbo. Sānipākārantareti sānipākārassa abbhantare. **Ekaladdhike**ti samānaladdhike. Kim vadati sīlenāti **kimvādī**. Atha vā ko katamo vādo kimvādo, so etassa atthīti **kimvādī**. Sassatam attānañca lokañca vadanti paññapenti sīlenāti sassatavādino. Atha vā vadanti etenāti vādo, ditthiyā etam adhivacanam. Sassato vādo sassatavādo, so etesam atthīti sassatavādino, sassataditthinoti attho. Atha sassato vādo etesamatthīti kasmā vuttam, tesañhi attā loko ca sassatoti adhippeto, na vādoti? Saccametam. Sassatasahacaritatāya pana vādopi sassatoti vutto yathā "kuntā pacarantī"ti. Sassatoti vādo etesanti vā itisaddalopo datthabbo. Ye rūpādīsu añnataram attāti ca lokoti ca gahetvā tam sassatam amatam niccam dhuvam paññapenti, te sassatavādinoti veditabbā. Vuttañhetam **niddese² patisambhidāyañca²**—

^{1.} Jātaka-Ttha 3. 60 pitthepi passitabbam.

"Rūpam attā ceva loko ca sassato cāti attānañca lokañca paññapenti. Vedanam, saññam, saṅkhāre, viññāṇam attā ceva loko ca sassato cāti attānañca lokañca paññapentī"ti.

Ayañca attho "rūpam attato samanupassati, vedanam, saññam, sankhāre, vinnānam attato samanupassatī"ti imissā pancavidhāya sakkāyaditthiyā vasena vutto. "Rūpavantam attānan"ti-ādikāya pana pañcadasavidhāya sakkāyaditthiyā vasena cattāro cattāro khandhe "attā"ti gahetvā tadañño lokoti paññapentīti ayañca attho labbhati. Tathā ekam khandham "attā" ti gahetvā añño attano upabhogabhūto lokoti, sasantatipatite vā khandhe "attā" ti gahetvā tadañño lokoti paññapentīti evamettha attho veditabbo. Sattesu sankhāresu vā ekaccam sassatam etassāti ekaccasassato, ekaccasassatavādo. So etesamatthīti **ekaccasassatikā**, ekaccasassatavādino. Te duvidhā honti sattekaccasassatikā sankhārekaccasassatikāti. Tattha "issaro nicco, aññe sattā aniccā"ti evam pavattavādā sattekaccasassatikā seyyathāpi issaravādā. "Nicco brahmā, aññe sattā aniccā"ti evam pavattavādāpi sattekaccasassatikāti veditabbā. "Paramānavo niccā, dvianukādayo aniccā"ti evam pavattavādā sankhārekaccasassatikā seyyathāpi kanādavādādayo¹. "Cakkhādayo aniccā, viññānam niccan"ti evamvādinopi sankhārekaccasassatikāti veditabbā.

Nanu "ekacce dhammā sassatā, ekacce asassatā"ti etasmiṁ vāde cakkhādīnaṁ asassatabhāvasanniṭṭhānaṁ yathāsabhāvāvabodho eva, tayidaṁ kathaṁ micchādassananti? Ko vā evamāha "cakkhādīnaṁ asassatabhāvasanniṭṭhānaṁ micchādassanan"ti, asassatesuyeva pana kesañci dhammānaṁ sassatabhāvābhiniveso idha micchādassanaṁ. Tena pana ekavāre pavattamānena cakkhādīnaṁ asassatabhāvāvabodho vidūsito saṁsaṭṭhabhāvato², visasaṁsaṭṭho viya sabbo sappimaṇḍo³ sakiccakaraṇāsamatthatāya

^{1.} Kaṇādā (Sī), aññāṇavādā (Syā), kāṇādi (Ka) uparipaṇṇāsake pañcattayasuttaṭīkāyaṁ passitabbaṁ.

^{2.} Asamsatthabhāvato (Sī, Ka)

^{3.} Sappipindo (Sī, Ka)

sammādassanapakkhe thapetabbatam nārahatīti. Asassatabhāvena nicchitāpi vā cakkhu-ādayo samāropitajīvasabhāvā eva ditthigatikehi gayhantīti tadavabodhassa micchādassanabhāvo na sakkā nivāretum. Evañca katvā asankhataya ca sankhataya ca dhatuya vasena yathakkamam ekacce dhamma sassatā, ekacce asassatāti evam pavatto vibhajjavādopi ekaccasassatavādo āpajjatīti evampakārā codanā anavakāsā hoti aviparītadhammasabhāvasampatipattibhāvato. Kāmañcettha purimasassatavādepi asassatānam dhammānam sassatāti gahanam visesato micchādassanam, sassatānam pana sassatāti gāho na micchādassanam yathāsabhāvaggahanabhāvato. Asassatesuyeva pana kecideva dhammā sassatāti gahetabbadhammesu vibhāgappavattiyā imassa vādassa vādantaratā vuttā. Na cettha samudāyantogadhattā ekadesassa sappadesassataggāho nippadesasassataggāhe samodhānam gacchatīti sakkā vattum vāditabbisayavisesavasena¹ vādadvayassa pavattattā. Aññe eva hi ditthigatikā "sabbe dhammā sassatā"ti abhinivitthā, aññe ekaccasassatāti sankhārānam anavasesapariyādānam ekadesapariggaho ca vādadvayassa paribyattoyevāti.

Antānantikāti ettha amati gacchati ettha sabhāvo osānanti anto, mariyādā. Tappaṭisedhena ananto. Kassa panāyaṁ antānantoti? Lokīyati saṁsāranissaraṇatthikehi diṭṭhigatikehi, lokīyati vā ettha tehi puññāpuññaṁ tabbipāko cāti lokoti saṅkhyaṁ gatassa paṭibhāganimittādisabhāvassa attano. Anto ca ananto ca antānanto ca nevantanānanto cāti antānanto sāmaññaniddesena, ekasesena vā "nāmarūpapaccayā saṭāyatanan"ti-ādīsu viya. Antānantasahacarito vādo antānanto yathā "kuntā pacarantī"ti. Antānantasannissayo vā yathā "mañcā ukkuṭṭhiṁ karontī"ti. So etesamatthīti antānantikā, antānantavādino. "Antavā ayaṁ loko, ananto ayaṁ loko, antavā ca ayaṁ loko ananto ca, nevāyaṁ loko antavā na panānanto"ti evaṁ antaṁ vā anantaṁ vā antānantaṁ vā nevantanānantaṁ vā ārabbha pavattavādāti attho.

^{1.} Vādītabbisayavisesavasena (Ka), vādino tabbisayavisesavasena (?)

Catubbidhā hi antānantavādīno antavādī anantavādī antānantavādī nevantanānantavādīti. Tathā hi koci paṭibhāganimittaṁ cakkavāļapariyantaṁ avaḍḍhetvā taṁ "loko"ti gahetvā antasaññī lokasmiṁ hoti.
Cakkavāļapariyantaṁ katvā vaḍḍhitakasiṇe pana anantasaññī hoti.
Uddhamadho avaḍḍhetvā pana tiriyaṁ vaḍḍhetvā uddhamadho antasaññī tiriyaṁ anantasaññī hoti. Koci pana yasmā lokasaññito attā adhigatavisesehi mahesīhi kadāci ananto sakkhidiṭṭho anusuyyati, tasmā nevantavā. Yasmā pana tehiyeva kadāci antavā sakkhidiṭṭho anusuyyati, tasmā na pana anantoti evaṁ nevantanānantasaññī lokasmiṁ hoti. Keci pana yadi panāyaṁ attā antavā siyā, dūradese upapajjamānānussaraṇādikiccanipphatti na siyā. Atha ananto idha ṭhitassa devalokanirayādīsu sukhadukkhānubhavanampi siyā. Sace pana antavāca ananto ca, tadubhayapaṭisedhadosasamāyogo, tasmā antavā anantoti ca abyākaraṇīyo attāti evaṁ takkanavasena nevantanānantasaññī hotīti vannayanti.

Ettha ca yuttam tāva purimānam tiṇṇam vādīnam antañca anantañca antānantañca ārabbha pavattavādattā antānantikattam, pacchimassa pana tadubhayapaṭisedhanavasena pavattavādattā katham antānantikattanti? Tadubhayapaṭisedhanavasena pavattavādattā eva. Yasmā antānantapaṭisedhavādopi antānantavisayo eva tam ārabbha pavattattā. Etadatthameva hi ārabbha "pavattavādā"ti heṭṭhā vuttam, evam santepi yuttam tāva pacchimavādadvayassa antānantikattam, antānantānam vasena ubhayavisayattā etesam vādassa, purimavādadvayassa pana katham visum antānantikattanti? Upacāravuttiyā. Samuditesu hi antānantavādesu pavattamāno antānantikasaddo tattha niruļhatāya paccekampi antānantavādīsu pavattati yathā arūpajjhānesu paccekam aṭṭhavimokkhapariyāyo, yathā ca loke sattisayoti.

Amarāvikkhepikāti ettha na marati na upacchijjatīti amarā. Kā sā? "Evantipi me no, tathātipi me no, aññathātipi me no, notipi me no, no notipi me no"ti¹ evam pavattavādavasena pariyantarahitā diṭṭhigatikassa diṭṭhi ceva vācā ca. "Evantipime no"ti-ādinā vividho nānappakāro khepo paravādīnam khipanam vikkhepo, amarāya diṭṭhiyā vācāya vā

vikkhepo amarāvikkhepo, so etesamatthīti amarāvikkhepikā. Atha vā amarāya diṭṭhiyā vācāya vikkhipantīti amarāvikkhepino, amarāvikkhepi no eva amarāvikkhepikā. Atha vā amarā nāma macchajāti, sā ummujjananimujjanādivasena udake sandhāvamānā gahetum na sakkā, evameva ayampi vādo ekasmim sabhāve anavaṭṭhānato ito cito ca sandhāvati, gāham na upagacchatīti amarāya vikkhepo viyāti amarāvikkhepoti vuccati. Ayañhi amarāvikkhepiko "idam kusalan"ti vā "akusalan"ti vā puṭṭho na kiñci byākaroti. "Idam kusalan"ti vā puṭṭho "evantipi me no"ti vadati. Tato "kim akusalan"ti vutte "tathātipi me no"ti vadati. "Kim ubhayato aññathā"tipi vutte "aññathātipi me no"ti vadati. Tato "tividhenapi na hoti, kim te laddhī"ti vutte "notipi me no"ti vadati. Tato "kim no no te laddhī"ti vutte "no notipi me no"ti vadati. Evam vikkhepameva āpajjati, ekamekasmimpi pakkhe na tiṭṭhati. Tato "atthi paro loko"ti-ādinā puṭṭhopi evameva vikkhipati, na ekasmim pakkhe tiṭṭhati. So vuttappakāro amarāvikkhepo etesamatthīti amarāvikkhepikā.

Nanu cāyam sabbopi amarāvikkhepiko kusalādayo dhamme paralokatthikādīni ca yathābhūtam anavabujjhamāno tattha tattha pañham puṭṭho pucchāya vikkhepanamattam āpajjati, tassa katham diṭṭhigatikabhāvo. Na hi avattukāmassa viya pucchitam ajānantassa vikkhepakaraṇamattena diṭṭhigatikatā yuttāti? Vuccate—na heva kho pucchāya vikkhepakaraṇamattena tassa diṭṭhigatikatā, atha kho micchābhinivesavasena sassatābhinivesato. Micchābhiniviṭṭhoyeva hi puggalo mandabuddhitāya kusalādidhamme paralokatthikādīni ca yāthāvato asampaṭipajjamāno attanā aviññātassa atthassa param viññāpetum asakkuṇeyyatāya musāvādādibhayena ca vikkhepam āpajjatīti. Tathā ca vuttam "satteva ucchedadiṭṭhiyo, sesā sassatadiṭṭhiyo"ti. Atha vā puññapāpānam tabbipākānañca anavabodhena asaddahanena ca tabbisayāya pucchāya vikkhepakaraṇamyeva sundaranti khantim rucim uppādetvā abhinivisantassa uppannā visumyeva cesā ekā diṭṭhi sattabhaṅgadiṭṭhi viyāti daṭṭhabbam. Tatoyeva ca vuttam "pariyantarahitā diṭṭhigatikassa diṭṭhi ceva vācā cā"ti.

Adhiccasamuppannikāti ettha adhicca yadicchakam yam kiñci kāraṇam vinā samuppanno attā ca loko cāti dassanam adhiccasamuppannam. Attalokasaññitānañhi khandhānam adhiccuppatti-ākārārammaṇam dassanam tadākārasannissayavasena pavattito tadākārasahacaritatāya ca adhiccasamuppannanti vuccati yathā "mañcā ghosanti, kuntā pacarantī"ti ca. Tam etesamatthīti adhiccasamuppannikā.

Saññīvādāti saññī vādo etesamatthīti saññīvādā "buddhaṁ assa atthīti buddho"ti yathā. Atha vā saññīti pavatto vādo saññī sahacaraṇanayena. Saññī vādo yesaṁ te saññīvādā. "Rūpī attā hoti arogo paraṁ maraṇā, saññīti naṁ paññapenti, arūpī attā hoti, rūpī ca arūpī ca attā hoti, neva rūpī nārūpī ca attā hoti. Antavā attā hoti, anantavā attā hoti, antavā ca anantavā ca attā hoti, nevantavā nānantavā attā hoti. Ekattasaññī attā hoti, nānattasaññī attā hoti. Parittasaññī attā hoti, appamāṇasaññī attā hoti. Ekantasukhī attā hoti, ekantadukkhī attā hoti. Sukhadukkhī attā hoti, adukkhamasukhī attā hoti arogo paraṁ maraṇā, saññīti naṁ paññapentī"ti¹ evaṁ soļasavidhena vibhattavādānametaṁ adhivacanaṁ.

Asaññīvādā nevasaññīnāsaññīvādā ca saññīvāde vuttanayeneva veditabbā. Kevalañhi "saññī attā"ti gaṇhantānaṁ vasena saññīvādā vuttā, "asaññī"ti ca "nevasaññīnāsaññī"ti ca gaṇhantānaṁ vasena asaññīvādā ca nevasaññīnāsaññīvādā ca vuttāti veditabbā. Tattha asaññīvādā "rūpī attā hoti arogo paraṁ maraṇā, asaññīti naṁ paññapenti, arūpī attā hoti, rūpī ca arūpī ca attā hoti, neva rūpī nārūpī attā hoti. Antavā attā hoti, anantavā attā hoti, antavā ca anantavā ca attā hoti, nevantavā nānantavā attā hoti arogo paraṁ maraṇā, asaññīti naṁ paññapentī"ti evaṁ aṭṭhavidhena vibhattā. Nevasaññīnāsaññīvādāpi evameva "rūpī attā hoti arogo paraṁ maraṇā, nevasaññīnāsaññīti naṁ paññapentī"ti-ādinā² aṭṭhavidhena vibhattāti veditabbā.

Ucchedavādāti "ayam attā rūpī cātumahābhūtiko mātāpettikasambhavo kāyassa bhedā ucchijjati vinassati, na hoti param maraṇā"ti¹ evamādinā nayena pavattam ucchedadassanam ucchedo sahacaraṇanayena. Ucchedo vādo yesam te ucchedavādā, ucchedavādo vā etesamatthīti ucchedavādā, ucchedam vadantīti vā ucchedavādā.

Diţṭhadhammanibbānavādāti ettha diṭṭhadhammo nāma dassanabhūtena ñāṇena upaladdhadhammo, paccakkhadhammoti attho. Tattha tattha paṭiladdhattabhāvassetaṁ adhivacanaṁ. Diṭṭhadhamme nibbānaṁ diṭṭhadhammanibbānaṁ, imasmiṁyeva attabhāve dukkhavūpasamanti attho. Taṁ vadantīti diṭṭhadhammanibbānavādā. Te pana "yato kho bho ayaṁ attā pañcahi kāmaguṇehi samappito samaṅgībhūto paricāreti, ettāvatā kho bho ayaṁ attā paramadiṭṭhadhammanibbānappatto hotī"ti² evamādinā nayena diṭṭheva dhame nibbānaṁ paññapenti. Te hi mandhātukāmaguṇasadise mānusake kāmaguṇe, paranimmitavasavattidevarājassa kāmaguṇasadise dibbe ca kāmaguṇe upagatānaṁ diṭṭheva dhamme nibbānappattiṁ vadanti.

Vibhajjavādīti verañjakaņḍe āgatanayeneva venayikādibhāvam vibhajja vadatīti vibhajjavādī. Tattha hi bhagavatā "ahañhi brāhmaņa vinayāya dhammam desemi rāgassā"ti-ādim vatvā "no ca kho yam tvam sandhāya vadesī'ti-ādinā verañjabrāhmaņassa attano venayikādibhāvo vibhajja vuttoti. Apica somanassādīnam³ cīvarādīnanca sevitabbāsevitabbabhāvam vibhajja vadatīti vibhajjavādī, sassatucchedavāde vā vibhajja vadatīti vibhajjavādī, "sassato attā ca loko cā'ti-ādīnam ṭhapanīyānam pañhānam ṭhapanato rāgādikhayasankhātassa sassatassa rāgādikāyaduccaritādi-ucchedassa vacanato vibhajjavādī, sassatucchedabhūte ubho ante anupaggamma majjhimapaṭipadābhūtassa paṭiccasamuppādassa desanato vibhajjavādī, bhagavā. Parappavādam maddantoti tasmim tatiyasangītikāle uppannam vādam, tato paṭṭhāya yāva saddhammantaradhānā āyatim uppajjanakavādanca sandhāya vuttam. Tasmiñhi samāgame ayam thero yāni ca tadā uppannāni vatthūni, yāni ca āyatim uppajjissanti, sabbesampi tesam

^{1.} Dī 1. 31 pitthe.

^{2.} Dī 1. 33 pitthe.

^{3.} Apica kho manussādīnam (Sī), apica so manussādīnam (Syā)

paṭibāhanatthaṁ satthārā dinnanayavaseneva tathāgatena ṭhapitamātikaṁ vibhajanto sakavāde pañca suttasatāni, paravāde pañcāti suttasahassaṁ āharitvā tadā uppannavādassa maddanato parappavādamaddanaṁ āyatiṁ uppajjanakavādānaṁ paṭisedhanalakkhaṇabhāvato āyatiṁ paṭisedhalakkhaṇaṁ¹ kathāvatthuppakaraṇaṁ akāsi.

Iti samantapāsādikāya vinayaṭṭhakathāya sāratthadīpaniyam Tatiyasaṅgītikathāvaṇṇanā samattā.

Ācariyaparamparakathāvaṇṇanā

"Kenābhatan"ti imam pañham visajjentena jambudīpe tāva ācariyaparamparā yāva tatiyasangīti, tāva dassetvā idāni sīhaladīpe ācariyaparamparam dassetum "tatiyasangahato pana uddhan"ti-ādi āraddham. **Imam dīpan**ti imam tambapannidīpam. **Kañci kālan**ti kismiñci kāle. **Porāņā**ti atthakathācariyā. **Bhaddanāmo**ti bhaddasālatthero. Nāmassa ekadesenapi hi vohāro dissati "devadatto datto"ti yathā. Āgum na karontīti nāgā. Vinayapiṭakam vācayimsūti sambandho. Tambapanniyāti bhummavacanam. Nikāye pañca vācesunti vinayābhidhammavajje dīghanikāyādike pañca nikāye ca vācesum. Satta ceva pakaraneti dhammasanganīvibhangādike satta abhidhammappakarane ca vācesunti attho. Asani viya siluccaye kilese medhati himsatīti medhā, khippam gahanadhāranatthena vā medhā, paññā, sā etassa atthīti medhāvī. Tipeṭakoti tīni pitakāni etassa atthīti tipetako, tepitakoti vuttam hoti, tipitakapariyattidharoti attho. Tārakānam rājāti tārakarājā, candimā. Atirocathāti ativiya virocittha. Pupphanāmoti mahāpadumatthero. Saddhammavamsakovidoti saddhammatantiyā kovido. Pupphanāmoti sumanatthero. Jambudīpe patitthitoti sumanatthero kira ekasmim samaye sīhaladīpamhi sāsane osakkamāne jambudīpam gantvā ugganhitvā sāsanam anurakkhanto tattheva patitthāsi. Maggakovidāti saggamaggamokkhamaggesu kovidā.

Bhāraṁ katvāti tesaṁ tesaṁ bhikkhūnaṁ sāsanaṁ bhāraṁ katvā, paṭibaddhaṁ katvāti attho. "Te te bhikkhū tattha tattha pesesī"ti saṅkhepato vuttamevatthaṁ vitthāretvā dassento āha "majjhantikattheraṁ kasmīragandhāraraṭṭhaṁ pesesī"ti-ādi. Mahiṁsakamaṇḍalanti¹ andhakaraṭṭhaṁ vadanti. Vanavāsinti vanavāsiraṭṭhaṁ. Attā pañcamo etesanti attapañcamā, taṁ taṁ disābhāgaṁ pañca pañceva bhikkhū agamaṁsūti vuttaṁ hoti.

Idāni tattha tattha gatānam therānam kiccānubhāvam dassetukāmo majjhantikattherassa gatatthane kiccam tava dassento "tena kho pana samayena kasmīragandhāraratthe"ti-ādimāha. Karakavassanti himapātanakavassam. Harāpetvāti udakoghena harāpetvā. Aravāladahapitthiyanti aravāladahassa udakapitthiyam. Chinnabhinnapatadharoti satthakena chinnam rangena bhinnam vannavikāramāpannam patam dhāretīti chinnabhinnapatadharo. Atha vā satthakena chinnānam gihivatthavisabhāgānam kāsāvānam dhāranato chinnabhinnapatadharo. Bhandūti mundako. Kāsāvavasanoti kāsāvavatthanivattho. **Makkham asahamāno**ti theram paticca attano santāne uppannam paresam gunamakkhanalakkhanam makkham asahamano sandhāretum adhisahitum vūpasametum asakkonto. **Bhimsanakānī**ti bheravārammaṇāni. Tāni dassetum "tato tato bhusā vātā vāyantī"ti-ādimāha. Bhusā vātāti rukkhabhedanapabbatakūtanipātanasamatthā balavavātā. Asaniyo phalantīti asaniyo bhijjanti, patantīti vuttam hoti. Paharanavutthiyoti anekappakārā āvudhavutthiyo. Niddhamathāti gahetvā apanetha. Bhimsanakanti nagarajassa kāyikavācasikapayogajanitabhayanimittam vippakāram.

Me bhayabheravam janetum paṭibalo na assa na bhaveyyāti sambandho. Tattha bhayabheravam nāma khuddānukhuddakam bhayam. Atha vā bhayanti cittutrāsabhayam, paṭighabhayassetam adhivacanam. Bheravanti bhayajanakamārammaṇam. Sacepi tvam mahim sabbanti sacepi tvam mahānāga sabbam mahim samuddena saha sasamuddam pabbatena saha sapabbatam ukkhipitvā mamūpari mayham sīsoparikhipeyyāsīti attho. Me bhayabheravam janetum neva sakkuṇeyyāsīti sambandho. Aññadatthūti ekamsena. Tavevassa vighāto uragādhipāti

uragānam nāgānam adhipati rāja tava eva vighāto dukkham vihimsā assa bhaveyyāti attho.

Dhammiyā kathāya sandassetvāti-ādīsu taṅkhaṇānurūpāya¹ dhammadesanāya diṭṭhadhammasamparāyikaṁ atthaṁ sandassetvā kusale dhamme samādapetvā gaṇhāpetvā tattha ca naṁ samuttejetvā sa-ussāhaṁ katvā tāya ca sa-ussāhatāya aññehi ca vijjamānaguṇehi sampahaṁsetvā tosetvāti attho. Therena kataṁ nāgānusāsanaṁ dassento "athāyasmā"ti-ādimāha. Tattha ito uddhaṁ yathā pureti yathā tumhe ito pure saddhammasavanuppattivirahitakāle parassa kodhaṁ uppādayittha, idāni ito paṭṭhāya uddhaṁ anāgate kodhañca mā janayittha, vijātamātuyāpi putte sinehacchedanaṁ sabbavināsamūlakaṁ sassaghātakañca mā karitthāti attho. Sukhakāmā hi pāṇinoti ettha hi-saddo kāraṇopadese, yasmā sabbe sattā sukhakāmā, tasmā hitasukha-upacchedakaraṁ sassaghātañca mā karothāti vuttaṁ hoti.

Yathānusiṭṭhanti yaṁ yaṁ anusiṭṭhaṁ yathānusiṭṭhaṁ, anusiṭṭhaṁ anatikkamma vā yathānusiṭṭhaṁ, therena dinnovādaṁ anatikkammāti vuttaṁ hoti. Dhammābhisamayo ahosīti paṭhamamaggaphalādhigamo ahosīti vadanti. Kulasatasahassanti iminā purisānaṁ satasahassaṁ dasseti. Kasmīragandhārāti kasmīragandhāraraṭṭhavāsino. Kāsāvapajjotāti bhikkhūnaṁ nivatthapārutakāsāvavatthehi obhāsitā. Isivātapaṭivātāti bhikkhūnaṁ nivāsanapārupanavātena ceva hatthapādānaṁ samiñjanapasāraṇādivātena ca samantato bījiyamānā² ahesuṁ. Duṭṭhanti kupitaṁ. Bandhanāti saṁsārabandhanato.

Dhammacakkhunti heṭṭhāmaggattaye ñāṇaṁ. Keci panettha "paṭhamamaggañāṇameva te paṭilabhiṁsū"ti vadanti. Codetvā devadūtehīti³ devadūtasuttantadesanāvasena⁴ daharakumāro jarājiṇṇasatto⁵ gilānasatto kammakāraṇā kammakāraṇikā vā matasattoti imehi pañcahi devadūtehi codetvā ovaditvā, saṁvegaṁ uppādetvāti attho.

^{1.} Tassānurūpāya (Sī)

^{3.} Ma-Ţţha 4. 164 piţţhādīsupi passitabbā.

^{5.} Jarajinnappatto (Ka)

^{2.} Bījayamānā (Sī, Ka)

^{4.} Ma 3. 216 pitthe.

Daharakumārādayo hi tattha "devadūtā"ti vuccanti. Tathā hi daharakumāro atthato evam vadati nāma "passatha bho mayhampi tumhākam viya hatthapādā atthi, sake panamhi muttakarīse palipanno, attano dhammatāya uṭṭhahitvā nahāyitum na sakkomi, 'aham kiliṭṭho, nahāpetha man'ti vattumpi na sakkomi, jātitomhi aparimuttatāya ediso jāto, na kho panāhameva, tumhepi jātito aparimuttāva. Yatheva hi mayham, evam tumhākampi jāti āgamissati, iti tassā pure āgamanāva kalyāṇam karothā"ti. Tenesa devadūto nāma jāto.

Jarājiṇṇasattopi atthato evaṁ vadati nāma "passatha bho ahampi tumhe viya taruṇo ahosiṁ ūrubalabāhubalajavasampanno, tassa me tā balajavasampattiyo antarahitā, hatthapādā hatthapādakiccañca na karonti, jarāyamhi aparimuttatāya ediso jāto, na kho panāhameva, tumhepi jarāya aparimuttāva. Yatheva hi mayhaṁ, evaṁ tumhākampi jarā āgamissati, iti tassā pure āgamanāva kalyāṇaṁ karothā"ti. Tenesa devadūto nāma jāto.

Gilānasattopi atthato evam vadati nāma "passatha bho ahampi tumhe viya nirogo ahosim, somhi etarahi byādhinā abhihato¹ sake muttakarīse palipanno, uṭṭhātumpi na sakkomi, vijjamānāpi me hatthapādā hatthapādakiccam na karonti, byādhitomhi aparimuttatāya ediso jāto, na kho panāhameva, tumhepi byādhito aparimuttāva. Yatheva hi mayham, evam tumhākampi byādhi āgamissati, iti tassa pure āgamanāva kalyāṇam karothā"ti. Tenesa devadūto nāma jāto.

Kammakāraṇā kammakāraṇikā vā catuttho devadūtoti veditabbā. Tattha kammakāraṇapakkhe dvattimsa tāva kammakāraṇā atthato evam vadanti nāma "mayam nibbattamānā na rukkhe vā pāsāṇe vā nibbattāma, tumhādisānam sarīre nibbattāma, iti amhākam pure nibbattitova kalyāṇam karothā"ti. Tenetā devadūtā nāma jātā. Kammakāraṇikāpi atthato evam vadanti nāma "mayam dvattimsa kammakāraṇā karontā na

rukkhādīsu karoma, tumhādisesu sattesuyeva karoma, iti amhākam tumhesu pure kammakāraṇākāraṇatova kalyāṇam karothā"ti. Tenetepi devadūtā nāma jātā.

Matakasattopi atthato evam vadati nāma "passatha bho mam āmakasusāne chaḍḍitam uddhumātakādibhāvam pattam, maraṇatomhi aparimuttatāya ediso jāto, na kho panāhameva, tumhepi maraṇato aparimuttāva. Yatheva hi mayham, evam tumhākampi maraṇam āgamissati, iti tassa pure āgamanāvakalyāṇam karothā"ti. Tenesa devadūto nāma jāto. Tasmā daharakumārādayo ettha "devadūtā"ti veditabbā.

Anamataggiyanti anamataggasamyuttami¹. Dhammāmatam pāyesīti lokuttaradhammāmatam pānam paṭilābhakaraṇavasena pāyesīti attho. Samadhikānīti sahādhikāni. Sahattho hettha samsaddo. Isīti sīlakkhandhādayo dhammakkhandhe esi gavesi pariyesīti isīti vuccati. Pañca raṭṭhānīti pañcavidhacīnaraṭṭhāni. Himavantam gantvā dhammacakkappavattanam pakāsento yakkhasenam pasādayīti yojetabbam.

Tena ca samayenāti tasmim samaye tesam gamanato pubbabhāgakāle. Laddham bhavissatīti vessavaņasantikā laddham bhavissatī. Vegasāti vegena. Samantato ārakkhamṭhapesīti "ito paṭṭhāya mā pavisantū"ti adhiṭṭhānavasena samantā ārakkham ṭhapesi. Aḍḍhuḍḍhāni sahassānīti aḍḍhena catutthāni aḍḍhuḍḍhāni, atirekapañcasatāni tīṇi sahassānīti vuttam hoti. Diyaḍḍhasahassanti aḍḍhena dutiyam diyaḍḍham, atirekapañcasatam ekam sahassanti attho. Soṇuttarāti soṇo ca uttaro ca soṇuttarā. Niddhametvānāti palāpetvāna. Adesisunti adesayum.

Ajjhiṭṭhoti āṇatto. Puna dānīti ettha dānīti nipātamattam, puna āgaccheyyāma vā na vāti attho. Rājagahanagaraparivattakenāti rājagahanagaram parivajjetvā² tato bahi tam padakkhiṇam katvā gatamaggena gamanena vā. Idāni theramātuyā veṭisanagare nivāsakāraṇam dassetum tassa nagarassa tassā jātibhūmibhāvam therassa ca aṭṭhuppattim dassento "asoko kira kumārakāle"ti-ādimāha.

Ayam panettha anupubbikathā—pubbe kira moriyavamse jātassa candaguttassa nāma rañño putto bindusāro nāma kumāro pitu accayena pātaliputtamhi nagare rājā ahosi. Tassa dve puttā sa-udariyā ahesum, tesam ekūnasatamattā vemātikabhātaro ahesum. Rājā pana tesam sabbajetthakassa asokakumārassa uparajjatthānañca avantiratthañca datvā athekadivasam attano upatthānam āgatam disvā "tāta uparāja tava rattham gantvā tattha ujjenīnagare vasāhī"ti ānāpesi. So pitu vacanena tam ujjenim gacchanto antarāmagge vetisagirinagare vetisanāmakassa¹ setthissa ghare nivāsam upagantvā tassa setthissa dhītaram lakkhanasampannam yobbanappattam vetisagirim nāma kumārim disvā tāya patibaddhacitto mātāpitūnam kathāpetvā tam tehi dinnam patilabhitvā tāya saddhim samvāsam kappesi. Sā tena samvāsena sanjātagabbhā hutvā tato ujjenim nītā mahindakumāram janayi. Tato vassadvaye atikkante samghamittañca dhītaram upalabhitvā uparājena saddhim tattha vasati. Uparājassa pana pitā bindusāro maranamañce nipanno puttam asokakumāram saritvā tam pakkosāpetum ujjenim manusse pesesi. Te tato ujjenim gantvā asokassa tam pavattim ārocesum. Tesam vacanena so pitu santikam turitagamanenāgacchanto antarāmagge vetisagirinagaramhi puttadāre thapetvā pitu santakam pātaliputtanagaram gantvā gatasamanantarameva kālakatassa pituno sarīrakiccam kārāpetvā tato ekūnasatamatte vemātikabhātaro ca ghātāpetvā vihatakantako hutvā tattha chattam ussāpetvā abhisekam ganhi. Tadāpi theramātā dārake rañno santikam pesetvā sayam tattheva vetisagirinagare vasi. Tena vuttam "sā tassa mātā tena samayena ñātighare vasī"ti.

Āropesīti paṭipādesi. Amhākaṁ idha kattabbakiccaṁ niṭṭhitanti mātu dassanassa katabhāvaṁ sandhāyāha. Anubhavatu tāva me pitarā pesitaṁ abhisekanti-ādīsu abhisekapesanādikathā vitthārena uttarato āvi bhavissati. Chaṇatthanti chaṇanimittaṁ, chaṇahetūti attho, sayaṁ chaṇakīḷaṁ akātukāmoti² vuttaṁ hoti. Tadā kira devānaṁpiyatisso jeṭṭhamūlamāsapuṇṇamiyaṁ nakkhattaṁ ghosāpetvā

"salilakīļāchaṇaṁ karothā"ti amacce āṇāpetvā sayaṁ migavaṁ kīļitukāmo missakapabbataṁ agamāsi. **Missakapabbatan**ti paṁsupāsāṇamissakattā evaṁladdhanāmaṁ pabbataṁ. **Diṭṭhasacco**ti anāgāmimaggena paṭividdhasacco, anāgāmiphalaṁ pattoti vuttaṁ hoti. So kira therena attano mātudeviyā desitaṁ dhammaṁ sutvā anāgāmiphalaṁ sacchākāsi, so ca therassa bhāgineyyoti veditabbo. Tathā hi therassa mātudeviyā bhaginī tassā dhītā, tassā ayaṁ putto. Vuttañhetaṁ **mahāvaṁse**¹—

"Deviyā bhaginī dhītu, putto bhaṇḍukanāmako. Therena deviyā dhammam, sutvā desitameva tu. Anāgāmiphalam patvā, vasi therassa santike"ti.

Sammāsambuddhena ca tumhe byākatāti bodhimūle eva buddhacakkhunā lokam voloketvā tambapaṇṇidīpam disvā anāgate tassa dīpassa sampattim diṭṭhena sammāsambuddhena "anāgate mahindo nāma bhikkhu tambapaṇṇidīpam pasādessatī"ti tumhe byākatā. Tattha tambapaṇṇidīpanti dīpavāsino vuttā. Indriyaparopariyattañāṇam āsayānusayañāṇañca "buddhacakkhū"ti vuccati. Tena pana indriyaparoparādim vinā aññam na sakkā daṭṭhunti "volokento"ti avatvā "voloketvā"ti vuttam. Etamatthanti "anāgate mahindo nāma bhikkhu tambapaṇṇidīpam pasādessatī"ti imamattham.

Veţisagirimhi rājagaheti² deviyā katavihāre. Kālova gamanassa, gacchāma dīpamuttamanti yojetabbam. Idanca tesam parivitakkanidassanam. Paļināti ākāsam pakkhandimsu. Ambareti ākāse. Evamākāsam pakkhanditvā kim te akamsūti cetiyapabbate nipatimsūti dassento āha "evamuppatitā therā, nipatimsu naguttame"ti. Idāni tassa pabbatassa patiṭṭhitaṭṭṭhānam therānanca tattha nipatitaṭṭhānam dassetum "purato puraseṭṭhassā"tiādigāthamāha. Puratoti pācīnadisābhāge. Puraseṭṭhassāti anurādhapurasaṅkhātassa puravarassa. Meghasannibheti samantato nīlavaṇṇattā nīlamahāmeghasadise. Sīlakūṭamhīti³ evamnāmake pabbatakūṭe. Hamsāva nagamuddhanīti pabbatamuddhani hamsā viya.

^{1.} Terasamaparicchede.

^{2.} Vețisagirimhīti (Syā), vedisagirimhi (Ka)

^{3.} Pilakūtamhīti (Sī), pīlakūtamhīti (Syā)

Tattha pana patiṭṭhahanto kadā patiṭṭhahīti āha "evaṁ iṭṭiyādīhi saddhin"ti-ādi. Parinibbānatoti parinibbānavassato taṁ avadhibhūtaṁ muñcitvā tato uddhaṁ dvinnaṁ vassasatānaṁ upari chattiṁsatime vasseti attho gahetabbo. Kathaṁ veditabboti āha "ajātasattussa hī"ti-ādi. Tasmiṁyeva vasseti ettha yasmiṁ saṁvacchare yasmiñca divase bhagavā parinibbuto, tasmiṁ saṁvacchare tasmiṁyeva ca divase vijayakumāro imaṁ dīpamāgatoti vadanti. Vuttañhetaṁ—

"Laṅkāyaṁ vijayasanāmako kumāro, Otiṇṇo thiramati tambapaṇṇidīpe. Sālānaṁ yamakaguṇānamantarasmiṁ, Nibbātuṁ sayitadine tathāgatassā"ti¹.

Sīhakumārassa puttoti ettha kālingarājadhītu kucchismim sīhassa jāto kumāro sīhakumāroti veditabbo, pubbe amanussāvāsattā āha "manussāvāsam akāsī"ti. Cuddasame vasseti cuddasame vasse sampatte. Idha vijayo kālamakāsīti imasmim tambapaṇṇidīpe vijayarājakumāro aṭṭhatimsa vassāni rajjam kāretvā kālamakāsi. Tathā hi ajātasattu rājā dvattimsa vassāni rajjam kāresi, udayabhaddo soļasa vassāni, tasmā ajātasattussa aṭṭhamavassam idha vijayassa paṭhamavassanti katvā tato uddham ajātasattussa catuvīsati vassāni udayabhaddassa cuddassa vassānīti vijayassa aṭṭhatimsa vassāni paripūrimsu. Tathā ca vuttam—

"Vijayo lankamāgamma, satthu nibbānavāsare. Atthatimsa samākāsi, rajjam yakkhavimaddako"ti².

"Udayabhaddassa pañcadasame vasse paṇḍuvāsudevo nāma imasmim dīpe rajjam pāpuṇī"ti vuttattā udayabhaddassa cuddasamavassasaṅkhātam ekam vassam imasmim dīpe vijayassa paṇḍuvāsudevassa ca antare sīhaļam arājikam hutvā ṭhitanti veditabbam. Tasmiñhi vasse vijayarājassa amaccā upatissam nāma amaccam jeṭṭhakam katvā tassa nāmena kate upatissagāme vasantā arājikam rajjamanusāsimsu. Vuttañhetam—

"Tasmim mate amaccā te, pekkhantā khattiyāgamam. Upatissagāme thatvāna, rattham samanusāsisum.

Mate vijayarājamhi, khattiyāgamanā purā. Ekam vassam ayam lankā-dīpo āsi arājiko"ti¹.

Tatthāti jambudīpe. Idha paṇḍuvāsudevo kālamakāsīti imasmim sīhaļadīpe paṇḍuvāsudevo timsa vassāni rajjamanusāsitvā kālamakāsi. Tathā hi udayabhaddassa anantaram anuruddho ca muṇḍo ca aṭṭha vassāni rajjamanusāsimsu, tadanantaram nāgadāsako catuvīsati vassāni, tasmā udayabhaddassa pañcadasamasoļasamavassehi saddhim anuruddhassa ca muṇḍassa ca aṭṭha vassāni, nāgadāsakassa ca catuvīsativassesu vīsati vassānīti paṇḍuvāsudevassa rañño timsa vassāni paripūrimsu. Teneva vuttam—

"Tato panduvāsudevo, rajjam timsa samā akā"ti².

Tatthāti jambudīpe. Sattarasame vasseti sattarasame vasse sampatte. Tathā hi nāgadāsakassa anantarā susunāgo aṭṭhārasa vassāni rajjam kāresi, tasmā nāgadāsakassa catuvīsativassesu vīsati vassāni ṭhapetvā sesehi catūhi vassehi saddhim susunāgassa aṭṭhārasasu vassesu soļasa vassānīti idha abhayarañño vīsati vassāni paripūrimsu. Vuttañhetam—

"Abhayo vīsati vassāni, laṅkārajjamakārayī"ti2.

Dāmarikoti yuddhakārako coro. Paṇḍukābhayo³ pana abhayassa bhāgineyyo rājāyeva, na coro, balakkārena pana rajjassa gahitattā "dāmariko"ti vuttam. **Rajjam aggahesī**ti ekadesassa gahitattā vuttam. Abhayassa hi vīsatime vasse na tāva sabbam rajjamaggahesīti. Tathā hi vīsatimavassato patthāya abhayassa nava

^{1.} Mahāvamse atthamaparicchede.

^{2.} Gavesitabbam.

^{3.} Pakuṇḍakābhayo (sabbattha) evamuparipi. "Mātāmahassa nāmañca, jeṭṭhassa mātulassa ca. Ekaṁ katvā tamakaruṁ, paṇḍukābhayanāmakan"ti mahāvaṁse navamavaricchede sattavīsatimagāthā ca "ekaṁ katvā tamakarunti tesaṁ ubhinnaṁ pituputtānaṁ nāmasaṁyogaṁ katvā taṁ kumāraṁ paṇḍukābhayanāmakaṁ akarunti attho'ti taṭṭīkā ca passitabbā.

bhātike attano mātule tattha tattha yuddham katvā ghātentassa anabhisittasseva sattarasa vassāni atikkamimsu, tatoyeva ca tāni rajasuññāni nāma ahesum. Tathā ca yuttam—

"Paṇḍukābhayarañño ca, abhayassa ca antare. Rājasuññāni vassāni, ahesuṁ dasa satta cā"ti.

Tatthāti jambudīpe. Paṇḍukassāti paṇḍukābhayassa. Bhavati hi ekadesenapi vohāro "devadatto datto"ti yathā. Sattarasa vassāni paripūrimsūti anabhisittasseva paripūrimsu. Ettha ca kāļāsokassa soļasamavassam ṭhapetvā pannarasa vassāni heṭṭhā susunāgassa sattarasama-aṭṭhārasamavassāni ca dve gahetvā sattarasa vassāni gaṇitabbāni. Tāni heṭṭhā ekena vassena saha aṭṭhārasa hontīti tāni rājasuññāni sattarasa vassāni heṭṭhā vijayapaṇḍuvāsudevarājūnamantare arājikena ekena vassena saddhim aṭṭhārasa rājasuññavassāni nāma honti.

Candaguttassa cuddasame vasse idha paṇḍukābhayo kālamakāsīti candaguttassa cuddasame vasse imasmiṁ tambapaṇṇidīpe paṇḍukābhayo nāma rājā sattati vassāni rajjamanusāsitvā kālamakāsi. Tathā hi susunāgassa putto kāļāsoko aṭṭhavīsati vassāni rajjaṁ kāresi. Tato tassa puttā dasa bhātukā dvevīsati vassāni rajjaṁ kāresuṁ, tesaṁ pacchā nava nandā dvevīsati, candagutto catuvīsati vassāni rajjaṁ kāresi. Tattha kāļāsokassa aṭṭhavīsativassesu pannarasa vassāni heṭṭhā gahitānīti tāni ṭhapetvā sesāni terasa vassāni, dasabhātukānaṁ dvevīsati, tathā navanandānaṁ dvevīsati, candaguttassa cuddasamavassaṁ ṭhapetvā terasa vassānīti paṇḍukābhayassa sattati vassāni paripūriṁsu. Tathā ca vuttaṁ—

"Pandukābhayanāmassa, rañño vassāni sattatī"ti1.

Tattha asokadhammarājassa sattarasame vasse idha muṭasivarājā kālamakāsīti tasmim jambudipe asikadhammarājassa sattarasame vasse idha muṭasivo nāma rājā saṭṭhi vassāni rajjamanusāsitvā

kālamakāsi. Tathā hi candaguttassa putto bindusāro aṭṭhavīsati vassāni rajjam kāresi, tato tassa putto asokadhammarājā rajjam pāpuṇi, tasmā gandaguttassa heṭṭhā vuttesu catuvīsativassesu terasa vassāni gahitānīti tāni ṭhapetvā sesāni ekādasa vassāni, bindusārassa aṭṭhavīsati vassāni, asokassa anabhisittassa cattāri vassāni, abhisittassa sattarasa vassānīti evam saṭṭhi vassāni idha muṭasivassa paripūrimsu. Tathā ca vuttam—

"Muṭasivo saṭṭhi vassāni, laṅkārajjamakārayī'ti1.

Devānampiyatisso rajjam pāpunīti asokadhammarājassa aṭṭhārasame vasse pāpuṇi. Idāni parinibbute bhagavati ajātasattu-ādīnam vassagaṇanāvasena parinibbānato dvinnam vassasatānam upari chattimsati vassāni ekato gaṇetvā dassento āha "parinibbute ca sammāsambuddhe"tiādi. Tattha ajātasattussa catuvīsatīti parinibbānavassasankhātam aṭṭhamavassam muñcitvā vuttam. Asokassa puttakā dasa bhātukarājānoti kāļāsokassa puttā bhaddaseno koraṇḍavaṇno maṅkuro² sabbañjaho jāliko ubhato sañcayo korabyo nandivaḍḍhano pañcamakoti ime dasa bhātukarājānoti veditabbā. Uggasenanando paṇḍukanando paṇḍugatinando bhūtapālanando raṭṭhapālanando govisāṇakanando saviddhakanando³ kevaṭṭakanando dhananandoti ime navanandāti veditabbā. Etena rājavamsānusārenāti etena jambudīpavāsirājūnam vamsānusārena veditabbametanti attho.

Tambapaṇṇidīpavāsīnampi puna rājūnam vasena evam gaṇanā veditabbā—sammāsambuddhassa parinibbānavassam idha vijayassa paṭhamam vassanti katvā tam apanetvā parinibbānavassato uddham vijayassa sattatimsa vassāni, tato arājikamekavassam, paṇḍuvāsudevassa timsa vassāni, abhayassa vīsati vassāni, paṇḍukābhayassa abhisekato pubbe sattarasa vassāni, abhisittassa sattati vassāni, muṭasivassa saṭṭhi vassāni, devānampiyatissassa paṭhamam vassanti evam parinibbānato dvinnam vassasatānam upari chattimsa vassāni veditabbāni.

^{1.} Mahāvamse ekādasamaparicchede.

^{3.} Savindhakanando (S \bar{i}), dasasitthakanando (Sy \bar{a})

^{2.} Manguro (Syā)

Jetthamāsassa punnamiyam jetthanakkhattam mūlanakkhattam vā hotīti āha "jetthamūlanakkhattam nāma hotī"ti. Tasmim pana nakkhatte kattabbachanampi tannissayattā tameva nāmam labhatīti veditabbam. Migavanti miganam vananato hesanato badhanato migavanti laddhasamaññam migavam¹. **Rohitamigarūpan**ti gokannamigavesam. **Jiyan**ti dhanujiyam. Anubandhantoti padasā anudhāvanto. Mamamyeva rājā passatūti ettha "amhesu bahūsu ditthesu rājā ativiva bhāvissatī"ti iminā kāranena attānameva dassetum "mamamyeva passatū"ti adhitthāsīti veditabbam. "Cintesī"ti vatvā tassa cintanākāram dassento āha "imasmim dīpe jāto"ti-ādi. Thero tassa parivitakkam jānitvā attano sabhāvam kathetvā tam assāsetukāmo "samanāmayam mahārājā" ti-ādimāha. Mahārāja mayam samanā nāma, tvam parivitakkam mā akāsīti vuttam hoti. Taveva anukampāyāti tava anukampatthāya eva āgatā, na vimukhabhāvatthāyāti adhippāyo. "Ime samanā nāmā"ti ajānantassa "samanā mayam mahārājā"ti kasmā thero āhāti ce? Asokadhammarājena pesitasāsaneneva pubbe gahitasamanasaññam sāretum evamāhāti. Imamattham vibhāvetum "tena ca samayenā"ti-ādi vuttam.

Adiṭṭhā hutvā sahāyakāti² adiṭṭhasahāyakā, aññamaññaṁ adisvāva sahāyakabhāvaṁ upagatāti vuttaṁ hoti. Chātapabbatapādeti chātavāhassa nāma pabbatassa pāde. Taṁ kira pabbataṁ anurādhapurā pubbadakkhiṇadisābhāge atirekayojanadvayamatthake tiṭṭhati. Tamhi ṭhāne pacchā saddhātisso nāma mahārājā vihāraṁ kārāpesi, taṁ "chātavihāran"ti vohariṁsu. "Rathayaṭṭhippamāṇāti āyāmato ca āvaṭṭato ca rathapatodena samappamānā"ti tīsupi ganthipadesu vuttaṁ. Mahāvaṁsepi³ vuttaṁ—

"Chātapabbatapādamhi, tisso ca veļuyaṭṭhiyo. Jātā rathapatodena, samānā parimāṇato"ti.

Gaṇṭhipade pana "rathayaṭṭhippamāṇāti rathassa dhajayaṭṭhippamāṇā"ti vuttam. **Uppajjimsū**ti tassa abhisekasamakālameva uppajjimsu. Evamuttaripi

vakkhamānānam acchariyānam pātubhāvo veditabbo. Tathā ca vuttam mahāvamse¹—

"Devānampiyatisso so, rājāsi pitu-accaye. Tassābhisekena samam, bahūnacchariyānahū"ti.

Ekā latāyaṭṭhi nāmāti kañcanalatāya paṭimaṇḍitattā evaṁladdhanāmā ekā yaṭṭhi ahosi. Taṁ alaṅkaritvā uppannalatāti taṁ rajatavaṇṇaṁ yaṭṭhiṁ alaṅkaritvā tattheva cittakammakatā viya uppannalatā. Khāyatīti dissati. Kiñjakkhānīti kesarāni. Etāni ca pupphayaṭṭhiyaṁ nīlapupphādīni sakuṇayaṭṭhiyañca nānappakārā migapakkhino tattheva cittakammakatā viya paññāyantīti daṭṭhabbaṁ. Setā rajatayaṭṭhīvāti rajatamayayaṭṭhi viya ekā yaṭṭhi setavaṇṇāti attho. Latāti tattheva cittakammakatā viya dissamānalatā. Nīlādi yādisaṁ pupphanti yādisaṁ loke nīlādipupphaṁ atthi, tādisaṁ pupphayaṭṭhimhi khāyatīti attho.

Anekavihitam ratanam uppajjīti anekappakāram ratanam samuddato sayameva tīram āruhitvā velante ūmivegābhijātamariyādavaṭṭi viya uppajji, uṭṭhahitvā aṭṭhāsīti attho. Tambapaṇṇiyam pana aṭṭha muttā uppajjimsūti etthāpi tambapaṇṇiyam samuddato sayameva uṭṭhahitvā jātito aṭṭha muttā samuddatīre vuttanayeneva ṭhitāti veditabbā. Vuttañhetam mahāvamse¹—

"Laṅkādīpamhi sakale, nidhayo ratanāni ca.

Antothitāni uggantvā, pathavītalamāruhum.

Lankādīpasamīpamhi, bhinnanāvāgatāni ca.

Tatra jātāni ca thalam, ratanāni samāruhum.

Hayagajā rathāmalakā, valayanguliveṭhakā.

Kakudhaphalā pākatikā, iccetā aṭṭha jātito.

Muttā samuddā uggantvā, tīre vaṭṭi viya ṭṭhitā.

Devānampiyatissassa, sabbapuññavijambhitan"ti.

Hayamuttāti assarūpasanthānamuttā. Gajamuttāti hatthirūpasanthānā. Evam sabbattha tamtamsanthanavasena muttabhedo veditabbo. Aṅguliyethakamuttāti aṅgulīyakasanthānā, muddikāsanthānāti attho. **Kakudhaphalamuttā**ti kakudharukkhaphalākārā bahū asāmuddikā muttā¹. Rājakakudhabhandānīti rājāraha-uttamabhandāni. Tāni sarūpena dassento āha "chattam cāmaran" ti-ādi. Aññañca bahuvidham pannākāram pahinīti sambandho. Sankhanti abhisekasincanakam samuddikam dakkhinavattam sankham. Anotattodakameva "gangodakan"ti vuttam. Vaddhamananti alankāracunnam. "Nahānacunnan"ti keci. Vatamsakanti kannapilandhanavatamsakanti vuttam hoti. "Vatamsakam kannaculikatthane olambakan"tipi vadanti. **Bhingāran**ti² suvannamayam mahābhingāram. "Makaramukhasanthānā balikammādikaranattham katā bhājanavikatī"tipi vadanti. Nandiyāvattanti kākapadasanthānā mangalattham katā suvannabhājanavikati. **Kaññan**ti khattiyakumārim. **Adhovimam** dussayuganti kilitthe jāte aggimhi pakkhittamatte parisuddhabhāvamupagacchantam adhovimam dussayugam. Hatthapuñchananti pītavannam mahaggham hatthapuñchanapatam. Haricandananti harivannacandanam, suvannavannavandananti attho. Lohitacandanam vā, gositacandananti attho. Tam kira uddhane kuthitatelamhi³ pakkhittamattam sakalampi telam aggiñca nibbāpanasamattham candanam. Teneva "gositacandanan"ti vuccati. Gosaddena hi jalam vuccati, tam viya sitam candanam gositacandanam. Nāgabhavanasambhavam **arunavannamattikam. Harītakam āmalakan**ti agadaharītakam agadāmalakam. Tam khippameva sarīramalasodhanādikaranasamattham hoti.

Uṇhīsanti uṇhīsapaṭṭaṁ. Veṭhananti sīsaveṭhanaṁ. Sārapāmaṅganti uttamaṁ ratanapāmaṅgasuttaṁ. Vatthakoṭikanti vatthayugameva. Nāgamāhaṭanti nāgehi āhaṭaṁ. Ma-kāro padasandhikaro. Amatosadhanti evaṁnāmikā guḷikajāti, amatasadisakiccattā evaṁ vuccati. Taṁ kira paripanthaṁ⁴ vidhametvā sabbattha sādhentehi agadosadhasambhārehi yojetvā vaṭṭetvā kataṁ guḷikaṁ. Taṁ pana rājūnaṁ mukhasodhananahānapariyosāne mahatā parihārena upanenti. Tena te aṅgarāgaṁ nāma karonti, karontā ca yathārahaṁ dvīhi tīhi agadosadharaṅgatilakāhi nalāṭaka-aṁsakūṭa-uramajjhasaṅkhātaṁ

^{1.} Bahū amsāmuttā (Sī, Syā)

^{3.} Pakkutthitatelamhi (Sī, Syā)

^{2.} Bhinkāranti (Sī)

^{4.} Parimattham (Ka)

aṅgaṁ sajjetvā aṅgarāgaṁ karontīti veditabbaṁ. Sā pana guḷikā ahivicchikādīnampi visaṁ hanati, tenapi taṁ vuccati "amatosadhan"ti.

Aham buddhañcāti-ādīsu sabbadhamme vāthāvato abujjhi patibujjhīti buddhoti sankhyam gatam sammāsambuddhanca, adhigatamagge sacchikatanirodhe vathānusittham patipajiamāne ca apāvesu apatamāne dhāretīti dhammoti sankhyam gatam pariyattiyā saddhim nava lokuttaradhammañca, ditthisīlasāmaññena samhatattā samghoti sankhyam gatam ariyasāvakasamghanca aham saranam gato parāyananti upagato, bhajim sevinti attho. Atha vā himsati tappasādataggarukatāhi vihatakilesena tapparāyanatākārappavattena cittuppādena saranagatānam teneva saranagamanena bhayam santāsam dukkham duggatim parikilesam hanati vināsetīti **saranam**, ratanattavassetam adhivacanam. Apica sammāsambuddho hite pavattanena ahitā ca nivattanena sattānam bhayam himsatīti sarananti vuccati. Dhammopi bhavakantārā uttāranena assāsadānena ca sattānam bhayam himsatīti sarananti vuccati. Samghopi appakānampi kārānam vipulaphalapatilābhakaranena sattānam bhayam himsatīti saraņanti vuccati. Iminā atthena saraņabhūtam ratanattayam teneva kāraņena saraņanti gato avagato, jānanti attho. Upāsakattam desesinti ratanattayam upāsatīti upāsakoti evam dassitam upāsakabhāvam mayi abhinivittham vācāya¹ pakāsesinti attho, "upāsakoham ajjatagge pānupetam saranam gato"ti evam upāsakattam pativedesinti vuttam hoti. Sakyaputtassa sāsaneti sakvassa suddhodanassa putto so bhagavā sakvaputto, tassa sakyaputtassa sāsaneti attho. **Saddhā**ti saddhāya, "sayam abhiññā sacchikatvā"ti-ādīsu viya yakāralopo datthabbo. Upehīti upagaccha.

Asokaraññā pesitena abhisekenāti asokaraññā pesitena abhisekupakaraṇena. Yadā hi devānampiyatisso mahārājā attano sahāyassa dhammāsokarañño ito veļuyaṭṭhiyādayo mahārahe paṇṇākāre pesesi. Tadā sopi te disvā pasīditvā ativiya tuṭṭho "imehi atirekataram kim nāma mahaggham paṭipaṇṇākāram sahāyassa me pesessāmī"ti amaccehi

saddhim mantetvā lankādīpe abhisekaparihāram pucchitvā "na tattha īdiso abhisekaparihāro atthī"ti sutvā "sādhu vata me sahāyassa abhisekaparihāram pesessāmī"ti vatvā sāmuddikasankhādīni tīņi sankhāni ca gangodakanca aruṇavaṇṇamattikanca aṭṭhaṭṭha khattiyabrāhmaṇagahapatikannāyo ca suvaṇṇarajatalohamattikā mayaghaṭe ca aṭṭhahi seṭṭhikulehi saddhim aṭṭha amaccakulāni cāti evam sabbaṭṭhakam nāma idha pesesi "imehi me sahāyassa puna abhisekam karothā"ti, annānca abhisekatthāya bahum paṇṇākāram pesesi. Tena vuttam "asokarannā pesitena atisekenā"ti. Eko māso abhisittassa assāti ekamāsābhisitto. Katham pana tassa tadā ekamāsābhisittatā vinnāyatīti āha "visākhapuṇṇamāyam hissa abhisekamakamsū"ti, pubbe katābhisekassapi asokarannā pesitena anagghena parihārena visākhapuṇṇamāyam puna abhisekamakamsūti attho. Vuttanhetam mahāvamse¹—

"Te migasiramāsassa, ādicandodayam dine.

Abhisittañca lankindam, amaccā sāmibhattino.

Dhammāsokassa vacanam, sutvā sāmihite ratā.

Punāpi abhisecimsu, lankāhitasukhe ratan"ti.

Dīpavamsepi¹ cetam vuttam—

"Visākhamāse dvādasiyam², jambudīpā idhāgatā.

Abhisekam saparivāram, asokadhammena pesitam.

Dutiyam abhisiñcittha, rājānam devānampiyam.

Abhisitto dutiyā tisekena, visākhamāse uposathe.

Tato māse atikkamma³, jetthamāse uposathe.

Mahindo sattamo hutvā, jambudīpā idhāgato"ti.

Tadā pana tassa rañño visākhapuṇṇamāya abhisekassa katattā tato pabhuti yāvajjatanā visākhapuṇṇamāyameva abhisekakaraṇamāciṇṇam. Abhisekavidhānañcettha evam veditabbam—abhisekamaṅgalattham

^{1.} Ekādasamaparicchede.

^{2.} Visākhe dvādasapakkhe (Sī), visākhamāse dvādasapakkhe (Syā, Ka)

^{3.} Atiggayha (Sī, Syā, Ka)

alankatappaṭiyattassa maṇḍapassa anto katassa udumbarasākhamaṇḍapassa majjhe suppatiṭṭhite udumbarabhaddapīṭhamhi abhisekāraham abhijaccam khattiyam nisīdāpetvā paṭhamam tāva maṅgalābharaṇabhūsitā jātisampannā khattiyakaññā gaṅgodakapuṇṇam sāmuddikam dakkhiṇāvaṭṭasaṅkham ubhohi hatthehi sakkaccam gahetvā sīsopari ussāpetvā tena tassa muddhani abhisekodakam abhisiñcati, evañca vadeti "deva tam sabbepi khattiyagaṇā attānamārakkhaṇattham iminā abhisekena abhisekikam¹ mahārājam karonti, tvam rājadhammesu ṭhito dhammena samena rajjam kārehi, etesu khattiyagaṇesu tvam puttasinehānukampāya sahitacitto hitasamamettacitto ca bhava, rakkhāvaranaguttiyā tesam rakkhito ca bhavāhī"ti.

Tato puna purohitopi purohiccaṭṭhānānurūpālaṅkārehi alaṅkatappaṭiyatto gaṅgodakapuṇṇaṁ rajatamayasaṅkhaṁ ubhohi hatthehi sakkaccaṁ gahetvā tassa sīsopari ussāpetvā tena tassa muddhani abhisekodakaṁ abhisiñcati, evañca vadeti "deva taṁ sabbepi brāhmaṇagaṇā attānamārakkhaṇatthaṁ iminā abhisekena abhisekikaṁ mahārājaṁ karonti, tvaṁ rājadhammesu ṭhito dhammena samena rajjaṁ kārehi, etesu brāhmaṇesu tvaṁ puttasinehānukampāya sahitacitto hitasamamettacitto ca bhava, rakkhāvaraṇaguttiyā tesaṁ rakkhito ca bhavāhī'ti.

Tato puna seṭṭhipi seṭṭhiṭṭhānānurūpabhūsanabhūsito gaṅgodakapuṇṇaṁ ratanamayasaṅkhaṁ ubhohi hatthehi sakkaccaṁ gahetvā tassa sīsopari ussāpetvā tena tassa muddhani abhisekodakaṁ abhisiñcati, evañca vadeti "deva taṁ sabbepi gahapatigaṇā attānamārakkhaṇatthaṁ iminā abhisekena abhisekikaṁ mahārājaṁ karonti, tvaṁ rājadhammesu ṭhito dhammena samena rajjaṁ kārehi, etesu gahapatigaṇesu tvaṁ puttasinehānukampāya sahitacitto hitasamamettacitto ca bhava, rakkhāvaraṇaguttiyā tesaṁ rakkhito ca bhavāhī'ti.

Te pana tassa evam vadantā² "sace tvam amhākam vacanānurūpena rajjam kāressasi, iccetam kusalam. No ce kāressasi, tava muddhā sattadhā phalatū"ti evam rañno abhisapanti viyāti datthabbam. Imasmim pana dīpe

devānampiyatissassa muddhani dhammāsokeneva idha pesitā khattiyakaññāyeva anotattodakapuņņena sāmuddikadakkhiņāvaṭṭasaṅkhena abhisekodakam abhisiñcīti vadanti. Idañca yathāvuttam abhisekavidhānam majjhimanikāye cūļasīhanādasuttavaṇṇanāyam sīhaļaṭṭhakathāyampi "paṭhamam tāva abhisekam gaṇhantānam rājūnam suvaṇṇamayādīni tīṇi saṅkhāni ca gaṅgodakañca khattiyakaññañca laddhum vaṭṭatī"ti-ādinā vuttanti yadanti.

Sammodanīyam katham kathayamānoti

pītipāmojjasaṅkhātasammodajananato sammodituṁ yuttabhāvato ca sammodanīyaṁ "kacci bhante khamanīyaṁ, kacci yāpanīyaṁ, kacci vo appābādhaṁ appātaṅkaṁ lahuṭṭhānaṁ balaṁ phāsuvihāro"ti evamādikathaṁ kathayamāno. Cha jane dassesīti raññā saddhiṁ āgatānaṁ "na ime yakkhā, manussā ime"ti sañjānanatthaṁ bhaṇḍukassa upāsakassa ānītattā tena saddhiṁ cha jane dassesi. Tevijjāti pubbenivāsadibbacakkhuāsavakkhayasaṅkhātāhi tīhi vijjāhi samannāgatā. Iddhippattāti iddhividhañāṇaṁ pattā. Cetopariyakovidāti paresaṁ cittācāre kusalā. Evamettha pañca abhiññā sarūpena vuttā, dibbasotaṁ pana tāsaṁ vasena āgatameva hoti. Bahūti evarūpā chaļabhiññā buddhasāvakā bahū gaṇanapathaṁ atikkantā sakalajambudīpaṁ kāsāvapajjotaṁ katvā vicarantīti. Keci pana "tevijjā iddhippattā ca khīṇāsavā cetopariyakovidā keci khīṇāsavāti visuṁ yojetvā 'arahanto'ti iminā sukkhavipassakā vuttā"ti vadanti.

Paññaveyyattiyanti paññapāṭavam, paññaya tikkhavisadabhāvanti attho. Āsannanti āsanne ṭhitam. Sādhu mahārāja paṇḍitosīti rājānam pasamsati. Puna vīmamsanto "atthi pana te mahārājā"ti-ādimāha. Cūļahatthipadopamasuttantam kathesīti "ayam rājā 'ime samaṇā nāma īdisā, sīlādipaṭipatti ca tesam īdisī'ti ca na jānāti, handa nam imāya cūļahatthipadopamasuttantadesanāya samaṇabhāvūpagamanam samaṇapaṭipattiñca viññāpessāmī"ti cintetvā paṭhamam cūļahatthipadopamasuttantam kathesi. Tattha hi—

"Evameva kho brāhmaṇa idha tathāgato loke uppajjati araham sammāsambuddho vijjācaraṇasampanno -pa- sāttham sabyañjanam kevalaparipuṇṇam parisuddham brahmacariyam pakāseti, tam dhammam suṇāti

gahapati vā gahapatiputto vā aññatarasmim vā kule paccājāto, so tam dhammam sutvā tathāgate saddham paṭilabhati, so tena saddhāpaṭilābhena samannāgato iti paṭisañcikkhati 'sambādho gharāvāso rajopatho, abbhokāso pabbajjā, nayidam sukaram agāram ajjhāvasatā ekantaparipuṇṇam ekantaparisuddham sankhalikhitam brahmacariyam caritum, yannūnāham kesamassum ohāretvā kāsāyāni vatthāni acchādetvā agārasmā anagāriyam pabbajeyyan'ti. So aparena samayena appam vā bhogakkhandham pahāya mahantam vā bhogakkhandham pahāya appam vā ñātiparivaṭṭam pahāya mahantam vā ñātiparivaṭṭam pahāya kesamassum ohāretvā kāsāyāni vatthāni acchādetvā agārasmā anagāriyam pabbajati.

So evam pabbajito samāno bhikkhūnam sikkhāsājīvasamāpanno pāṇātipātam pahāya pāṇātipātā paṭivirato hoti nihitadaṇḍo nihitasattho, lajjī dayāpanno sabbapāṇabhūtahitānukampī viharati.

Adinnādānam pahāya adinnādānā paṭivirato hoti dinnādāyī dinnapāṭikaṅkhī, athenena sucibhūtena attanā viharatī"ti1—

evamādinā sāsane saddhāpaṭilābham paṭiladdhasaddhehi ca pabbajjupagamanam pabbajitehi ca paṭipajjitabbā sīlakkhandhādayo dhammā pakāsitā.

Rājā suttantam suņantoyeva aññāsīti "so

bījagāmabhūtagāmasamārambhā paṭivirato hoti, ekabhattiko hoti rattuparato virato vikālabhojanā"ti evam tasmim suttante² āgatattā tam suṇantoyeva aññāsi. Idheva vasissāmāti na tāva rattiyā upaṭṭhitattā anāgatavacanamakāsi. Āgataphaloti anāgāmiphalam sandhāyāha, sampatta-anāgāmiphaloti attho. Tatoyeva ca visesato aviparītaviditasatthusāsanattā viññātasāsano. Idāni pabbajissatīti gihilingena ānītakiccassa niṭṭhitattā evamāha.

Acirapakkantassa raññoti

raññe acirapakkanteti attho. **Adhiṭṭhahitvā**ti antotambapaṇṇidīpe samāgatā sunantūti adhitthahitvā.

Bhūmattharaṇasaṅkhepenāti bhūmattharaṇākārena. Uppātapāṭhakāti nimittapāṭhakā, nemittakāti attho. Gahitā dāni imehi pathavīti āsanānaṁ pathaviyaṁ atthatattā evamāhaṁsu. Patiṭṭhahissatīti cintentoti ettha tena kāraṇena sāsanapatiṭṭhānassa abhāvato avassaṁ patiṭṭhahantassa sāsanassa pubbanimittamidanti evaṁ pubbanimittabhāvena sallakkhesīti veditabbaṁ. Paṇītenāti uttamena. Sahatthāti sahatthena santappetvāti suṭṭhu tappetvā, paripuṇṇaṁ suhitaṁ yāvadatthaṁ katvāti attho. Petavatthuṁ vimānavatthuṁ saccasaṁyuttañca kathesīti desanāvidhikusalo thero janassa saṁvegaṁ janetuṁ paṭhamaṁ petavatthuṁ kathetvā tadanantaraṁ saṁvegajātaṁ janaṁ assāsetuṁ saggakathāvasena vimānavatthuñca kathetvā tadanantaraṁ paṭiladdhassāsānaṁ¹ "mā ettha assādaṁ karotha nibbānaṁ vinā na aññaṁ kiñci saṅkhāragataṁ dhuvaṁ nāma atthi, tasmā paramassāsakaṁ nibbānamadhigantuṁ vāyamathā''ti saccapaṭivedhatthāya ussāhaṁ janento ante saccasaṁyuttaṁ kathesīti veditabbaṁ.

Tesaṁ sutvāti tesaṁ santikā therānaṁ guṇakathaṁ sutvā. Rañño saṁviditaṁ katvāti rañño nivedanaṁ katvā, rājānaṁ paṭivedayitvāti attho. Alaṁ gacchāmāti purassa accāsannattā sāruppaṁ na hotīti paṭipakkhipanto āha. Meghavanaṁ nāma uyyānanti mahāmeghavanuyyānaṁ. Tassa kira uyyānassa bhūmiggahaṇadivase akālamahāmegho uṭṭhahitvā sabbataļākapokkharaṇiyo pūrento gimhābhihatarukkhalatādīnaṁ anuggaṇhantova pāvassi, tena kāraṇena taṁ mahāmeghavanaṁ nāma uyyānaṁ jātaṁ. Vuttañhetaṁ mahāvaṁse²—

"Uyyānaṭṭhānaggahaṇe³, mahāmegho akālajo. Pāvassi tena uyyānaṁ, mahāmeghavanaṁ ahū"ti.

Sukhasayitabhāvam pucchitvāti "kacci bhante idha sukham sayittha, tumhākam idha nivāso sukhan"ti evam sukhasayitabhāvam pucchitvā tato therena "sukhasayitamhi mahārāja, bhikkhūnam phāsukamidam uyyānan"ti vutte "evam

^{1.} Paṭiladdhassādānam (Syā) 2. Ekādasamaparicchede. 3. Uyyānabhūmigahane (Syā)

sati idam no uyyānam dassāmī"ti cintetvā "kappati bhante bhikkhusamghassa ārāmo"ti pucchi. Imam suttanti veļuvanārāmapaṭiggahaņe vuttamimam suttam. Udakanti dakkhinodakam. Mahāmeghavanuyyānam adāsīti "imam mahāmeghavanuyyānam samghassa dammī"ti vatvā jeṭṭhamāsassa kāļapakkhe dutiyadivase adāsi. Mahāvihārassa dakkhinodakapāteneva saddhim patiṭṭhitabhāvepi na tāva tattha vihārakammam niṭṭhitanti āha "idanca paṭhamam vihāraṭṭhānam bhavissatī"ti. Punadivasepīti kāļapakkhassa dutiyadivaseyeva. Aḍḍhanavamānam pāṇasahassānanti aḍḍhena navamānam pāṇasahassānami, pañcasatādhikānam aṭṭhasahassānanti aṭtho. Jotipātubhāvaṭṭhānanti ñāṇālokassa pātubhāvaṭṭhānam. Appamādasuttanti aṅguttaranikāye mahāappamādasuttam¹, rājovādasuttanti vuttam hoti.

Mahaccanti karanatthe paccattavacanam, mahatā rājānubhāvenāti attho. Tumhe jānanatthanti sambandho. **Arittho nāma amacco**ti rañño bhāgineyyo arittho nāma amacco. **Pañcapaṇṇāsāyā**ti ettha "catupaṇṇāsāyā"ti vattabbam. Evañhi sati upari vuccamānam "dvāsatthi arahanto" ti vacanam sameti. Teneva ca sīhalabhāsāya likhite **mahāvamse** "catupannāsāya saddhin"ti vuttam, dasabhātikasamākulam rājakulanti mutasivassa puttehi abhayo devānampiyatisso mahānāgo uttiyo mattābhayo sūratissoti evamādīhi dasahi bhātikehi samākinnam rājakulam. Cetiyagirimhi vassam vasimsūti āsālīpunnamadivase raññā dinnavihāreyeva patiggahetvā pātipadadivase vassam vasimsu. **Pavāretvā**ti mahāpavāranāya pavāretvā. Kattikapunnamāyanti aparakattikapunnamāyam. Mahāmahindatthero hi purimikāyam upagantvā vutthavasso mahāpavāranāya pavāretvā tato ekamāsam atikkamma cātumāsiniyam puņņamadivase ariyagaņaparivuto rājakulam gantvā bhojanāvasāne "mahārāja amhehi ciradittho sammāsambuddho"ti-ādivacanamabravi. Evañca katvā vakkhati "punnamāyam mahāvīro, cātumāsiniyā idhā"ti. Yam panettha kenaci vuttam "vutthavasso pavāretvāti cātumāsiniyā pavāraņāyāti attho, pathamapavāranāya vā pavāretvā ekamāsam tattheva vasitvā kattikapunnamiyam avoca, aññathā

'puṇṇamāyam mahāvīro'ti vuttattā na sakkā gahetun''ti, tattha cātumāsiniyā pavāraṇāyāti ayamatthavikappo na yujjati. Na hi purimikāya vassūpagatā cātumāsiniyam pavārenti. **Ciradiṭṭho sammāsambuddho**ti satthussa sarīrāvayavo ca sammāsambuddhoyevāti katvā avayave samudāyavohāravasena evamāhāti daṭṭhabbam yathā "samuddo diṭṭho''ti.

Therena vuttampi gamanakāraṇaṁ ṭhapetvā idha vāse payojanameva dassetvā gamanaṁ paṭisedhetukāmo āha "ahaṁ bhante tumhe"ti-ādi. Abhivādanādīsu ācariyaṁ¹ disvā abhivādanakaraṇaṁ abhivādanaṁ nāma. Yasmiṁ vā disābhāge ācariyo vasati iriyāpathe kappento, tato abhimukhova vanditvā gacchati, vanditvā tiṭṭhati, vanditvā nisīdati, vanditvā nipajjati, idaṁ abhivādanaṁ nāma. Ācariyaṁ¹ pana dūrabhova disvā paccuṭṭhāya paccuggamanakaraṇaṁ paccuṭṭhānaṁ nāma. Ācariyaṁ¹ pana disvā añjaliṁ paggayha sīse ṭhapetvā ācariyaṁ namassati, yasmiṁ disābhāge so vasati, tadabhimukhopi tatheva namassati, gacchantopi ṭhitopi nisinnopi añjaliṁ paggayha namassatiyevāti idaṁ añjalikammaṁ nāma.

Anucchavikakammassa pana karaṇaṁ sāmīcikaraṇaṁ nāma. Cīvarādīsu hi cīvaraṁ dento na yaṁ vā taṁ vā deti, mahagghaṁ satamūlagghampi² pañcasatamūlagghampi satasahassamūlagghampi³ detiyeva. Piṇḍapātādīsupi eseva nayo. Idaṁ sāmīcikaraṇaṁ nāma. Sarīradhātuyoti sarīrāvayavā.

Aññātanti aññātam, viditam mayāti attho. Kuto lacchāmāti kuto labhissāma. Sumanena saddhim mantehīti paṭhamameva sāmaṇerassa kathitattā vā "jānāti esa amhākamadhippāyan"ti ñatvā vā evamāhāti daṭṭhabbam.

Appossukko tvam mahārājāti mahārāja tvam dhātūnam paṭilābhe mā ussukkam karohi, mā tvam tattha vāvaṭo bhava, aññam tayā kattabbam karohīti adhippāyo. Idāni tadeva raññā kattabbakiccam dassento "vīthiyo sodhāpetvā"ti-ādimāha. Sabbatāļāvacare upaṭṭhāpetvāti kamsatāļāditāļam avacarati etthāti tāļāvacaram vuccati

^{1.} Garuṭṭhāniyam (Sī) 2. Satamūliyampi (Sī, Syā) 3. Sahassamūliyampi (Sī, Syā)

ātatavitatādi sabbam tūriyabhandam. Teneva parinibbānasuttaṭṭhakathāyam¹ "sabbañca tālāvacaram sannipātethāti ettha sabbañca tālāvacarami sabbam tūriyabhandan"ti vuttam. Ettha pana sahacarananayena sabbatūriyabhandānam vādakāpi gahetum vaṭṭantīti te sabbe upaṭṭhāpetvā sannipātetvāti vuttam hoti. Lacchasīti latissasi. Therā cetiyagirimeva agamamsūti rājanivesanato nikkhamitvā puna cetiyagirimeva agamamsu.

Tāvadevāti tam khaṇamyeva. Pāṭaliputtadvāreti pāṭaliputtanagaradvāre. Kiṁ bhante sumana āhiṇḍasīti sumana tvaṁ samaṇadhammaṁ akatvā kasmā vicarasīti pucchati. Cetiyagirimhiyeva patiṭṭhāpetvāti pacchā tattha vihāratthāya ākaṅkhitabbabhāvato cetiyagirimhiyeva patiṭṭhāpetvā². Vaḍḍhamānakacchāyāyāti pacchābhattanti attho. Pacchābhattameva hi chāyā vaḍḍhati. Athassa etadahosīti dhātucaṅkoṭakaṁ disvā evaṁ cintesi. Chattaṁ apanamatūti idaṁ setacchattaṁ sayameva me sīsoparito dhātucaṅkoṭakābhimukhaṁ hutvā namatūti attho. Mayhaṁ matthake patiṭṭhātūti idaṁ dhātucaṅkoṭakaṁ therassa hatthato dhātuyā saha āgantvā sirasmiṁ me patiṭṭhātūti attho. Pokkharavassaṁ nāma pokkharapattappamāṇaṁ valāhakamajjhe uṭṭhahitvā kamena pharitvā temetukāmeyeva temayamānaṁ mahantaṁ hutvā vassati. Mahāvīroti mahāparakkamo. Mahāvīrāvayavattā cettha satthuvohārena dhātuyo eva niddiṭṭhā. Dhātusarīrenāgamanaṁ hi sandhāya ayaṁ gāthā vuttā.

Pacchimadisābhimukhova hutvā apasakkantoti piṭṭhito piṭṭhitoyeva pacchimadisābhimukho hutvā osakkanto, gacchantoti attho. Kiñcāpi esa pacchimadisaṁ na oloketi, tathāpi pacchimadisaṁ sandhāya gacchatīti "pacchimadisābhimukho"ti vuttaṁ. Puratthimena dvārena nagaraṁ pavisitvāti ettha piṭṭhito piṭṭhitoyeva āgantvā dvāre sampatte parivattetvā ujukeneva nagaraṁ pāvisīti veditabbaṁ. Mahejavatthu nāmāti mahejanāmakena³ yakkhena pariggahitaṁ ekaṁ devaṭṭhānanti

^{1.} Dī-Ṭṭha 2. 227 piṭṭhe.

^{2.} Pacchā kattabbesu sabbavihāresu ito dhātuyo gahetvā patiṭṭhāpetabbāti adhippāyena cetiyagirimhiyeva tā dhātuyo patiṭṭhāpetvā (Sī)

^{3.} Pahejavatthu nāma pahejanāmakena (Sī)

veditabbam. Paribhogacetiyaṭṭhānanti ettha paribhuttūpakaraṇāni nidahitvā katam cetiyam paribhogacetiyanti daṭṭhabbam. Tividhañhi cetiyam vadanti paribhogacetiyam dhammacetiyanti. Tattha paribhogacetiyam vuttanayameva. Dhātucetiyam pana dhātuyo nidahitvā katam. Paṭiccasamuppādādilikhitapotthakam nidahitvā katam pana dhammacetiyam nāma. Sārīrikam paribhogikam uddissakanti evampi tippabhedam cetiyam vadanti. Ayam pana pabhedo paṭimārūpassapi uddissakacetiyeneva saṅgahitattā sutthutaram yujjati.

Katham pana idam ṭhānam tiṇṇam buddhānam paribhogacetiyaṭṭhānam ahosīti āha "atīte kirā"ti-ādi. Pajjarakenāti ettha pajjarako nāma rogo¹ vuccati. So ca yakkhānubhāvena samuppannoti veditabbo. Tadā kira puṇṇakāļo nāma yakkho attano ānubhāvena manussānampi sarīre pajjarakam nāma rogam samuṭṭhāpesi. Vuttañhetam mahāvamse²—

"Rakkhasehi janassettha³, rogo pajjarako ahū"ti.

Dīpavamsepi cetam vuttam—

"Rakkhasā ca bahū tattha, pajjarā ca samuṭṭhitā. Pajjarena bahū sattā, nassanti dīpamuttame"ti⁴.

Anayabyasananti ettha anayoti avaḍḍhi. Kāyikaṁ cetasikañca sukhaṁ byasati vikkhipati vināsetīti byasananti dukkhaṁ vuccati. Kiñcāpi "buddhacakkhunā lokaṁ olokento"ti vuttaṁ, tathāpi "te satte anayabyasanamāpajjante disvā"ti vacanato paṭhamaṁ buddhacakkhunā lokaṁ oloketvā pacchā sabbaññutaññāṇena lokaṁ olokento te satte anayabyasanamāpajjante disvāti⁵ gahetabbaṁ. Na hi āsayānusayādibuddhacakkhussa te sattā anayabyasanaṁ āpajjantā dissanti. Dubbuṭṭhikāti visamavassādivasena duṭṭhā asobhanā vuṭṭhiyeva dubbuṭṭhikā, sassuppattihetubhūtā kāyasukhuppattisappāyā⁶ sattupakārā sammā vuṭṭhi tattha na hotīti adhippāyo. Katoyeva ca "dubbhikkhaṁ dussassan"ti vuttaṁ. Bhikkhāya

^{1.} Jararogo (Sī), jaro (Syā)

^{2.} Pannarasamaparicchede.

^{3.} Janayettha (Ka)

^{4.} Gavesitabbam.

^{5.} Addasāti (Syā)

^{6.} Sassuppattihetubhūtavutthikāya abhāvā sukhuppattisappāyā (Sī)

abhāvo, dullabhabhāvo vā **dubbhikkhaṁ**, sulabhā tattha bhikkhā na hotīti vuttaṁ hoti. Sassānaṁ abhāvo, asampannatā vā **dussassaṁ**. **Devo**ti meghassetaṁ nāmaṁ. **Sammādhāramanupavecchī**ti udakadhāraṁ sammā vimuñci, sammā anupavassīti vuttaṁ hoti.

Mahāvivādo hotīti tasmim kira kāle jayantamahārājena ca tassa rañño kaniṭṭhabhātukena samiddhakumāranāmakena uparājena ca saddhim imasmim dīpe mahāyuddham upaṭṭhitam. Teneva vuttam "tena kho pana samayena maṇḍadīpe mahāvivādo hotī"ti. Hotīti kiriyā kālamapekkhitvā vattamānapayogo, vivādassa pana atītakālikattam "tena kho pana samayenā"ti imināva viññāyati. Saddantarasannidhānena hettha atītakālāvagamo yathā "bhāsate vaḍḍhate¹ tadā"ti. Evam sabbattha īdisesu ṭhānesu vattamānapayogo daṭṭhabbo. Kalahaviggahajātāti ettha kalaho nāma matthakappatto kāyakalahopi vācākalahopi. Tattha hatthaparāmāsādivasena kāyena kātabbo kalaho kāyakalaho. Mammaghaṭṭanādivasena² vācāya kātabbo kalaho vācākalaho. Vipaccanīkagahaṇam viggaho. Kalahassa pubbabhāge uppanno aññamaññaviruddhagāho. Atha vā kalaho nāma vācākalaho. Aññamaññam hatthaparāmāsādivasena virūpam viruddham vā gahaṇam viggaho kāyakalaho. Yathāvutto kalaho ca viggaho ca jāto sañjāto etesanti kalahaviggahajātā, sañjātakalahaviggahāti attho.

Tāni sāsanantaradhānena nassantīti

pariyattipaṭivedhapaṭipattisaṅkhātassa tividhassapi sāsanassa antaradhānena dhātuparinibbāne sati tāni cetiyāni vinassanti. Tīṇi³ hi parinibbānāni kilesaparinibbānaṁ khandhaparinibbānaṁ dhātuparinibbānanti, tāni pana amhākaṁ bhagavato vasena evaṁ veditabbāni. Tassa hi kilesaparinibbānaṁ bodhipallaṅke ahosi, khandhaparinibbānaṁ kusinārāyaṁ.

Dhātuparinibbānaṁ anāgate bhavissati. Sāsanassa kira osakkanakāle imasmiṁ tambapaṇṇidīpe dhātuyo

^{1.} Rāghavo (Sī)

^{2.} Oṭṭhaghaṭanādivasena (Syā)

^{3.} Dī-Ṭṭha 3. 83; Abhi-Ṭṭha 2. 413 piṭṭhesupi passitabbam.

sannipatitvā mahācetiyam gamissanti, mahācetiyato nāgadīpe rājāyatanacetiyam, tato mahābodhipallankam gamissanti, nāgabhavanatopi devalokatopi brahmalokatopi dhātuyo mahābodhipallankameva gamissanti, sāsapamattāpi dhātu na antarā nassissati. Sabbā dhātuyo mahābodhipallanke rāsibhūtā suvaṇṇakkhandho viya ekagghanā hutvā chabbaṇṇarasmiyo vissajjessanti, tā dasasahassilokadhātum pharissanti. Tato dasasahassacakkavāļe devatā sannipatitvā "ajja satthā parinibbāti, aja sāsanam osakkati, pacchimadassanam dāni idam amhākan"ti dasabalassa parinibbutadivasato mahantataram kāruññam karissanti, ṭhapetvā anāgāmikhīṇāsave avasesā sakabhāvena saṇṭhātum na sakkhissanti. Dhātūsu tejodhātu uṭṭhahitvā yāva brahmalokā uggacchissanti, sāsapamattiyāpi dhātuyā sati ekajālāva bhavissati, dhātūsu pariyādānam gatāsu paricchijjissati. Evam mahantam ānubhāvam dassetvā dhātūsu antarahitāsu sāsanam antarahitam nāma hoti.

Divā bodhirukkhaṭṭhāne hatthisālāyaṁ tiṭṭhatīti divā vatthuvicinanāya okāsaṁ kurumāno tato dhātuṁ gahetvā kumbhe ṭhapetvā sadhātukova hutvā tiṭṭhatīti vadanti. Vuttañhetaṁ **mahāvaṁse**¹—

"Rattim nāgonupariyāti, tam ṭhānam so sadhātukam. Bodhitthānamhi sālāyam, divā thāti sadhātuko"ti.

Thūpapatiṭṭhānabhūmiṁ pariyāyatīti matthakato dhātuṁ tattha patiṭṭhāpetvā sadhātukaṁ thūpapatiṭṭhānabhūmiṁ rattibhāge pariyāyati, samantato vicaratīti attho. Jaṅghappamāṇanti pupphaṭṭhānappamāṇaṁ². Thūpakucchito heṭṭhābhāgañhi thūpassa jaṅghāti vadanti. Dhātuoropanatthāyāti hatthikumbhato dhātukaraṇḍakassa oropanatthāya. Sakalanagarañca janapado cāti nagaravāsino janapadavāsino ca abhedato nagarajanapadasaddehi vuttā "sabbā gāmo āgato, mañcā ukkuṭṭhiṁ karontī"ti-ādīsu viya. Mahājanakāyeti mahājanasamūhe. Samūhapariyāyo hettha kāyasaddo. Ekekadhātuppadesato tejodakanikkhamanādivasena yamakayamakaṁ hutvā pavattaṁ pātihāriyaṁ

yamakapāṭihāriyam. Channam vaṇṇānam rasmiyo cāti sambandho kātabbo. Channam vaṇṇānam udakadhārā cāti evampettha sambandham vadanti. Parinibbutepi bhagavati tassānubhāvena evarūpam pāṭihāriyamahosiyevāti dassetum "evam acintiyā"ti-ādigāthamāha. Buddhadhammāti ettha buddhaguṇā.

Dharamānakālepi tikkhattum āgamāsīti bhagavā kira abhisambodhito navame māse phussapunnamadivase yakkhādhivāsam lankādīpamupagantvā lankāmajihe tiyojanāyate yojanavitthate mahānāgavanuyyāne mahāyakkhasamāgame upari-ākāse thatvā kapputthānasamaye samutthitavutthivātanibbisesavassavāyunā ca lokantarikanirayandhakārasadisaghorandhakāranikāyena ca sītanarakanibbisesabahalasītena ca samvattakālasañjātavātasankhubhitehi meghanabhagajjitasadisena gaganamedanīninnādena ca yakkhānam bhayam santāsam janetvā tehi yācitābhayo "detha me samaggā nisīdanatthānan"ti vatvā "demate sakaladīpam, dehi no mārisa abhayan"ti vutte sabbam tam upaddavam antaradhāpetvā yakkhadattabhūmiyā cammakhandam pattharitvā tattha nisinno samantato jalamanam cammakhandam pasaretva kapputthānaggisadisadahanābhibhūtānam jaladhisalilabhītānam samantā velante bhamantānam yakkhānam giridīpam dassetvā tesu tattha patitthitesu tam yathathane patitthapetva cammakhandam sankhipitva nisinno tada samāgate anekadevatāsannipāte dhammam desetvā anekapānakotīnam dhammābhisamayam katvā sumanakūtavāsinā mahāsumanadevarājena samadhigatasotāpattiphalena yācitapūjanīyo sīsam parāmasitvā muṭṭhimattā nīlāmalakesadhātuyo tassa datvā jambudīpamagamāsi.

Dutiyam abhisambodhito pañcame samvacchare cūlodaramahodarānam jalathalanivāsīnam mātulabhāgineyyānam nāgarājūnam maṇipallankam nissāya upaṭṭhitamahāsaṅgāme nāgānam mahāvināsam disvā cittamāsakālapakkhassa uposathadivase pātova samiddhasumanena nāma rukkhadevaputtena chattam katvā dhāritarājāyatano nāgadīpam samāgantvā saṅgāmamajjhe ākāse pallankena nisinno ghorandhakārena nāge santāsetvā assāsento ālokam dassetvā sañjātapītisomanassānam upagatanāgānam sāmaggikaraṇīyam dhammam desetvā mātulabhāgineyyehi dvīhi

nāgarājūhi pūjite pathavītalagate maņipallaṅke nisinno nāgehi dibbannapānehi santappito jalathalanivāsino asītikoṭināge saraņesu ca sīlesu ca patiṭṭhāpetvā tehi namassituṁ pallaṅkañca rājāyatanapādapañca tattha patiṭṭhāpetvā jambudīpamagamāsi.

Tatiyampi abhisambodhito aṭṭhame samvacchare mahodaramātulena maṇi-akkhikanāgarājenābhiyācito visākhapuṇṇamadivase pañcabhikkhusataparivuto kalyāṇīpadese maṇi-akkhikassa bhavanamupagantvā tattha māpitaruciraratanamaṇḍape manoharavarapallaṅke nisinno nāgarājena dibbannapānehi santappetvā nāgamāṇavikagaṇaparivutena dibbamālāgandhādīhi pūjito tattha dhammaṁ desetvā vuṭṭhāyāsanā sumanakūṭe padaṁ dassetvā pabbabhapāde divāvihāraṁ katvā dīghavāpicetiyaṭṭhāne ca mubhiyaṅgaṇacetiyaṭṭhāne ca kalyāṇīcetiyaṭṭhāne ca mahābodhiṭṭhāne ca thūpārāmaṭṭhāne ca mahācetiyaṭṭhāne ca sasāvako nisīditvā nirodhasamāpattiṁ samāpajjitvā silācetiyaṭṭhāneyeva ṭhatvā devanāge samanusāsitvā jambudīpamagamāsi. Evaṁ bhagavā dharamānakālepi imaṁ dīpaṁ tikkhattuṁ āgamāsīti veditabbaṁ.

Idāni tadeva tikkhattumāgamanam sankhepato vibhāvento āha "paṭhamam yakkhadamanatthan"ti-ādi. Rakkham karontoti yakkhānam puna apavisanatthāya rakkham karonto. Āvijjīti¹ samantato vicari. Mātulabhāgineyyānanti cūļodaramahodarānam. Ettha pana kiñcāpi bhagavā samiddhasumanena nāma devaputtena saddhim āgato, tathāpi pacchāsamaṇena ekenapi bhikkhunā saddhim anāgatattā "ekakova āgantvā"ti vuttam. Tadanurūpassa paripanthassa vihatattā "pariļāham vūpasametvā"ti vuttam. Rañño bhātāti rañño kaniṭṭhabhātā. Abhayoti mattābhayo.

Anuļā devīti rañño jeṭṭhabhātujāyā anuļā devī. Purimakānaṁ tiṇṇaṁ sammāsambuddhānaṁ bodhi patiṭṭhāsīti yadā hi so kakusandho nāma bhagavā imasmiṁ dīpe manusse pajjarakābhibhūte anayabyasanamāpajjante disvā karuṇāya sañcoditahadayo imaṁ dīpamāgato,

tadā tam rogabhayam vūpasametvā sannipatitānam dhammam desento caturāsītiyā pāṇasahassānam dhammābhisamayam katvā sāyanhasamaye bodhipatiṭṭhānārahaṭṭhānam gantvā tattha samāpattim samāpajjitvā vuṭṭhāya "mama sirīsamahābodhito dakkhiṇamahāsākhamādāya rucanandā bhikkhunī idhāgacchatū"ti adhiṭṭhāsi. Sā satthu cittam ñatvā taṅkhaṇaññeva khemavatīrājadhāniyā khemarājānamādāya mahābodhimupagantvā dakkhiṇamahāsākhāya manosilālekham khemarājena dāpetvā taṁ sayam chijjitvā suvaṇṇakaṭāhe ṭhitam bodhisākhamādāya pañcasatabhikkhunīhi ceva devatāhi ca parivāritā iddhiyā idhānetvā taṭhāgatena pasārite dakkhiṇahatthe sasuvaṇṇakaṭāham mahābodhim ṭhapesi. Taṁ taṭhāgato abhayassa nāma rañño datvā tena tasmim samaye "mahātitthavanan"ti paññāte mahāmeghavanuyyāne patiṭṭhāpesi.

Koṇāgamano ca bhagavā dubbuṭṭhipīḷite dīpavāsino disvā imaṁ dīpamāgato taṁ bhayaṁ vūpasametvā dhammaṁ desento caturāsīti pāṇasahassāni maggaphalesu patiṭṭhāpetvā pubbabodhiṭṭhānaṁ gantvā samāpattipariyosāne "mama udumbaramahābodhito dakkhiṇamahāsākhamādāya karakanattā¹ bhikkhunī idhāgacchatū"ti cintesi. Sā bhagavato adhippāyaṁ viditvā taṅkhaṇaññeva sobharājadhāniyā sobharājānamādāya mahābodhimupagantvā dakkhiṇamahāsākhāya manosilālekhaṁ sobharājena dāpetvā taṁ sayaṁ chijjitvā hemakaṭāhe patiṭṭhitaṁ bodhisākhamādāya pañcasatabhikkhunīhi saddhiṁ suragaṇaparivutā iddhiyā idhāharitvā satthārā pasāritadakkhiṇapāṇitale sahemakaṭāhaṁ mahābodhiṁ ṭhapesi. Taṁ tathāgato samiddhassa rañño datvā tena tasmiṁ samaye "mahānāgavanan"ti saṅkhyaṁ gate mahāmeghavanuyyāne mahābodhiṁ patiṭṭhāpesi.

Kassapopi ca bhagavā upaṭṭhitarājūparājayuddhena pāṇino vināsaṁ disvā karuṇāya codito imaṁ dīpamāgantvā taṁ kalahaṁ vūpasametvā dhammaṁ desento caturāsīti pāṇasahassāni maggaphalaṁ pāpetvā mahābodhiṭṭhānaṁ gantvā tattha samāpattiṁ samāpajjitvā vuṭṭhāya "mama nigrodhamahābodhito dakkhiṇamahāsākhamādāya sudhammā bhikkhunī idhāgacchatū"ti adhiṭṭhāsi. Sā bhagavato cittaṁ viditvā taṅkhaṇaññeva

bārāṇasīrājadhāniyā brahmadattarājānamādāya mahābodhimupagantvā dakkhiṇamahāsākhāya manosilālekham brahmadattena dāpetvā tam sayam chijjitvā kanakakaṭāhe ṭhitam bodhisākhamādāya pañcasatabhikkhunīparivārā devagaṇaparivutā iddhiyā ettha ānetvā munindena pasārite dakkhiṇakaratale sasuvaṇṇakaṭāham mahābodhim ṭhapesi. Tam bhagavā jayantarañño datvā tena tasmim samaye "mahāsālavanan"ti saṅkhyam gate mahāmeghavanuyyāne mahābodhim patiṭṭhāpesi. Evam imasmim dīpe purimakānam tiṇṇam sammāsambuddhānam bodhim patiṭṭhāpesi. Tam sandhāya evamāha "imasmiñca mahārāja dīpe purimakānam tiṇṇam sammāsambuddhānam bodhi patiṭṭhāsī"ti.

Sarasaramsijālavissajjanakenāti siniddhatāya rasavantam ojavantam abhinavaramsijālam vissajjentena. Atha vā ito cito ca samsaraņato sarasam sajīvam jīvamānam viya ramsijālam vissajjentena. Atha vā sarasakāle dharamānakāle buddhena viya ramsijālam muncantenāti evamettha attham vaṇṇayanti. Ekadivaseneva agamāsīti sambandho. Pancahi kannāsatehīti attano paricārikehi pancahi kannāsatehi. Upassayam kārāpetvāti bhikkhunupassayam kārāpetvā. Appesīti lekhasāsanam patiṭṭhāpesi. Evanca avocāti rājasandesam appetvā therassa mukhasāsanam vinnāpento evam avoca. Udikkhatīti apekkhatī pattheti¹.

Chinnahatthaṁ viyāti chinnahatthavantaṁ viya. Chinnā hatthā etassāti chinnahatthoti aññapadatthasamāso daṭṭhabbo. Pabbajjāpurekkhārāti pabbajjābhimukhā, pabbajjāya sañjātābhilāsā "kadā nu kho pabbajissāmī"ti tattha ussukkamāpannāti vuttaṁ hoti. Maṁ paṭimānetīti maṁ udikkhati. Satthena ghātaṁ na arahatīti asatthaghātārahaṁ. Himavalāhakagabbhanti himapuṇṇavalāhakagabbhaṁ. Pāṭihāriyavasena jātaṁ himameva "valāhakagabbhan"tipi vadanti. Doṇamattāti magadhanāḷiyā solasanālippamānā.

Magganti sattayojanikam maggam. Paṭijaggāpetvāti sodhāpetvā, khāṇukaṇṭakādīni harāpetvā tattha bahalavipulavālukam okirāpetvāti vuttam hoti. Kammāravaṇṇanti rañño pakatisuvaṇṇakāravaṇṇam. Navahatthaparikkhepanti navahatthappamāṇo parikkhepo assāti navahatthaparikkhepam,

parikkhepato navahatthappamāṇanti vuttaṁ hoti. "Pañcahatthubbedhan"tiādīsupi imināva nayena attho veditabbo. Tihatthavikkhambhanti tihatthappamāṇavitthāraṁ. Samussitadhajapaṭākanti ussāpitanīlapītādivividhadhajapaṭākaṁ. Nānāratanavicittanti tattha tattha racitanānāratanehi suvicittaṁ. Anekālaṅkārapaṭimaṇḍitanti pasannajanapūjitehi¹ hatthūpagādīhi nānālaṅkārehi sajjitaṁ. Nānāvidhakusumasamākiṇṇanti upahāravasena upanītehi nānappakārehi vaṇṇagandhasampannehi jalathalapupphehi ākiṇṇaṁ.

Anekatūriyasamghuṭṭhanti ātatavitatādipañcangikatūriyasamghositam.

Avasesam adassanam agamāsīti ettha "handa mahārāja tayā gahetabbā ayam sākhā, tassa upanissayabhūto ayam khandho, na mayam tayā gahetabbā"ti vadantā viya avasesā sākhā satthu tejasā adassanamagamamsūti vadanti.

Gavakkhajālasadisanti bhāvanapumsakam, jālakavāṭasadisam katvāti attho.

Celukkhepasatasahassāni pavattimsūti tesam tesam janānam sīsopari bhamantānam uttarāsangacelānam ukkhepasatasahassāni pavattimsūti attho.

Mūlasatenāti dasasu lekhāsu ekekāya dasa dasa hutvā nikkhantamūlasatena.

Dasa mahāmūlāti paṭhamalekhāya nikkhantadasamahāmūlāni.

Devadundubhiyophalimsūti devadundubhiyo thanimsu. Devadundutīti ca na ettha kāci bherī adhippetā, atha kho uppātabhāvena ākāsagato nigghosasaddo. Devoti hi megho. Tassa hi acchabhāvena ākāsavaṇṇassa devassābhāvena sukkhagajjitasaññite sadde niccharante devadundubhīti samaññā, tasmā devadundubhiyo phalimsūti devo sukkhagajjitam gajjīti vuttam hoti. Pabbatānam naccehīti pathavīkampena ito cito ca bhamantānam pabbatānam naccehi. Yakkhānam hinkārehīti vimhayajātānam yakkhānam vimhayappakāsanavasena pavattehi hinkārasaddehi. Yakkhā hi vimhayajātā "him hin"ti saddam nicchārenti. Thutijappehīti pasamsāvacanehi. Brahmānam apphoṭanehīti pītisomanassajātānam brahmānam bāhāyam paharaṇasankhātehi apphoṭanehi. Pītisomanassajātā hi brāhmāno vāmahattham samiñjitvā dakkhiṇena hatthena bāhāyam pahāram denti. Ekakolāhalanti ekato

pavattakolāhalam. **Ekaninnādan**ti ekato pavattanigghosam. Phalato nikkhantā chabbaṇṇarasmiyo ujukam uggantvā onamitvā cakkavāļapabbatamukhavaṭṭim āhacca tiṭṭhantīti āha "sakalacakkavāļam ratanagopānasīvinaddham viya kurumānā"ti. Taṅkhaṇato ca pana pabhutīti vuttanayena suvaṇṇakaṭāhe patiṭṭhitassa mahābodhissa chabbaṇṇarasmīnam vissajjitakālato pabhuti. Himavalāhakagabbham pavisitvā aṭṭhāsīti suvaṇṇakaṭāheneva saddhim uggantvā himodakapuṇṇam valāhakagabbham pavisitvā aṭṭhāsi. Paṭhamam suvaṇṇakaṭāhe patiṭṭhitoyeva hi bodhi pacchā vuttappakāra-acchariyapaṭimaṇḍito hutvā himavalāhakagabbham pavisitvā aṭṭhāsi. Teneva vakkhati "paṭhamam suvaṇṇakaṭāhe patiṭṭhahi, tato himagabbhasattāham abhisekasattāhañca vītināmetvā"ti-ādi. Tatoyeva ca mahāvamsepi¹ vuttam—

"Evam satena mūlānam, tatthesā gandhakaddame. Patitthāsi mahābodhi, pasādentī mahājanam.

Tassā khandho dasahattho, pañca sākhā manoramā. Catuhatthā catuhatthā, dasaddhaphalamanditā.

Sahassantu pasākhānam, sākhānam tāsamāsi ca. Evam āsi mahābodhi, manoharasirindharā.

Kaṭāhamhi mahābodhi, patiṭṭhitakkhaṇe mahī. Akampi pāṭihīrāni, ahesum vividhāni ca.

Sayam nādehi tūriyānam, devesu mānusesu ca. Sādhukāraninnādehi, devabrahmagaņassa ca.

Meghānaṁ migapakkhīnaṁ, yakkhādīnaṁ ravehi ca. Ravehi ca mahīkampe, ekakolāhalaṁ ahu.

Bodhiyā phalapattehi, chabbaṇṇaraṁsiyo subhā. Nikkhamitvā cakkavālaṁ, sakalaṁ sobhayiṁsu ca.

Sakaṭāhā mahābodhi, uggantvāna tato nabham. Atthāsi himagabbhamhi, sattāhāni adassanā''ti. Tasmā suvaņņakaṭāhe patiṭṭhitoyeva bodhi kaṭāheneva saddhim uggantvā himavalāhakagabbham pavisitvā aṭṭhāsīti veditabbam.

Hetthā pana bhagavato adhitthānakkamam dassentena yam vuttam—

"Bhagavā kira mahāparinibbānamañce nipanno laṅkādīpe mahābodhipatiṭṭhāpanatthāya asokamahārājā mahābodhiggahaṇatthaṁ gamissati, tadā mahābodhissa dakkhiṇasākhā sayameva chijjitvā suvannakatāhe patitthātūti adhitthāsi, idamekamadhitthānaṁ.

Tattha patiṭṭhānakāle ca 'mahābodhi himavalāhakagabbham pavisitvā tiṭṭhatū'ti adhiṭṭhāsi, idam dutiyamadhiṭṭhānam.

Sattame divase himavalāhakagabbhato oruyha suvaṇṇakaṭāhe patiṭṭhahanto pattehi ca phalehi ca chabbaṇṇarasmiyo muñcatūti adhiṭṭhāsi, idam tatiyamadhiṭṭhānan"ti.

Tam iminā na sameti. Tattha hi paṭhamam himavalāhakagabbham pavisitvā pacchā sattame divase himavalāhakagabbhato oruyha chabbaṇṇaramsivissajjanam suvaṇṇakaṭāhe patiṭṭhahanañca vuttam, tasmā aṭṭhakathāya pubbenāparam na sameti. **Mahāvamse** pana adhiṭṭhānepi paṭhamam suvaṇṇakaṭāhe patiṭṭhahanam pacchāyeva chabbaṇṇaramsivissajjanam himavalāhakagabbhapavisanañca.

Vuttañhetam—

"Parinibbānamañcamhi, nipannena jinena hi. Katam mahā-adhitthānam, pañcakam pañcacakkhunā.

Gayhamānā mahābodhi-sākhā'sokena dakkhiņā.

Chijjitvāna sayamyeva, patiṭṭhātu kaṭāhake.

Patiţţhahitvā sā sākhā, chabbannarasmiyo subhā.

Rājayantī disā sabbā, phalapattehi muñcatu.

Sasuvaṇṇakaṭāhā sā, uggantvāna manoramā.

Adissamānā sattāham, himagabbhamhi tiṭṭhatū"ti¹.

Bodhivaṁsepi ca ayameva adhiṭṭhānakkamo vutto, tasmā aṭṭhakathāyaṁ vutto adhiṭṭhānakkamo yathā pubbenāparaṁ na virujjhati, tathā vīmaṁsitvā gahetabbo.

Himañca chabbaṇṇaraṁsiyo ca āvattitvā mahābodhimeva pavisiṁsūti mahābodhim paṭicchādetvā ṭhitaṁ himañca bodhito nikkhantachabbaṇṇarasmiyo ca āvattitvā padakkhiṇaṁ katvā bodhimeva pavisiṁsu, bodhipaviṭṭhā viya hutvā antarahitāti vuttaṁ hoti. Ettha pana "himañca raṁsiyo cā"ti ayameva pāṭho satasodhitasammate porāṇapotthake sesesu ca sabbapotthakesu dissati. Mahāvaṁsepi cetaṁ vuttaṁ—

"Atīte tamhi sattāhe, sabbe himavalāhakā. Pavisimsu mahābodhim, sabbā tā ramsiyopi cā"ti.

Kenaci pana "pañca ramsiyo"ti pāṭham parikappetvā yam vuttam "sabbadisāhi pañca rasmiyo āvattitvāti pañcahi phalehi nikkhantattā pañca, tā pana chabbaṇṇāvā"ti, tam tassa sammohavijambhitamattanti daṭṭhabbam. Paripuṇṇakhandhasākhāpasākhapañcaphalapaṭimaṇḍitoti paripuṇṇakhandhasākhāpasākhāhi ceva pañcahi ca phalehi paṭimaṇḍito, samantato vibhūsitoti attho. Abhisekam datvāti anotattodakena abhisekam datvā. Mahābodhitthāneyeva atthāsīti bodhisamīpeyeva vasi.

Pubbakattikapavāraṇādivaseti assayujamāsassa juṇhapakkhapuṇṇamiyam. Cātuddasī-uposathattā dvisattāhe jāte uposatho sampattoti āha "kāļapakkhassa uposathadivase"ti, assayujamāsakāļapakkhassa cātuddasī-uposatheti attho. Pācīnamahāsālamūle ṭhapesīti nagarassa pācīnadisābhāge jātassa mahāsālarukkhassa heṭṭhā maṇḍapam kāretvā tattha ṭhapesi. Sattarasame divaseti pāṭipadadivasato dutiyadivase. Kattikachaṇapūjam addasāti kattikachaṇavasena bodhissa kariyamānam pūjam sumanasāmaṇero addasa, disvā ca āgato sabbam tam pavattim ārocesi. Tam sandhāyeva ca thero bodhi-āharaṇattham pesesi.

Aṭṭhārasa devatākulānīti mahābodhim parivāretvā thitanāgayakkhādidevatākulāni datvāti sambandho. Amaccakulāni bodhissa

kattabbavicāranatthāya adāsi, brāhmanakulāni lokasammatattā udakāsiñcanatthāva adāsi, kutumbivakulāni bodhissa kattabbapūjopakaranagopanatthāya adāsi. "Gopakā rājakammino tathā taracchā"ti mahāganthipade vuttam. Ganthipade pana "gopakakulāni bodhisiñcanattham khīradhenupālanatthāya taracchakulāni kālingakulāni vissāsikāni padhānamanussakulānī"ti vuttam. Kālingakulānīti ettha "udakādigāhakā¹ kālingā"ti **mahāganthipade** vuttam. "Kalingesu janapade jātisampannakulam kālingakulan"ti keci. **Iminā parivārenā**ti sahatthe karanavacanam, iminā vuttappakāraparivārena saddhinti attho. Viñjhātavim samatikkammāti rājā sayampi mahābodhissa paccuggamanam karonto senangaparivuto thalapathena gacchanto viñjhātavim nāma atavim atikkamitvā. **Tāmalittim**² **anuppatto**ti tāmalittim² nāma tittham sampatto. Idamassa tatiyanti suvannakatāhe patithitamahābodhissa rajjasampadānam sandhāya vuttam. Tato pubbe panesa ekavāram saddhāya sakalajambudīparajjena mahābodhim pūjesiyeva, tasmā tena saddhim catutthamidam rajjasampadānam. Mahābodhim pana yasmim yasmim divase rajjena pūjesi, tasmim tasmim divase sakalajambudīparajjato uppannam āyam gahetvā mahābodhipūjam kāresi.

Māgasiramāsassāti migasiramāsassa³. Paṭhamapāṭipadadivaseti sukkapakkhapāṭipadadivase. Tañhi kaṇhapakkhapāṭipadadivasaṁ apekkhitvā "paṭhamapāṭipadadivasan"ti vuccati. Idañca imasmiṁ dīpe pavattamānavohāraṁ gahetvā vuttaṁ. Tattha pana puṇṇamito paṭṭhāya yāva aparā puṇṇamī, tāva eko māsoti vohārassa pavattattā tena vohārena "dutiyapāṭipadadivase"ti vattabbaṁ siyā. Tattha hi kaṇhapakkhapāṭipadadivasaṁ "paṭhamapāṭipadan"ti vuccati. Ukkhipitvāti mahāsālamūle dinnehi soļasahi jātisampannakulehi saddhiṁ ukkhipitvāti vadanti. Gacchati vatareti ettha areti khede. Tenevāha "kanditvā"ti, bodhiyā adassanaṁ asahamāno roditvā paridevitvāti attho. Sarasaraṁsijālanti ettha pana heṭṭhā vuttanayeneva attho veditabbo. Mahābodhisamāruļhāti mahābodhinā samāruļhā. Passato passatoti anādare sāmivacanaṁ, passantassevāti

^{1.} Udakādivāhakā (Sī, Syā)

^{2.} Tāmbalittim (Syā)

^{3.} Maggasirassāti maggasiramāsassa (Sī), migasirassāti migasiramāsassa (Syā)

attho. **Mahāsamuddatalaṁ pakkhantā**ti¹ mahāsamuddassa udakatalaṁ pakkhandi. **Samantā yojanan**ti samantato ekekena passena yojanappamāṇe padese. Accantasaṁyoge cetaṁ upayogavacanaṁ. **Vīciyo vūpasantā**ti vīciyo na uṭṭhahiṁsu, nāhesunti vuttaṁ hoti. **Pavajjiṁsū**ti viraviṁsu, nādaṁ pavattayiṁsūti attho. **Rukkhādisannissitāhī**ti ettha **ādi-**saddena pabbatādisannissitā devatā saṅgaṇhāti.

Supannarūpenāti supannasadisena rūpena. Nāgakulāni santāsesīti mahābodhiggahanattham āgatāni nāgakulāni santāsesi, tesam bhayam uppādetvā palāpesīti vuttam hoti. Tadā hi samuddavāsino nāgā mahābodhim gahetum vātavassandhakārādīhi mahantam vikubbanam akamsu. Tato samghamittattherī garulavannam māpetvā tena garularūpena ākāsam pūrayamānā sikhāmarīcijālena gaganam ekandhakāram katvā pakkhappahāravātena mahāsamuddam āloletvā samvattajaladhinādasadisena ravena nāgānam hadayāni bhindantī viya tāsetvā nāge palāpesi. **Te ca** utrastarūpā nāgā āgantvāti te ca vuttanayena uttāsitā nāgā puna āgantvā. Tam vibhūtinti tam iddhipāṭihāriyasankhātam vibhūtim, tam acchariyanti vuttam hoti. Therimyācitvāti "ayye amhākam bhagavā mucalindanāgarājassa bhogāvalim attano gandhakuţim katvā sattāham tassa sangaham akāsi. Abhisambujihanadivase neranjarānadītīre attano ucchitthapattam mahākālanāgassa vissajjesi. Uruvelanāgena māpitam visadhūmadahanam aganetvā tassa saranasīlābharanamadāsi. Mahāmoggallānattheram pesetvā nandopanandanāgarājānam dametvā nibbisam akāsi. Evam so lokanāyako amhākam upakārako, tvampi no dosamassaritvā muhuttam mahābodhim vissajjetvā nāgalokassa saggamokkhamaggam sampādehī"ti evam yācitvā.

Mahābodhiviyogadukkhitoti mahābodhiviyogena dukkhito sañjātamānasikadukkho. **Kanditvā**ti imassa pariyāyavacanamattam **roditvā**ti, gunakittanavasena vā punappunam roditvā, vilāpam katvāti attho.

Uttaradvāratoti anurādhapurassa uttaradvārato. Maggam sodhāpetvāti khāņukantakādīnam uddharāpanavasena maggam sodhāpetvā.

Alaṅkārāpetvāti vālukādīnam otirāpanādivasena sajjetvā.

Samuddasālavatthusminti samuddāsannasālāya vatthubhūte padese. Tasmim kira padese thitehi samuddassa diṭṭhattā tam acchariyam pakāsetum tattha ekā sālā katā. Sā nāmena "samuddāsannasālā"ti pākaṭā jātā. Vuttañhetam—

"Samuddāsannasālāya, thāne thatvā mahannave.

Āgacchantam mahābodhim, mahātheriddhiyāddasa.

Tasmim thane kata sala, pakasetum tamabbhutam.

'Samuddāsannasālā'ti, nāmenāsidha pākaṭā"ti.

Tāya vibhūtiyāti tāya vuttappakārāya pūjāsakkārādisampattiyā. Therassāti mahāmahindattherassa. Maggassa kira ubhosu passesu antarantarā pupphehi kūtāgārasadisasanthānāni pupphacetiyāni kārāpesi. Tam sandhāyetam vuttam "antarantare puppha-agghiyāni thapento"ti. Āgato vatareti ettha areti pasamsāyam, sādhu vatāti attho. Solasahi jātisampannakulehīti atthahi amaccakulehi atthahi ca brāhmanakulehīti evam solasahi jātisampannakulehi. Samuddatīre mahābodhim thapetvāti samuddavelātale alankatappatiyatte ramaņīye maņdape mahābodhim thapetvā. Evam pana katvā sakalatambapannirajjena mahābodhim pūjetvā soļasannam kulānam rajjam niyyātetvā sayam dovārikatthāne thatvā tayo divase anekappakāram pūjam kārāpesi. Tam dassento "tīni divasānī"tiādimāha. Rajjam vicāresīti rajjam vicāretum vissajjesi, solasahi vā jātisampannakulehi rajjam vicārāpesīti attho. Catutthe divaseti migasiramāsassa sukkapakkhadasamiyam. Anupubbena anurādhapuram sampattoti dasamiyam alankatappatiyattarathe mahābodhim thapetvā uļārapūjam kurumāno pācīnapassavihārassa patithātabbatthānamānetvā tattha samghassa pātarāsam pavattetvā mahindattherena bhāsitam nāgadīpe dasabalena katam nāgadamanam sutvā "sammāsambuddhena nisajjādinā paribhuttaṭṭhānesu thūpādīhi sakkāram karissāmī"ti saññāṇam kāretvā tato āharitvā tavakkabrāhmanassa gāmadvāre thapetvā pūjetvā evam tasmim tasmim thane pujam katva imina anukkamena

anurādhapuram sampatto. **Cātuddasīdivase**ti migasiramāsasseva sukkapakkhacātuddase. **Vaḍḍhamānakacchāyāyā**ti chāyāya vaḍḍhamānasamaye, sāyanhasamayeti vuttam hoti. **Samāpattin**ti phalasamāpattim. **Tilakabhūte**ti alankārabhūte.

Rājavatthudvārakoṭṭhakaṭṭhāneti rājuyyānassa dvārakoṭṭhakaṭṭhāne. "Sakalarajjaṁ mahābodhissa dinnapubbattā upacāratthaṁ rājā dovārikavesaṁ ganhī'ti vadanti.

Anupubbavipassananti udayabbayadi-anupubbavipassanam. Patthapetvāti ārabhitvā. Atthangamiteti atthangate. "Saha bodhipatitthānenā"ti vattabbe vibhattiviparināmam katvā "saha bodhipatitthānā"ti nissakkavacanam katam. Sati hi sahayoge karanavacanena bhavitabbam. Mahāpathavī akampīti ca idam mukhamattanidassanam, aññānipi anekāni acchariyāni ahesumyeva. Tathā hi saha bodhipatitthānena udakapariyantam katvā mahāpathavī akampi, tāni mūlāni katāhamukhavattito uggantvā tam katāham vinandhantā pathavītalamotarimsu, samantato dibbakusumāni vassimsu, ākāse dibbatūriyāni vajjimsu, mahāmegho utthahitvā vutthidhāramakāsi¹, ākāsapadesā viravimsu, vijiulatā niccharimsu. Devatā sādhukāramadamsu, samāgatā sakaladīpavāsino gandhamālādīhi pūjayimsu, gahitamakarandā mandamārutā vāyimsu, samantato ghanasītalahimavalāhakā mahābodhim chādayimsu. Evam bodhi pathaviyam patitthahitvā himagabbhe sannisīditvā sattāham lokassa adassanam agamāsi. Himagabbhe sannisīdīti himagabbhassa anto atthāsi. Vipphurantāti vipphurantā ito cito ca samsarantā. Niccharimsūti nikkhamimsu. Dassimsūti² paññāyimsu. Sabbe dīpavāsinoti sabbe tambapannidīpavāsino. Uttarasākhato ekam phalanti uttarasākhāya thitam ekam phalam. "Pācīnasākhāya ekam phalan"tipi keci. **Mahā-āsanatthāne**ti³ pubbapasse mahāsilāsanena patitthitatthāne. **Issaranimmānavihāre**ti issaranimmānasankhāte kassapagirivihāre. "Issaranimmānavihāre"ti hi pubbasanketavasena vuttam, idāni pana so vihāro "kassapagirī"ti paññāto. "Issarasamanārāme"tipi keci pathanti. Tathā ca vuttam-

^{1.} Vutthipātamakamsu (Sī), vutthipātamakāsi (Syā)

^{3.} Mahābodhi-āsannaṭṭhāneti (Syā, Ka)

^{2.} Passimsūti (Ka)

"Tavakkabrāhmaṇagāme, thūpārāme tatheva ca. Issarasamaṇārāme, paṭhame cetiyaṅgaṇe"ti.

Yojaniya-ārāmesūti anurādhapurassa samantā yojanassa anto kataārāmesu. Samantā patitthite mahābodhimhīti sambandho. Anurādhapurassa samantā evam puttanattuparamparāya mahābodhimhi patitthiteti attho. Lohapāsādatthānam pūjesīti lohapāsādassa kattabbatthānam pūjesi. "Kiñcāpi lohapāsādam devānampiyatissoyeva mahārājā kāressati, tathāpi tasmim samaye abhāvato 'anāgate'ti vuttan"ti tīsupi ganthipadesu vuttam. Keci pana "dutthagāmani-abhayeneva kārito lohapāsādo"ti vadanti. **Mūlāni panassa na** tāva otarantīti iminā mahārāja imasmim dīpe satthusāsanam patitthitamattameva ahosi, na tāva supatitthitanti dasseti, assa satthusāsanassa mūlāni pana na tāva otinnānīti evamettha attho veditabbo. Otarantīti hi atītatthe vattamānavacanam. Tenevāha "kadā pana bhante mūlāni otinnāni nāma bhavissantī"ti. Yo amacco catupannāsāya jetthakakanitthabhātukehi saddhim cetiyagirimhi pabbajito, tam sandhāya vuttam "mahā-arittho bhikkhū"ti. Meghavannābhayassa amaccassa parivenatthāneti meghavannābhayassa rañño amaccena kattabbassa parivenassa vatthubhūte thāne. Mandapappakāranti mandapasadisam. Sadisatthampi hi pakārasaddam vannayanti. Sāsanassa mūlāni otarantāni passissāmīti iminā sāsanassa sutthu patitthānākāram passissāmīti dīpeti.

Meghavirahitassa nimmalasseva ākāsassa viravitattā "ākāsaṁ mahāviravaṁ ravī"ti vuttaṁ. Paccekagaṇīhīti visuṁ visuṁ gaṇācariyehi. Paccekaṁ gaṇaṁ etesaṁ atthīti paccekagaṇino. Yathā vejjo gilānesu karuṇāya tikicchanameva purakkhatvā vigatacchandadoso jigucchanīyesu vaṇesu guyhaṭṭhānesu ca bhesajjalepanādinā tikicchanameva karoti, evaṁ bhagavāpi kilesabyādhipīļitesu sattesu karuṇāya te satte kilesabyādhidukkhato mocetukāmo avattabbārahāni guyhaṭṭhānanissitānipi asappāyāni¹ vadanto vinayapaññattiyā sattānaṁ

kilesabyādhim tikicchati. Tena vuttam "satthu karuṇāguṇaparidīpakan"ti. Anusiṭṭhikarānanti anusāsanīkarānam, ye bhagavato anusāsanim sammā paṭipajjanti, tesanti attho. Kāyakammavacīkammavipphanditavinayananti kāyavacīdvāresu ajjhācāravasena pavattassa kilesavipphanditassa vinayanakaram.

Rājinoti upayogatthe sāmivacanam, rājānamanusāsimsūti attho. Ālokanti ñāṇālokam. Nibbāyimsu¹ mahesayoti ettha mahāmahindatthero dvādasavassiko hutvā tambapaṇṇidīpam sampatto, tattha dve vassāni vasitvā vinayam patiṭṭhapesi. Dvāsaṭṭhivassiko hutvā parinibbutoti vadanti.

Tesam therānam antevāsikāti tesam mahāmahindattherappamukhānam therānam antevāsikā. Tassadattādayo pana mahā-ariṭṭhattherassa antevāsikā, tasmā tissadattakāļasumanadīghasumanādayo mahā-ariṭṭhattherassa antevāsikā cāti yojetabbam. Antevāsikānam antevāsikāti ubhayathā vutta-antevāsikānam antevāsikā. Pubbe vuttappakārāti—

"Tato mahindo ittiyo, ñattiyo sambalo tathā.

Bhaddanāmo ca paṇḍito.

Ete nāgā mahāpaññā, jambudīpā idhāgatā.

Vinayam te vācayimsu, piṭakam tambapaṇṇiyā.

Nikāye pañca vācesum, satta ceva pakaraņe

Tato arittho medhāvī, vissadatto ca paṇḍito.

Visārado kāļasumano, thero ca dīghanāmako"ti—evamādinā pubbe vuttappakārā ācariyaparamparā.

Ācariyaparamparakathāvaṇṇanā niṭṭhitā.

Vinayānisamsakathāvannanā

Ettāvatā ca "kenābhatan"ti imam pañham vitthārato vibhajitvā idāni "kattha patiṭṭḥitan"ti imam pañham vissajjento āha "kattha patiṭṭḥitan"ti-ādi. Tattha telamivāti sīhatelamiva. Adhimattasatigatidhītimantesūti ettha satīti buddhavacanam uggahetvā dhāraṇakasati. Gatīti uggaṇhanakagati. Dhītīti sanniṭṭhānam katvā gaṇhanakañāṇam. Gatīti vā paññāgati. Dhītīti buddhavacanam uggaṇhanavīriyam sajjhāyanavīriyam dhāraṇavīriyañca. Lajjīsūti pāpajigucchanakalakkhaṇāya lajjāya samannāgatesu. Kukkuccakesūti aṇumattesupi vajjesu dosadassāvitāya kappiyākappiyam nissāya kukkuccakārīsu. Sikkhākāmesūti adhisīla-adhicitta-adhipaññāvasena tisso sikkhā kāmayamānesu sampiyāyitvā sikkhantesu.

Akattabbato nivāretvā kattabbesu patiṭṭhāpanato mātāpituṭṭhāniyoti vuttam. Ācāragocarakusalatāti veļudānādimicchājīvassa kāyapāgabbhiyādīnañca akaraṇena sabbaso anācāram vajjetvā "kāyiko avītikkamo vācasiko avītikkamo"ti¹ evam vuttabhikkhusāruppaācārasampattiyā vesiyādi-agocaram vajjetvā piṇḍapātādi-attham upasaṅkamitum yuttaṭṭhānasaṅkhātagocarena ca sampannattā samaṇācāresu ceva samaṇagocaresu ca kusalatā. Apica² yo bhikkhu satthari sagāravo sappatisso sabrahmacārīsu sagāravo sappatisso hirottappasampanno sunivattho supāruto pāsādikena abhikkantena paṭikkantena ālokitena vilokitena samiñjitena pasāritena okkhittacakkhu iriyāpathasampanno indriyesu guttadvāro bhojane mattaññū jāgariyamanuyutto satisampajaññena samannāgato appiccho santuṭṭho āraddhavīriyo pavivitto asamsaṭṭho ābhisamācārikesu sakkaccakārī garucittīkārabahulo viharati, ayam vuccati ācāro.

Gocaro³ pana upanissayagocaro ārakkhagocaro upanibandhagocaroti tividho. Tattha dasakathāvatthuguṇasamannāgato kalyāṇamitto, yaṁ nissāya assutaṁ suṇāti, sutaṁ pariyodāpeti, kaṅkhaṁ

^{1.} Abhi 2. 255 pitthe.

^{2.} Mahāniddesa-Ttha 295 pitthepi passitabbam.

^{3.} Mahāniddesa-Ṭṭha 296 piṭṭhepi passitabbam.

vitarati, diṭṭhiṁ ujuṁ karoti, cittaṁ pasādeti, yassa vā pana anusikkhamāno saddhāya vaḍḍhati, sīlena, sutena, cāgena, paññāya vaḍḍhati, ayaṁ upanissayagocaro. Yo pana bhikkhu antaragharaṁ paviṭṭho vīthipaṭipanno okkhittacakkhu yugamattadassāvī saṁvuto gacchati, na hatthiṁ olokento, na assaṁ, na rathaṁ, na pattiṁ, na itthiṁ, na purisaṁ olokento, na uddhaṁ olokento, na adho olokento, na disāvidisampi pekkhamāno gacchati, ayaṁ ārakkhagocaro. Upanibandhagocaro pana cattāro satipaṭṭhānā, yattha bhikkhu attano cittaṁ upanibandhati. Vuttañhetaṁ bhagavatā "ko ca bhikkhave bhikkhuno gocaro sako pettiko visayo, yadidaṁ cattāro satipaṭṭhānā"ti¹. Ayaṁ upanibandhagocaro. Iti iminā ca ācārena iminā ca gocarena samannāgatattā ācāragocarakusalatā. Evaṁ anācāraṁ agocarañca vajjetvā saddhāpabbajitānaṁ yathāvutta-ācāragocaresu kusalabhāvo vinayadharāyattoti ayamānisaṁso vinayapariyattiyā dassitoti veditabbo.

Vinayapariyattim nissāyāti vinayapariyāpuṇanam nissāya. Attano sīlakkhandho sugutto hoti surakkhitoti kathamassa attano sīlakkhandho sugutto hoti surakkhito? Āpattinhi āpajjanto chahākārehi āpajjati alajjitā, annāṇatā, kukkuccapakatatā, akappiye kappiyasannitā, kappiye akappiyasannitā, satisammosāti. Vinayadharo pana imehi chahākārehi āpattim nāpajjati.

Katham alajjitāya nāpajjati? So hi "passatha bho, ayam kappiyākappiyam jānantoyeva paṇṇattivītikkamam karotī"ti imam parūpavādam rakkhantopi akappiyabhāvam jānantoyeva madditvā vītikkamam na karoti. Evam alajjitāya nāpajjati. Sahasā āpannampi desanāgāminim desetvā vuṭṭhānagāminiyā vuṭṭhahitvā suddhante patiṭṭhāti, tato—

"Sañcicca āpattim nāpajjati, āpattim na parigūhati.

Agatigamanañca na gacchati, edisā vuccati lajjipuggalo"ti²—

Imasmim lajjibhāve patithitova hoti.

Katham **aññāṇatāya** nāpajjati? So hi kappiyākappiyam jānāti, tasmā kappiyamyeva karoti, akappiyam na karoti. Evam aññāṇatāya nāpajjati.

Katham kukkuccapakatatāya nāpajjati? Kappiyākappiyam nissāya kukkucce uppanne vatthum oloketvā mātikam padabhājanam antarāpattim anāpattim oloketvā kappiyam ce hoti, karoti, akappiyam ce, na karoti. Uppannam pana kukkuccam avinicchinitvāva "vaṭṭatī"ti madditvā na vītikkamati. Evam kukkuccapakatatāya nāpajjati.

Katham **akappiye kappiyasaññitā**dīhi nāpajjati? So hi kappiyākappiyam jānāti, tasmā akappiye kappiyasaññī na hoti, kappiye akappiyasaññī na hoti, supatiṭṭhitā cassa sati hoti, adhiṭṭhātabbam adhiṭṭheti, vikappetabbam vikappeti. Iti imehi chahākārehi āpattim nāpajjati, āpattim anāpajjanto akhaṇḍasīlo hoti parisuddhasīlo. Evamassa attano sīlakkhandho sugutto hoti surakkhito.

Kukkuccapakatānanti kappiyākappiyam nissāya uppannena kukkuccena abhibhūtānam. Katham pana kukkuccapakatānam paṭisaraṇam hoti? Tiroraṭṭhena tirojanapadesu ca uppannakukkuccā bhikkhū "asukasmim kira vihāre vinayadharo vasatī"ti dūratopi tassa santikam āgantvā kukkuccam pucchanti. So tehi katakammassa vatthum oloketvā āpattānāpattim garukalahukādibhedam sallakkhetvā desanāgāminim desāpetvā vuṭṭhānagāminiyā vuṭṭhāpetvā suddhante patiṭṭhāpeti. Evam kukkuccapakatānam paṭisaraṇam hoti.

Visārado samghamajjhe voharatīti vigato sārado bhayam etassāti¹ visārado, abhītoti attho. Avinayadharassa hi samghamajjhe kathentassa bhayam sārajjam okkamati, vinayadharassa tam na hoti. Kasmā? "Evam kathentassa doso hoti, evam na doso"ti ñatvā kathanato.

Paccatthike sahadhammena suniggahitam nigganhātīti ettha dvidhā paccatthikā nāma attapaccatthikā ca sāsanapaccatthikā ca. Tattha mettiyabhummajakā ca bhikkhū vaḍḍho ca licchavī amūlakena antimavatthunā codesum, ime attapaccatthikā nāma. Ye vā panaññepi dussīlā pāpadhammā, sabbe te attapaccatthikā. Viparītadassanā pana ariṭṭhabhikkhukanṭakasāmaneravesālikavajjiputtakā mahāsamghikādayo ca abuddhasāsanam "buddhasāsanan"ti vatvā katapaggahā sāsanapaccatthikā nāma. Te sabbepi sahadhammena sahakāranena vacanena yathā tam asaddhammam patiṭṭhāpetum na sakkonti, evam suniggahitam katvā nigganhāti.

Saddhammatthitiyā patipanno hotīti ettha pana tividho saddhammo pariyattipatipatti-adhigamavasena. Tattha tipitakam buddhavacanam pariyattisaddhammo nāma. Terasa dhutanganā cuddasa khandhakavattāni dve-asīti mahāvattānīti ayam patipattisaddhammo nāma. Cattāro maggā ca cattāri phalāni ca, ayam adhigamasaddhammo nāma. Tattha keci therā "yo vo ānanda mayā dhammo ca vinayo ca desito paññatto, so vo mamaccayena satthā"ti iminā suttena¹ "sāsanassa pariyatti mūlan"ti vadanti. Keci therā "ime ca subhadda bhikkhū sammā vihareyyum, asuñño loko arahantehi assā"ti iminā suttena² "sāsanassa patipatti mūlan"ti vatvā "yāva pañca bhikkhū sammā patipannā samvijjanti, tāva sāsanam thitam hotī"ti āhamsu. Itare pana therā "pariyattiyā antarahitāya suppatipannassapi dhammābhisamayo natthī"ti vatvā āhamsu. Sacepi pañca bhikkhū cattāri pārājikāni rakkhanakā honti, te saddhe kulaputte pabbājetvā paccantime janapade upasampādetvā dasavaggaganam pūretvā majjhimajanapadepi upasampadam karissanti. Etenupayena visativaggasamgham puretva attanopi abbhānakammam katvā sāsanam vuddhim virulhim gamayissanti. Evamayam vinayadharo tividhassapi saddhammassa ciratthitiyā patipanno hotīti. Evamayam vinayadharo ime pañcānisamse patilabhatīti veditabbo.

Vinayo samvaratthāyāti-ādīsu³ vinayoti vinayassa pariyāpuṇanam, vinayoti vā vinayapaññatti vuttā, tasmā sakalāpi vinayapaññatti

vinayapariyāpuṇanam vā kāyavacīdvārasamvaratthāyāti attho, ājīvapārisuddhipariyosānassa sīlassa upanissayapaccayo hotīti vuttam hoti. Avippaṭisāroti pāpapuññānam katākatānusocanavasena pavattacittavippaṭisārābhāvo. Pāmojjanti dubbalā taruṇapīti. Pītīti balavapīti. Passaddhīti kāyacittadarathapaṭippassaddhi. Sukhanti kāyikam cetasikañca sukham. Tañhi duvidhampi samādhissa upanissayapaccayo hoti. Samādhīti cittekaggatā. Yathābhūtañāṇadassananti sappaccayanāmarūpapariggaho. Nibbidāti vipassanā. Atha vā yathābhūtañāṇadassanam taruṇavipassanā, udayabbayañāṇassetam adhivacanam. Cittekaggatā hi taruṇavipassanāya upanissayapaccayo hoti. Nibbidāti sikhāppattā vuṭṭhānagāminibalavavipassanā. Virāgoti ariyamaggo. Vimuttīti arahattaphalam. Catubbidhopi hi ariyamaggo arahattassa upanissayapaccayo hoti. Vimuttiñāṇadassananti paccavekkhaṇañāṇam.
Anupādāparinibbānatthāyāti kañci dhammam aggahetvā anavasesetvā parinibbānatthāya, appaccayaparinibbānatthāyāti attho.

Appaccayaparinibbānassa hi vimuttiñāṇadassanaṁ paccayo hoti tasmiṁ anuppatte avassaṁ parinibbāyitabbato, na ca paccavekkhanañāne anuppanne

antarā parinibbānam hoti.

Etadatthā kathāti ayam vinayakathā nāma etadatthāya, anupādāparinibbānatthāyāti attho. Evam sabbatthapi. Mantanāpi vinayamantanā-eva, "evam karissāma, na karissāmā"ti vinayapaṭibaddhasamsandanā. Etadatthā upanisāti upanisīdati ettha phalam tappaṭibaddhavuttitāyāti upanisā vuccati kāraṇam paccayoti. "Vinayo samvaratthāyā"ti-ādikā kāraṇaparamparā etadatthāti attho. Etadattham sotāvadhānanti imissā paramparapaccayakathāya sotāvadhānam imam katham sutvā yam uppajjati ñāṇam, tampi etadattham. Yadidam anupādācittassa vimokkhoti yadidanti nipāto. Sabbalingavibhattivacanesu tādisova tattha tattha atthato pariṇāmetabbo, tasmā evamettha attho veditabbo—yo ayam catūhi upādānehi anupādiyitvā cittassa arahattaphalasankhāto vimokkho, sopi etadatthāya anupādāparinibbānatthāyāti evamettha sambandho veditabbo. Yo ayam anupādācittassa vimokkhasankhāto maggo, heṭṭhā vuttam sabbampi etadatthamevāti. Evañca sati iminā mahussāhato

sādhitabbam niyatappayojanam dassitam hoti. Heṭṭhā "virāgo -panibbānatthāyā"ti iminā pana labbhamānānisamsaphalam dassitanti veditabbam. Āyogoti uggahaṇacintanādivasena punappunam abhiyogo.

Vinayānisamsakathāvannanā nitthitā.

Iti samantapāsādikāya vinayaṭṭhakathāya sāratthadīpaniyam

Bāhiranidānavannanā samattā.

Verañjakandavannanā

1. **Seyyathidan**ti tam katamam, tam kathanti vā attho.

Aniyamaniddesavacananti natthi etassa niyamoti aniyamo, niddisīyati attho etenāti niddeso, vuccati etenāti vacanam, niddesoyeva vacanam niddesavacanam, aniyamassa niddesavacanam aniyamaniddesavacanam, paṭhamam aniyamitassa samayassa niddesavacanamti attho. "Yenāti avatvā tenāti vuttattā aniyamam katvā niddiṭṭhavacanam aniyamaniddesavacanan"tipi vadanti. Yamtamsaddānam niccasambandhabhāvato āha "tassa sarūpena avuttenapī"ti-ādi. Tattha tassāti "tenā"ti etassa. Sarūpena avuttenapīti "yenā"ti evam sarūpato pāṭiyam avuttenapi. Atthato siddhenāti parabhāge sāriputtattherassa uppajjanakaparivitakkasankhāta-atthato siddhena. Parivitakke hi siddhe yena samayena parivitakko udapādīti idam atthato siddhameva hoti. Tenevāha "aparabhāge hi vinayapaññattiyācanahetubhūto āyasmato sāriputtassa parivitakko siddho"ti-ādi. "Tenā"ti vatvā tato tadatthameva "yenā"ti atthato vuccamānattā "yenā"ti ayam "tenā"ti etassa paṭiniddeso nāma jāto. Paṭiniddesoti ca vitthāraniddesoti attho.

Aparabhāge hīti ettha hi-saddo hetumhi, yasmāti attho.

Vinayapaññattiyācanahetubhūtoti "etassa bhagavā kālo, etassa sugata kālo, yam bhagavā sāvakānam sikkhāpadam paññapeyya, uddiseyya pātimokkham. Yathayidam brahmacariyam addhaniyam assa ciraṭṭhitikan"ti evam pavattassa vinayapaññattiyācanassa kāraṇabhūtoti attho. Parivitakkoti "katamesānam kho buddhānam bhagavantānam brahmacariyam na ciraṭṭhitikam ahosi, katamesānam buddhānam bhagavantānam brahmacariyam ciraṭṭhitikam ahosī"ti evam pavatto parivitakko.

Yamtamsaddānam niccasambandhoti āha "tasmā yena samayenā"ti-ādi.

Pubbe vā pacchā vā atthato siddhenāti pubbe vā pacchā vā uppanna-atthato siddhena. Paṭiniddeso kattabboti etassa "yadidam"ti iminā sambandho. "Paṭiniddeso kattabbo'ti yadidam yam idam vidhānam, ayam sabbasmim vinaye yuttīti attho. Atha vā "paṭiniddeso kattabbo'ti yadidam yā ayam yutti, ayam sabbasmim vinaye yuttīti attho.

Tatridam mukhamattanidassananti tassā yathāvuttayuttiyā paridīpane idam mukhamattanidassanam, upāyamattanidassananti attho. Mukham dvāram upāyoti hi atthato ekam. "Tena hi bhikkhave bhikkhūnam sikkhāpadam paññapessāmī"ti pāļim dassetvā tattha paṭiniddesamāya "yena sudinno"ti-ādinā. Tenāti hetu-atthe karaṇavacanattā tassa paṭiniddesopi tādisoyevāti āha "yasmā paṭisevī"ti. Pubbe atthato siddhenāti pubbe uppannamethunadhammapaṭisevanasaṅkhāta-atthato siddhena. Pacchā atthato siddhenāti raññā adinnam dārūnam ādiyanasaṅkhātapacchā-uppanna-atthato siddhena. Samayasaddoti etassa "dissatī"ti iminā sambandho.

Samavāyeti paccayasāmaggiyam, kāraṇasamavāyeti attho. Khaṇeti okāse. Assāti assa samayasaddassa samavāyo atthoti sambandho. Appeva nāma svepi upasaṅkameyyāma kālañca samayañca upādāyāti ettha kālo nāma upasaṅkamanassa yuttapayuttakālo. Samayo nāma tasseva paccayasāmaggī, atthato tadanurūpam sarīrabalañceva tappaccayaparissayābhāvo ca. Upādānam nāma ñāṇena tesam gahaṇam sallakkhaṇam, tasmā kālañca samayañca paññāya gahetvā upadhāretvāti attho. Idam vuttam hoti—sace amhākam sve gamanassa yuttakālo bhavissati, kāye balamattā ceva pharissati, gamanapaccayā ca añño aphāsuvihāro na bhavissati, athetam kālañca gamanakāraṇasamavāyasaṅkhātam samayañca upadhāretvā api eva nāma sve āgaccheyyāmāti.

Khaṇoti okāso. Tathāgatuppādādiko hi maggabrahmacariyassa okāso tappaccayapaṭilābhahetuttā, khaṇo eva ca samayo. Yo khaṇoti ca samayoti ca vuccati, so ekovāti hi attho. Mahāsamayoti mahāsamūho. Pavuddhaṁ vanaṁ pavanaṁ, tasmiṁ pavanasmiṁ, vanasaṇḍeti attho. Samayopi kho te bhaddāli appaṭividdho ahosīti ettha samayoti sikkhāpadapūraṇassa hetu. Bhaddālīti tassa bhikkhuno nāmaṁ. Idaṁ vuttaṁ hoti—bhaddāli tayā paṭivijjhitabbayuttakaṁ etaṁ kāraṇaṁ atthi, tampi te na paṭividdhaṁ na sallakkhitanti. Kiṁ taṁ kāraṇanti āha "bhagavā kho"ti-ādi.

Uggāhamānoti-ādīsu mānoti tassa paribbājakassa pakatināmam, kiñci kiñci pana uggahetum samatthatāya "uggāhamāno"ti nam sanjānanti, tasmā "uggāhamāno"ti vuccati. Samanamundikāya putto samanamundikāputto¹. So kira devadattassa upatthāko. Samayam ditthim pavadanti etthāti samayappavādako, tasmim samayappavādake, ditthippavādaketi attho. Tasmim kira thāne cankibhārukkhapokkharasātipabhutayo brāhmanā niganthācelakaparibbājakādayo ca paribbājakā sannipatitvā attano attano samayam ditthim pavadanti kathenti dipenti, tasma so aramo "samayappavādako"ti vuccati, sveva tindukācīrasankhātāya timbarurukkhapantiyā parikkhittattā "tindukācīran"ti vuccati. Ekā sālā etthāti ekasālako. Yasmā panettha pathamam ekā sālā katā ahosi, pacchā mahāpuññam potthapādaparibbājakam nissāya bahū sālā katā, tasmā tameva ekam sālamupādāya laddhanāmavasena "ekasālako"ti vuccati. Mallikāya pana pasenadirañño deviyā uyyānabhūto so pupphaphalasañchanno ārāmoti katvā "mallikāya ārāmo" ti sankhyam gato. Tasmim samayappavādake tindukācīre ekasālake mallikāva ārāme. **Pativasatī**ti tasmim vāsaphāsutāva vasati.

Diţţhe dhammeti paccakkhe attabhāve. Atthoti vuḍḍhi. Samparāyikoti kammakilesavasena samparetabbato sampāpuṇitabbato samparāyo, paraloko. Tattha niyutto samparāyiko, paralokattho. Atthābhisamayāti yathāvutta-ubhayatthasaṅkhātahitapaṭilābhā. Samparāyikopi hi attho kāraṇassa nipphannattā paṭiladdho nāma hotīti tamaddhadvayaṁ ekato katvā "atthābhisamayā"ti vuttaṁ. Dhiyā paññāya rāti gaṇhātīti dhīro. Atha vā dhī paññā etassa atthīti dhīro.

Sammā mānābhisamayāti mānassa sammā pahānena. Sammāti iminā mānassa aggamaggañāņena samucchedappahānam vuttam. Dukkhassa pīļanaṭṭhoti-ādīsu dukkhasaccassa pīļanam tamsamaṅgino himsanam avipphārikatākaraṇam, pīļanameva attho pīļanaṭṭho, tthakārassa ṭṭhakāram katvā vuttam. Evam sesesupi. Samecca paccayehi katabhāvo saṅkhataṭṭho. Santāpo dukkhadukkhatādivasena santāpanam paridahanam. Vipariṇāmo jarāya

maraņena cāti dvidhā vipariņāmetabbatā. Abhisametabbo paṭivijjhitabboti abhisamayo, abhisamayova attho **abhisamayaṭṭho**, pīļanādīni. Tāni hi abhisametabbabhāvena ekībhāvaṁ upanetvā "abhisamayaṭṭho"ti vuttāni, abhisamayassa vā paṭivedhassa visayabhūto attho abhisamayaṭṭhoti tāneva pīļanādīni abhisamayassa visayabhāvūpagamanasāmaññato ekattena vuttāni.

Ettha ca upasaggānam jotakamattattā tassa tassa atthassa vācako samayasaddo evāti samayasaddassa atthuddhārepi sa-upasaggo abhisamayasaddo vutto. Tattha sahakārīkāranasannijjham sameti samavetīti samayo, samavāyo. Sameti samāgacchati maggabrahmacariyam ettha tadādhārapuggalehīti samayo, khano. Samenti ettha, etena vā samgacchanti dhammā sahajātadhammehi uppādādīhi vāti samayo, kālo. Dhammappavattimattatāva atthato abhūtopi hi kālo dhammappavattivā adhikaranam kāranam viya ca parikappanāmattasiddhena rūpena voharīyati. Samam, saha vā avayavānam ayanam pavatti avatthānanti samayo, samūho yathā "samudāyo"ti. Avayavena sahāvatthānameva hi samūho. Paccayantarasamāgame eti phalam etasmā uppajjati pavattati cāti samayo, hetu yathā 'samudayo"ti. Sameti samyojanabhāvato sambandho eti attano visaye pavattati, daļhaggahaņabhāvato vā tamsamyuttā ayanti pavattanti sattā yathābhinivesam etenāti samayo, ditthi. Ditthisamyojanena hi sattā ativiya bajjhanti. Samiti sangati samodhānanti samayo, patilābho. Samassa nirodhassa yānam, sammā vā yānam apagamo appavattīti samayo, pahānam. Nānena abhimukham sammā etabbo adhigantabboti abhisamayo, dhammānam aviparīto sabhāvo. Abhimukhabhāvena sammā eti gacchati bujjhatīti abhisamayo, dhammānam yathābhūtasabhāvāvabodho. Evam tasmim tasmim atthe samayasaddassa pavatti veditabbā.

Nanu ca atthamattam paṭicca saddā abhinivisanti, na ekena saddena aneke atthā abhidhīyantīti? Saccametam saddavisese apekkhite. Saddavisese hi apekkhiyamāne ekena saddena anekatthābhidhānam na sambhavati. Na hi yo kālattho samayasaddo, soyeva samūhādi-attham vadati. Ettha pana tesam tesam atthānam samayasaddavacanīyatāsāmaññamupādāya

anekatthatā samayasaddassa vuttā. Evam sabbattha atthuddhāre adhippāyo veditabbo. **Idha panassa kālo attho**ti assa samayasaddassa idha kālo attho samavāyādīnam atthānam idha asambhavato desadesakādīnam viya nidānabhāvena kālassa apadisitabbato ca.

Upayogavacanena bhummavacanena ca niddesamakatvā idha karanavacanena niddese payojanam niddhāretukāmo parammukhena codanam samutthāpeti "etthāhā"ti-ādi. Ettha "tena samayenā"ti imasmim thāne vitandavādī āhāti attho. **Athā**ti codanāya kattukāmatam dīpeti, nanūti iminā samānattho. Kasmā karaņavacanena niddeso katoti sambandho. Bhummavacanena niddeso katoti payojetabbam. Etthāpi "yathā"ti idam ānetvā sambandhitabbam. Tatthāti tesu suttābhidhammesu. Tathāti upayogabhummavacanehi. Idhāti imasmim vinaye. Aññathāti karanavacanena. Accantamevāti ārambhato patthāya yāva desanānitthānam, tāva accantameva, nirantaramevāti attho. Karunāvihārenāti parahitapatipattisankhātena karunāvihārena. Tathā hi karunānidānattā desanāya idha parahitapatipatti "karunāvihāro"ti vuttā, na pana karunāsamāpattivihāro. Na hi desanākāle desetabbadhammavisayassa desanāñānassa sattavisayāya mahākarunāya sahuppatti sambhavati bhinnavisayattā, tasmā karunāvasena pavatto parahitapatipattisankhāto vihāro idha karunāvihāroti veditabbo. **Tadatthajotanatthan**ti accantasamyogatthadīpanattham upayoganiddeso kato yathā "māsam ajjhetī"ti.

Adhikaraṇatthoti ādhārattho. Bhāvo nāma kiriyā, kiriyāya kiriyantaralakkhaṇaṁ bhāvenabhāvalakkhaṇaṁ, soyevattho bhāvenabhāvalakkhaṇattho. Kathaṁ pana abhidhamme yathāvutta-atthadvayasambavoti āha "adhikaraṇañhī"ti-ādi. Tattha kālasaṅkhāto attho kālattho, samūhasaṅkhāto attho samūhattho. Atha vā kālasaddassa attho kālattho, samūhasaddassa attho samūhattho. Ko so? Samayo. Idaṁ vuttaṁ hoti—kālattho samūhattho ca samayo tattha abhidhamme vuttānaṁ phassādidhammānaṁ adhikaraṇaṁ ādhāroti yasmiṁ kāle dhammapuñje vā kāmāvacaraṁ kusalaṁ cittaṁ uppannaṁ hoti, tasmiṁyeva kāle puñje ca phassādayopi hontīti ayañhi tattha attho.

Nanu cāyam upādāya paññatto kālo samūho ca vohāramattako, so katham ādhāro tattha vuttadhammānanti? Nāyam doso. Yathā hi kālo sabhāvadhammaparicchinno sayam paramatthato avijjamānopi ādhārabhāvena paññatto tankhaṇappavattānam tato pubbe parato ca abhāvato "pubbaṇhe jāto sāyanhe gacchatī"ti-ādīsu, samūho ca avayavavinimutto avijjamānopi kappanāmattasiddho avayavānam ādhārabhāvena paññapīyati "rukkhe sākhā, yavarāsimhi sambhūto"ti-ādīsu, evamidhāpīti daṭṭhabbam.

Abhidhamme ādhāratthasambhavam dassetvā idāni bhāvenabhāvalakkhanatthasambhavam dassento āha "khanasamavāyahetusankhātassā" ti-ādi. Tattha khano nāma atthakkhanavinimutto navamo buddhuppādasankhāto khano, yāni vā panetāni "cattārimāni bhikkhave cakkāni yehi samannāgatānam devamanussānam catucakkam pavattatī"ti¹ ettha patirūpadesavāso, sappurisūpanissayo, attasammāpanidhi, pubbe ca katapuññatāti cattāri cakkāni vuttāni, tāni ekajjham katvā okāsatthena khanoti veditabbo. Tāni hi kusaluppattiyā okāsabhūtāni. Samavāyo nāma "cakkhuñca paticca rūpe ca uppajjati cakkhuviññāṇan"ti² evamādinā nidditthā cakkhuviññānādisankhātasādhāranaphalanipphādakattena santhitā cakkhurūpādipaccayasāmaggī. Cakkhurūpādīnañhi cakkhuviññānādisādhāranaphalam. Hetūti janakahetu. Yathāvuttakhanasankhātassa samavāyasankhātassa hetusankhātassa ca samayassa bhāvena sattāva tesam phassādidhammānam bhāvo sattā lakkhīyati viññāyatīti attho. Idam vuttam hoti—yathā "gāvīsu duyhamānāsu gato, duddhāsu āgato"ti dohanakiriyāya gamanakiriyā lakkhīyati, evamidhāpi "yasmim samaye, tasmim samaye"ti ca vutte "satī"ti ayamattho viññāyamāno eva hoti aññakiriyāya sambandhābhāve padatthassa sattāvirahābhāvatoti samayassa sattākiriyāya cittassa uppādakiriyā phassādibhavanakiriyā ca lakkhīyatīti. Ayañhi tattha attho yasmim yathāvutte khane paccayasamavāye hetumhi ca sati kāmāvacaram kusalam cittam uppannam hoti, tasmimyeva khane paccayasamavāye hetumhi ca sati phassādayopi

hontīti. **Tadatthajotanatthan**ti adhikaraṇatthassa bhāvenabhāvalakkhaṇatthassa ca dīpanatthaṁ.

Idha panāti imasmim vinaye. Hetu-attho karanattho ca sambhavatīti "annena vasati, vijjāya vasatī"ti-ādīsu viya hetu-attho "pharasunā chindati, kudālena khanatī"ti-ādīsu viya karanattho ca sambhavati. Katham sambhavatīti āha "yo hi so"ti-ādi. Tena samayena hetubhūtena karanabhūtenāti ettha pana tamtamvatthuvītikkamova sikkhāpadapaññattiyā hetu ceva karanañca. Tathā hi yadā bhagavā sikkhāpadapaññattiyā pathamameva tesam tattha tattha tamtamsikkhāpadapaññattihetubhūtam vītikkamam apekkhamāno viharati, tadā tam tam vītikkamam apekkhitvā tadattham vasatīti siddho vatthuvītikkamassa hetubhāvo "annena vasati, annam apekkhitvā tadatthāya vasatī"ti-ādīsu viya. Sikkhāpadapaññattikāle pana teneva pubbasiddhena vītikkamena sikkhāpadam paññapetīti sikkhāpadapaññattiyā sādhakatamattā karanabhāvopi vītikkamasseva siddho "asinā chindatī'ti-ādīsu viya. Vītikkamam pana apekkhamāno teneva saddhim tannissayakālampi apekkhitvā viharatīti kālassapi idha hetubhāvo vutto, sikkhāpadam paññapento ca tam tam vītikkamakālam anatikkamitvā teneva kālena sikkhāpadam paññapetīti vītikkamanissayassa kālassapi karanabhāvo vutto, tasmā iminā pariyāyena kālassapi hetubhāvo karanabhāvo ca labbhatīti vuttam "tena samayena hetubhūtena karanabhūtenā"ti. Nippariyāyato pana vītikkamoyeva hetubhūto karanabhūto ca. So hi vītikkamakkhane hetu hutvā pacchā sikkhāpadapaññāpane karanampi hotīti.

Sikkhāpadāni paññāpayantoti vītikkamam pucchitvā bhikkhusamgham sannipātāpetvā otiņņavatthukam puggalam paṭipucchitvā vigarahitvā ca tam tam vatthum otiņņakālam anatikkamitvā teneva kālena karaņabhūtena sikkhāpadāni paññāpayanto. Sikkhāpadapaññattihetuñca apekkhamānoti tatiyapārājikādīsu viya sikkhāpadapaññattiyā hetubhūtam tam tam vatthum vītikkamasamayam apekkhamāno tena samayena hetubhūtena bhagavā tattha tattha vihāsīti attho. "Sikkhāpadāni paññāpayanto

sikkhāpadapaññattihetuñca apekkhamāno"ti vacanato "tena samayena karanabhūtena hetubhūtenā"ti evam vattabbepi pathamam "hetubhūtenā"ti vacanam idha hetu-atthassa adhippetatta vuttam. Bhagava hi veranjayam viharanto therassa sikkhāpadapaññattiyācanahetubhūtam parivitakkasamayam apekkhamāno tena samayena hetubhūtena vihāsīti tīsupi ganthipadesu vuttam. Kim panettha yutticintāya, ācariyassa idha kamavacanicchā natthīti evametam gahetabbam. Teneva dīghanikāvatthakathāvampi¹ "tena samayena hetubhūtena karanabhūtenā"tiādinā ayameva anukkamo vutto. Na hi tattha pathamam "hetubhūtenā"ti vacanam idha "tena samayena veranjayam viharati"ti ettha hetu-atthassa adhippetabhāvadīpanattham vuttam. "Sikkhāpadāni paññāpayanto hetubhūtena karanabhūtena samayena vihāsi, sikkhāpadapaññattihetuñca apekkhamāno hetubhūtena samayena vihāsīti evamettha sambandho kātabbo"tipi vadanti. **Tadatthajotanatthan**ti hetu-atthassa karanatthassa vā dīpanattham. **Idhā**ti imasmim vinaye. **Hoti cetthā**ti ettha imasmim padese yathāvuttatthasangahavasena ayam gāthā hoti. Aññatrāti suttābhidhammesu.

Porāṇāti aṭṭhakathācariyā. Abhilāpamattabhedoti vacanamattena viseso. Tena suttavinayesu vibhattivipariṇāmo katoti dasseti. Parato attham vaṇṇayissāmāti parato "itipi so bhagavā"ti-ādinā āgataṭṭhāne vaṇṇayissāma. Verañjāyanti ettha "balikaraggahaṇena janassa pīļābhāvato niddosattā vigato rajo assāti verañjā, serivāṇijajātake devadattassa veruppannapadese katattā veram ettha jātanti verañjā, paviṭṭhapaviṭṭhe naṭasamajjādīhi khādanīyabhojanīyālaṅkārādīhi ca vividhehi upakaraṇehi rañjanato vividhehi rañjayatīti verañjā, paṭipakkhe abhibhavitvā katabhāvato veram abhibhavitvā jātāti verañjā, verañjassa nāma isino assamaṭṭhāne katattā verañjā"ti evamādinā keci vaṇṇayanti. Kim iminā, nāmamattametam tassa nagarassāti dassento āha "verañjāti aññatarassa nagarassetam adhivacanan"ti. Samīpatthe bhummavacananti "gaṅgāyam gāvo caranti, kūpe gaggakulan"ti-ādīsu viya.

Avisesenāti "pātimokkhasamvarasamvuto viharati. Paṭhamam jhānam upasampajja viharati. Mettāsahagatena cetasā ekam disam pharitvā viharati. Sabbanimittānam amanasikārā animittam cetosamādhim samāpajjitvā viharatī"ti-ādīsu viya saddantarasannidhānasiddhena visesaparāmasanena vinā. Atha vā avisesenāti na visesena, vihārabhāvasāmaññenāti attho.

Iriyāpatha -pa- vihāresūti iriyāpathavihāro dibbavihāro brahmavihāro ariyavihāroti etesu catūsu vihāresu. Tattha iriyanam pavattanam iriyā, kāyappayogo kāyikakiriyā. Tassā pavattanupāyabhāvato iriyāya pathoti iriyāpatho, thāna nisajjādi. Na hi thānanisajjādīhi avatthāhi vinā kañci kāyikakiriyam pavattetum sakkā. Thānasamangī vā hi kāyena kinci kareyya gamanādīsu añnatarasamangī vāti. Viharanam, viharati etenāti vā vihāro, iriyāpathova vihāro iriyāpathavihāro, so ca atthato thānanisajjādiākārappavatto catusantatirūpappabandhova. Divi bhavo dibbo, tattha bahulappavattiyā brahmapārisajjādidevalokabhavoti attho. Tattha yo dibbānubhāvo tadatthāya samvattatīti vā dibbo, abhiññābhinīhāravasena mahāgatikattā vā dibbo, dibbo ca so vihāro cāti dibbavihāro, dibbabhāvāvaho vā vihāro dibbavihāro, mahaggatajihānāni. Aruppasamāpattiyopi hi ettheva sangaham gacchanti. **Nettiyam** pana "catasso āruppasamāpattiyo āneñjavihāro" ti vuttam, tam mettajhānādīnam brahmavihāratā viya tāsam bhāvanāvisesabhāvam sandhāya vuttam. Atthakathāsu pana dibbabhāvāvahasāmaññato tāpi "dibbavihārā" tveva vuttā. Brahmānam vihārā **brahmavihārā**, brahmāno vā vihārā brahmavihārā, hitūpasamharādivasena pavattiyā brahmabhūtā setthabhūtā vihārāti attho, mettājhānādikā catasso appamaññāyo. Ariyā uttamā vihārāti ariyavihārā, anaññasādhāranattā ariyānam vā vihārā ariyavihārā, catasso phalasamāpattiyo. Visesato pana rūpāvacaracatutthajjhānam catasso appamaññāyo catutthajjhānikaphalasamāpatti ca bhagavato dibbabrahmaariyavihārā.

Aññataravihārasamaṅgīparidīpananti yathāvuttavihāresu aññataravihārasamaṅgībhāvaparidīpanam. Bhagavā hi lobhadosamohussannakāle loke tassa sakāya paṭipattiyā vinayanatthaṁ dibbabrahma-ariyavihāre upasampajja viharati. Tathā hi yadā sattā kāmesu vippaṭipajjanti, tadā kira bhagavā dibbena vihārena viharati tesaṁ alobhakusalamūluppādanatthaṁ "appeva nāma imaṁ paṭipattiṁ disvā ettha ruciṁ uppādentā kāmesu virajjeyyun"ti. Yadā pana issariyatthaṁ sattesu vippaṭipajjanti, tadā pana brahmavihārena viharati tesaṁ adosakusalamūluppādanatthaṁ "appeva nāma imaṁ paṭipattiṁ disvā ettha ruciṁ uppādetvā adosena dosaṁ vūpasameyyun"ti. Yadā pana pabbajitā dhammādhikaraṇaṁ vivadanti, tadā ariyavihārena viharati tesaṁ amohakusalamūluppādanatthaṁ "appeva nāma imaṁ paṭipattiṁ disvā tattha ruciṁ uppādetvā amohena mohaṁ vūpasameyyun"ti. Evañca katvā imehi

dibbabrahma-ariyavihārehi sattānam vividham hitasukham harati upaharati

upaneti janeti uppādetīti "viharatī"ti vuccati.

Iriyāpathavihārena pana na kadāci na viharati tam vinā attabhāvapariharaṇābhāvato, tatoyeva ca dibbavihārādīnampi sādhāraṇo iriyāpathavihāroti āha "idha panā"ti-ādi. Iriyāpathasamāyogaparidīpananti itaravihārasamāyogaparidīpanassa visesavacanassa abhāvato iriyāpathasamāyogaparidīpanassa ca atthasiddhattā vuttam. Asmim pana pakkhe viharatīti ettha vi-saddo vicchedatthajotano, haratīti neti pavattetīti attho, vicchinditvā haratīti vuttam hoti. Tattha kassa kena vicchindanam, katham kassa pavattananti antolīnacodanam sandhāyāha "so hī"ti-ādi. Soti bhagavā. Yadipi bhagavā ekenapi iriyāpathena cirataram kālam attabhāvam pavattetum sakkoti, tathāpi upādinnakasarīrassa nāma ayam sabhāvoti dassetum "ekam iriyāpathabādhanan"ti-ādi vuttam. Aparipatantanti apatantam. Yasmā pana bhagavā yattha katthaci vasanto vineyyānam dhammam desento nānāsamāpattīhi ca kālam vītināmento vasatīti sattānam attano ca vividham hitasukham harati upaneti, tasmā vividham haratīti viharatīti evampettha attho veditabbo.

Naļerupucimandamūleti ettha vaṇṇayanti—naļerūti tasmim rukkhe adhivatthayakkhassetam adhivacanam, tasmā tena adhivattho pucimando "naļerussa pucimanto naļerupucimando"ti vuccati. Atha vā naļe ruhattā jātattā naļeru. Susiramettha naļasaddena vuccati, tasmā rukkhasusire jātattā naļeru ca so pucimando cāti naļerupucimandoti vuccati. Naļavane ruhattā jātattā vā naļeru. Naļavane kira so pucimandarukkho jāto. Urunaļo pucimando naļerupucimando. Urusaddo cettha mahantapariyāyo, naļasaddo susirapariyāyo, tasmā mahantena susirena samannāgato pucimando naļerupucimandoti vuccatīti. Ācariyo pana kimettha bahubhāsitenāti ekamevattham dassento "naļeru nāma yakkho"ti-ādimāha.

Mūlasaddo ettha samīpavacano adhippeto, na mūlamūlādīsu vattamānoti dassento āha "mūlanti samīpan"ti-ādi. Nippariyāyena sākhādimato saṅghātassa suppatitthitabhāvasādhane avayavavisese pavattamāno mūlasaddo yasmā tamsadisesu tannissaye padese ca rulhīvasena pariyāyato pavattati, tasmā "mūlāni uddhareyyā"ti ettha nippariyāyato mūlam adhippetanti ekena mūlasaddena visesetvā āha "mūlamūle dissatī"ti yathā "dukkhadukkham, rūparūpan"ti ca. Asādhāraṇahetumhīti asādhāraṇakāraṇe. Lobho hi lobhasahagataakusalacittuppādasseva hetuttā asādhārano, tasmā lobhasahagatacittuppādānameva āvenike nesam suppatitthitabhāvasādhanato mūlatthena upakārake paccayadhammaviseseti attho. Atha vā yathā alobhādayo kusalābyākatasādhāraṇā, lobhādayo pana tathā na honti akusalasseva sādhāranattāti asādhāranakāranam. Atha vā ādīsūti ettha ādisaddena alobhādīnampi kusalābyākatamūlānam sangaho datthabbo. Tesupi hi alobhādikusalamūlam akusalābyākatehi asādhāranattā asādhāranakāranam, tathā alobhādi-abyākatamūlampi itaradvayehi asādhāranattāti. **Nivāte**ti vātarahite padese, vātassa abhāve vā. **Patantī**ti nipatanti, ayameva vā pātho. **Ramanīyo**ti manuñño. **Pāsādiko**ti pasādāvaho, pasādajanakoti attho. Ādhipaccam kurumāno viyāti sambandho.

Tatthāti "tena samayena buddho bhagavā verañjāyam viharati naļerupucimandamūle"ti yam vuttam, tattha. Siyāti kassaci evam parivitakko siyā, vakkhamānākārena kadāci codeyya vāti attho. Yadi tāva bhagavātiātīsu codakassāyamadhippāyo—"pāṭaliputte pāsāde vasatī"ti-ādīsu viya adhikaraṇādhikaraṇam yadi bhaveyya, tadā "verañjāyam viharati naļerupucimandamūle"ti adhikaraṇadvayaniddeso yutto siyā, imesam pana bhinnadesattā na yutto ubhayaniddesoti. Atha tattha viharatīti yadi naļerupucimandamūle viharati. Na vattabbanti nānāṭhānabhūtattā verañjānaļerupucimandamūlānam "tena samayenā"ti ca vuttattāti adhippāyo. Idāni codako tameva attano adhippāyam "na hi sakkā"ti-ādinā vivarati. Verañjānaļerupucimandamūlānam bhūmibhāgavasena bhinnattāyeva hi na sakkā ubhayattha teneva samayena viharitum, "ubhayattha teneva samayenā"ti ca vuttattā nānāsamaye vihāro avāritoti veditabbo.

Itaro sabbametam aviparītamattham ajānantena tayā vuttanti dassento "na kho panetam evam daṭṭhabban"ti-ādimāha. Tattha etanti "verañjāyam viharati naļerupucimandamūle"ti etam vacanam. Evanti "yadi tāva bhagavā"ti-ādinā yam tam bhavatā coditam, tam atthato evam na kho pana daṭṭhabbam, na ubhayattha apubbam acarimam vihāradassanatthanti attho. Idāni attanā yathādhippetam aviparītamattham tassa ca paṭikacceva¹ vuttabhāvam tena ca appaṭividdhatam pakāsento "nanu avocumha samīpatthe bhummavacanan"ti-ādimāha. Goyūthānīti gomaṇḍalāni. Evampi naļerupucimandamūle viharaticceva vattabbam, na verañjāyanti, tasmā samīpādhikaraṇatthavasena ubhayathā nidānakittane kim payojananti codanam manasi nidhāyāha "gocaragāmanidassanatthan"ti-ādi. Assāti bhagavato.

Avassañcettha gocaragāmakittanam kattabbam. Yathā hi naļerupucimandamūlakittanam pabbajitānuggahakaraṇādi-anekappayojanam, evam gocaragāmakittanampi gahaṭṭhānuggahakaraṇādivividhappayojananti dassento "verañjākittanenā"ti-ādimāha. Tattha gahaṭṭhānuggahakaraṇanti tesam tattha paccayaggahaṇena upasaṅkamanapayirupāsanādīnam okāsadānena dhammadesanāya

saraņesu sīlesu ca patiṭṭhāpanena yathūpanissayaṁ uparivisesādhigamāvahanena ca gahaṭṭhānaṁ anuggahakaraṇaṁ. **Pabbajitānuggahakaraṇan**ti uggahaparipucchānaṁ kammaṭṭhānānuyogassa ca anurūpavasanaṭṭhānapariggahenettha pabbajitānaṁ anuggahakaraṇaṁ.

Paccayaggahaṇeneva paccayaparibhogasiddhito āha "tathā purimena-pa-vivajjananti. Tattha purimenāti verañjāvacanena. Āhito ahammāno etthāti attā, attabhāvo. Tassa kilamatho kilantabhāvo attakilamatho, attapīļā attadukkhanti vuttam hoti, tassa anuyogo karaṇam attakilamathānuyogo, upavāsakaṇṭakāpassayaseyyādinā attano dukkhuppādananti vuttam hoti. Tassa vivajjanam attakilamathānuyogavivajjanam. Antogāme vasantānam anicchantānampi visabhāgarūpādi-ārammaṇadassanādisambhavato bahigāme patirūpaṭṭhāne vasantānam tadabhāvato āha "pacchimena vatthukāmappahānato"ti-ādi. Tattha pacchimenāti naļerupucimandamūlavacanena. Kilesakāmassa vatthubhūtattā rūpādayo pañca kāmaguṇā vatthukāmo, tassa pahānam vatthukāmappahānam. Kāmasukhallikānuyogavivajjanupāyadassananti vatthukāmesu kilesakāmasamyuttassa sukhassa yogo anuyogo¹ anubhavo, tassa parivajjane upāyadassanam.

Sayameva gocaragāmam upasankamitvā attano dhammassavanānurūpabhabbapuggalānam dassanato dhammadesanāya kālo sampatto nāma hotīti dhammadesanāya abhiyogo viññāyatīti āha "purimena ca dhammadesanābhiyogan"ti. Dhammadesanāya sa-ussāhabhāvo dhammadesanābhiyogo. Bahigāme vivittokāse vasantassa ākiṇṇavihārābhāvato kāyavivekādīsu adhimutti tappoṇatā viññāyatīti āha "pacchimena vivekādhimuttin"ti.

Dhammadesanābhiyogavivekādhimuttīnam hetubhūtā eva karuṇāpaññā dhammadesanāya upagamanassa tato apagamanassa kāraṇabhūtā hontīti āha "purimena karuṇāya upagamanan"ti-ādi. Karuṇāpaññāyeva hi anantaradukassa hetū honti. Etena ca karuṇāya upagamanam na

lābhādinimittam, paññāya apagamanam na virodhādinimittanti upagamanāpagamanānam nirupakkilesatam vibhāvibhanti daṭṭhabbam. **Adhimuttatan**ti tanninnabhāvam. **Nirupalepanan**ti anupalepanam anallīyanam.

Dhammikasukhāpariccāganimittanti ettha dhammikasukham nāma anavajjasukham. Tañhi dhammikam lābham paṭicca uppannattā "dhammikasukhan"ti vuccati. Uttarimanussadhammābhiyoganimittam phāsuvihāranti sambandho. Manussānam upakārabahulatanti paccayapaṭiggahaṇadhammadesanādivasena upakārabahulatam. Devatānam upakārabahulatam janavivittatāya. Pacurajanavivittañhi ṭhānam devā upasankamitabbam mañnanti. Loke samvaḍḍhabhāvanti āmisopabhogena samvaddhitabhāvam.

Ekapuggaloti ettha¹ ekoti dutiyādipaṭikkhepattho gaṇanaparicchedo. Puggaloti sammutikathā, na paramatthakathā. Buddhassa hi bhagavato duvidhā desanā sammutidesanā paramatthadesanā cāti. Ayamattho pana heṭṭhā vitthāritovāti idha na vuccati. Eko ca so puggalo cāti ekapuggalo. Kenaṭṭhena ekapuggalo? Asadisaṭṭhena guṇavisiṭṭhaṭṭhena asamasamaṭṭhena. So hi dasannaṁ pāramīnaṁ paṭipāṭiyā āvajjanaṁ ādiṁ katvā bodhisambhāraguṇehi ceva buddhaguṇehi ca sesamahājanena asadisoti asadisaṭṭhenapi ekapuggalo. Ye cassa te guṇā, tepi aññasattānaṁ guṇehi visiṭṭhāti guṇavisiṭṭhaṭṭhenapi ekapuggalo. Purimakā sammāsambuddhā sabbasattehi asamā, tehi saddhiṁ ayameva eko rūpakāyaguṇehi ceva nāmakāyaguṇehi ca samoti asamasamaṭṭhenapi ekapuggalo. Loketi sattaloke.

Uppajjamāno uppajjatīti idam pana ubhayampi vippakatavacanameva. Uppajjanto bahujanahitatthāya uppajjati, na aññena kāraṇenāti evam panettha attho veditabbo. Evarūpañcettha lakkhaṇam na sakkā etam aññena saddalakkhaṇena paṭibāhitum. Apica uppajjamāno nāma, uppajjati nāma, uppanno nāmāti ayamettha bhedo veditabbo. Esa hi dīpaṅkarapādamūlato laddhabyākaraṇo buddhakārakadhamme pariyesanto dasa pāramiyo disvā "ime dhammā mayā pūretabbā"ti katasanniṭṭhāno

dānapāramim pūrentopi uppajjamāno nāma. Sīlapāramim -paupekkhāpāraminti imā dasa pāramiyo pūrentopi, dasa upapāramiyo pūrentopi uppajjamāno nāma. Dasa paramatthapāramiyo pūrentopi uppajjamāno nāma. Pañca mahāpariccāge pariccajantopi uppajjamāno nāma. Ñatatthacariyam lokatthacariyam buddhatthacariyam¹ pūrayamānopi uppajjamāno nāma. Kappasatasahassādhikāni cattāri asankhyeyyāni buddhakārake dhamme matthakam pāpentopi uppajjamāno nāma. Vessantarattabhāvam pahāya tusitapure patisandhim gahetvā satthivassasatahassādhikā sattapannāsa vassakotiyo titthantopi uppajjamāno nāma. Devatāhi yācito pañca mahāvilokanāni viloketvā māyādeviyā kucchismim patisandhim ganhantopi, anūnādhike dasa māse gabbhavāsam vasantopi uppajjamāno nāma. Ekūnatimsa vassāni agāramajjhe titthantopi uppajjamāno nāma. Kāmesu ādīnavam nekkhamme ca ānisamsam disvā rāhulabhaddassa jātadivase channasahāyo kandakam² assavaramāruvha nikkhamantopi uppajjamāno nāma. Tīņi rajjāni atikkamanto anomanaditīre pabbajantopi uppajjamāno nāma. Chabbassāni mahāpadhānam karontopi uppajjamāno nāma. Paripākagate ñāne olārikam āhāram āharantopi uppajjamāno nāma. Sāyanhasamaye visākhapunnamāyam mahābodhimandam āruyha mārabalam vidhametvā pathamayāme pubbenivāsam anussaritvā majjhimayāme dibbacakkhum parisodhetvā pacchimayāmasamanantare dvādasangam paticcasamuppādam anulomapatilomato sammasitvā sotāpattimaggam pativijihantopi uppajjamāno nāma. Sotāpattiphalakkhanepi sakadāgāmiphalakkhanepi anāgāmiphalakkhanepi uppajjamāno nāma. Arahattamaggakkhane pana uppajjati nāma. Arahattaphalakkhane uppanno nāma. Buddhānañhi sāvakānam viya na patipātiyā iddhividhañānādīni uppajjanti, saheva pana arahattamaggena sakalopi sabbaññutaññānādi gunarāsi āgatova nāma hoti, tasmā nibbattasabbakiccattā arahattaphalakkhane uppanno nāma hoti. Imasmimpi sutte arahattaphalakkhanamyeva sandhāya "uppajjatī"ti vuttam. Uppanno hotīti ayañhettha attho.

Bahujanahitāyāti mahājanassa hitatthāya uppajjati. **Bahujanasukhāyā**ti mahājanassa sukhatthāya uppajjati. **Lokānukampāyā**ti

sattalokassa anukampam paticca uppajjati. Katarasattalokassāti? Yo tathāgatassa dhammadesanam sutvā amatapānam pivi, dhammam pativijihi, tassa. Bhagavatā hi mahābodhimande sattasattāham vītināmetvā bodhimandā isipatanam āgamma "dveme bhikkhave antā pabbajitena na sevitabbā"ti dhammacakkappavattanasuttante¹ desite āyasmatā aññāsikondaññattherena saddhim atthārasakotisankhā brahmāno amatapānam pivimsu, etassa sattalokassa anukampāya uppanno. Pañcamadivase anattalakkhanasuttantapariyosāne pañcavaggiyattherā arahatte patitthahimsu, etassapi sattalokassa anukampāva uppanno. Tato vasadārakappamukhe pañcapannāsa purise arahatte patitthāpesi, tato kappāsikavanasande timsa bhaddavaggiye tayo magge ca phalāni ca sampāpesi, etassapi sattalokassa anukampāya uppanno. Gayāsīse ādittapariyāyapariyosāne² jatilasahassam arahatte patitthāpesi, tato latthivane bimbisārappamukhā ekādasa nahutā brāhmanagahapatikā satthu dhammadesanam sutvā sotāpattiphale patitthahimsu, ekam nahutam saranesu patitthitam. Tirokuttaanumodanāvasāne³ caturāsītiyā pānasahassehi amatapānam pītam. Sumanamālākārasamāgame caturāsītiyā, dhanapālasamāgame dasahi pānasahassehi, khadirangārajātakasamāgame caturāsītiyā pānasahassehi, jambuka-ājīvakasamāgame caturāsītiyāva, ānandasetthisamāgame caturāsītiyāva pānasahassehi amatapānam pītam. Pāsānakacetiye pārāyanasuttakathādivase⁴ cuddasa kotiyo amatapānam pivimsu. Yamakapātihāriyadivase vīsati pānakotiyo, tāvatimsabhavane pandukambalasilāyam nisīditvā mātaram kāyasakkhim katvā sattappakaranam abhidhammam desentassa asīti pānakotiyo, devorohane timsa pānakotiyo, sakkapañhasuttante⁵ asīti devasahassāni amatapānam pivimsu. Mahāsamayasuttante⁶ mangalasutte⁷ cūlarāhulovāde⁸ samacittapatipadāyāti⁹ imesu catūsu thānesu abhisamayappattasattānam paricchedo natthi, etassapi sattalokassa anukampāya uppannoti. Yāvajjadivasā

^{1.} Sam 3. 368; Vi 3. 14 pitthesu. 2. Sam 2. 251; Vi 3. 44 pitthesu. 3. Khu 1. 8 pitthe.

^{4.} Khu 1. 429 pitthe.

^{5.} Dī 2. 311 pitthe.

^{6.} Dī 2. 203 pitthe.

^{7.} Khu 1. 3, 318 pitthesu.

^{8.} Ma 3. 324 pitthe.

^{9.} Am 1. 62 pitthe.

ito parampi anāgate imam sāsanam nissāya saggamokkhamagge patiṭṭhahantānam vasenapi ayamattho veditabbo.

Devamanussānanti na kevalam devamanussānamyeva, avasesānam nāgasupaṇṇādīnampi atthāya hitāya sukhāyeva uppanno. Sahetukapaṭisandhike pana maggaphalasacchikiriyāya bhabbe puggale dassetum evam vuttam. Tasmā etesampi atthatthāya hitatthāya sukhatthāyeva uppannoti veditabbo.

Katamo ekapuggaloti kathetukamyatāpucchā. Idāni tāya pucchāya puṭṭhaṁ ekapuggalaṁ vibhāvento "tathāgato arahaṁ sammāsambuddho"ti āha. Tadatthaparinipphādananti lokatthanipphādanaṁ, buddhakiccasampādananti attho. Paṭhamaṁ lumbinīvane dutiyaṁ bodhimaṇḍeti lumbinīvane rūpakāyena jāto, bodhimaṇḍe dhammakāyena. Evamādināti ādisaddena verañjākittanato rūpakāyassa anuggaṇhanaṁ dasseti, naļerupucimandamūlakittanato dhammakāyassa. Tathā purimena parādhīnakiriyākaraṇaṁ, dutiyena attādhīnakiriyākaraṇaṁ. Purimena vā karuṇākiccaṁ, itarena paññākiccaṁ, purimena cassa paramāya anukampāya samannāgamaṁ, pacchimena paramāya upekkhāya samannāgamanti evamādiṁ saṅganhāti.

Pacchimakoti guņena pacchimako. Ānandattheram sandhāyetam vuttam. Sankhyāyapīti gaņanatopi. Diṭṭhisīlasāmaññana samhatattā samghoti imamattham vibhāvento āha "diṭṭhisīlasāmaññasankhātasanghātena samaṇagaṇenā"ti. Ettha pana "yāyam diṭṭhi ariyā niyyānikā niyyāti takkarassa sammā dukkhakkhayāya, tathārūpāya diṭṭhiyā diṭṭhisāmaññagato viharatī"ti¹ evam vuttāya diṭṭhiyā, "yāni tāni sīlāni akhaṇḍāni acchiddāni asabalāni akammāsāni bhujissāni viññuppasatthāni aparāmaṭṭhāni samādhisamvattanikāni, tathārūpesu sīlesu² sīlasāmaññagato viharatī"ti³ evam vuttānañca sīlānam sāmaññasankhātena sanghato sanghaṭito sametoti diṭṭhisīlasāmaññasankhātasanghāto, samaṇagaṇo. Diṭṭhisīlasāmaññena samhatoti vuttam hoti. Tathā hi "aṭṭhānametam bhikkhave anavakāso, yam diṭṭhisampanno puggalo sañcicca pāṇam jīvitā voropeyya, netam ṭhānam

^{1.} Dī 3. 204, 237; Ma 1. 397; Ma 3. 39 piţthesu.

^{2.} Tathārūpehi sīlehi (sabbattha)

^{3.} Dī 3. 203, 237; Ma 1. 397; Ma 3. 39 pitthesu.

vijjatī"ti-ādivacanato diṭṭhisīlānaṁ niyatasabhāvattā sotāpannāpi aññamaññaṁ diṭṭhisīlasāmaññena saṁhatā, pageva sakadāgāmi-ādayo. Ariyapuggalā hi yattha katthaci dūre ṭhitāpi attano guṇasāmaggiyā saṁhatāyeva. "Tathārūpāya diṭṭhiyā diṭṭhisāmaññagato viharati¹, tathārūpesu sīlesu sīlasāmaññagato viharatī"ti² vacanato puthujjanānampi diṭṭhisīlasāmaññena saṁhatabhāvo labbhatiyeva, idha pana ariyasaṁghoyeva adhippeto "yo tattha pacchimako, so sotāpanno"ti vacanato. **Etenā**ti "pañcamattehi bhikkhusatehī'ti etena vacanena. **Assā**ti pañcamattassa bhikkhusatassa. **Nirabbudo**ti-ādīnaṁ vacanattho parato eva āvi bhavissati.

Assosīti ettha savanamupalabbhoti āha "assosīti suņi upalabhī"ti, aññāsīti attho. So cāyamupalabbho savanavasenevāti imamattham dassento āha "sotadvārasampattavacananigghosānusārena aññāsī"ti.

Avadhāraṇaphalattā saddappayogassa sabbampi vākyam antogadhāvadhāraṇanti āha "khoti padapūraṇamatte nipāto"ti.

Avadhāraṇattheti pana iminā antogadhāvadhāraṇepi sabbasmim vākye iṭṭhatovadhāraṇattham khosaddaggahaṇanti dasseti. Tameva iṭṭhatovadhāraṇam dassento āha "tattha avadhāraṇatthenā"ti-ādi. Atha padapūraṇatthena khosaddena kimpayojananti āha "padapūraṇena pana byañjanasiliṭṭhatāmattamevā"ti. "Assosī"ti hi padam khosadde gahite tena phullitamaṇḍitavibhūsitam viya hontam pūritam nāma hoti, tena ca purimapacchimapadāni siliṭṭhatāmattameva payojanam. Matta-saddo cettha visesanivatti-attho, tenassa anatthantaradīpanatam³ dasseti, eva-saddena pana byañjanasiliṭṭhatāya ekantikatam.

Verañjoti ettha saddalakkhaṇānusārena atthaṁ dassento āha "verañjāyaṁ jāto"ti-ādi. Brahmaṁ aṇatīti ettha brahmanti vedo vuccati, so pana mantabrahmakappavasena tividho. Tattha mantā padhānamūlabhāvatoyeva aṭṭhakādīhi pavuttā, itare pana tannissayena jātā,

^{1.} Dī 3. 204, 237; Ma 1. 397; Ma 3. 39 pitthesu.

^{2.} Dī 3. 203, 237; Ma 1. 397; Ma 3. 39 pitthesu.

^{3.} Atthantaradīpanatam (Sī, Syā)

tena padhānasseva gahaṇam. Mante sajjhāyatīti iruvedādike mantasatthe sajjhāyatīti attho. Iruvedādayo hi guttabhāsitabbatāya "mantā"ti vuccanti. Idameva hīti avadhāraṇena brahmato jātoti-ādikam niruttim paṭikkhipati. Jātibrāhmaṇānanti iminā aññepi brāhmaṇā atthīti dasseti. Duvidhā hi brāhmaṇā jātibrāhmaṇā visuddhibrāhmaṇā cāti. Idāni tattha visuddhibrāhmaṇānam niruttim dassento āha "ariyā panā"ti-ādi.

Samitapāpattāti accantam anavasesato savāsanam samitapāpattā. Evañhi bāhiraka-avītarāgasekkhāsekkhapāpasamanato bhagavato pāpasamanam visesitam hoti. Vuttamevattham udaharanena vibhavento aha "vuttañhetan"ti-ādi. Ettha pana "bāhitapāpoti brāhmano, samitapāpattā samanoti vuccatīti idam bhinnagāthāsannissitapadadvayam ekato gahetvā vuttan"ti vadanti. Vuttan tīsupi ganthipadesu "samitattā hi pāpānam, samanoti pavuccatīti idam vacanam gahetvā 'samitattā samanoti vuccatī'ti vuttam. Bāhitapāpoti brāhmanoti idam pana aññasmim gāthābandhe vuttavacanan"ti. Anekatthattā nipātānam idha anussavanatthe¹ adhippetoti āha "khalūti anussavanatthe nipāto"ti. Jātisamudāgatanti jātiyā āgatam, jātisiddhanti vuttam hoti. Ālapanamattanti piyālāpavacanamattam. Piyasamudāhārā hete bhoti vā āvusoti vā devānampiyāti vā. **Bhoyādī nāma** so hotīti yo āmantanādīsu "bho bho"ti vadanto vicarati, so bhovādī nāma hotīti attho. **Sakiñcano**ti rāgādīhi kiñcanehi sakiñcano. Rāgādayo hi satte kiñcenti maddanti palibundhantīti² "kiñcanānī"ti vuccanti. Manussā kira gonehi khalam maddapenta "kiñcehi kapila, kiñcehi kalaka"ti vadanti, tasma maddanattho kiñcanatthoti veditabbo.

Gottavasenāti ettha gam³ tāyatīti gottam. Gosaddena cettha abhidhānam buddhi ca vuccati, tasmā evamettha attho daṭṭhabbo. Gotamoti pavattamānam abhidhānam buddhiñca ekamsikavisayatāya⁴ tāyati rakkhatīti gottam. Yathā hi buddhi ārammaṇabhūtena atthena vinā na vattati, evam

^{1.} Anussavanattho (Syā)

^{3.} Gavam (Sī)

^{2.} Palibodhentīti (Sī)

^{4.} Ekantikavisayatāya (Sī)

abhidhānam abhidheyyabhūtena, tasmā so gottasankhāto attho tāni buddhiabhidhānāni tāyati rakkhatīti vuccati. So pana aññakulaparamparāya asādhāranam tassa kulassa ādipurisasamudāgatam tamkulapariyāpannasādhāranam sāmaññarūpanti datthabbam. Ettha ca samanoti iminā sarikkhakajanehi bhagavato bahumatabhāvo dassito samitapāpatākittanato, **gotamo**ti iminā lokiyajanehi ulārakulasambhūtatādīpanato. Sakyassa suddhodanamahārājassa putto sakyaputto. Iminā ca uditoditavipulakhattiyakulavibhāvanato vuttam "idam pana bhagavato uccākulaparidīpanan"ti. Sabbakhattiyānañhi ādibhūtamahāsammatamahārājato patthāya asambhinnam ulāratamam sakyarājakulam. Kenaci pārijuññena anabhibhūtoti ñātipārijuññabhogapārijuññādinā kenaci pārijuññena parihāniyā anabhibhūto anajjhotthato. Tathā hi lokanāthassa abhijātiyam tassa kulassa na kiñci pārijuññam, atha kho vaddhiyeva. Abhinikkhamane ca tato samiddhatamabhāvo loke pākato paññāto. Tena "sakyakulā pabbajito"ti idam vacanam bhagavato saddhāpabbajitabhāvaparidīpanattham vuttam mahantam ñatipariyattam mahantañca bhogakkhandham pahaya pabbajitabhāvasiddhito. **Tato paran**ti "verañjāyam viharatī"ti-ādi.

Itthambhūtākhyānatthe upayogavacananti ittham imam pakāram bhūto āpannoti ittambhūto, tassa ākhyānam itthambhūtākhyānam, soyeva attho itthambhūtākhyānattho. Atha vā ittham evam pakāro bhūto jātoti evam kathanattho itthambhūtākhyānattho, tasmim upayogavacananti attho. Ettha ca abbhuggatoti ettha abhi-saddo itthambhūtākhyānatthajotako abhibhavitvā uggamanappakārassa dīpanato. Tena yogato "tam kho pana bhavantam gotaman"ti idam upayogavacanam sāmi-atthepi samānam itthambhūtākhyānadīpanato "itthambhūtākhyānatthe"ti vuttam. Tenevāha "tassa kho pana bhoto gotamassāti attho"ti. Idam vuttam hoti—yathā "sādhu devadatto mātaramatī"ti ettha abhisaddayogato itthambhūtākhyāne upayogavacanam katam, evamidhāpi tam kho pana bhavantam gotamam abhi evam kalyāno kittisaddo uggatoti

abhisaddayogato itthambhūtākhyāne upayogavacananti. "Sādhu devadatto mātaramabhī"ti ettha hi "devadatto mātaramabhi mātari visaye mātuyā vā sādhū"ti evam adhikaraṇatthe sāmi-atthe vā bhummavacanassa vā sāmivacanassa vā pasaṅge itthambhūtākhyānatthajotakena abhisaddena yoge upayogavacanam katam. Yathā cettha "devadatto mātu visaye mātusambandhī vā sādhuttappakārappatto"ti ayamattho viññāyati, evamidhāpi "bhoto gotamassa sambandhī kittisaddo abbhuggato abhibhavitvā uggamanappakārappatto"ti ayamattho viññāyati. Tattha hi devadattaggahaṇam viya idha kittisaddaggahaṇam, tathā tattha "mātaran"ti vacanam viya idha "tam kho pana bhavantam gotaman"ti vacanam, tattha sādhusaddaggahaṇam viya idha uggatasaddaggahaṇam veditabbam.

Kalyāṇoti bhaddako. Kalyāṇabhāvo cassa kulyāṇaguṇavisayatāyāti āha "kalyāṇaguṇāsamannāgato"ti, kalyāṇehi guṇehi samannāgato taṁvisayatāya yuttoti attho. Taṁvisayatā hettha samannāgamo kalyāṇaguṇavisayatāya tannissitoti adhippāyo. Seṭṭhoti etthāpi eseva nayo. Seṭṭhaguṇavisayatāya eva hi kittisaddassa seṭṭhatā "bhagavāti vacanaṁ seṭṭhan"ti-ādīsu viya. "Bhagavā arahan"ti-ādinā guṇānaṁ saṁkittanato saddanīyato ca kittisaddo vaṇṇoti āha "kittisaddoti kitti evā"ti. Vaṇṇoyeva hi kittetabbato kittisaddanīyato saddoti ca vuccati. Kittipariyāyo hi saddasaddo yathā "uļārasaddo isayo, guṇavanto tapassino"ti. Abhitthavanavasena pavatto saddo thutighoso, abhitthavudāhāro.

"Abbhuggato"ti pana etassa attho aṭṭhakathāyaṁ na dassito, tasmā tassattho evaṁ veditabbo—abbhuggatoti abhibhavitvā uggato, anaññasādhāraṇaguṇe ārabbha pavattattā sadevakaṁ lokaṁ ajjhottharitvā pavattoti vuttaṁ hoti. Kinti saddo abbhuggatoti āha "itipi so bhagavā"ti-ādi. Ito paraṁ pana īdisesu ṭhānesu yattha yattha pāḷipāṭhassa attho vattabbo siyā, tattha tattha "pāḷiyaṁ panā"ti vatvā atthaṁ dassayissāma, idāni tattha padayojanāpubbakaṁ atthaṁ dassento āha "itipi so bhagavāti-ādīsu

pana ayam tāva yojanā"ti-ādi. So bhagavāti yo so samatimsa pāramiyo pūretvā sabbakilese bhañjitvā anuttaram sammāsambodhim abhisambuddho devānam atidevo sakkānam atisakko brahmānam atibrahmā lokanātho bhāgyavantatādīhi kāranehi bhagavāti laddhanāmo, so bhagavā. Bhagavāti hi idam satthu nāmakittanam. Tenāha āyasmā dhammasenāpati "bhagavāti netam nāmam mātarā katan"ti-ādi¹. Parato pana bhagavāti gunakittanameva. Yathā kammatthānikena "arahan"ti-ādīsu navasu thānesu paccekam itipisaddam yojetvā buddhagunā anussarīyanti, evam buddhagunasamkittakenapīti dassento "itipi araham itipi sammāsambuddho -pa- itipi bhagavā"ti āha. Evañhi sati "arahan"ti-ādīhi navahi padehi ye sadevake loke ativiya pākatā paññātā buddhagunā, te nānappakārato vibhāvitā honti. "Itipetam bhūtam, itipetam tacchan"ti-ādīsu² viya hi idha iti-saddo āsannapaccakkhakāranattho, pi-saddo sampindanattho, tena ca tesam gunānam bahubhāvo dīpito, tāni ca gunasallakkhanakāranāni saddhāsampannānam viñnujātikānam paccakkhāni hontīti tāni samkittentena viññunā cittassa sammukhībhūtāneva katvā samkittetabbānīti dassento "iminā ca iminā ca kāranenāti vuttam hotī"ti āha.

"Suttantikānam vacanānamattham, suttānurūpam paridīpayantī"ti heṭṭhā vuttattā visuddhimagge³ sabbākārato samvaṇṇitampi attham idhāpi vitthāretvā dassetukāmo tattha payojanamāya "idāni vinayadharānan"ti-ādi. Tattha cittasampahamsanatthanti cittasantosanattham, cittappasādajananatthanti vuttam hoti. "Ārakattā"ti-ādīsu ārakattāti suvidūrattā. Arīnanti kilesārīnam. Arānanti samsāracakkassa arānam. Hatattāti viddhamsitattā. Paccayādīnanti cīvarādipaccayānañceva pūjāvisesānañca.

Idāni yathāvuttamevattham vibhāvento āha "ārakāhiso"ti-ādi. Dūratā nāma āsannatā viya upādāyupādāya vuccatīti paramukkamsagatam dūratāvam dassento "suvidūravidūre thito"ti āha, suṭṭhu vidūrabhāveneva vidūre thitoti attho. So panassa kilesehi

dūre ṭhitabhāvo, na padesavasena, atha kho tesaṁ sabbaso pahīnattāti dassento āha "maggena kilesānaṁ viddhaṁsitattā"ti. Nanu aññesampi khīṇāsavānaṁ te pahīnā evāti anuyogaṁ manasi katvā vuttaṁ "savāsanānan"ti. Na hi ṭhapetvā bhagavantaṁ aññe saha vāsanāya kilese pahātuṁ sakkonti. Etena aññehi asādhāraṇaṁbhagavato arahattanti dassitaṁ hoti. Kā panāyaṁ vāsanā nāma? Pahīnakilesassapi appahīnakilesassa payogasadisapayogahetubhūto kilesanissito¹ sāmatthiyaviseso āyasmato pilindavacchassa vasalasamudācāranimittaṁ viya. Kathaṁ pana "ārakā"ti vutte "kilesehī"ti ayamattho labbhatīti sāmaññacodanāya visese avaṭṭhānato visesatthinā ca visesassa anupayujjitabbato "ārakāssa honti pāpakā akusalā dhammā"ti-ādīni² suttapadānettha udāharitabbāni. Ārakāti cettha ākārassa rassattaṁ, kakārassa ca hakāraṁ sānusāraṁ katvā niruttinayena "arahan"ti padasiddhi veditabbā. Yathāvuttassevatthassa sukhaggahaṇatthaṁ idamettha vuccati—

"So tato ārakā nāma, yassa yenāsamaṅgitā. Asamaṅgī ca dosehi, nātho tenārahaṁ mato"ti³.

Anatthacaraṇena kilesā eva arayoti **kilesārayo**. Arīnaṁ hatattā arihāti vattabbe niruttinayena **"arahan"**ti vuttaṁ. Etthāpi yathāvuttassatthassa sukhaggahanatthaṁ idaṁ veditabbaṁ—

"Yasmā rāgādisaṅkhātā, sabbepi arayo hatā. Paññāsatthena nāthena, tasmāpi arahaṁ mato"ti³.

Yañcetam samsāracakkanti sambandho. Rathacakkassa nābhi viya mūlāvayavabhūtam anto bahi ca samavaṭṭhitam avijjābhavataṇhādvayanti vuttam "avijjābhavataṇhāmayanābhī"ti. Nābhiyā nemiyā ca sambaddha-arasadisā paccayaphalabhūtehi avijjātaṇhājarāmaraṇehi sambaddhā puññābhisaṅkhāra-apuññābhisaṅkhāra-āneñjābhisaṅkhārāti vuttam "puññādi-abhisaṅkhārāran"ti. Tattha tattha bhave pariyantabhāvena pākaṭam jarāmaraṇanti tam nemiṭṭhāniyam katvā

āha "jarāmaraṇanemī"ti. Yathā rathacakkappavattiyā padhānakāraṇaṁ akkho, evaṁ saṁsāracakkappavattiyā āsavasamudayoti āha "āsavasamudayasamayena akkhena vijjhitvā"ti. Āsavā eva avijjādīnaṁ kāraṇattā āsavasamudayo. Yathāha "āsavasamudayā avijjāsamudayo"ti¹. Vipākakaṭattārūpappabhedo kāmabhavādiko tibhavo eva ratho, tasmṁ tibhavarathe. Attano paccayehi samaṁ, sabbaso vā ādito paṭṭhāya yojitanti samāyojitaṁ. Ādirahitaṁ kālaṁ pavattatīti katvā anādikālappavattaṁ.

"Khandhānañca paṭipāṭi, dhātu-āyatanāna ca. Abbocchinnaṁ vattamānā, saṁsāroti pavuccatī"ti²—

evam vuttasamsārova samsāracakkam. Anenāti bhagavatā. Bodhimaņdeti bodhisankhātassa ñāṇassa maṇḍabhāvappatte ṭhāne kāle vā. Bodhīti paññā, sā ettha maṇḍā pasannā jātāti bodhimaṇḍo. Vīriyapādehīti samkilesavodānapakkhiyesu sannirumbhanasannikkhipanakiccatāya dvidhā pavatteti attano vīriyasankhātehi pādehi. Sīlapathaviyanti patiṭṭhānaṭṭhena. Sīlameva pathavī, tassam. Patiṭṭhāyāti sampādanavasena patiṭṭhāhitvā. Saddhāhatthenāti anavajjadhammādānasādhanato saddhāva hattho, tena. Kammakkhayakaranti kāyakammādibhedassa sabbassapi kammassa khayakaraṇato kammakkhayakaram. Ñāṇapharasunti samādhisilāyam sunisitam maggañāṇapharasum gahetvā.

Evam "arānam hatattā"ti ettha vuttam arasankhātam samsāram cakkam viya cakkanti gahetvā atthayojanam katvā idāni paṭiccasamuppādadesanākkamenapi tam dassetum "atha vā"ti-ādi vuttam. Tattha anamataggasamsāravaṭṭanti anu anu amataggam aviñnātapubbakoṭikam samsāramaṇḍalam. Sesā dasa dhammāti sankhārādayo jātipariyosānā dasa dhammā. Katham tesam sankhārādīnam arabhāvoti āha "avijjāmūlakattā jarāmaraṇapariyantattā cā"ti. Tattha avijjā mūlam padhānakāraṇam yesam sankhārādīnam te avijjāmūlakat, tesam bhāvo avijjāmūlakattam. Jarāmaranam

^{1.} Ma 1. 67 pitthe.

^{2.} Visuddhi 2. 176; Dī-Ṭtha 2. 86; Sam-Ṭtha 2. 89; Am-Ṭtha 2. 386 piṭṭhādīsu.

pariyantam pariyosānabhūtam etesanti jarāmaraṇapariyantā, saṅkhārādayo dasa dhammā. Tesam bhāvo **jarāmaraṇapariyantattam**. Saṅkhārādijātipariyosānānam dasadhammānam avijjāmūlakattā jarāmaraṇapariyosānattā cāti attho, nābhibhūtāya avijjāya mūlato nemibhūtena jarāmaraṇena antato saṅkhārādīnam sambandhattāti adhippāyo.

Dukkhādīsūti dukkhasamudayanirodhamaggesu. Aññāṇanti ñāṇappaṭipakkhattā moho aññāṇaṁ, na pana ñāṇato aññaṁ, napi ñāṇassa abhāvamattaṁ. Tattha dukkhādīsu aññāṇaṁ yathāsabhāvappaṭivedhāppadānato tappaṭicchādanavaseneva. Ettha hi kiñcāpi ṭhapetvā lokuttarasaccadvayaṁ sesaṭṭhānesu ārammaṇavasenapi avijjā uppajjati, evaṁ santepi paṭicchādanavaseneva idha adhippetā. Sā hi uppannā dukkhasaccaṁ paṭicchādetvā tiṭṭhati, yāthāvasarasalakkhaṇaṁ paṭivijjhituṁ na deti, tathā samudayaṁ nirodhaṁ magganti.

Dukkhanti cettha dukkham ariyasaccam adhippetanti tam kāmabhavādivasena tidhā bhinditvā tathā tappaticchādikañca avijjam tidhā katvā avijjādipaccaye tīsu bhavesu sankhārādike patipātiyā dassento "kāmabhave ca avijjā"ti-ādimāha. Tattha kāmabhave ca avijjāti kāmabhave ādīnavapaticchādikā avijjā. Rūpabhave avijjā arūpabhave avijjāti etthāpi eseva nayo. Kāmabhave sankhārānanti kāmabhūmipariyāpannānam puññapuññasankharanam, kamabhave va nipphadetabba1 ye puññapuññasankhara, tesam kamabhavupapattinibbattakasankharananti attho. Sankhārāti cettha lokiyakusalākusalacetanā veditabbā. Paccayo hotīti puññābhisankhārānam tāva ārammanapaccayena ceva upanissayapaccayena cāti dvidhā paccayo hoti, apuññābhisankhāresu sahajātassa sahajātādivasena, asahajātassa anantarasamanantarādivasena, anānantarassa pana ārammanavasena ceva upanissayavasena ca paccayo hoti. **Arūpabhave** sankhārānanti ānenjābhisankhārānam. Paccayo hotīti upanissayapaccayavaseneva. Imasmiñca panatthe ettha vitthāriyamāne atippapañco hoti, tasmā tam nayidha vitthārayissāma. **Itaresū**ti rūpārūpabhavesu.

Tiṇṇaṁ āyatanānanti cakkhusotamanāyatanānaṁ ghānādittayassa tattha asambhavato. Ekassāti manāyatanassa itaresaṁ tattha asambhavato. Iminā nayena tiṇṇaṁ phassānanti-ādīsupi attho veditabbo. Chabbidhassa phassassāti

cakkhusamphassasotasamphassaghānasamphassajivhāsamphassakāyasampha ssamanosamphassānam vasena chabbidhassa phassassa. **Channam vedanānan**ti cakkhusamphassajā vedanā, tathā sotasamphassajā ghānasamphassajā jivhāsamphassajā kāyasamphassajā manosamphassajā vedanāti imāsam channam vedanānam. **Channam taṇhākāyānan**ti rūpataṇhā saddataṇhā gandhataṇā rasataṇhā phoṭṭhabbataṇhā dhammataṇhāti imesam channam taṇhākāyānam. **Tattha tattha sā sā taṇhā**ti rūpataṇhādibhedo tattha tattha kāmabhavādīsu uppajjanakatanhā.

Sā taṇhādimūlikā kathā atisaṁkhittāti taṁ upādānabhave cavibhajitvā vitthāretvā dassetuṁ "kathan"ti-ādi vuttaṁ. Tattha kāme paribhuñjissāmīti iminā kāmataṇhāpavattimāha, tathā saggasampattiṁ anubhavissāmīti-ādīhi. Sā pana taṇhā yasmā bhusamādānavasena pavattamānā kāmupādānaṁ nāma hoti, tasmā vuttaṁ "kāmupādānapaccayā"ti. Tathevāti kāmupādānapaccayā eva. Brahmalokasampattinti rūpībrahmaloke sampattiṁ. "Sabbepi tebhūmakā dhammā kāmanīyaṭṭhena kāmā"ti vacanato bhavarāgopi kāmupādānamevāti katvā "kāmupādānapaccayā eva mettaṁ bhāvetī"ti-ādi vuttaṁ. Tattha mettaṁ bhāvetīti mijjati siniyhatīti mettā, taṁ bhāveti vaḍḍhetīti attho. Atha vā mettā etassa atthīti mettaṁ, cittaṁ, taṁsampayuttaṁ jhānaṁ vā, taṁ bhāveti vaḍḍheti uppādeti vāti attho. Karuṇaṁ bhāvetīti-ādīsupi imināva nayena attho veditabbo.

Sesupādānamūlikāsupīti diṭṭhupādānasīlabbatupādānaattavādupādānamūlikāsupi yojanāsu eseva nayoti attho. Tatthāyam yojanā idhekacco "natthi paraloko"ti natthikadiṭṭhim gaṇhāti, so diṭṭhupādānapaccayā kāyena duccaritam caratīti-ādi vuttanayena yojetabbam. Aparo "asukasmim sampattibhave attā ucchijjatī"ti ucchedadiṭṭhim gaṇhāti, so tatrūpapattiyā kāyena sucaritam caratīti-ādi vuttanayeneva yojetabbam. Aparo "rūpī manomayo hutvā attā ucchijjatī"ti rūpūpapattiyā maggam bhāveti bhāvanāpāripūriyāti sabbam vuttanayeneva veditabbam. Aparopi "arūpabhave uppajjitvā attā ucchijjatī"ti arūpūpapattiyā maggam bhāveti bhāvanāpāripūriyāti sabbam vuttanayeneva veditabbam. Etāhiyeva attavādupādānamūlikāpi yojanā samvaṇṇitāti daṭṭhabbam. Evam diṭṭhadhammanibbānavādavasenapi yojanā veditabbā. Aparo "sīlena suddhi, vatena suddhī"ti asuddhimaggam "suddhimaggo"ti parāmasanto sīlabbatupādānapaccayā kāyena duccaritam caratīti-ādi sabbam vuttanayeneva yojetabbam.

Idāni yvāyam samsāracakkam dassentena "kāmabhave avijjā kāmabhave sankhārānam paccayo hotī"ti-ādinā avijjādīnam paccayabhāvo sankhārādīnam paccayuppannabhāvo ca dassito, tameva patisambhidāmaggapālim ānetvā nigamanavasena dassento "evamayan"tiādimāha. Tattha yathā sankhārā hetunibbattā, evam avijjāpi kāmāsavādinā sahetukā evāti āha "ubhopete hetusamuppannā"ti. Paccayapariggaheti nāmarūpassa paccayānam avijjādīnam paricchijja gahane. Nipphādetabbe bhummam. Paññāti kankhāvitaranavisuddhisankhātā pakārato jānanā. **Dhammatthitiñānan**ti titthanti ettha phaladhammā tadāyattavuttitāyāti thiti, kāranam, dhammānam thiti dhammatthiti, dhammatthitivā ñānam dhammatthitiñānam, paccayañānanti attho, paticcasamuppādāvabodhoti vuttam hoti. Kāmañcettha paccayapariggahe paññāyeva dhammatthitiñānam, sankhāresu pana aditthesu avijjāya sankhārānam paccayabhāvo na sakkā datthunti "sankhārā hetusamuppannā"ti paccayuppannadhammānampi gahanam katanti veditabbam. **Ubhopete hetusamuppannā**ti idam vana ubhinnampi paccayuppannabhāvam dassetukāmatāya vuttam. Idanca dhammatthitiñāṇam yasmā addhattaye kankhāmalavitaraṇavasena pavattati, tasmā "atītampi addhānan" ti-ādi vuttam. Etena nayena sabbapadāni vitthāretabbānīti etena nayena "avijjā hetū"ti-ādinā avijjāyam vuttanayena "sankhārā hetu, viññānam hetusamuppannan"ti-ādinā sabbapadāni vitthāretabbāni.

Samkhippanti ettha avijjādayo viññāṇādayo cāti **sankhepo**, hetu vipāko ca¹. Atha vā hetuvipākoti samkhippatīti sankhepo, avijjādayo viññāṇādayo ca. Sankhepabhāvasāmañnena pana ekavacanam katanti

daṭṭhabbaṁ. Te pana saṅkhepā atīte hetu, etarahi vipāko, etarahi hetu, āyatiṁ vipākoti evaṁ kālavibhāgena cattāro jātā, tenāha "purimasaṅkhepo cettha atīto addhā"ti-ādi. Paccuppanno addhāti sambandho. Taṇhupādānabhavā gahitāva hontīti ettha avijjāgahaṇena kilesabhāvasāmaññato taṇhupādānā gahitā, saṅkhāraggahaṇena kammabhāvasāmaññato bhavo gahito, avijjāsaṅkhārānaṁ tehi vinā sakiccākaraṇato ca taṇhupādānabhavā gahitāva honti. Atha vā avidvā paritassati, paritasito upādiyati, tassupādānapaccayā bhavo, tasmā tanhupādānabhavāpi gahitā honti. Tathā ca vuttaṁ—

"Purimakammabhavasmim moho avijjā, āyūhanā sankhārā. Nikanti taṇhā, upagamanam upādānam, cetanā bhavo, iti ime pañca dhammā purimakammabhavasmim idha paṭisandhiyā paccayā"ti¹.

Tattha² purimakammabhavasminti purime kammabhave, atītajātiyam kammabhave kariyamāneti attho. **Moho avijjā**ti yo tadā dukkhādīsu moho yena mūļho kammam karoti, sā avijjā. Āyūhanā sankhārāti tam kammam karoto yā purimacetanāyo, yathā "dānam dassāmī"ti cittam uppādetvā māsampi samvaccharampi dānūpakaranāni sajjentassa uppannā purimacetanāyo, patiggāhakānam pana hatthe dakkhinam patitthāpayato cetanā bhavoti vuccati. Ekāvajjanesu vā chasu javanesu cetanā āyūhanasankhārā nāma, sattamā bhavo. Yā kāci vā pana cetanā bhavo, sampayuttā āyūhanasankhārā nāma. Nikanti tanhāti yā kammam karontassa tassa phale upapattibhaye nikāmanā patthanā, sā tanhā nāma. **Upagamanam** upādānanti yam kammabhavassa paccayabhūtam "idam katvā asukasmim nāma thāne kāme sevissāmi ucchijjissāmī"ti-ādinā nayena pavattam upagamanam gahanam parāmasanam, idam upādānam nāma. Cetanā bhavoti "tam kammam karoto yā purimā cetanāyo"ti-ādinā hetthā vuttesu tīsu atthavikappesu yā cetanā bhavoti vuttā, sā cetanā bhavoti evamattho veditabbo.

^{1.} Khu 9. 50 pitthe. 2. Abhi-Ttha 2. 182; Patisam-Ttha 1. 223 pitthesupi passitabbam.

Idāni sabbepete avijjādayo dhamme dvīhi vaṭṭehi saṅgahetvā dassetukāmo āha "ime pañca dhammā atīte kammavaṭṭan"ti. Ettha ca nippariyāyato saṅkhārā bhavo ca kammaṁ, avijjādayo pana kammasahāyatāya kammasarikkhakā tadupakārakā cāti kammanti vuttā. Avijjādayo hi vipākadhammadhammatāya kammasarikkhakā sahajātakoṭiyā upanissayakoṭiyā ca kammassa ca upakārakā. Kammameva ca aññamaññasambandhaṁ hutvā punappunaṁ parivattanaṭṭhena kammavaṭṭaṁ. Viññāṇādayo pañcāti viññāṇādayo vedanāpariyantā pañca etarahi idāni imasmiṁ attabhāveti vuttaṁ hoti. Avijjāsaṅkhārā gahitāva hontīti etthāpi pubbe viya kilesakammabhāvasāmaññato taṇhupādānaggahaṇena avijjā gahitā, bhavaggahaṇena saṅkhārā gahitāti daṭṭhabbaṁ. Atha vā bhave gahite tassa pubbabhāgā taṁsampayuttā vā saṅkhārā gahitāva honti, taṇhupādānaggahaṇena ca taṁsampayuttā yāya vā mūļho kammaṁ karoti, sā avijjāva hotīti taṇhupādānabhavaggahaṇena avijjāsaṅkhārā gahitāva honti. Teneva vuttaṁ—

"Idha paripakkattā āyatanānam moho avijjā, āyūhanā sankhārā, nikanti taṇhā, upagamanam upādānam, cetanā bhavo, iti ime pañca dhammā idha kammabhavasmim āyatim paṭisandhiyā paccayā"ti¹.

Tattha **idha paripakkattā āyatanānan**ti paripakkāyatanassa kammakaraṇakāle sammoho dassito. Sesaṁ heṭṭhā vuttanayameva.

Viññāṇanāmarūpasaļāyatanaphassavedanānaṁ jātijarābhaṅgāvatthā jātijarāmaraṇanti vuttāti avatthānaṁ gahaṇena avatthāvantā gahitāva honti tadavinābhāvatoti āha "jātijarāmaraṇāpadesena viññāṇādīnaṁ niddiṭṭhattā"ti. Apadesenāti jātijarāmaraṇānaṁ kathanena. Imeti viññāṇādayo. Āyatiṁ vipākavaṭṭanti paccuppannahetuto bhāvīnaṁ anāgatānaṁ gahitattā. Teti avijjādayo. Ākāratoti sarūpato avuttāpi tasmiṁ tasmiṁ saṅgahe ākirīyanti avijjāsaṅkhārādiggahaṇehi pakāsīyantīti ākārā, atītahetu-ādīnaṁ vā pakārā

ākārā. Tato ākārato. **Vīsatividhā hontī**ti atīte hetupañcakādibhedato vīsatividhā honti.

Saṅkhāraviññāṇānaṁ cettha antarā eko sandhīti hetuto phalassa avicchedappavattibhāvato hetuphalassa sambandhabhūto eko sandhi, tathā bhavajātīnamantarā. Vedanātaṇhānamantarā pana phalato hetuno avicchedappavattibhāvato phalahetusambandhabhūto eko sandhi. Phalabhūtopi hi dhammo aññassa hetusabhāvassa dhammassa paccayo hotīti.

Itīti vuttappakāraparāmasanam. Tenāha "catusankhepan"ti-ādi. Sabbākāratoti idha vuttehi ca avuttehi ca paṭiccasamuppādavibhange anantanayasamantapaṭṭhānādīsu ca āgatehi sabbehi ākārehi. Jānātīti avabujjhati. Passatīti dassanabhūtena ñāṇacakkhunā paccakkhato passati. Aññāti paṭivijjhatīti tesamyeva vevacanam. Tanti tam jānanam. Ñātaṭṭhenāti yathāsabhāvato jānanaṭṭhena. Pajānanaṭṭhenāti aniccādīhi pakārehi paṭivijjhanaṭṭhena.

Idāni yadatthamidam bhavacakkam idhānītam¹, tam dassetum "iminā"ti-ādi vuttam. Tattha te dhammeti te avijjādike dhamme. Yathābhūtam ñatvāti mahāvajirañānena yāthāvato jānitvā. Nibbindantoti balavavipassanāya nibbindanto. Virajjanto vimuccantoti ariyamaggehi virajjanto vimuccanto. Are hanīti sambandho. Tattha yadā bhagavā virajjati vimuccati, tadā are hanati nāma. Tato param pana abhisambuddhakkhaṇam gahetvā vuttam "hani vihani viddhamsesī'ti. Evampi arānam hatattā arahanti evam imināpi pakārena yathāvuttasamsāracakkassa saṅkhārādiarānam hatattā araham. Etthedam vuccati—

"Arā samsāracakkassa, hatā ñāṇāsinā yato. Lokanāthena tenesa, **arahan**ti pavuccatī"ti².

Aggadakkhiņeyyattāti uttamadakkhiņeyyabhāvato. Cakkavattino acetane cakkaratane uppanne tattheva loko pūjam karoti, aññattha pūjāvisesā pacchijjanti, kimangam pana sammāsambuddhe uppanneti dassento

^{1.} Bhavacakkam idāni tam (sabbattha) Visuddhimaggaṭīkāyam cha-anussatiniddese Buddhānussatikathāvannanāyam passitabbam.

^{2.} Visuddhi 1. 194 piṭṭhepi.

"uppanne tathāgate" ti-ādimāha. "Ekekam dhammakkhandham ekekavihārena pūjessāmī" ti vuttepi satthāramyeva uddissa katattā "bhagavantam uddissā" ti-ādi vuttam. Ko pana vādo aññesam pūjāvisesānanti yathāvuttato aññesam amahesakkhehi devamanussehi kariyamānānam nāti-uļārānam pūjāvisesānam arahabhāve kā nāma kathā. Paccayādīnam arahattāpi arahanti yathāvuttacīvarādipaccayānam pūjāvisesassa ca aggadakkhiņeyyabhāvena anucchavikattāpi araham. Imassapi atthassa sukhaggahaņattham idam vuccati—

"Pūjāvisesam saha paccayehi, Yasmā ayam arahati lokanātho. Atthānurūpam **arahan**ti loke, Tasmā jino arahati nāmametan"ti¹.

Asilokabhayenāti akittibhayena, ayasabhayena garahābhayenāti vuttam hoti. Raho pāpam karontīti "mā nam koci jaññā"ti rahasi pāpam karonti. Evamesa na kadāci karotīti esa bhagavā pāpahetūnam bodhimaṇḍayeva suppahīnattā kadācipi evam na roti. Hoti cettha—

"Yasmā natthi raho nāma, pāpakammesu tādino. Rahābhāvena tenesa, **arahaṁ** iti vissuto"ti¹.

Idāni sukhaggahaṇatthaṁ yathāvuttamatthaṁ sabbampi saṅgahetvā dassento āha "hoti cetthā"ti-ādi. Kilesārīna so munīti ettha gāthābandhasukhatthaṁ niggahītalopo daṭṭhabbo, kilesārīnaṁ hatattāti attho. Paccayādīna cārahoti etthāpi niggahītalopo vuttanayeneva daṭṭhabbo.

Arahanti ettha ayamaparopi nayo daṭṭhabbo—ārakāti araham, suvidūrabhāvato icceva attho. Kuto pana suvidūrabhāvatoti? Ye abhāvitakāyā abhāvitasīlā abhāvitacittā abhāvitapaññā, tato eva appahīnarāgadosamohā ariyadhammassa akovidā ariyadhamme avinītā ariyadhammassa adassāvinā appaṭipannā micchāpaṭipannā ca, tato suvidūrabhāvato. Vuttañhetam bhagavatā—

"Saṅghāṭikaṇṇe cepi me bhikkhave bhikkhu gahetvā piṭṭhito piṭṭhito anubandho assa pāde pādaṁ nikkhipanto, so ca hoti abhijjhālu kāmesu tibbasārāgo byāpannacitto paduṭṭhamanasaṅkappo muṭṭhassati asampajāno asamāhito vibbhantacitto pākatindriyo, atha kho so ārakāva mayhaṁ, ahañca tassa. Taṁ kissa hetu? Dhammañhi so bhikkhave bhikkhu na passati, dhammaṁ apassanto na maṁ passatī''ti¹.

Yathāvuttapuggalā hi sacepi sāyampātam satthu santikāvacarāva siyum², Na te tāvatā "satthu sanikā"ti vattabbā, tathā satthāpi nesam. Iti asappurisānam ārakā dūreti araham. Tenedam vuccati—

"Sammā na paṭipajjanti, ye nihīnāsayā narā. Ārakā tehi bhagavā, dūre tenārahaṁ mato"ti.

Tathā ārakāti **araham**, āsannabhāvatoti attho. Kuto pana āsannabhāvatoti? Ye bhāvitakāyā bhāvitasīlā bhāvitacittā bhāvitapaññā, tato eva pahīnarāgadosamohā ariyadhammassa kovidā ariyadhamme suvinītā ariyadhammassa dassāvino sammāpaṭipannā, tato āsannabhāvato. Vuttampi cetam bhagavatā—

"Yojanasate cepi me bhikkhave bhikkhu vihareyya, so ca hoti anabhijjhālu kāmesu na tibbasārāgo abyāpannacitto apaduṭṭhamanasaṅkappo upaṭṭhitassati sampajāno samāhito ekaggacitto saṁvutindriyo, atha kho so santikeva mayhaṁ, ahañca tassa. Taṁ kissa hetu? Dhammañhi so bhikkhave bhikkhu passati, dhammaṁ passanto maṁ passatī"ti¹.

Tathārūpā hi puggalā satthu yojanasatantarikāpi honti, na tāvatā te "satthu dūracārino"ti vattabbā, tathā satthāpi nesam. Iti sappurisānam ārakā āsanneti araham. Tenedam vuccati—

"Ye sammā paṭipajjanti, suppaṇītādhimuttikā. Ārakā³ tehi āsanne, tenāpi **arahaṁ** jino"ti.

^{1.} Khu 1. 256 pitthe.

^{2.} Santikāvacarā vasimsu (Sī)

^{3.} Bhagavā (Mūlapannāsake sāleyyakasuttatīkāyam)

Ye ime rāgādayo pāpadhammā yasmim santāne uppajjanti, tassa diṭṭhadhammikampi samparāyikampi anattham āvahanti, nibbānagāminiyā paṭipadāya ekamseneva ujuvipaccanīkabhūtā ca, te attahitam parahitanca paripūretum sammā paṭipajjantehi sādhūhi dūrato rahitabbā pariccajitabbā pahātabbāti rahā nāma, te ca yasmā bhagavato bodhimūleyeva ariyamaggena sabbaso pahīnā susamucchinnā. Yathāha—

"Tathāgatassa kho brāhmaṇa rāgo pahīno doso moho, sabbepi pāpakā akusalā dhammā pahīnā ucchinnamūlā tālāvatthukatā anabhāvaṁkatā āyatiṁ anuppādadhammā"ti¹.

Tasmā sabbaso na santi etassa rahāti arahoti vattabbe okārassa sānusāram akārādesam katvā "arahan"ti vuttam. Tenedam vuccati—

"Pāpadhammā rahā nāma, sādhūhi rahitabbato. Tesam sutthu pahīnattā, bhagavā **araham** mato"ti.

Ye te sabbaso pariññātakkhandhā pahīnakilesā bhāvitamaggā sacchikatanirodhā arahanto khīṇāsavā, ye ca sekhā appattamānasā anuttaram yogakkhemam patthayamānā viharanti, ye ca parisuddhappayogā kalyāṇajjhāsayā saddhāsīlasutādiguṇasampannā puggalā, tehi na rahitabbo na pariccajitabbo, te ca bhagavatāti **araham**. Tathā hi ariyapuggalā satthārā diṭṭhadhammassa paccakkhakaraṇato satthu dhammasarīrena avirahitāva honti. Yathāha āyasmā piṅgiyo—

"Passāmi nam manasā cakkhunāva, Rattindivam brāhmaņa appamatto. Namassamāno vivasemi rattim, Teneva maññāmi avippavāsam.

Saddhā ca pīti ca mano sati ca, Nā'penti'me gotamasāsanamhā. Yaṁ yaṁ disaṁ vajati bhūripañño, Sa tena teneva natohamasmī"ti¹.

Teneva ca te aññam satthāram na uddisanti. Yathāha—

"Aṭṭhānametaṁ bhikkhave anavakāso, yaṁ diṭṭhisampanno puggalo aññaṁ satthāraṁ uddiseyya, netaṁ ṭhānaṁ vijjatī"ti².

Kalyāṇaputhujjanāpi yebhuyyena satthari niccalasaddhā eva honti. Iti suppaṭipannehi purisavisesehi avirahitabbato tesañca avirahanato na santi etassa rahā pariccajanakā, natthi vā etassa rahā sādhūhi pariccajitabbatāti arahaṁ. Tenedaṁ vuccati—

"Ye sacchikatasaddhammā, ariyā suddhagocarā. Na tehi rahito hoti, nātho tenā**rahaṁ** mato"ti.

Rahoti ca gamanam vuccati, bhagavato ca nānāgatīsu paribbhamanasankhātam samsāre gamanam natthi kammakkhayakarena ariyamaggena bodhimūleyeva sabbaso sasambhārassa kammavaṭṭassa viddhamsitattā. Yathāha—

"Yena devūpapatyassa, gandhabbo vā vihaṅgamo. Yakkhattaṁ yena gaccheyyaṁ, manussattañca abbaje. Te mayhaṁ āsavā khīṇā, viddhastā vinaļīkatā"ti³.

Evam natthi etassa raho gamanam gatīsu paccājātītipi **araham.** Tenedam vuccati—

"Raho vā gamanam yassa, samsāre natthi sabbaso. Pahīnajātimarano, **araham** sugato mato"ti.

Pāsamsatto vā bhagavā **araham**. Akkharacintakā hi pasamsāyam arahasaddam vaņņenti. Pāsamsabhāvo ca bhagavato anaññasādhāraṇato yathābhuccaguṇādhigato sadevake loke suppatiṭṭhito. Tathā hesa anuttarena sīlena anuttarena samādhinā anuttarāya paññāya

anuttarāya vimuttiyā asamo asamasamo appaṭimo appaṭibhāgo appaṭipuggaloti evam tasmim tasmim guņe vibhajitvā vuccamāne paṇḍitapurisehi devehi brahmehi bhagavatā vā pana pariyosāpetum asakkuṇeyyarūpo. Iti pāsamsattāpi bhagavā araham. Tenedam vuccati—

"Guṇehi sadiso natthi, yasmā loke sadevake. Tasmā pāsaṁsiyattāpi, **arahaṁ** dvipaduttamo"ti.

Sabbasangahavasena pana—

Ārakā mandabuddhīnam, ārakā¹ ca vijānatam. Rahānam suppahīnattā, vidūnamaraheyyato. Bhavesu ca rahābhāvā, pāsamsā araham jinoti.

Ettāvatā ca "arahan"ti padassa sabbaso attho vibhatto hoti.

Idāni sammāsambuddhoti imassa attham vibhajitvā dassento āha "sammā sāmañcā"ti-ādi. Tattha sammāti aviparītam. Sāmanti sayameva, aparaneyyo hutvāti attho. Sambuddhoti hi ettha sam-saddo sayanti etassa atthassa bodhakoti daṭṭhabbo. Sabbadhammānanti anavasesānam neyyadhammānam. Katham panettha sabbadhammānanti ayam viseso labbhatīti? Ekadesassa aggahaṇato. Padesaggahaṇe hi asati gahetabbassa nippadesatāva viññāyati yathā "dikkhito² na dadātī"ti. Evañca katvā atthavisesanapekkhā kattari eva buddhasaddasiddhi veditabbā kammavacanicchāya abhāvato. "Sammā sāmañca buddhattā sammāsambuddho"ti ettakameva hi idha saddato labbhati, "sabbadhammānan"ti idam pana atthato labbhamānam gahetvā vuttam. Na hi bujjhanakiriyā avisayā yujjati.

Idāni tassā visayam "sabbadhamme"ti sāmañnato vuttam vibhajitvā dassetum "abhiñneyye dhamme"ti-ādi vuttam. Tattha abhiñneyyeti aniccādito lakkhaṇarasādito ca abhivisiṭṭhena ñāṇena jānitabbe catusaccadhamme. Abhiñneyyato buddhoti abhinneyyabhāvato bujjhi, pubbabhāge vipassanāpañnādīhi adhigamakkhaṇe maggapañnāya aparabhāge sabbañnutañnāṇādīhi añnāsīti attho. Ito paresupi eseva

^{1.} Āsannā (Mūlapaṇṇāsake sāleyyakasuttaṭīkāyam)

^{2.} Dukkhito (Syā) saddanītidhātumālā passitabbā.

nayo. Pariññeyye dhammeti aniccādivasena parijānitabbam dukkham ariyasaccamāha. Pahātabbeti samudayapakkhiye. Sacchikātabbeti nibbānam sandhāyāha. Bahuvacananiddeso panettha sopādisesādikam pariyāyasiddham bhedamapekkhitvā kato, uddeso vā ayam catusaccadhammānampi. Tathā hi vakkhati "cakkhu dukkhasaccan"ti-ādi. Uddeso ca avinicchitatthaparicchedassa dhammassa vasena karīyati. Uddesena hi uddisiyamānānam atthitāmattam vuccati, na paricchedoti aparicchedena bahuvacanena vuttam yathā "appaccayā dhammā, asankhatā dhammā"ti. Sacchikātabbeti vā phalavimuttīnampi gahaṇam, na nibbānassevāti bahuvacananiddeso kato. Evañca bhāvetabbeti ettha jhānānampi gahaṇam daṭṭhabbam. Teneva cāhāti selabrāhmaṇassa attano buddhabhāvam sādhento evamāha.

Kim pana bhagavā sayameva attano sammāsambuddhabhāvam sādhetīti? Sādheti mahākaruṇāya aññesam avisayato. Tattha "ekomhi sammāsambuddho, sabbābhibhū sabbavidūhamasmī"ti-ādīni¹ suttapadāni, idameva ca "abhiññeyyan"ti-ādi suttapadam etassa atthassa sādhakam. Tattha abhiññeyyanti iminā dukkhasaccamāha, bhāvetabbanti maggasaccam. Ca-saddo panettha avuttasamuccayattho, tena sacchikātabbassa gahaṇam veditabbam. Atha vā abhiññeyyanti imināva pārisesañāyena pariññeyyadhamme sacchikātabbadhamme ca dasseti. Tasmā buddhosmīti yasmā cattāri saccāni mayā buddhāni, saccavinimuttañca kiñci ñeyyam natthi, tasmā sabbampi ñeyyam buddhosmi, abbhaññāsinti attho. Selasuttatthakathāyam² pana idam vuttam—

"Abhiññeyyanti vijjā ca vimutti ca. Bhāvetabbam maggasaccam. Pahātabbam samudayasaccam. Hetuvacanena pana phalasiddhito tesam phalāni nirodhasaccadukkhasaccānipi vuttāneva honti. Evam sacchikātabbam sacchikatam, pariññātabbam pariññātanti idampettha sangahitamevāti catusaccabhāvanam catusaccabhāvanāphalañca vimuttim dassento 'bujjhitabbam bujjhitvā buddho jātosmī'ti yuttahetunā buddhabhāvam sāmetī'ti.

Tattha vijjāti maggavijjā vuttā ukkaṭṭhaniddesena. Vimuttīti phalavimutti. Kāmañcettha maggavijjāpi bhāvetabbabhāvena gahitā, sabbepi pana sabhāvadhammā abhiññeyyāti vijjāya abhiññeyyabhāvo vutto. Imināva nayena sabbesampi abhiññeyyabhāvo vutto evāti daṭṭhabbaṁ. Phalena vinā hetubhāvasseva abhāvato hetuvacanena phalasiddhi vuttāti veditabbaṁ. Nirodhassa hi sampāpanena maggassa hetubhāvo, dukkhassa nibbattanena taṇhāya samudayabhāvoti.

Evam saccavasena sāmaññato vuttamattham dvārārammanehi saddhim dvārappavattadhammehi ceva khandhādīhi ca saccavaseneva vibhajitvā dassetum "apica"ti-ādi āraddham. Mūlakāranabhāvenāti santesupi avijjādīsu aññesu kāraņesu tesampi mūlabhūtakāraņabhāvena. Taņhā hi kammassa vicittabhāvahetuto sahāyabhāvūpagamanato ca dukkhavicittatāya padhānakāraṇam. Samutthāpikāti uppādikā. Purimatanhāti purimabhavasiddhā taṇhā. **Ubhinnan**ti cakkhussa taṁsamudayassa ca. Appavattīti appavattinimittam. Nirodhappajānanāti sacchikiriyābhisamayavasena nirodhassa paţivijjhanā. **Ekekapaduddhā renā**ti "cakkhum cakkhusamudayo cakkhunirodho"ti-ādinā ekekakotthāsaniddhāranena. Tanhāyapi pariñneyyabhāvasabbhāvato upādānakkhandhogadhattā sankhāradukkhabhāvato ca dukkhasaccasangaham dassetum "rūpatanhādayo cha tanhākāyā"ti vuttam, tasmā vattamānabhave tanhā khandhapariyāpannattā sankhāradukkhabhāvato ca dukkhasaccam. Yasmim pana attabhāve sā uppajjati, tassa attabhāvassa mūlakāraņabhāvena samutthāpikā purimabhavasiddhā tanhā samudayasaccanti gahetabbā.

Kasiṇānīti kasiṇārammaṇikajjhānāni. Dvattiṁsākārāti dvattiṁsa koṭṭhāsā tadārammaṇajjhānāni ca. Nava bhavāti kāmabhavo rūpabhavo arūpabhavo saññībhavo asaññībhavo nevasaññīnāsaññībhavo ekavokārabhavo catuvokārabhavo pañcavokārabhavoti nava bhavā. Tattha bhavatīti bhavo, kāmarāgasaṅkhātena kāmena yutto bhavo, kāmasaṅkhāto vā bhavo kāmabhavo, ekādasa kāmāvacarabhūmiyo. Kāme pahāya rūparāgasaṅkhātena rūpena yutto bhavo, rūpasaṅkhāto vā bhavo rūpabhavo,

solasa rūpāvacarabhūmiyo. Kāmañca rūpañca pahāya arūparāgasankhātena arūpena yutto bhavo, arūpasankhāto vā bhavo arūpabhavo, catasso āruppabhūmiyo. Saññāvatam bhavo saññībhavo, saññā vā ettha bhave atthīti saññibhavo, so kāmabhavo ca asaññibhavamutto rūpabhavo ca nevasaññīnāsaññībhavamutto arūpabhavo ca hoti. Na saññībhavo asaññībhavo, so rūpabhavekadeso. Olārikattābhāvato nevasaññā, sukhumattassa sabbhāvato nāsaññāti nevasaññānāsaññā, tāya yutto bhavo nevasaññānāsaññābhavo. Atha vā olārikāva saññāva abhāvā sukhumāva ca bhāvā nevasaññā nāsaññā asmim bhaveti nevasaññānāsaññābhavo, so arūpabhavekadeso. Ekena rūpakkhandhena vokinno bhavo, ekena vā vokāro assa bhavassāti **ekavokārabhavo**, so asaññībhavo. Catūhi arūpakkhandhehi vokinno bhavo, catūhi vā vokāro assa bhavassāti catuvokārabhavo, so arūpabhavo eva. Pañcahi khandhehi vokinno bhavo, pañcahi vā vokāro assa bhavassāti pañcavokārabhavo, so kāmabhavo ca rūpabhavekadeso ca hoti. Vokāroti vā khandhānametamadhivacanam, tasmā eko vokāro assa bhavassāti ekavokārabhavoti evamādināpettha attho veditabbo. Cattāri **jhānānī**ti aggahitārammanavisesāni cattāri rūpāvacarajjhānāni. Vipākajjhānānam vā etam gahanam. Ettha ca kusaladhammānam upanissayabhūtā tanhāsamutthāpikā¹ purimatanhāti veditabbā. Kiriyadhammānam pana yattha te kiriyadhammā uppajjanti, tassa attabhāvassa kāranabhūtā tanhā. Anulomatoti ettha "sankhārā dukkhasaccam, avijjā samudayasaccan"ti iminā anukkamena yojetabbam.

Anubuddhoti bujjhitabbadhammassa anurūpato buddho. Tenāti yasmā² sāmaññato visesato ca ekekapaduddhārena sabbadhamme buddho, tasmā vuttam. Kim vuttanti āha "sammā sāmañca sabbadhammānam buddhattā"ti, sabbassapi ñeyyassa sabbākārato aviparītam sayameva abhisambhuddhattāti attho. Imināssa paropadesarahitassa sabbākārena

sabbadhammāvabodhanasamatthassa ākankhappaṭibaddhavuttino anāvaraṇañāṇasankhātassa sabbaññutaññāṇassa adhigamo dassito.

Nanu ca sabbaññutaññānato aññam anāvaranañānam, aññathā "cha asādhāranañānāni buddhañānānī''ti vacanam virujjhevyāti? Na virujjhati visayappavattibhedavasena aññehi asādhāranabhāvadassanattham ekasseva ñānassa dvidhā vuttattā. Ekameva hi tam ñānam anavasesasankhatasankhatasammutidhammavisayataya sabbaññutaññanam, tattha ca āvaranābhāvato nissangacāramupādāya anāvaranañānanti vuttam. Yathāya patisambhidāyam¹ "sabbam sankhatamasankhatam anavasesam jānātīti sabbañnutannānam, tattha āvaranam natthīti anāvarananānan"ti-ādi. Tasmā natthi nesam atthato bhedo, ekantena cetam evamicchitabbam. Aññathā sabbaññutānāvaranañānānam sādhāranatā asabbadhammārammanatā ca āpajjeyya. Na hi bhagavato ñānassa anumattampi āvaranam atthi, anāvaranañānassa asabbadhammārammanabhāve yattha tam na pavattati, tatthāvaranasabbhāvato anāvaranabhāvoyeva na siyā. Atha vā pana hotu aññameva anāvaranañānam sabbaññutaññānato, idha pana sabbattha appatihatavuttitāya anāvaranañānanti sabbaññutaññānameva adhippetam, tassa cādhigamanena bhagavā sabbaññū sabbavidū sammāsambuddhoti ca vuccati na sakimyeva sabbadhammāvabodhanato. Tathā ca vuttam patisambhidāyam² "vimokkhantikametam buddhānam bhagavantānam bodhiyā mūle saha sabbañnutannānassa patilābhā sacchikā pannatti yadidam buddho"ti. Sabbadhammāvabodhanasamatthañāṇasamadhigamena hi bhagavato santāne anavasesadhamme paţivijjhitum samatthatā ahosīti.

Etthāha—kim panidam ñāṇam pavattamānam sakimyeva sabbasmim visaye pavattati, udāhu kamenāti. Kiñcettha—yadi tāva sakimyeva sabbasmim visaye pavattati, atītānāgatapaccuppanna-ajjhattabahiddhādibhedabhinnānam sankhatadhammānam asankhatasammutidhammānañca ekajjham upaṭṭhāne dūrato cittapaṭam pekkhantassa viya paṭivibhāvenāvabodho³ na siyā, tathā sati "sabbe

^{1.} Khu 9. 125 pitthe.

^{2.} Khu 9. 172 pitthe.

^{3.} Visayapatibhāgenāvabodho (Sī), viya patibhāgenāvabodho (Syā)

dhammā anattā''ti vipassantānaṁ anattākārena viya sabbadhammā anirūpitarūpena bhagavato ñāṇassa visayā hontīti āpajjati. Yepi¹ "sabbañeyyadhammānaṁ thitalakkhaṇavisayaṁ vikapparahitaṁ sabbakālaṁ buddhānaṁ ñāṇaṁ pavattati, tena te sabbavidūti vuccanti, evañca katvā 'caraṁ samāhito nāgo, tiṭṭhantopi samāhito'ti idampi vacanaṁ suvuttaṁ hotī'ti vadanti, tesampi vuttadosā nātivatti, ṭhitalakkhaṇārammaṇatāya ca atītānāgatasammutidhammānaṁ tadabhāvato ekadesavisayameva bhagavato ñāṇaṁ siyā, tasmā sakiṁyeva ñāṇaṁ pavattatīti na yujjati.

Atha kamena sabbasmim visaye ñāṇam pavattatīti. Evampi na yujjati. Na hi jātibhūmisabhāvādivasena disādesakālādivasena ca anekabhedabhinne ñeyye kamena gayhamāne tassa anavasesappaṭivedho sambhavati apariyantabhāvato ñeyyassa. Ye pana "atthassa avisamvādanato ñeyyassa ekadesam paccakkham katvā sesepi evanti adhimuccitvā vavatthāpanena sabbaññū bhagavā, tañca ñāṇam na anumānañāṇam samsayābhāvato. Samsayānubaddhañhi loke anumānañāṇam"ti vadanti, tesampi tam na yuttam. Sabbassa hi appaccakkhabhāve atthāvisamvādanena ñeyyassa ekadesam paccakkham katvā sesepi evanti adhimuccitvā vavatthāpanassa asambhavato. Yañhi tam sesam, tam appaccakkhanti.

Atha tampi paccakkham tassa sesabhāvo eva na siyāti? Sabbametam akāraṇam. Kasmā? Avisayavicāraṇabhāvato. Vuttañhetam bhagavatā "buddhavisayo bhikkhave acinteyyo na cintetabbo, yo cinteyya, ummādassa vighātassa bhāgī assā"ti². Idam panettha sanniṭṭhānam—yam kiñci bhagavatā ñātum icchitam sakalam ekadeso vā, tattha tattha appaṭihatavuttitāya paccakkhato ñāṇam pavattati niccasamādhānañca vikkhepābhāvato. Ñātum icchitassa ca sakalassa avisayabhāve tassa ākaṅkhappaṭibaddhavuttitā na siyā, ekantenevassā icchitabbā "sabbe dhammā buddhassa bhagavato āvajjanappaṭibaddhā ākaṅkhappaṭibaddhā manasikārappaṭibaddhā cittuppādappaṭibaddhā"ti³ vacanato. Atītānāgatavisayampi bhagavato ñāṇam anumānāgamatakkagahaṇavirahitattā paccakkhameva.

Nanu ca etasmimpi pakkhe yadā sakalam ñātum icchitam, tadā sakimyeva sakalavisayatāya anirūpitarūpena bhagavato ñāṇam pavatteyyāti vuttadosā nātivattiyevāti? Na, tassa visodhitattā. Visodhito hi so buddhavisayo acinteyyoti. Aññathā pacurajanañāṇasamānavuttitāya buddhānam bhagavantānam ñāṇassa acinteyyatā na siyā, tasmā sakaladhammārammaṇampi tam ekadhammārammaṇam viya suvavatthāpiteyeva te dhamme katvā pavattatīti idamettha acinteyyam, "yāvatakam ñeyyam, tāvatakam ñāṇam. Yāvatakam ñāṇam, tāvatakam ñeyyam. Ñeyyapariyantikam ñāṇam, ñāṇapariyantikam ñeyyam"ti¹ evamekajjham visum sakim kamena vā icchānurūpam sammā sāmam sabbadhammānam buddhattā sammāsambuddho.

Vijjāhīti ettha vindiyam vindatīti vijjā, yāthāvato upalabbhatīti attho. Attano vā paṭipakkhassa vijjhanaṭṭhena vijjā, tamokkhandhādikassa padālanaṭṭhenāti attho. Tato eva attano visayassa viditakaraṇaṭṭhenapi vijjā. Sampannattāti samannāgatattā paripuṇṇattā vā, avikalattāti attho. Tatrāti ambaṭṭhasutte. Manomayiddhiyāti ettha "idha bhikkhu imamhā kāyā aññam kāyam abhinimmināti rūpim manomayam sabbaṅgapaccaṅgam ahīnindriyan"ti² iminā nayena āgatā iddhi sarīrabbhantare aññasseva jhānamanena nibbattattā manomayassa sarīrassa nibbattivasena pavattā manomayiddhi nāma. Cha abhiññāti āsavakkhayañāṇena saddhim iddhividhādikā pañcābhiññāyo. Tissannam aṭṭhannañca vijjānam tattha tattha sutte gahaṇam veneyyajjhāsayavasenāti daṭṭhabbam. Satta saddhammā nāma saddhā hirī ottappam bāhusaccam vīriyam sati paññā ca. Ye sandhāya vuttam "idha bhikkhu saddho hoti, hirimā, ottappī, bahussuto, āraddhavīriyo, upaṭṭhitassati, paññavā hotī"ti³. Cattāri jhānānīti yāni kānici cattāri rūpāvacarajjhānāni.

Kasmā panettha sīlādayoyeva pannarasa "caraṇan"ti vuttāti codanam sandhāyāha "ime meva hī"ti-ādi. Tena tesam sikkhattayasangahato nibbānupagamane ekamsato sādhanabhāvamāha. Idāni tadatthasādhanāya āgadham dassento "yathāhā"ti-ādimāha.

Bhagayāti-ādi vuttassevatthassa nigamanavasena vuttam. Nanu cāyam vijjācaranasampadā sāvakesupi labbhatīti? Kiñcāpi labbhati, na pana tathā, yathā bhagavatoti dassetum "tattha vijjāsampadā"ti-ādi vuttam. Āsavakkhayavijjāya sabbaññubhāvasiddhito āha "vijiāsampadā bhagayato" sabbaññutam pūretvā thitā"ti. Catūsu jhānesu antogadhabhāvena caranadhammapariyāpannattā karunābrahmavihārassa yathāraham tassa ca mahākarunāsamāpattivasena asādhāranasabhāvassa bhagavati upalabbhanato āha "caranasampadā mahākārunikatam pūretvā thitā"ti. Yathā sattānam anattham parivajjetvā atthe niyojanam paññāya vinā na hoti, evam nesam atthānatthajānanam satthu karunāya vinā na hotīti ubhayampi ubhayattha sakiccakameva¹ siyā. Yattha pana yassā padhānabhāvo, tam dassetum "so sabbaññutāyā"ti-ādi vuttam. Yathā tam vijjācaranasampannoti ettha tanti nipātamattam, yathā aññopi vijjācaranasampanno niyojeti, tathā ayanti attho. Tena vijjācaranasampannassevāyam āvenikā patipattīti dasseti. Sā panāyam satthu vijjācaranasampadā sāsanassa nivyānikatāva sāvakānam sammāpatipattiyā ekantakārananti dassetum "tenassā"ti-ādi vuttam. Tattha attantapādayoti ādi-saddena parantapa-ubhayantapā gahitā. Sesam suviññeyyameva.

Ettha ca vijjāsampadāya satthu paññāmahattam pakāsitam hoti, caraṇasampadāya karuṇāmahattam. Tesu paññāya bhagavato dhammarajjappatti, karuṇāya dhammasamvibhāgo. Paññāya samsāradukkhanibbidā, karuṇāya samsāradukkhasahanam. Paññāya paradukkhaparijānanam, karuṇāya paradukkhapatikārārambho. Paññāya parinibbānābhimukhabhāvo, karuṇāya tadadhigamo. Paññāya sayam taraṇam, karuṇāya paresam tāraṇam. Paññāya buddhabhāvasiddhi, karuṇāya buddhakiccasiddhi. Karuṇāya vā bodhisattabhūmiyam samsārābhimukhabhāvo, paññāya tattha anabhirati, tathā karuṇāya paresam abhimsāpanam, paññāya sayam parehi abhāyanam. Karuṇāya param rakkhanto attānam rakkhati, paññāya attānam rakkhanto param rakkhati. Tathā karuṇāya aparantapo, paññāya anattantapo, tena attahitāya paṭipannādīsu

catūsu puggalesu catutthapuggalabhāvo siddho hoti. Tathā karuṇāya lokanāthatā, paññāya attanāthatā. Karuṇāya cassa ninnatābhāvo, paññāya unnamābhāvo. Tathā karuṇāya sabbasattesu janitānuggaho, paññānugatattā na ca na sabbattha virattacitto, paññāya sabbadhammesu virattacitto, karuṇānugatattā na ca na sabbasattānuggahāya pavatto. Yathā hi karuṇā bhagavato sinehasokavirahitā, evaṁ paññā ahaṁkāramamaṁkāravinimuttāti aññamaññavisodhitā paramavisuddhā guṇavisesā vijjācaraṇasampadāhi pakāsitāti daṭṭhabbaṁ.

Idāni sugatoti imassa attham dassento āha "sobhanagamanattā"ti-ādi. "Gate ṭhite"ti-ādīsu gamanampi gatanti vuccatīti āha "gamanampi hi gatanti vuccatī"ti. "Sobhananti subham, subhabhāvo visuddhatāya, visuddhatā dosavigamenāti āha "parisuddhamanavajjan"ti. Gamananca nāma bahuvidhanti idhādhippetam gamanam dassento "ariyamaggo"ti āha. So hi nibbānassa gati adhigamoti ca katvā gatam gamananti ca vuccati. Idāni tasseva gamane kāraṇam dassetum "tena hesā"ti-ādi vuttam. Khemam disanti nibbānam. Asajjamānoti paripanthābhāvena sugatigamanepi asajjanto saṅgam akaronto, pageva itarattha. Atha vā ekāsane nisīditvā khippābhiñāvaseneva catunnampi maggānam paṭiladdhabhāvato asajjamāno abajjhanto gato. Yam gamanam gacchanto sabbagamanattham āvahati, sabbañca anuttaram sampattim āvahati, tadeva sobhanam nāma, tena ca bhagavā gatoti āha "iti sobhanagamanattā sugato"ti sobhanattho susaddoti katvā.

Asundarānam dukkhānam sankhārappavattīnam abhāvato accantasukhattā ekantato sundaram nāma asankhatā dhātūti āha "sundarancesa ṭhānam gato amatam nibbānan"ti. Tenāha bhagavā "nibbānam paramam sukhan"ti¹. Sammāti suṭṭhu. Suṭṭhu gamananca nāma paṭipakkhena anabhibhūtassa gamananti āha "pahīne kilese puna apaccāgacchanto"ti, pahīnānam puna asamudācāravasena apaccāgacchanto. Vuttamevattham āgamam dassetvā vibhāvento āha "vuttancetan"ti-ādi. Etanti tena tena maggena pahīnakilesānam puna apaccāgamanam, idanca sikhāppattam sammāgamanam, yāya

āgamanīyapaṭipadāya siddham, sāpi sammāgamanamevāti evampi bhagavā sugatoti dassetum "sammā vā āgato"ti-ādi vuttam. Sammāpaṭipattiyāti sammāsambodhiyā sampāpane aviparītapaṭipattiyā. Sabbalokassa hitasukhameva karontāti etena mahābodhiyā paṭipadā avibhāgena sabbasattānam sabbadā hitasukhāvahabhāveneva pavattatīti dasseti. Sassatam ucchedanti ime ante anupagacchanto gatoti etena paṭiccasamuppādagatim dasseti. Kāmasukham attakilamathanti ime anupagacchanto gatoti etena ariyamaggagatim dasseti.

Tatrāti yuttatthāne yuttasseva bhāsane. Nipphādetabbe sādhetabbe cetam bhummam. Abhūtanti abhūtattham. Atthamukhena hi vācāya abhūtatā bhūtatā vā. Atacchanti tasseva vevacanam. Anatthasamhitanti ditthadhammikena samparāyikena vā anatthena samhitam anatthasamhitam, anatthavaham. Na atthoti anattho, atthassa patipakkho abhavo ca, tena samhitam. Pisunavācam samphappalāpañcāti attho. Evamettha catubbidhassapi vacīduccaritassa sangaho datthabbo. Ettha ca pathamā vācā sīlavantam "dussīlo"ti, acandālādim "candālo"ti-ādinā bhāsamānassa datthabbā. Dutiyā dussīlam "dussīlo"ti, candālādimeva "candālo"ti-ādinā avinayena bhāsamānassa. Tatiyā nerayikādikassa nerayikādibhāvavibhāvanīkathā yathā "āpāyiko devadatto nerayiko"ti-ādikā. Catutthī "vedavihitena yaññavidhinā pānātipātādikatam sugatim āvahatī'ti lokassa byāmohanakathā. Pañcamī bhūtena pesuññupasamhārā kathā. Chatthā yuttapattatthāne pavattitā dānasīlādikathā veditabbā. Evam sammā gadattāti yathāvuttam abhūtādim vajjetvā bhūtam taccham atthasamhitam piyam manapam tato eva samma sutthu gadanato sugato. Āpāthagamanamattena kassapi appiyampi hi bhagavato vacanam piyam manāpameva atthasiddhiyā lokassa hitasukhāvahattā. Ettha pana da-kārassa ta-kāram katvā "sugato"ti vuttanti datthabbam.

Aparo nayo—sobhanam gatam gamanam etassāti **sugato**. Bhagavato hi veneyyajanupasankamanam ekantena tesam hitasukhanipphādanato sobhanam bhaddakam. Tathā lakkhanānubyanjanappaṭimanḍitarūpakāyatāya dutavilambitakhalitānukaddhananippīlanukkutikakutilākulatādidosavirahitam

vilāsitarājahamsavasabhavāraṇamigarājagamanam kāyagamanam ñānagamanañca

vipulanimmalakaruṇāsativīriyādiguṇavisesahitamabhinīhārato yāva mahābodhi¹ anavajjatāya sattānaṁ hitasukhāvahatāya ca sobhanameva. Atha vā sayambhūñāṇena sakalampi lokaṁ pariññābhisamayavasena parijānanto sammā gato avagatoti **sugato**. Tathā lokasamudayaṁ pahānābhisamayavasena pajahanto anuppattidhammataṁ āpādento sammā gato atītoti sugato. Lokanirodhaṁ nibbānaṁ sacchikiriyābhisamayavasena sammā gato adhigatoti sugato. Lokanirodhagāminiṁ paṭipadaṁ bhāvanābhisamayavasena sammā gato paṭipannoti sugato. Tathā yaṁ imassa sadevakassa lokassa diṭṭhaṁ sutaṁ mutaṁ viññātaṁ pattaṁ pariyesitaṁ ñātaṁ anuvicaritaṁ manasā, sabbaṁ taṁ hatthatale āmalakaṁ viya sammā paccakkhato gato abbhaññāsīti sugato.

Idāni lokavidūti imassa attham pakāsento āha "sabbathā viditalokattā"ti-ādi. Tattha sabbathāti sabbappakārena, yo yo loko yena yena pakārena veditabbo, tena tena pakārenāti attho. Te pana pakāre dassetum "sabhāvato"ti-ādi vuttam. Tattha sabhāvatoti dukkhasabhāvato. Sabbo hi loko dukkhasabhāvo. Yathāha "samkhittena pancupādānakkhandhā dukkhā"ti. Samudayatoti yato samudeti, tato tanhādito. Nirodhatoti yattha so nirujjhati, tato visankhārato. Nirodhūpāyatoti yena vidhinā so nirodho pattabbo, tato ariyamaggato ito aññassa pakārassa abhāvā. Iti "sabbathā lokam avedī"ti vatvā tadatthasādhakam suttam dassento "yattha kho āvuso"ti-ādimāha. Idañca suttam "yattha kho bhante na jāyati -pa- na upapajjati, sakkā nu kho so bhante gamanena lokassa anto ñātum vā daṭṭhum vā pāpunitum vā"ti² okāsalokassa gatim sandhāya rohitadevaputtena puṭṭho bhagavā abhāsi. Tattha na jāyatīti-ādinā ujukam jāti-ādīni paṭikkhipitvā na cavati na upapajjatīti padadvayena aparāparam cavanupapatanāni paṭikkhipati. Keci pana

"na jāyatīti-ādi gabbhaseyyakādivasena vuttam, itaram opapātikavasenā"ti vadanti. **Tan**ti jāti-ādirahitam. **Gamanenā**ti padasā gamanena. **Lokassantan**ti sankhāralokassa antabhūtam nibbānam. **Nāteyyan**ti jānitabbam. **Daṭṭheyyan**ti daṭṭhabbam. **Patteyyan**ti pattabbam. "Nātāyam diṭṭhāyam pattāyan"ti vā pāṭho, tattha gamanena lokassantam ñātā ayam diṭṭhā ayam pattā ayanti na vadāmīti attho. **Ayan**ti nibbānatthiko.

Kāmam padasā gamanena gantvā lokassantam nātum daṭṭhum pattum vā na sakkā, api ca parimitaparicchinnaṭṭhāne tam paññāpetvā dassemīti dassento "api cā"ti-ādimāha. Tattha byāmamatte kaļevareti byāmappamāņe attabhāve. Iminā rūpakkhandham dasseti. Sasaññimhīti saññāya sahite. Iminā saññāsīsena vedanādayo tayo khandhe dasseti saññāsahitattā eva. Samanaketi saviññāṇaketi attho. Iminā viññāṇakkhandham dasseti, aviññāṇake pana utusamuṭṭhānarūpasamudāyamatte paññāpetum na sakkāti adhippāyo. Lokanti khandhādilokam. Lokanirodhanti tassa lokassa nirujjhanam nibbānameva vā. Nibbānampi hi khandhe paṭicca paññāpanato sarīrasmimyeva paññāpeti. Adesampi hi tam yesam nirodho, tesam vasena desatopi upacāravasena niddisīyati yathā "cakkhum loke piyarūpam sātarūpam, etthesā taṇhā pahīyamānā pahīyati, ettha nirujjhamānā nirujjhatī"ti¹.

Gamanenāti pākatikagamanena. Lokassantoti saṅkhāralokassa anto antakiriyāya hetubhūtaṁ nibbānaṁ. Kudācananti kadācipi. Appatvāti aggamaggena anadhigantvā. Pamocananti pamutti nissaraṇaṁ. Tasmāti yasmā lokantaṁ appatvā vaṭṭadukkhato mutti natthi, tasmā. Haveti nipātamattaṁ. Lokavidūti sabhāvādito sabbaṁ lokaṁ vijānanto. Sumedhoti sundarapañño. Lokantagūti pariññābhisamayena lokaṁ viditvā pahānābhisamayena lokantagū. Maggabrahmacariyassa pariniṭṭhitattā vusitabrahmacariyo. Sabbesaṁ kilesānaṁ samitattā catusaccadhammānaṁ vā abhisamitattā samitāvī. Nāsīsatīti na pattheti, yathā imaṁ lokaṁ, evaṁ parañca lokaṁ nāsīsati appaṭipandhikattā.

Evam yadipi lokavidutā anavasesato dassitā sabhāvādito dassitatā, loko pana ekadeseneva vuttoti tam anavasesato dassetum "api ca tayo lokā"ti-ādi vuttam. Tattha indriyabaddhānam khandhānam samūho santāno ca sattaloko. Rūpādīsu sattavisattatāya satto, lokīyati ettha kusalākusalam tabbipāko cāti loko. Anindriyabaddhānam rūpādīnam samūho santāno ca okāsaloko lokīyanti ettha jangamā thāvarā ca tesanca okāsabhūtoti katvā. Tadādhāratāya hesa "bhājanaloko"tipi vuccati. Ubhayepi khandhā sankhāraloko paccayehi sankharīyanti lujjanti palujjanti cāti. Āhāraṭṭhitikāti paccayaṭṭhitikā, paccayāyattavuttikāti attho. Paccayattho hettha āhārasaddo "ayamāhāro anuppannassa vā kāmacchandassa uppādāyā"ti-ādīsu¹ viya. Evanhi "sabbe sattā"ti iminā asannasattāpi pariggahitā honti. Sā panāyam āhāraṭṭhitikatā nippariyāyato sankhāradhammo, na sattadhammoti āha "āhāraṭṭhitikāti āgataṭṭhāne sankhāraloko veditabbo"ti.

Yadi evam "sabbe sattā"ti idam kathanti? Puggalādhiṭṭhānadesanāti nāyam doso. Kasmā pana bhagavā katthaci puggalādhiṭṭhānam katvā dhammam desetī, katthaci dhammādhiṭṭhānam katvā dhammam desetīti? Desanāvilāsato veneyyajjhāsayato ca. Desanāvilāsappattā hi buddhā bhagavanto, te yathāruci katthaci puggalādhiṭṭhānam katvā katthaci dhammādhiṭṭhānam katvā dhammam desenti. Ye vā pana veneyyā sāsanakkamam anotiṇṇā, tesam puggalādhiṭṭhānam desanam desenti. Ye ca otiṇṇā, tesam dhammādhiṭṭhānam, sammutisaccavisayā puggalādhiṭṭhānā desanā, itarā paramatthasaccavisayā. Purimā karuṇānukūlā, itarā paññānukūlā. Saddhānusārīgottānam vā purimā. Te hi puggalappamāṇikā, pacchimā dhammānusārīgottānam. Saddhācaritatāya vā lokādhipatīnam valena puggalādhiṭṭhānā, paññācaritatāya dhammādhipatīnam vasena dhammādhiṭṭhānā. Purimā ca neyyatthā, pacchimā nītatthā. Iti bhagavā tam tam visesam apekkhitvā tattha tattha duvidham desanam desetīti veditabbam.

Diṭṭhigatikānam sassatādivasena "attā loko"ti parikappanā yebhuyyena sattavisayā, na saṅkhāravisayāti āha "sassato lokoti vā asassato lokoti vāti āgataṭṭhāne sattaloko veditabbo"ti. Yāvatā candimasūriyā pariharantīti yattake ṭhāne candimasūriyā parivattanti paribbhamanti. Disā bhanti vorocamānāti tesam paribbhamaneneva tā tā tam disā pabhassarā hutvā virocanti. Atha vā disāti upayogabahuvacanam, tasmā sayam virocamānā candimasūriyā yattakā disā bhanti sobhenti obhāsayantīti attho. Tāva sahassadhā lokoti tattakena pamāṇena sahassappakāro okāsaloko, sahassalokadhātuyoti attho. "Tāvasahassavā"ti vā pāṭho, tāva tattakam sahassam assa atthīti tāvasahassavā. Etthāti sahassalokadhātusaṅkhāte loke.

Tampīti tividhampi lokam. Sabbathā avedīti sabbappakārato paṭivijjhi. Katham paṭivijjhīti āha "tathā hī"ti-ādi. Tathā hissāti imassa "sabbathā vidito"ti etena sambandho. Assāti anena bhagavatā. Eko loko sabbe sattā āhāraṭṭhitikāti kāya puggalādhiṭṭhānāya kathāya sabbesam sankhārānam paccayāyattavuttitā vuttā, tāya sabbo sankhāraloko ekavidho pakārantarassa abhāvato. Dve lokāti-ādīsupi imināva nayena attho veditabbo. Nāmaggahaṇena cettha nibbānassa aggahaṇam tassa alokasabhāvattā. Nanu ca "āhāraṭṭhitikā"ti ettha paccayāyattavuttitāya maggaphaladhammānampi lokatā āpajjatīti? Nāpajjati pariññeyyānam dukkhasaccadhammānam idha lokoti adhippetattā. Atha vā na lujjati na palujjatīti yo gahito tathā na hoti, so lokoti tamgahanarahitānam lokuttarānam natthi lokatā.

Tisso vedanāti sukhadukkha-upekkhāvasena. Cattāro āhārāti kabaļīkārāhāro phassāhāro manosañcetanāhāro viññāṇāhāroti cattāro āhārā. Tattha kabaļīkārāhāro ojaṭṭhamakaṁ rūpaṁ āharatīti āhāro. Phasso tisso vedanā āharatīti āhāro. Manosañcetanā tīsu bhavesu paṭisandhiṁ āharatīti āhāro. Viññāṇaṁ paṭisandhikkhaṇe nāmarūpaṁ āharatīti āhāro.

Upādānānam ārammaṇabhūtā khandhā **upādānakkhandhā. Cha ajjhattikāni āyatanānī**ti cakkhāyatanādimanāyatanapariyantāni. **Satta viññāṇaṭṭhitiyo**ti nānattakāyā nānattasaññino, nānattakāyā ekattasaññino, ekattakāyā nānattasaññino, ekattakāyā ekattasaññino, heṭṭhimāca tayo āruppāti imā satta "viññāṇam tiṭṭhati etthāti viññāṇaṭṭhitiyo"ti vuccanti. Tattha nānattam kāyo etesam, nānatto vā kāyo etesanti nānattakāyā, nānattasaññā etesam atthīti nānattasaññino. Iminā nayena sesapadesupi attho veditabbo.

Sabbe manussā¹ chakāmāvacarā ca devā ekacce ca vinipātikā "nānattakāyā nānattasaññino"ti vuccanti. Aparimāņesu hi cakkavālesu aparimāṇānam manussānam vaṇṇasaṇṭhānādivasena dvepi ekasadisā natthi. Yepi katthaci yamakabhātaro vannena vā santhānena vā ekasadisā honti, tesampi ālokitavilokitakathitahasitagamanathānādīhi viseso hotiyeva, patisandhisaññā ca nesam tihetukāpi duhetukāpi ahetukāpi hoti, tasmā sabbepi manussā nānattakāyā nānattasaññino. Chakāmāvacaradevesu ca kesañci kāyo nīlo hoti, kesañci pītādivanno, patisandhisaññā ca nesam duhetukāpi tihetukāpi hoti, tasmā tepi nānattakāyā nānattasaññino. Ekacce vinipātikā pana catu-apāyavinimuttakā uttaramātā yakkhinī, piyankaramātā, dhammaguttāti evamādayo daṭṭhabbā. Etesañhi odātakālamanguracchavisāmavannādivasena ceva kisabhūlarassadīghādivasena ca kāyo nānā hoti, manussānam viya tihetukaduhetukāhetukavasena paţisandhisaññāpi, te pana devā viya na mahesakkhā, kapanamanussā viya appesakkhā dullabhaghāsacchādanā dukkhapīlitā viharanti, ekacce kālapakkhe dukkhitā junhapakkhe sukhitā honti, tasmā sukhasamussayato vinipatitattā sukhasamussayato vinipāto etesam atthīti vinipātikāti vuttā satipi devabhāve dibbasampattiyā abhāvato. Ye panettha tihetukā, tesam dhammābhisamayopi hoti. Piyankaramātā hi yakkhinī paccūsasamaye anuruddhattherassa dhammam sajjhāyato sutvā—

^{1.} Dī-Ttha 2. 99; Am-Ttha 3. 163 pitthādīsupi passitabbam.

"Mā saddam kari piyankara, bhikkhu dhammapadāni bhāsati. Apica dhammapadam vijāniya, paṭipajjema hitāya no siyā.

Pāņesu ca samyamāmase,

Sampajānamusā na bhaņāmase.

Sikkhema susīlyamattano,

Api muccema pisācayoniyā"ti1—

evam puttakam saññāpetvā tam divasam sotāpattiphalam pattā. Uttaramātā pana bhagavato dhammam sutvāva sotāpannā jātā. Evamimepi kāyassa ceva paṭisandhisaññāya ca nānattā "nānattakāyā nānattasaññino"tveva saṅkhyam gacchanti.

Brahmapārisajjabrahmapurohitamahābrahmasankhātā pana hīnamajjhimapanītabhedabhinnena pathamajjhānena nibbattā brahmakāyikā ceva catūsu apāyesu sattā ca "nānattakāyā ekattasaññino"ti vuccanti. Etesu hi brahmakāyikesu brahmapurohitānam kāyo brahmapārisajjehi pamānato vipulataro hoti, mahābrahmānam kāyo pana brahmapurohitehipi pamānato vipulataro hoti. Kāmañca nesam pabhāvasenapi kāyo hetthimahetthimehi ulārataro hoti, tam pana idha appamānam. Tathā hi parittābhādīnam parittasubhādīnañca kāye satipi pabhāvematte ekattavaseneva vavatthapīyatīti "ekattakāyā" tveva te vuccanti. Evamime brahmakāyikā kāyassa nānattā paṭhamajjhānavipākavasena pana paṭisandhisaññāya ca ekattā nānattakāyā ekattasaññino. Yathā ca te, evam catūsu apāyesu sattā. Nirayesu hi kesañci gāvutam, kesañci addhayojanam, kesañci yojanam attabhāvo hoti, devadattassa pana yojanasatiko jāto. Tiracchānesupi keci khuddakā, keci mahantā, pettivisayepi keci saṭṭhihatthā, keci asītihatthā honti, keci suvannā, keci dubbannā, tathā kālakañcikā² asurā. Api cettha dīghapitthikapetā nāma satthiyojanikāpi honti, patisandhisaññā pana sabbesampi akusalavipākāhetukāva hoti. Iti āpāyikāpi "nānattakāyā ekattasaññino"tveva sankhyam gacchanti.

Dutiyajjhānabhūmikā pana parittābhā appamāṇābhā ābhassarā "ekattakāyā nānattasaññino"ti vuccanti. Nesañhi sabbesaṁ kāyo ekappamāṇova hoti, paṭisandhisaññā pana dutiyatatiyajjhānavipākavasena nānā hoti.

Parittasubhā appamānasubhā subhakinhā pana tatiyajjhānabhūmikā ekattakāyā ekattasaññino. Tesam vuttanayena kāyassa ceva catutthajjhānavipākavasena patisandhisaññāya ca ekattā. "Vehapphalāpi imamyeva catutthaviññānatthitim bhajanti kāyassa ceva pañcamajihānavipākavasena patisandhisaññāya ca ekarūpattā. Suddhāvāsā pana apunarāvattanato vivattapakkhe thitā, na sabbakālikā. Kappasatasahassampi asankhyeyyampi buddhasuññe loke nuppajjanti, solasakappasahassabbhantare buddhesu uppajjantesuyeva uppajjanti, dhammacakkappavattissa bhagavato khandhāvāratthānasadisā honti, tasmā neva viññanatthitim, na sattavasam bhajanti"ti vadanti. Mahasīvatthero pana "na kho pana so sāriputta āvāso sulabharūpo, yo mayā anāvutthapubbo iminā dīghena addhunā aññatra suddhāvāsehi devehī"ti¹ iminā suttena "suddhāvāsāpi catutthaviññāṇaṭṭhitim catutthasattāvāsam bhajantī"ti vadati, tam appatibāhiyattā suttassa anuñnātam. Tasmā asañnasattam apanetvā parittasubhādīsu akanitthapariyosānāsu navasu bhūmīsu sattā "ekattakāyā ekattasaññino"ti gahetabbā.

Asaññasattā pana viññāṇābhāvā ettha saṅgahaṁ na gacchanti. Tathā hi anuppanne buddhe titthāyatane pabbajitā vāyokasiṇe parikammaṁ katvā catutthajjhānaṁ nibbattetvā tato vuṭṭhāya "dhī cittaṁ, dhī cittaṁ, cittassa nāma abhāvoyeva sādhu. Cittañhi nissāya vadhabandhādipaccayaṁ dukkhaṁ uppajjati, citte asati natthetan"ti khantiṁ ruciṁ uppādetvā aparihīnajjhānā kālaṁ katvā rūpapaṭisandhivasena asaññabhave nibbattanti. Yo yassa iriyāpatho manussaloke paṇihito ahosi, so tena iriyāpathena nibbattitvā pañca kappasatāni ṭhito vā nisinno vā nipanno vā hoti. Evaṁ cittavirāgabhāvanāvasena tesaṁ tattha viññāṇuppatti na hotīti viññāṇābhāvato viññāṇaṭṭhitiṁ te na bhajanti.

Nevasaññānāsaññāyatanam pana yatheva saññāya, evam viññāṇassapi sukhumattā viññāṇaṭṭhitīsu saṅgaham na gacchati. Tañhi saññāya viya viññāṇassapi saṅkhārāvasesasukhumabhāvappattattā paribyattaviññāṇakiccābhāvato neva viññāṇam, na ca sabbaso aviññāṇam hotīti nevaviññāṇā nāviññāṇam, tasmā paripphuṭaviññāṇakiccavantīsu viññāṇaṭṭhitīsu saṅgaham na gacchati. Tasmā vinipātikehi saddhim chakāmāvacaradevā manussā ca nānattakāyā nānattasaññino, paṭhamajjhānabhūmikā apāyasattā ca nānattakāyā ekattasaññino, dutiyajjhānabhūmikā akattakāyā nānattasaññino, tatiyajjhānabhūmikā asaññasattam vajjetvā sesā catutthajjhānabhūmikā ca ekattakāyā ekattasaññinoti imā catasso viññāṇaṭṭhitiyo nevasaññānāsaññāyatanam vajjetvā ākāsānañcāyatanādiheṭṭhimāruppattayena saddhim "satta viññāṇaṭṭhitiyo"ti veditabbā.

Aṭṭha lokadhammāti lābho alābho yaso ayaso nindā pasaṁsā sukhaṁ dukkhanti ime aṭṭha lokassa dhammattā lokadhammā. Ime hi sattalokassa avassaṁbhāvino dhammā, tasmā etehi vinimutto nāma koci satto natthi. Te hi aparāparaṁ kadāci lokaṁ anupatanti, kadāci te loko ca anupatati. Vuttampi cetaṁ "aṭṭhime bhikkhave lokadhammā lokaṁ anuparivattanti, loko ca aṭṭha lokadhamme anuparivattatī"ti¹. Ghāsacchādanādīnaṁ laddhi, tāni eva vā laddhabbato lābho. Tadabhāvo alābho. Lābhaggahaṇena cettha tabbisayo anurodho gahito, alābhaggahaṇena virodho. Evaṁ yasādīsupi tabbisaya-anurodhavirodhānaṁ gahaṇaṁ veditabbaṁ. Lābhe pana āgate alābho āgatoyeva hotīti lābho ca alābho ca vutto. Yasādīsupi eseva nayo. Tathā ca lohite sati tadupaghātavasena pubbo viya lābhādīsu anurodhe sati alābhādīsu virodho laddhāvasaro eva hoti.

Nava sattāvāsāti heṭṭhā vuttasattaviññāṇaṭṭhitiyo eva asaññasattacatutthāruppehi saddhiṁ "nava sattāvāsā"ti vuccanti. Sattā āvasanti etesūti sattāvāsā, nānattakāyanānattasaññī-ādibhedā sattanikāyā. Te hi sattanikāyā tappariyāpannānaṁ sattānaṁ tāya eva tappariyāpannatāya ādhāro viya vattabbatam arahanti samudāyādhāratāya avayavassa yathā "rukkhe sākhā"ti. Suddhāvāsānampi sattāvāsaggahaņe kāranam hetthā vuttameva.

Dasāyatanānīti arūpasabhāvam manāyatanam rūpārūpādimissakam dhammāyatananca ṭhapetvā kevalam rūpadhammānamyeva vasena cakkhāyatanādayo panca, rūpāyatanādayo pancāti dasāyatanāni vuttāni, manāyatanadhammāyatanehi pana saddhim tāniyeva "dvādasāyatanānī"ti vuttāni.

Kasmā panettha cakkhādayo "āyatanānī"ti vuccanti? Āyatanato¹ āyānam vā tananato āyatassa ca nayanato āyatanāni. Cakkhurūpādīsu hi tamtamdvārārammanā cittacetasikā dhammā sena sena anubhavanādinā kiccena āyatanti uṭṭhahanti ghaṭanti vāyamanti, te ca pana āyabhūte dhamme etāni tanonti vitthārenti, idañca anamatagge samsāre pavattam ativiya āyatam samsāradukkham yāva na nivattati, tāva nayanti pavattayanti, tasmā "āyatanānī"ti vuccanti. Api ca nivāsatthānatthena ākaratthena samosaranatthena sañjātidesatthena kāranatthena ca āyatanāni. Tathā hi loke "issarāyatanam vāsudevāyatanan"ti-ādīsu nivāsaṭṭhānam āyatananti vuccati. "Suvannāyatanam rajatāyatanan"ti-ādīsu ākaro. Sāsane pana "manorame āyatane, sevanti nam vihangamā"ti-ādīsu² samosaranatthānam. "Dakkhināpatho gunnam āyatanan"ti-ādīsu sañjātideso. "Tatra tatreva sakkhibhabbatam pāpuņātisati sati sati-āyatane"ti-ādīsu³ kāranam āyatananti vuccati. Cakkhu-ādīsu ca te te cittacetasikā dhammā nivasanti tadāyattavuttitāyāti cakkhādayo tesam nivāsatthānam. Cakkhādīsu ca te ākinnā tannissitattā tadārammanattā cāti cakkhādayova nesam ākaro. Tattha tattha vatthudvārārammaņavasena samosaraņato cakkhādayova nesam samosaranatthānam. Tannissayārammanabhāvena tattheva uppattito cakkhādayova nesam sañjātideso. Cakkhādīnam abhāve abhāvato cakkhādayova nesam kāraņanti yathāvutte natthena cakkhu ca tam āyatanañcāti cakkhāyatanam. Evam sesānipi.

^{1.} Abhi-Ttha 2. 42 pitthādīsupi passitabbam.

^{3.} Ma 3. 138; Am 1. 256; Am 2. 14 piṭṭhādīsu.

^{2.} Am 2. 36 pitthe.

Imāneva pana dvādasāyatanāni cakkhuviññānādichaviññānehi saddhim atthārasa vidahanādito "dhātuyo"ti vuccanti. Tathā hi cakkhādīsu ekeko dhammo yathāsambhavam vidahati, dhīyate, vidhānam, vidhīyate etāya, ettha vā dhīyatīti dhātūti vuccati. Lokiyā hi dhātuyo kāraņabhāvena vavatthitāva hutvā suvannarajatādidhātuyo viya suvannarajatādim, anekappakāram samsāradukkham vidahanti, bhārahārehi ca bhāro viya sattehi dhīyanti dhārīyanti, dukkhavidhānamattameva cetā avasavattanato. Etāhi ca kāranabhūtāhi samsāradukkham sattehi anuvidhīyati, tathāvihitañca tam etāsveva dhīyati thapīyati, tasmā "dhātuyo"ti vuccanti. Api ca yathā titthiyānam attā nāma sabhāvato natthi, na evametā, etā pana attano sabhāvam dhārentīti dhātuyo. Yathā ca loke vicittā haritālamanosilādayo selāvayavā "dhātuyo"ti vuccanti, evametāpi dhātuyo viya dhātuyo. Vicittā hetā ñānañeyyāvayavāti. Yathā vā sarīrasankhātassa samudāyassa avayavabhūtesu rasasonitādīsu aññamaññavisabhāgalakkhanaparicchinnesu dhātusamaññā, evametesupi pañcakkhandhasankhātassa attabhāvassa avayavesu dhātusamaññā veditabbā.

Aññamaññavisabhāgalakkhaṇaparicchinnā hete cakkhādayoti. Api ca **dhātū**ti nijjīvamattassetaṁ adhivacanaṁ. Tathā hi bhagavā "chadhāturo ayaṁ bhikkhu puriso"ti-ādīsu¹ jīvasaññāsamūhananatthaṁ dhātudesanamakāsi. Tasmā nijjīvaṭṭhenapi dhātuyoti vuccanti.

Ettha ca "āhāraṭṭhitikā"ti paccayāyattavuttitāvacanena saṅkhārānaṁ aniccatā, tāya ca "yadaniccaṁ taṁ dukkhaṁ, yaṁ dukkhaṁ tadanattā"ti² vacanato dukkhānattatā ca pakāsitā hontīti tīṇipi sāmaññalakkhaṇāni gahitāni. Nāmanti cattāro arūpino khandhā, te ca atthato phassādayo. Rūpanti bhūtupādāyarūpāni, tāni ca atthato pathavī-ādayoti aviseseneva salakkhaṇato saṅkhārā gahitā. Taggahaṇeneva ye te savisesā kusalādayo hetu-ādayo ca, tepi gahitā eva hontīti āha "iti ayaṁ saṅkhāralokopi sabbathā vidito"ti.

Evam sankhāralokassa sabbathā viditabhāvam dassetvā idāni sattalokassapi sabbathā viditabhāvam dassento "yasmā panesā"ti-ādimāha. Tattha āsayam jānātīti āgamma cittam seti etthāti āsayo migāsayo viya. Yathā migo gocarāya gantvā paccāgantvā tattheva vanagahane sayatīti so tassa āsayo, evam aññathā pavattitvāpi cittam āgamma yattha seti, so tassa āsayoti vuccati. So pana sassataditthi-ādivasena catubbidho. Vuttañca—

"Sassatucchedadiṭṭhī ca, khanti cevānulomikā. Yathābhūtañca yaṁ ñāṇaṁ, etaṁ āsayasadditan"ti.

Tattha sabbadiṭṭhīnaṁ sassatucchedadiṭṭhīhi saṅgahitattā sabbepi diṭṭhigatikā sattā imā eva dve diṭṭhiyo sannissitā. Yathāha "dvayanissito khvāyaṁ kaccāna loko yebhuyyena atthitañceva natthitañcā"ti¹. Atthitāti hi sassataggāho adhippeto, natthitāti ucchedaggāho. Ayaṁ tāva vaṭṭanissitānaṁ puthujjanānaṁ āsayo, vivaṭṭanissitānaṁ pana suddhasattānaṁ anulomikā khanti yathābhūtañāṇanti duvidho āsayo. Tattha "anulomikā khanti vipassanāñāṇaṁ, yathābhūtañāṇaṁ pana maggañāṇan"ti sammohavinodaniyā vibhaṅgaṭṭhakathāyaṁ² vuttaṁ. Taṁ catubbidhampi sattānaṁ āsayaṁ jānāti, jānanto ca tesaṁ diṭṭhigatānaṁ tesañca ñāṇānaṁ appavattikkhaṇepi jānāti. Vuttañhetaṁ—

"Kāmaṁ sevantaññeva jānāti 'ayaṁ puggalo kāmagaruko kāmāsayo kāmādhimutto'ti, kāmaṁ sevantaññeva jānāti 'ayaṁ puggalo nekkhammagaruko nekkhammādhimutto'ti"ādi³.

Anusayam jānātīti anu anu sayantīti anusayā, anurūpam kāraṇam labhitvā uppajjantīti attho. Etena nesam kāraṇalābhe uppajjanārahatam dasseti. Appahīnā hi kilesā kāraṇalābhe sati uppajjanti. Ke pana te? Kāmarāgādayo satta anāgatā kilesā, atītā paccuppannā ca tamsabhāvattā tathā vuccanti. Na hi dhammānam kālabhedena

^{1.} Sam 1. 257 pitthe.

^{2.} Abhi-Ṭtha 2. 440 pitthe.

^{3.} Khu 9. 118 pitthe Patisambhidāmagge.

sabhāvabhedo atthi, taṁ sattavidhaṁ anusayaṁ tassa tassa sattassa santāne paroparabhāvena¹ pavattamānaṁ jānāti.

Caritam jānātīti ettha cāritanti sucaritaduccaritam. Tañhi vibhange² caritaniddese niddiṭṭham. Atha vā caritanti cariyā veditabbā. Tā pana rāgadosamohasaddhābuddhivitakkavasena cha mūlacariyā, tāsam apariyanto antarabhedo, samsaggabhedo pana tesaṭṭhividho. Tam caritam sabhāvato samkilesato vodānato samuṭṭhānato phalato nissandatoti evamādinā pakārena jānāti.

Adhimuttim jānātīti ettha adhimuttīti ajjhāsayadhātu. Sā duvidhā hīnādhimutti panītādhimuttīti. Yāya hīnādhimuttikā sattā hīnādhimuttikeyeva sevanti, panītādhimuttikā ca panītādhimuttike eva. Sace hi ācariyupajjhāyā na sīlavanto honti, saddhivihārikā sīlavanto honti, te attano ācariyupajjhāyepi na upasankamanti, attanā sadise sāruppabhikkhūyeva upasankamanti. Sace ācariyupajjhāyā sāruppatikkhū, itare asāruppā, tepi na ācariyupajjhāye upasankamanti, attanā sadise hīnādhimuttike eva upasankamanti. Tipitakacūlābhayatthero kira nāgadīpe cetiyavandanāya pañcahi bhikkhusatehi saddhim gacchanto ekasmim gāme manussehi nimantito therena ca saddhim eko asāruppabhikkhu atthi, dhuravihārepi eko asāruppabhikkhu atthi, bhikkhusamghesu gāmam osarantesu te ubho janā kiñcāpi āgantukena nevāsiko, nevāsikena vā āgantuko na ditthapubbo, evam santepi ekato hutvā hasitvā hasitvā kathayamānā atthamsu. Thero disvā "sammāsambuddhena jānitvā **dhātusamyuttam**³ kathitan"ti āha. Evamayam hīnādhimuttikādīnam aññamaññopasevanādiniyāmikā ajjhāsayadhātu ajjhāsayabhāvo adhimuttīti vuccati, tam adhimuttim jānāti. "Imassa adhimutti hīnā, imassa panītā. Tatthāpi imassa mudu, imassa mudutarā, imassa mudutamā"ti-ādinā pativijjhati. Adhimuttiyā pana tikkhamudubhāvādiko indriyānam tikkhamudubhāvādinā veditabbo.

^{1.} Parovarabhāvena (Sī), paramparabhāvena (Ka)

^{3.} Sam 1. 358 pitthe.

Apparajakkheti paññāmaye akkhimhi appam parittam rāgadosamoharajam etesanti apparajakkhā, appam vā rāgādirajam etesanti apparajakkhā, anussadarāgādirajā sattā. Te apparajakkhe. Mahārajakkheti etthāpi eseva nayo, ussādarāgādirajā mahārajakkhā. Jānātīti "imassa rāgarajo appo, imassa dosarajo appo"ti-ādinā apparajakkhādike jānāti.

Tikkhindriyeti tikhinehi saddhādīhi indriyehi samannāgate. Mudindriyeti mudukehi saddhādīhi indriyehi samannāgate. Ubhayatthāpi upanissayabhūtindriyāni adhippetāni. Svākāreti sundarākāre, kalyāṇapakatike vivaṭṭajjhāsayeti attho. Yesam vā āsayādayo ākārā koṭṭhāsā sundarā, te svākārā. Viparītā dvākārā. Suviññāpayeti sammattaniyāmam viññāpetum sukare saddhe paññavante ca, ye vā kathitam kāraṇam sallakkhenti, sukhena sakkā honti viññāpetum, te suviññāpayā. Viparītā duviññāpayā. Bhabbe abhabbeti ettha ye ariyamaggappaṭivedhassa anucchavikā upanissayasampannā kammāvaraṇakilesāvaraṇavipākāvaraṇarahitā, te bhabbā. Viparītā abhabbā.

kammāvaraņakilesāvaraņavipākāvaraņarahitā, te **bhabbā**. Viparītā **abhabbā**. **Tasmāti** yasmā bhagavā aparimāņe satte āsayādito anavasesetvā jānāti, tasmā assa bhagavato sattalokopi sabbathā vidito.

Nanu ca sattesu pamāṇādipi jānitabbo atthīti? Atthi, tassa pana jānanam na nibbidāya virāgāya nirodhāyāti idha na gahitam, bhagavato pana tampi suviditam suvavatthāpitameva, payojanābhāvā desanam nāruļham. Tena vuttam—

"Atha khobhagavā parittam nakhasikhāyam pamsum āropetvā bhikkhū āmantesi 'tam kim maññatha bhikkhave, katamam nu kho bahutaram yo vāsam mayā paritto nakhasikhāyam pamsu āropito, ayam vā mahāpathavī"ti-ādi¹.

Evam sattalokassapi sabbathā viditabhāvam dassetvā idāni okāsalokassapi tatheva viditabhāvam dassento āha "yathā ca

sattaloko"ti-ādi. Okāsalokopi sabbathā viditoti sambandho. Cakkavāļanti lokadhātu. Sā hi nemimaņdalasadisena cakkavāļapabbatena samantato parikkhittattā "cakkavāļan"ti vuccati. Aḍḍhuḍḍhānīti upaḍḍhacatutthāni, tīṇi satāni paññāsañcāti attho. Nahutānīti dasasahassāni. Saṅkhātāti kathitā. Yasmā pathavī nāmāyaṁ tiriyaṁ aparicchinnā, tasmā "ettakaṁ bahalattena, saṅkhātāyaṁ vasundharā"ti bahalatoyeva paricchedo vutto. Nanu cakkavāļapabbatehi taṁtaṁcakkavāļapathavī paricchinnāti? Na tadaññacakkavāļapathaviyā ekābaddhabhāvato. Tiṇṇaṁ tiṇṇañhi pattānaṁ antarāļasadise tiṇṇaṁ tiṇṇaṁ lokadhātūnaṁ antareyeva pathavī natthi lokantaranirayabhāvato, cakkavāļapabbatānaṁ pana cakkavāļapabbatantarehi sambaddhaṭṭhāne pathavī ekābaddhāva, vivaṭṭakāle saṇṭhahamānāpi pathavī yathāsaṇṭhitapathaviyā ekābaddhāva saṇṭhahati.

Saṇṭhitīti heṭṭhā uparito cāti sabbaso ṭhiti. Evaṁ saṇṭhiteti evaṁ avaṭṭhite. Etthāti cakkavāļe. Ajjhogāļhoti ogāhitvā anupavisitvā ṭhito. Accugato tāvadevāti tattakameva caturāsīti yojanasatasahassāniyeva uggato. Na kevalañcettha ubbedhova, atha kho āyāmavitthārāpissa tattakāyeva. Vuttañhetaṁ—

"Sineru bhikkhave pabbatarājā caturāsīti yojanasahassāni āyāmena, caturāsīti yojanasahassāni vitthārenā"ti¹.

Sinerupabbatuttamoti pabbatesu uttamo, pabbatoyeva vā uttamo pabbatuttamo, sinerusaṅkhāto pabbatuttamo sinerupabbatuttamo, sinerupabbatarājāti vuttaṁ hoti. Tassa ca pācīnapassaṁ rajatamayaṁ, tasmā tassa pabhāya ajjhottharantiyā pācīnadisāya samuddodakaṁ khīraṁ viya paññāyati. Dakkhiṇapassaṁ pana indanīlamaṇimayaṁ, tasmā dakkhiṇadisāya samuddodakaṁ yebhuyyena nīlavaṇṇaṁ hutvā paññāyati, tathā ākāsaṁ. Pacchimapassaṁ phalikamayaṁ. Uttarapassaṁ suvaṇṇamayaṁ. Cattāro samuddāpi sinerurasmīti eva paricchinnā. Tathā hi pubbadakkhiṇapassehi nikkhantā rajatamaṇirasmiyo ekato hutvā mahāsamuddapiṭṭhena gantvā cakkavāļapabbataṁ āhacca tiṭṭhanti, dakkhiṇapacchimapassehi nikkhantā maṇiphalikarasmiyo,

pacchimuttapassehi nikkhantā phalikasuvaṇṇarasmiyo, uttarapācīnapassehi nikkhantā suvaṇṇarajatarasmiyo ekato hutvā mahāsamuddapiṭṭhena gantvā cakkavāļapabbataṁ āhacca tiṭṭhanti, tāsaṁ rasmīnaṁ antaresu cattāro mahāsamuddā honti.

Tatoti sinerussa heṭṭhā upari ca vuttappamāṇato. Upaḍḍhupaḍḍhenāti upaḍḍhena upaḍḍhena. Idaṁ vuttaṁ hoti—dvācattālīsa yojanasahassāni samudde ajjhogāļho tattakameva upari uggato yugandharapabbato, ekavīsati yojanasahassāni mahāsamudde ajjhogāļho tattakameva ca upari uggato īsadharo pabbatoti iminā nayena sesesupi upaḍḍhupaḍḍhappamāṇatā veditabbā. Yathā mahāsamuddo yāva cakkavāļapādamūlā anupubbaninno, evaṁ yāva sinerupādamūlāti heṭṭhā sineruppamāṇato upaḍḍhappamāṇopi yugandharapabbato pathaviyaṁ suppatiṭṭhito, evaṁ īsadharādayopīti daṭṭhabbaṁ. Vuttañhetaṁ "mahāsamuddo bhikkhave anupubbaninno anupubbapoṇo anupubbapabbhāro"ti¹. Sineruyugandharādīnaṁ antare sīdantarasamuddā² nāma honti. Tattha kira udakaṁ sukhumaṁ morapattamattampi pakkhittaṁ patiṭṭhātuṁ na sakkoti sīdateva, tasmā te sīdasamuddā³ nāma vuccanti. Te pana vitthārato yathākkamaṁ sineruādīnaṁ accuggamasamānaparimāṇāti vadanti. Ajjhogāḥhuggatāti ajjhogāḥhā ca uggatā ca. Brāhāti mahantā.

Sinerussa samantatoti parikkhipanavasena sinerussa samantato ṭhitā. Sinerum tāva parikkhipitvā ṭhito yugandharo, tam parikkhipitvā īsadharo. Evam tam parikkhipitvā ṭhitā "sinerussa samantato"ti vuttā. Katthaci pana "sinerum parikkhipitvā assakaṇṇo nāma pabbato patiṭṭhito, tam parikkhipitvā vinatako nāma pabbato"ti evam aññoyeva anukkamo āgato. Tathā hi nimijātake—

"Sahassayuttam hayavāhim, dibbayāna'madhiṭṭhito. Yāyamāno mahārājā, addā sīdantare nage. Disvānā'mantayī sūtam, ime ke nāma pabbatā"ti⁴—

^{1.} Vi 4. 419; Khu 1. 139 pitthesu.

^{3.} Sīdantarasamuddā (?)

^{2.} Sīdasamuddā (Syā)

^{4.} Khu 6. 201, 202 pitthesu.

evam nimimahārājena putthena mātalidevaputtena—

"Sudassano karavīko, īsadharo yugandharo.

Nemindharo vinatako, assakanno girī brahā.

Ete sīdantare nagā, anupubbasamuggatā.

Mahārājāna'māvāsā, yāni tvam rāja passasī"ti1—

vuttam.

Tattha aṭṭhakathāyam idam vuttam—

"Ayam mahārāja etesam sabbabāhiro sudassano pabbato nāma, tadanantare karavīko nāma, tadanantare karavīko nāma, so sudassanato uccataro. Ubhinnampi pana tesam antare ekopi sīdantaramahāsamuddo. Karavīkassa anantare īsadharo nāma, so karavīkato uccataro. Tesampi antare eko sīdantaramahāsamuddo. Īsadharassa anantare yugandharo nāma, so īsadharato uccataro. Tesampi antare eko sīdantaramahāsamuddo. Yugandharassa anantare nemindharo nāma, so yugandharato uccataro. Tesampi antare eko sīdantaramahāsamuddo. Nemindharassa anantare vinatako nāma, so nemindharato uccataro. Tesampi antare eko sīdantaramahāsamuddo. Vinatakassa anantare assakaṇṇo nāma, so vinatakato uccataro. Tesampi antare eko sīdantaramahāsamuddo eko sīdant

Yojanānam satānucco, himavā panca pabbatoti himavā pabbato panca yojanasatāni ucco, ubbedhoti attho. Tattha himavāti himapātasamaye himayuttatāya himam assa atthīti himavā, gimhakāle himam vamatīti himavā. Pabbatoti selo. Selo hi sandhisankhātehi pabbehi sahitattā "pabbato"ti vuccati, pasavanādivasena jalassa sārabhūtānam bhesajjādīnam vatthūnanca giranato "girī"ti ca vuccati. Yojanānam sahassāni, tīņi āyatavitthatoti yojanānam tīņi sahassāni

āyāmato ca vitthārato cāti attho, āyāmato ca vitthārato ca tīņi yojanasahassānīti vuttam hoti.

Caturāsītisahassehi. kūtehi patimanditoti sudassanakūtacitrakūtādīhi caturāsītikūtasahassehi patimandito, sobhitoti attho. Apicettha avuttopi ayam viseso veditabbo¹—ayam himavā nāma pabbato samantato sandamānapañcasatanadīvicitto, yattha āyāmavitthārena ceva gambhīratāya ca pannāsa pannāsa yojanā diyaddhayojanasataparimandalā anotattadaho kannamundadaho rathakāradaho chaddantadaho kunāladaho mandākinīdaho sīhappapātadahoti satta mahāsarā patitthitā. Tesu **anotatto** sudassanakūtam citrakūtam kālakūtam gandhamādanakūtam kelāsakūtanti imehi pañcahi pabbatehi parikkhitto. Tattha sudassanakūtam sovannamayam dviyojanasatubbedham antovankam kākamukhasanthānam tameva saram paticchādetvā thitam. Citrakūtam sabbaratanamayam. Kālakūtam añjanamayam. Gandhamādanakūtam sānumayam abbhantare muggavannam kālānusāriyādimūlagandho candanādisāragandho saralādipheggugandho lavangāditacagandho kapitthādipapatikagandho sajjādirasagandho tamālādipattagandho nāgakunkumādipupphagandho jātiphalādiphalagandho sabbathā gandhabhāvato gandhagandhoti imehi dasahi gandhehi ussannam nānappakāra-osadhasañchannam kāļapakkha-uposathadivase ādittamiva angāram jalantam titthati.

Tattheva nandamūlakam² nāma pabbhāram paccekabuddhānam vasanokāso. Tisso guhāyo suvaṇṇaguhā maṇiguhā rajataguhāti. Tattha maṇiguhādvāre mañjūsako nāma rukkho yojanam ubbedhena, yojanam vitthārena, so yattakāni udake vā thale vā pupphāni, sabbāni pupphati visesena paccekabuddhāgamanadivase, tassūparito sabbaratanamāļo hoti. Tattha sammajjanakavāto kacavaram chaḍḍeti, samakaraṇavāto sabbaratanamayam vālikam samam karoti, siñcanakavāto anotattadahato ānetvā udakam siñcati, sugandhakaraṇavāto sabbesam gandharukkhānam gandhe āneti, ocinakavāto pupphāni ocinitvā pāteti, santharaṇakavāto sabbattha santharati, sadā paññattāneva cettha āsanāni honti.

^{1.} Ma-Ţṭha 3. 24; Am-Ṭṭha 3. 218; Suttanipāta-Ṭṭha 2. 160 piṭṭhādīsupi passitabbam.

^{2.} Suttanipāta-Ttha 1. 59 pitthepi passitabbam.

Yesu paccekabuddhuppādadivase uposathadivase ca sabbapaccekabuddhā sannipatitvā nisīdanti, ayam tattha pakati. Abhisambuddhapaccekabuddho tattha gantvā paññattāsane nisīdati. Tato sace tasmim kāle aññepi paccekabuddhā samvijjanti, tepi tankhaṇam sannipatitvā paññattāsanesu nisīdanti, nisīditvā kiñcideva samāpattim samāpajjitvā vuṭṭhahanti. Tato samghatthero adhunāgatam paccekabuddham sabbesam anumodanatthāya "kathamadhigatan"ti kammaṭṭhānam pucchati, tadā so attano udānabyākaraṇagātham bhāsati. Evamidam gandhamādanakūṭam paccekabuddhānam āvāsaṭṭhānam hotīti veditabbam.

Kelāsakūṭaṁ pana rajatamayaṁ. Sabbāni cetāni citrakūṭādīni sudassanena samānubbedhasaṇṭhānāni tameva saraṁ paṭicchādetvā ṭhitāni. Sabbāni pana puthulato paññāsayojanāni, āyāmato pana ubbedhato viya dviyojanasatānevāti vadanti. Tāni sabbāni devānubhāvena nāgānubhāvena ca ṭhassanti, nadiyo ca tesu sandanti, taṁ sabbampi udakaṁ anotattameva pavisati, candimasūriyā dakkhiṇena vā uttarena vā gacchantā pabbatantarena tattha obhāsaṁ karonti, ujuṁ gacchantā na karonti, tenevassa "anotattan"ti saṅkhā udapādi. Tattha ratanamayamanuññasopānasilātalāni nimmacchakacchapāni phalikasadisanimmalūdakāni nhānatitthāni tadupabhogīsattānaṁ sādhāraṇakammunāva suppaṭiyattāni susaṇṭhitāni honti, yesu buddhapaccekabuddhakhīṇāsavā ca iddhimanto ca isayo nhāyanti, devayakkhādayo uyyānakīļaṁ kīļanti.

Tassa catūsu passesu sīhamuham hatthimukham assamukham usabhamukhanti cattāri mukhāni honti, yehi catasso nadiyo sandanti. Sīhamukhena nikkhantanadītīre sīhā bahutarā honti, hatthimukhādīhi hatthiassa-usabhā. Puratthimadisato nikkhantanadī anotattam tikkhattum padakkhiṇam katvā itarā tisso nadiyo anupagamma pācīnahimavanteneva amanussapatham gantvā mahāsamuddam pavisati. Pacchimadisato ca uttaradisato ca nikkhantanadiyopi tatheva padakkhiṇam katvā pacchimahimavanteneva uttarahimavanteneva ca amanussapatham gantvā mahāsamuddam pavisanti. Dakkhiṇadisato nikkhantanadī pana tam tikkhattum padakkhiṇam katvā dakkhiṇena ujukam pāsāṇapiṭṭheneva saṭṭhi yojanāni gantvā pabbatam paharitvā vuṭṭhāya parikkhepena tigāvutappamāṇā udakadhārā hutvā ākāsena saṭṭhi yojanāni gantvā tiyaggaļe nāma

pāsāņe patitā, pāsāņo udakadhārāvegena bhinno. Tattha paññāsayojanappamāṇā tiyaggaļā nāma mahāpokkharaṇī jātā, mahāpokkharaṇiyā kūlaṁ bhinditvā pāsāṇaṁ pavisitvā saṭṭhi yojanāni gatā, tato ghanapathaviṁ bhinditvā umaṅgena saṭṭhi yojanāni gantvā viñjhaṁ nāma tiracchānapabbataṁ paharitvā hatthatale pañcaṅgulisadisā pañcadhārā hutvā pavattati. Sā tikkhattuṁ anotattaṁ padakkhiṇaṁ katvā gataṭṭhāne "āvaṭṭagaṅgā"ti vuccati, ujukaṁ pāsāṇapiṭṭhena saṭṭhi yojanāni gataṭṭhāne "kaṇhagaṅgā"ti, ākāsena saṭṭhi yojanāni gataṭṭhāne "ākāsagaṅgā"ti, tiyaggaḷapāsāṇe paññāsayojanokāse ṭhitā "tiyaggaḷapokkharaṇī"ti, kūlaṁ bhinditvā pāsāṇaṁ pavisitvā saṭṭhi yojanāni gataṭṭhāne "bahalagaṅgā"ti, umaṅgena saṭṭhi yojanāni gataṭṭhāne "umaṅgagaṅgā"ti vuccati. Viñjhaṁ nāma tiracchānapabbataṁ paharitvā pañcadhārā hutvā pavattaṭṭhāne pana gaṅgā yamunā aciravatī sarabhū mahīti pañcadhā saṅkhyaṁ gatā. Evametā pañca mahānadiyo himavantato pabhavanti.

Chaddantadahassa pana¹ majihe dvādasayojanappamāne thāne sevālo vā panakam vā natthi, manikkhandhavannam udakameva santitthati, tadanantaram yojanavitthatam suddhakallahāravanam tam udakam parikkhipitvā thitam, tadanantaram yojanavitthatameva suddhanīluppalavanam tam parikkhipitvā thitam, vojanavojanavitthatāneva rattuppalasetuppalarattapadumasetapadumakumudavanāni purimam purimam parikkhipitvā thitāni, imesam pana sattannam vanānam anantaram sabbesampi kallahārādīnam vasena vomissakavanam vojanavitthatameva tāni parikkhipitvā thitam, tadanantaram nāgānam katippamāne²udake yojanavitthatameva rattasālivanam, tadanantaram udakapariyante nīlapītalohitodātasurabhisukhumakusumasamākinnam khuddakagacchavananti imāni dasa vanāni yojanayojanavitthatāneva. Tato khuddakarājamāsamahārājamāsamuggavanam, tadanantaram tipusa-elālukaalābukumbhandavallivanāni, tato pūgarukkhappamānam ucchuvanam, tato hatthidantappamānaphalam kadalivanam, tato sālavanam, tadanantaram cātippamānaphalam panasavanam, tato madhuraphalam ambavanam, tato ciñcavanam, tato kapitthavanam, tato vomissako mahāvanasando, tato venuvanam, venuvanam pana parikkhipitvā

satta pabbatā ṭhitā, tesaṁ bāhirantato paṭṭhāya paṭhamo cūḷakāḷapabbato nāma, dutiyo mahākāḷapabbato nāma, tato udakapassapabbato nāma, tato candapassapabbato nāma, tato sūriyapassapabbato nāma, tato maṇipassapabbato nāma, sattamo suvaṇṇapassapabbato nāma. So ubbedhato sattayojaniko chaddantadahaṁ parikkhipitvā pattassa mukhavaṭṭi viya ṭhito. Tassa abbhantarimapassaṁ suvaṇṇavaṇṇaṁ, tato nikkhantena obhāsena chaddantadaho samuggatabālasūriyo viya hoti. Bāhirimapabbatesu pana eko ubbedhato cha yojanāni, eko pañca, eko cattāri, eko tīṇi, eko dve, eko yojanaṁ.

Evam sattapabbataparikkhittassa pana tassa dahassa pubbuttarakanne udakavātappaharanokāse mahānigrodharukkho, tassakhandho parikkhepato pañcayojaniko, ubbedhato sattayojaniko. Catūsu disāsu catasso sākhāyo chachayojanikā, uddham uggatasākhāpi chayojanikāva. Iti so mūlato paṭṭhāya ubbedhena terasayojaniko sākhānam orimantato yāva pārimantā dvādasayojaniko aṭṭhahi pārohasahassehi paṭimanḍito muṇḍamaṇipabbato viya vilāsamāno tiṭṭhati. Chaddantadahassa pana pacchimadisābhāge suvaṇṇapabbate dvādasayojanikā kañcanaguhā. Chaddanto nāgarājā vassāratte aṭṭhasahassanāgaparivuto kañcanaguhāyam vasati, gimhakāle udakavātam sampaṭicchamāno mahānigrodhamūle pārohantare tiṭṭhati.

Mandākiniyā pana majjhe pañcavīsatiyojanamatte ṭhāne sevālo vā paṇakaṁ vā natthi, phalikavaṇṇaṁ udakameva hoti, tato paraṁ pana nāgānaṁ kaṭippamāṇe¹ udake aḍḍhayojanavitthataṁ setapadumavanaṁ taṁ udakaṁ parikkhipitvā ṭhitaṁ. Tattha muļālaṁ naṅgalasīsamattaṁ hoti, bhisaṁ mahābheripokkharappamāṇaṁ hoti. Tassa ekekasmiṁ pabbantare āḷhakappamāṇaṁ khīraṁ hoti. Padumāraṁ pupphasamaye vāto reṇuvaṭṭiṁ uṭṭhāpetvā paduminīpattesu ṭhapeti, tattha udakaphusitāni patanti, tato ādiccapākena paccitvā pakka-ayoghaṭikā viya pokkharamadhu tiṭṭhati, tadanantaraṁ tāvamahantameva rattapadumavanaṁ, tadanantaraṁ rattakumudavanaṁ, tadanantaraṁ

setakumudavanam, tadanantaram nīluppalavanam, tadanantaram rattuppalavanam, tadanantaram sugandhasālivanam, tadanantaram eļāluka-alābukumbhaṇḍādīni madhurarasāni valliphalāni, tadanantaram aḍḍhayojanavitthatameva ucchuvanam, tattha pūgarukkhakkhandhappamāṇam ucchu. Tadanantaram kadalivanam, yato duve pakkāni khādantā kilamanti. Tadanantaram cāṭippamāṇaphalam panasavanam, tadanantaram ambavanam, jambuvanam, kapiṭṭhavananti saṅkhepato tasmim dahe khāditabbayuttakam phalam nāma natthīti na vattabbam. Iti imasmim himavati vijjamānakasattamahāsarappabhutīnam pamāṇasaṇṭhānādibhedam sabbameva visesam bhagavā sabbathā avedi aññāsi pativijjhiyevāti datthabbam.

Tipañcayojanakkhandhaparikkhepāti

pannarasayojanappamāṇakkhandhaparikkhepā, khandhassa pariṇāho pannarasayojanappamāṇoti vuttaṁ hoti. Nagavhayāti nagasaddena avhātabbā, rukkhābhidhānāti attho. Rukkho hi na gacchatīti nagoti vuccati. Nagavhayā jambūti yojetabbaṁ. Paññāsayojanakkhandhasākhāyāmāti ubbedhato paññāsayojanappamāṇakkhandhāyāmā ubbedhato samantato ca paññāsayojanasākhāyāmā ca. Tato eva satayojanavitthiṇṇā, tāvadeva ca uggatā. Jamburukkhassa hi mūlato paṭṭhāya yāva sākhāviṭapā, tāva paṇṇāsa yojanāni, tato parampi ujukaṁ uggatasākhā paṇṇāsa yojanāni, samantato ca ekekā sākhā paṇṇāsa paṇṇāsa yojanāni vaḍḍhitāni. Tāsu pana mahantā mahantā nadiyo sandanti, tāsaṁ nadīnaṁ ubhayatīre jambupakkānaṁ patitaṭṭhāne suvaṇṇaṅkurā uṭṭhahanti, te nadījalena vuyhamānā anupubbena mahāsamuddaṁ pavisanti, tatoyeva jambunadiyaṁ nibbattattā "jambunadan"ti taṁ suvaṇṇaṁ vuccati.

Yassānubhāvenāti yassā mahantatā kappaṭṭhāyikādippakārena pabhāvena. Yañcetaṁ jambuyā pamāṇaṁ, etadeva asurānaṁ cittapāṭaliyā, garuļānaṁ simbalirukkhassa¹, aparagoyāne kadambassa, uttarakurūsu kapparukkhassa, pubbavidehe sirīsassa, tāvatiṁsesu pāricchattakassāti. Tenāhu porāṇā—

"Pāṭalī simbalī jambū, devānam pārichattako. Kadambo kapparukkho ca, sirīsena bhavati sattaman"ti². Ettha **sirīsena bhavati sattaman**ti ettha **sirīsenā**ti paccatte karaṇavacanam. **Sattaman**ti liṅgavipallāsena vuttam, sirīso bhavati sattamoti attho.

Cakkavāļasiluccayoti cakkavāļapabbato. Parikkhipitvā tam sabbam, lokadhātumayam thitoti hetthā vuttam sabbampi tam parikkhipitvā cakkavāļasiluccayo patitthito, ayam ekā lokadhātu nāmāti attho. Ma-kāro padasandhivasena āgato. "Tam sabbam lokadhātum parikkhipitvā ayam cakkavāļasiluccayo thito"ti evampettha sambandham vadanti, evam vuttepi cakkavāļapabbatopi lokadhātuyevāti veditabbam.

Tatthāti tissam lokadhātuyam. Candamaṇḍalam ekūnapaññāsayojananti ujukam āyāmato vitthārato ubbedhato ca ekūnapaññāsayojanam, parimaṇḍalato pana tīhi yojanehi ūnadiyaḍḍhasatayojanam. Sūriyamaṇḍalam paññāsayojananti etthāpi candamaṇḍale vuttanayeneva ujukam paññāsayojananti veditabbam, parimaṇḍalato pana diyaḍḍhasatayojanam.

Tesu pana candamaṇḍalaṁ¹ heṭṭhā, sūriyamaṇḍalaṁ upari, antarā nesaṁ yojanaṁ hoti. Candassa heṭṭhimantato sūriyassa uparimantaṁ yojanasataṁ hoti, candavimānaṁ anto maṇimayaṁ, bahi rajatena parikkhittaṁ, anto ca bahi ca sītalameva hoti. Sūriyavimānaṁ anto kanakamayaṁ, bāhiraṁ phalikaparikkhittaṁ hoti, anto ca bahi ca uṇhameva. Cando ujukaṁ saṇikaṁ gacchati. So hi amāvāsiyaṁ sūriyena saddhiṁ gacchanto divase divase thokaṁ thokaṁ ohīyanto puṇṇamāsiyaṁ upaḍḍhamaggato ohīyati, tiriyaṁ pana sīghaṁ gacchati. Tathā hesa ekasmiṁ māse kadāci dakkhiṇato, kadāci uttarato dissati, candassa ubhosu passesu nakkhattaārakā gacchanti, cando dhenu viya vacchaṁ taṁ taṁ nakkhattaṁ upasaṅkamati, nakkhattāni pana attano gamanaṭṭhānaṁ na vijahanti, attano vīthiyāva gacchanti. Sūriyassa pana ujukaṁ gamanaṁ sīghaṁ, tiriyaṁ gamanaṁ dandhaṁ. Tiriyaṁ gamanaṁ nāma dakkhiṇadisato uttaradisāya, uttaradisato dakkhiṇadisāya gamanaṁ, taṁ dandhaṁ chahi chahi māsehi ijjhanato.

Sūriyo kāļapakkha-uposathe candena saheva gantvā tato param pāṭipadadivase yojanānam satasahassam candamandalam ohāya gacchati

attano sīghagāmitāya tassa ca dandhagāmitāya, atha cando lekhā viya paññayati. Tato parampi pakkhassa dutiyaya yojananam satasahassam candamandalam ohāya gacchati. Evam divase divase yāva sukkapakkhauposathadivasā satasahassam satasahassam ohāya gacchati, atha cando anukkamena vaddhitvā uposathadivase paripunno hoti. Anukkamena vaddhanañcettha uparibhāgato patitasūriyālokatāya hetthato pavattāya sūriyassa dūrabhāvena divase divase anukkamena parihāyamānāya attano chāyāya vasena anukkamena candamandalappadesassa vaddhamānassa viya dissamānatāyāti veditabbam, tasmā anukkamena vaddhitvā viya uposathadivase punnamāyam paripunnamandalo hutvā dissati. Atha sūriyo pātipadadivase yojanānam satasahassam dhāvitvā puna candamandalam ganhāti candassa dandhagatitāya attano ca sīghagatitāya, tathā dutiyāya satasahassanti evam yava uposathadivasa satasahassam satasahassam dhāvitvā ganhāti. Atha cando anukkamena hāvitvā kālapakkhauposathadivase sabbaso na paññayati, anukkamena hayamanata cettha anukkamena vaddhamānatāya vuttanayena veditabbā. Tattha pana chāyāya hāyamānatāya mandalam vaddhamānam viya dissati, idha ca chāyāya vaddhamānatāya mandalam hāyamānam viya dissati, tasmā anukkamena hāyitvā viya uposathadivase sabbaso na paññāyati. Candam hetthā katvā sūriyo upari hoti, mahatiyā pātiyā khuddakabhājanam viya candamandalam pidhīyati, majjhanhike gehacchāyā viya candassa chāyā na paññāyati. So chāyāya apaññāyamānāya dūre thitānam divā padīpo viya sayampi na paññāyati.

Imesam pana ajavīthi nāgavīthi govīthīti tisso gamanavīthiyo honti. Tattha ajānam udakam paṭikūlam hoti, hatthināgānam manāpam, gunnam sītunhasamatāya phāsu hoti. Tathā ca yāya vīthiyā sūriye gacchante vassavalāhakadevaputtā sūriyābhitāpasantattā attano vimānato na nikkhamanti, kīļāpasutā hutvā na vicaranti, tadā kira sūriyavimānam pakatimaggato adho otaritvā vicarati, tassa oruyha caraņeneva candavimānampi adho oruyha carati taggatikattā,

tasmā sā vīthi udakābhāvena ajānurūpatāya "ajavīthī"ti samaññā¹ gatā. Yāya pana vīthiyā sūriye gacchante vassavalāhakadevaputtā sūriyābhitāpābhāvato abhiṇham attano vimānato bahi nikkhamitvā kīļāpasutā hutvā ito cito ca vicaranti, tadā kira sūriyavimānam pakatimaggato uddham āruhitvā vicarati, tassa uddham āruyha caraṇeneva candavimānampi uddham āruyha carati taggatikattā, taggatikatā ca samānagati nāma vātamaṇḍalena vimānassa phellitabbattā², tasmā sā vīthi udakabahubhāvena nāgānurūpatāya "nāgavīthī"ti samaññā gatā. Yadā sūriyo uddham anārohanto adho ca anotaranto pakatimaggeneva gacchati, tadā vassavalāhakā yathākālam yathāruciñca vimānato nikkhamitvā sukhena vicaranti, tena kālena kālam vassanato loke utusamatā hoti, tāya utusamatāya hetubhūtāya sā candimasūriyānam gati gavānurūpatāya "govīthī"ti samaññā gatā. Tasmā yam kālam candimasūriyā ajavīthim āruhanti, tadā devo ekabindumpi na vassati. Yadā nāgavīthim ārohanti, tadā bhinnam viya nabham paggharati. Yadā govīthim ārohanti, tadā utusamatā sampajjati.

Yadā pana rājāno adhammikā honti, tesam adhammikatāya uparājasenāpatippabhutayo sabbe devā brahmāno ca adhammikā honti, tadā tesam adhammikatāya visamam candimasūriyā parivattanti. Tadā hi bahvābādhatādi-aniṭṭhaphalūpanissayabhūtassa yathāvuttassa adhammikatāsaññitassa sādhāraṇassa pāpakammassa balena visamam vāyantena vāyunā phelliyamānā³ candimasūriyā sinerum parikkhipantā visamam parivattanti, yathāmaggena na pavattanti. Vāto yathāmaggena na vāyati, ayathāmaggena vāyati, ayathāmaggena vāyanto ākāsaṭṭhavimānāni khobheti, vimānesu khobhitesu devatānam kīļanatthāya cittāni na namanti, cittesu anamantesu sītuṇhabhedo utu yathākālena na sampajjati, tasmim asampajjantena na sammā devo vassati, kadāci vassati, kadāci na vassati, katthaci vassati, katthaci na vassati. Vassantopi vappakāle aṅkurakāle nāļakāle pupphakāle khīraggahaṇādikālesu yathā

^{1.} Samaññam (Sī, Syā)

^{2.} Vellitabbattā (Sī), pellitabbattā (Syā)

^{3.} Velliyamānā (Sī), pelliyamānā (Syā)

yathā sassānam upakāro na hoti, tathā tathā vassati ca vigacchati ca. Tena sassāni visamapākāni honti vigatagandharasādisampadāni, ekabhājane pakkhittataṇḍulesupi ekasmim padese bhattam uttaṇḍulam hoti, ekasmim atikilinnam, ekasmim samapākam. Tam paribhuttam kucchiyampi sabbaso apariṇatam, ekadesena pariṇatam, supariṇatanti evam tīhiyeva pakārehi paccati, pakkāsayam na sammā upagacchati. Tena sattā bahvābādhā ceva honti appāyukā ca.

Dhammikānam pana rājūnam kāle vuttavipariyāyena candimasūriyā samam parivattanti, yathāmaggena pavattanti, utusamatā ca sampajjati, candimasūriyā cha māse sineruto bahi nikkhamanti, cha māse anto vicaranti. Tathā hi sinerusamīpena tam padakkhinam katvā gacchantā cha māse tato gamanavīthito bahi attano tiriyam gamanena cakkavālābhimukhā nikkhamanti. Evam cha māse khane khane sineruto apasakkanavasena tato nikkhamitvā cakkavāļasamīpam pattā. Tatopi cha māse khaņe khaņe apasakkanavasena nikkhamitvā sinerusamīpam pāpunantā anto vicaranti. Te hi āsālhīmāse sinerusamīpena caranti, tato dve māse nikkhamitvā bahi caranti. Pathamakattikamāse majjhena gacchanti, tato cakkavāļābhimukhā gantvā tayo māse cakkavālasamīpena vicaritvā puna nikkhamitvā citramāse majihena gantvā tato pare dve māse sineru-abhimukhā pakkhanditvā puna āsālhe sinerusamīpena caranti. Ettha ca sinerussa cakkavālassa ca yam thānam vemajjham, tassa sinerussa ca yam thānam vemajjham, tena gacchantā sinerusamīpena carantīti veditabbā, na sinerussa aggālindam allīnā, cakkavālasamīpena caranampi imināva nayena veditabbam. Yadā pana sinerussa cakkavālassa ujukam vemajihena gacchanti, tadā vemajihena vicarantīti veditabbam.

Evam vicarantā ca ekappahārena tīsupi dīpesu ālokam karonti. Ekekāya disāya nava nava yojanasatasahassāni andhakāram vidhamitvā ālokam dassenti. Katham? Imasmiñhi dīpe sūriyuggamanakālo pubbavidehe majjhanhiko hoti, uttarakurūsu atthamamanakālo, aparagoyāne majjhimayāmo, pubbavidehamhi uggamanakālo uttarakurūsu majjhanhiko, aparagoyāne atthamamanakālo, idha majjhimayāmo,

uttarakurūsu uggamanakālo aparagoyāne majjhanhiko, idha atthaṅgamanakālo, pubbavidehe majjhimayāmo, aparagoyānadīpe uggamanakālo idha majjhanhiko, pubbavidehadīpe atthaṅganakālo, uttarakurūsu majjhimayāmo. Imasmiñhi dīpe ṭhitamajjhanhikavelāyaṁ pubbavidehavāsīnaṁ atthaṅgamanavasena upaḍḍhaṁ sūriyamaṇḍalaṁ paññāyati, aparagoyānavāsīnaṁ uggamanavasena upaḍḍhaṁ paññāyati. Evaṁ sesadīpesupi. Iti imināva pakārena tīsu dīpesu ekappahāreneva candimasūriyā ālokaṁ dassentīti veditabbaṁ.

Ito aññathā pana dvīsu eva dīpesu ekappahāreneva ālokam dassenti. Yasmiñhi dīpe atthangamanavasena upaḍḍham sūriyamaṇḍalam paññāyati, atthangamite tattha na paññāyati, ālokam na dasseti, dvīsu eva dīpesu ekappahārena ubhayam. Ekekāya disāya nava nava yojanasatasahassāni andhakāravidhamanampi imināva nayena daṭṭhabbam. Imasmiñhi dīpeṭhitamajjhanhikavelāyam pubbavidehavāsīnam atthangamanavasena upaḍḍham sūriyamaṇḍalam paññāyatīti pubbavidehe navayojanasatasahassappamāṇe ṭhāne andhakāram vidhamitvā ālokam dasseti, tathā aparagoyāne uggamanavasena tatthāpi upaḍḍhasseva paññāyamānattā. Pubbavidehānam pana atthangamite pana paññāyatīti dvīsu dīpesu sabbattha andhakāram vidhamitvā ālokam dasseti aparagoyānepi uggate sūriye sabbattha andhakāravidhamanato.

Pātubhavantā ca candimasūriyā ekatova loke pātubhavanti, tesu sūriyo paṭhamataraṁ paññāyati. Paṭhamakappikānañhi sattānaṁ sayaṁpabhāya antarahitāya andhakāro ahosi. Te bhītatasitā "bhaddakaṁ vatassa, sace añño āloko bhaveyyā"ti cintayiṁsu. Tato mahājanassa sūrabhāvaṁ janayamānaṁ sūriyamaṇḍalaṁ uṭṭhahi, tenevassa "sūriyo"ti nāmaṁ ahosi. Tasmiṁ divasaṁ ālokaṁ katvā atthaṅgamite puna andhakāro ahosi. Te bhītatasitā "bhaddakaṁ vatassa, sace añño āloko uppajjeyyā"ti cintayiṁsu. Atha nesaṁ channaṁ ñatvā viya candamaṇḍalaṁ uṭṭhahi, tenevassa "cando"ti nāmaṁ ahosi. Evaṁ candimasūriyesu pātubhūtesu nakkhattāni tārakarūpāni

pātubhavanti, tato pabhuti rattindivā paññāyanti. Anukkamena ca māsaḍḍhamāsa-utusaṁvaccharā jāyanti. Candimasūriyānaṁ pana pātubhūtadivaseyeva sinerucakkavāļahimavantapabbatā cattāro ca dīpā pātubhavanti, te ca kho apubbaṁ acarimaṁ phagguṇapuṇṇamadivaseyeva pātubhavantīti veditabbaṁ.

Yasmā cettha "ekam cakkavāļam āyāmato ca vitthārato ca yojanānam dvādasa satasahassāni tīņi sahassāni cattāri satāni paññāsañca yojanānī"ti aṭṭhakathāyam¹ vuttam, tasmā vuttappamāṇato imassa cakkavāļassa sinerupatiṭṭhitokāse caturāsīti yojanasahassāni parato yāva cakkavāļapabbatā uttaradisābhāgappamānañca pahāya imissā dakkhinadisāya—

Sinerucakkavāļānam, antaram parimāņato.

Pañca satasahassāni, sahassānūnasatthi ca.

Satāni satta ñeyyāni, pañcavīsuttarāni ca.

Majjhavīthigato nāma, tattha vemajjhago ravi.

Majjhato yāva merumhā, cakkavāļānamantare.

Vemajjhago yadā hoti, ubhayantagato tadā.

Majjhato yāva merumhā, cakkavāļā ca pabbatā.

Duve satasahassāni, sahassānūnasīti ca.

Atthasatam duve satthi, yojanāni dvigāvutam.

Ubhato antato meru-cakkavāļānamantare.

Ekam satasahassanca, sahassanunatalisam.

Navasatānekatimsa, yojanāni ca gāvutam.

Pamāṇato samantā ca, maṇḍalam majjhavīthiyā.

Satasahassānūnavīsa, sahassānekatimsa ca.

Satamekañca viññeyyam, pañcasattati uttaram.

Dakkhiṇam uttarañcāpi, gacchanto pana bhāṇumā.

Majjhavīthippamāṇena, maṇḍaleneva gacchati. Gacchanto ca panevaṁ so, oruyhoruyha hetthato.

Āruyhāruyha uddhañca, yato gacchati sabbadā. Tato gativasenassa, dūramaddhānamāsi taṁ.

Timsa satasahassāni, yojanāni pamāṇato. Tasmā so parito yāti, tattakamva dine dine.

Sahassamekam pañcasatam, catupaññāsayojanam. Tigāvutam terasūsatam, tettimsa ratanāni ca.

Aṭṭhaṅgulāni ca tiriyaṁ, gacchatekadine ravi. Chatālīsasahassāni, cha satāni tigāvutaṁ.

Yojanānam¹ titālīsam, māsenekena gacchati. Tenavutisahassāni, dvisatam sattasīti ca.

Gāvutāni duve cāpi, dvīhi māsehi gacchati. Imāya gatiyā anta-vīthito vīthi-antimam.

Gacchati chahi māsehi, timāsehi ca majjhimam. Sinerusantike anta-vīthito pana bhāṇumā. Āgacchanto dvimāsehi, assa dīpassa majjhago.

Tasmā sīhaļadīpassa, majjhato meru-antaram. Duve satasahassāni, dvīsatenādhikāni tu.

Tettimsañca sahassāni, aṭṭhārasa tigāvutam. Cakkavāļantarañcassa, dīpasseva ca majjhato.

Tīṇi satasahassāni, sahassāni chavīsati. Cha uttarāni pañceva, satānekañca gāvutanti.

Evamettha ayampi viseso veditabbo.

Tāvatimsabhavanam dasasahassayojananti ettha tettimsa sahapuññakārino ettha nibbattāti tamsahacaritaṭṭṭhānam tettimsam, tadeva tāvatimsam, tam nivāso etesanti tāvatimsā, devā. Tesam bhavanam tāvatimsabhavanam. Tathā hi maghena māṇavena saddhim macalagāmake kālam katvā tattha uppanne tettimsa devaputte upādāya assa devalokassa ayam paṇṇatti jātāti vadanti. Atha vā yasmā sesacakkavāļesupi cha kāmāvacaradevalokā atthi. Vuttampi cetam "sahassam catumahārājikānam sahassam tāvatimsānan"ti. Tasmā nāmapaṇṇattiyevesā tassa devalokassāti veditabbā. Dasasahassayojananti idam pana sakkapuram sandhāya vuttanti veditabbam. Tathā hi tāvatimsakāyikā devā atthi pabbataṭṭhakā, atthi ākāsaṭṭhakā, tesam paramparā cakkavāļapabbatam pattā, tathā cātumahārājikānam yāmādīnañca. Ekadevalokepi hi devānam paramparā cakkavāļapabbatam appattā nāma natthi. Idam pana tāvatimsabhavanam sinerussa uparimatale dasasahassayojanike ṭhāne patiṭṭhitanti veditabbam. Tassa pācīnapacchimadvārānam antarā dasayojanasahassam hoti, tathā dakkhiņuttaradvārānam. Tam kho pana nagaram dvārasahassayuttam ahosi ārāmapokkharaṇīpaṭimaṇḍitam.

Tassa majjhe¹ tiyojanasatubbedhehi dhajehi paṭimaṇḍito sattaratanamayo sattayojanasa-ubbedho sakkassa **vejayanto** nāma pāsādo. Tattha suvaṇṇayaṭṭhīsu maṇidhajā ahesuṁ, maṇiyaṭṭhīsu suvaṇṇadhajā, pavāḷayaṭṭhīsu muttadhajā, muttayaṭṭhīsu pavāḷadhajā, sattaratanamayāsu yaṭṭhīsu sattaratanamayā dhajā.

Diyaḍḍhayojanasatāyāmo **vejayantaratho**². Tassa hi pacchimanto paṇṇāsayojano, majjhe rathapañjaro paṇṇāsayojano, rathasandhito yāva rathasīsā paṇṇāseva yojanāni. Tadeva pamāṇaṁ diguṇaṁ katvā "tiyojanasatāyāmo"tipi vadantiyeva. Tasmiṁ yojanikapallaṅko atthato tiṭṭhati. Tattha tiyojanikaṁ setacchattaṁ, ekasmiṁyeva yuge sahassaājaññayuttaṁ. Sesālaṅkārassa pamāṇaṁ natthi. Dhajo panassa aḍḍhatiyāni yojanasatāni uggato, yassa vātāhatassa pañcaṅgikatūriyasseva saddo niccharati.

Sakkassa pana **erāvaņo**¹ nāma hatthī diyaḍḍhayojanasatiko, sopi devaputtoyeva. Na hi devalokasmim tiracchānagatā honti, tasmā

^{1.} Dhammapada-Ṭṭha 1. 173 piṭṭhādīsupi passitabbam.

^{2.} Sam-Ttha 1. 312 pitthepi passitabbam.

so uyyānakīļāya nikkhamanakāle attabhāvam vijahitvā diyaḍḍhayojanasatiko erāvaṇo nāma hatthī hoti. So tettimsakumbhe māpeti āvaṭṭena gāvuta-aḍḍhayojanappamāṇe, sabbesam majjhe sakkassa atthāya sudassanam nāma timsayojanikam kumbham māpeti. Tassa upari dvādasayojaniko ratanamaṇḍapo hoti. Tattha antarantarā sattaratanamayā yojanubbedhā dhajā uṭṭhahanti. Pariyante kiṅkiṇikajālā olambanti, yassa mandavāteritassa pañcaṅgikatūriyasaddasadiso dibbagītasaddo viya ravo niccharati. Maṇḍapamajjhe sakkassa yojaniko maṇipallaṅko paññatto hoti, tattha sakko nisīdati. Tettimsāya kumbhānam ekekasmim kumbhe satta satta dante māpeti, tesu ekeko paṇṇāsayojanāyāmo. Ekekasmim cettha dante satta satta pokkharaṇiyo honti, ekekāya pokkharaṇiyā satta satta paduminīgacchā, ekekasmim gacche satta satta pupphāni honti, ekekassa pupphassa satta satta pattāni, ekekasmim patte satta satta devadhītaro naccanti. Evam samantā paṇṇāsayojanaṭṭhāne hatthidantesuyeva naccanaṭasamajjo hoti.

Nandā nāma pana pokkharaṇī paññāsayojanā. "Pañcasatayojanikā"tipi vadanti.

Cittalatāvanaṁ pana saṭṭhiyojanikaṁ. "Pañcayojanasatikan"tipi vadanti. Taṁ pana dibbarukkhasahassapaṭimaṇḍitaṁ, tathā **nandanavanaṁ phārusakavanañca.** Sakko panettha accharāsaṁghaparivuto yaṭṭhiyojanikaṁ suvaṇṇamahāvīthiṁ otaritvā nakkhattaṁ kīḷanto nandanavanādīsu vicarati.

Pāricchattako pana koviļāro samantā tiyojanasataparimaņḍalo pañcadasayojanapariṇāhakkhandho yojanasatubbedho. Tassa mūle saṭṭhiyojanāyāmā paññāsayojanavitthārā pañcadasayojanubbedhā jayasumanapupphakavaṇṇā paṇḍukambalasilā, yassā mudutāya sakkassa nisīdato upaḍḍhakāyo anupavisati, uṭṭhitakāle ūnaṁ¹ paripūrati.

Sudhammā nāma devasabhā āyāmato ca vitthārato ca tiyojanasatikā, parikkhepato navayojanasatikā, ubbedhato pañcayojanasatikā, tassā phalikamayā bhūmi, thambhatulāsaṅghāṭādīsu vāļarūpādisaṅghaṭṭanakaāṇiyo maṇimayā, suvaṇṇamayā thambhā, rajatamayā thambhaghaṭakā ca saṅghāṭañca, pavāḷamayāni vāḷarūpāni, sattaratanamayā gopānasiyo ca pakkhapāsā ca mukhavaṭṭi ca, indanīla-iṭṭhakāhi chadanaṁ, sovaṇṇamayaṁ chadanavidhaṁ¹, rajatamayā thupikā.

Āsāvatī nāma ekā latā atthi, "sā pupphissatī"ti devā vassasahassam upaṭṭhānam gacchanti, pāricchattake pupphamāne ekam vassam upaṭṭhānam gacchanti. Te tassa paṇḍupalāsādibhāvato paṭṭhāya attamanā honti. Yathāha—

"Yasmim bhikkhave samaye devānam tāvatimsānam pāricchattako koviļāro paņdupalāso hoti, attamanā bhikkhave devā tāvatimsā tasmim samaye honti 'paṇḍupalāso dāni pāricchattako koviļāro, na cirasseva dāni pannapalāso bhavissatī'ti"ādi².

Sabbapāliphullassa pana pāricchattakassa koviļārassa samantā pañca yojanasatāni ābhā pharati, anuvātam yojanasatam gandho gacchati. Pupphite pāricchattake ārohaṇakiccam vā aṅkusam gahetvā nāmanakiccam vā pupphāharaṇattham caṅkoṭakakiccam vā natthi. Kantanakavāto uṭṭhahitvā pupphāni vaṇṭato kantati, sampaṭicchanakavāto sampaṭicchati, pavesanakavāto sudhammadevasabham paveseti, sammajjanakavāto purāṇapupphāni nīharati, santharaṇakavāto pattakaṇṇikakesarāni racento³ santharati, majjhaṭṭhāne dhammāsanam hoti yojanappamāṇo ratanapallaṅko, tassa upari dhāriyamānam tiyojanikam setacchattam, tadanantaram sakkassa devarañño āsanam attharīyati, tato bāttimsāya devaputtānam, tato aññesam mahesakkhadevatānam. Aññesam devatānam pana pupphakaṇṇikāva āsanam hoti. Devā devasabham pavisitvā nisīdanti. Tato pupphehi reṇuvaṭṭi uggantvā upari kaṇṇikam āhacca nipatamānā devatānam

tigāvutappamāṇam attabhāvam lākhāparikammasajjitam viya karoti, tesam sā kīļā catūhi māsehi pariyosānam gacchati. Iti imāhi sampattīhi samannāgatam tāvatimsabhavanam bhagavā sabbathā avedīti veditabbam.

Tathā asurabhavananti ettha devā viya na suranti na īsaranti na virocantīti asurā. Surā nāma devā, tesam patipakkhāti vā asurā. Sakko kira macalagāmake magho nāma mānavo hutvā tettimsa purise gahetvā kalvānakammam karonto satta vattapadāni pūretvā tattha kālakato devaloke nibbatti saddhim parisāya. Tato pubbadevā "āgantukadevaputtā āgatā, sakkāram nesam karomā"ti vatvā dibbapadumāni upanāmesum, upaddharajjena ca nimantesum. Sakko upaddharajjena asantuttho ahosi, atha nevāsikā "āgantukadevaputtānam sakkāram karomā" ti gandhapānam 1 sajjayimsu. Sakko sakaparisāya saññam adāsi "mārisā mā gandhapānam pivittha, pivamānākāramattameva dassethā"ti. Te tathā akamsu. Nevāsikadevatā suvannasarakehi upanītam gandhapānam vāvadattham pivitvā mattā tattha tattha suvannapathaviyam patitvā sayimsu. Sakko "ganhatha dhutte, haratha dhutte"ti te pādesu gāhāpetvā sinerupāde khipāpesi. Sakkassa puññatejena tadanuvattakāpi sabbe tattheva patimsu. Atha nesam kammapaccaya-utusamutthānam sinerussa hetthimatale dasayojanasahassam asurabhavanam nibbatti pāricchattakapaticchannabhūtāya citrapātaliyā upasobhitam. Sakko tesam nivattitvā anāgamanatthāya ārakkham thapesi. Yam sandhāya vuttam—

> "Antarā dvinnam ayujjhapurānam, Pañcavidhā ṭhapitā abhirakkhā. Uragakaroṭipayassa ca hārī, Madanayutā² caturo ca mahatthā"ti³.

Tattha dvinnam ayujjapurānanti dvinnam devāsuranagarānam antarāti attho. Dve kira nagarāni yuddhena gahetum asakkuņeyyatāya ayujjhapurāni nāma jātāni. Yadā hi asurā balavanto honti, atha devehi palāyitvā devanagaram pavisitvā dvāre pihite asurānam satasahassampi

^{1.} Gandapānam (Sī), gandupānam (Syā, Ka), Sam-Ţtha 1. 309 piṭṭhe passitabbam.

^{2.} Madanayudhā (Sī), madanayuddhā (Syā)

^{3.} Sam-Ttha 1. 309; Jātaka-Ttha 1. 219 pitthesu.

kiñci kātum na sakkoti. Yadā devā balavanto honti, atha asurehi palāyitvā asuranagaram pavisitvā dvāre pihite sakkānam satasahassampi kiñci kātum na sakkoti. Iti imāni dve nagarāni ayujjhapurāni nāma. Tesam antarā etesu uragādīsu pañcasu thānesu sakkena ārakkhā thapitā. Tattha uragasaddena nāgā gahitā. Te udake mahabbalā honti, tasmā sinerussa pathamālinde etesam ārakkhā. Sinerussa kira samantato bahalato puthulato ca pañcayojanasahassaparimānāni cattāri paribhandāni tāvatimsabhavanassa ārakkhāya nāgehi garulehi kumbhandehi yakkhehi ca adhitthitāni. Tehi kira sinerussa upaddham pariyādinnam, etāniyeva ca sinerussa ālindāni mekhalāni ca vuccanti. **Karoti**saddena supannā gahitā. Tesam kira karoti nāma pānabhojanam, tena nāmam labhimsu, dutivālinde tesam ārakkhā. Payassahārīsaddena kumbhandā gahitā. Dānavarakkhasā kira te, tatiyālinde tesam ārakkhā. **Madanayuta**saddena yakkhā gahitā. Visamacārino kira te yuddhasondā, catutthālinde tesam ārakkhā. Caturo ca mahatthāti cattāro mahārājāno vutto. Te hi sinerussa tasmim tasmim passe yugandharādīsu pañcasataparittadīpaparivāre mahādīpe ca sāsitabbassa mahato atthassa vasena "mahatthā" ti vuccanti, pañca mālinde tesam ārakkhā.

Te pana asurā āyuvaṇṇayasa-issariyasampattīhi tāvatimsadisāva. Tasmā antarā attānam ajānitvā pāṭaliyā pupphitāya "nayidam devanagaram, tattha pāricchattako pupphati, idha pana cittapāṭalī, jarasakkena mayam suram pāyetvā vañjitā, devanagarañca no gahitam, gacchāma tena saddhim yujjhissāmā"ti hatthi-assarathe āruyha suvaṇṇarajatamaṇiphalakāni gahetvā yuddhasajjā hutvā asurabheriyo vādentā mahāsamudde udakam dvidhā bhinditvā yuddhasajjā hutvā asurabheriyo vādentā mahāsamudde udakam dvidhā bhinditvā uṭṭhahanti. Te deve vuṭṭhe vammikamakkhikā vammikam viya sinerum abhiruhitum ārabhanti. Atha nesam paṭhamam nāgehi saddhim yuddham hoti. Tasmim kho pana yuddhe na kassaci chavi vā cammam vā chijjati, na lohitam uppajjati, kevalam kumārakānam dārumeṇḍakayuddham viya aññamaññam santāsanamattameva hoti. Koṭisatāpi koṭisahassāpi nāgā tehi saddhim yujhitvā asurapuramyeva

pavesetvā nivattanti. Sace pana asurā balavanto honti, atha nāgā osakkitvā dutiye ālinde supaṇṇehi saddhim ekato hutvā yujjhanti. Esa nayo supaṇṇādīsupi. Yadā pana tāni pañcapi ṭhānāni asurā maddanti, tadā ekato sampiṇḍitānipi tāni pañca balāni osakkanti. Atha cattāro mahārājāno gantvā sakkassa pavattim ārocenti. Sakko tesam vacanam sutvā diyaḍḍhayojanasatikam vejayantaratham āruyha sayam vā nikkhamati, ekam vā puttam peseti. Ekasmim pana divase evam nikkhamitvā asure yuddhena abbhuggantvā samudde pakkhipitvā catūsu dvāresu attanā sadisā paṭimā māpetvā ṭhapeti, tasmā asurā nāgādayo jinitvā āgatāpi indapaṭimā disvā "sakko nikkhanto"ti palāyanti. Iti surānam paṭipakkhāti asurā, vepacittipahārādādayo, tesam bhavanam asurabhavanam. Tam pana āyāmato ca vitthārato ca dasasahassayojananti dassetum "tathā asurabhavanam"ti vuttam.

Avīcimahānirayo jambudīpo cāti etthāpi tathā-saddo vojetabbo, avīcimahānirayo jambudīpo ca tathā dasasahassayojanamevāti attho. Ettha ca avīcimahānirayassa abbhantaram āyāmena ca vitthārena ca yojanasatam hoti, lohapathavī lohachadanam ekekā ca bhitti navanavayojanikā hoti. Puratthimāya bhittiyā acci utthahitvā pacchimam bhittim gahetvā tam vinivijihitvā parato¹ vojanasatam gacchati. Sesadisāsupi eseva navo. Iti jālapariyantavasena āyāmavitthārato atthārasayojanādhikāni tīni yojanasatāni honti, parikkhepena nava yojanasatāni catupannāsañca yojanāni. Samantā pana ussadehi saddhim dasayojanasahassam hoti. Kasmā panesa narako "avīcī"ti sankhyam gatoti? Vīci nāma antaram vuccati, tattha ca aggijālānam vā sattānam vā dukkhassa vā antaram natthi, tasmā so "avīcī"ti sankhyam gato. Tassa hi puratthimabhittito jālā utthahitvā samsibbamānayojanasatam gantvā bhittim vinivijihitvā parato yojanasatam gacchati. Sesadisāsupi eseva nayo. Evam jālānam nirantaratāya avīci. Abbhantare panassa yojanasatike thane naliyam kottetva puritatipupittham viya sattā nirantarā, "imasmim thāne satto atthi, imasmim

1. Purato (Syā) Jātaka-Ṭṭha 5. 288 piṭṭhepi.

thāne natthī'ti na vattabbam, gacchantānam thitānam nisinnānam nipannānanca paccamānānam anto natthi, gacchantā thite vā nisinne vā nipanne vā na bādhenti. Evam sattānam nirantaratāya avīci. Kāyadvāre pana cha upekkhāsahagatāni cittāni uppajjanti, ekam dukkhasahagatam. Evam santepi yathā jivhāgge cha madhubindūni thapetvā ekasmim tambalohabindumhi thapite anudahanabalavatāya tadeva paññāyati, itarāni abbohārikāni honti, evam anudahanabalavatāya dukkhamevettha nirantaram, itarāni abbohārikānīti evam dukkhassa nirantaratāya avīcīti vuccati. "Ayañca avīcīmahānirayo jambudīpassa heṭṭhā patiṭṭhito"ti vadanti.

Jambudīpo pana āyāmato ca vitthārato ca dasasahassayojanaparimāņo. Tattha ca catusahassayojanappamāņo padeso tadupabhogīsattānam puññakkhayā udakena ajjhotthaṭo "samuddo"ti saṅkhyaṁ gato. Tisahassayojanappamāṇe manussā vasanti, tisahassayojanappamāṇe himavā patiṭṭhitoti veditabbo.

Aparagoyānam sattasahassayojananti-ādīsu āyāmato ca vitthārato ca pamāṇam dassitanti veditabbam. Tattha jambudīpo sakaṭasaṇṭhāno, channavutiyā paṭṭanakoṭisatasahassehi chapaṇṇāsaratanāgārehi navanavutiyā doṇamukhasatasahassehi tikkhattum tesaṭṭhiyā nagarasahassehi ca samannāgato. Jambudīpe kira ādito tesaṭṭhimattāni nagarasahassāni uppannāni, tathā dutiyam, tathā tatiyam. Tāni pana sampiṇḍetvā satasahassam, tato param asīti sahassāni ca nava sahassāni ca honti. Doṇamukhanti ca mahānagarassa āyuppattiṭṭhānabhūtam padhānagharam vuccati. Aparagoyāno ādāsasaṇṭhāno, pubbavideho aḍḍhacandasaṇṭhāno, uttarakuru pīṭhasaṇṭhāno. "Tamtamnivāsīnam tamtamparivāradīpavāsīnamca manussānam mukhampi tamtamsaṇṭhānan"ti vadanti.

Api cettha uttarakurukānam puññānubhāvasiddho ayampi viseso veditabbo. Tattha kira tesu tesu padesesu ghananicitapattasañchannasākhāpasākhā kūṭāgārupamā manoramā rukkhā tesam manussānam nivesanakiccam sādhenti. Yattha sukham nivasanti, aññepi tattha rukkhā sujātā sabbadāpi pupphitaggā tiṭṭhanti. Jalāsayāpi vikasitapadumapuṇḍarīkasogandhikādipupphasañchannā sabbakālam paramasugandhā samantato pavāyantā tiṭṭhanti.

Sarīrampi tesam atidīghatādidosarahitam ārohapariṇāhasampannam jarāya anabhibhūtattā valitapalitādidosavirahitam yāvatāyukam aparikkhīṇajavabalaparakkamasobhameva hutvā tiṭṭhati.

Anuṭṭhānaphalūpajīvitāya na ca tesam kasivaṇijjādivasena āhārapariyeṭṭhivasena dukkham atthi, tato eva na dāsadāsīkammakarādipariggaho atthi. Na ca tattha sītuṇhaḍamsamakasavātātapasarīsapavāļādiparissayo atthi. Yathā nāmettha gimhānam pacchime māse paccūsavelāyam samasītuṇho utu hoti, evameva sabbakālam tattha samasītuṇhova utu hoti, na ca nesam koci upaghāto vihesā vā uppajjati.

Akaṭṭhapākimameva sāliṁ akaṇaṁ athusaṁ suddhaṁ sugandhaṁ taṇḍulaphalaṁ niddhūmaṅgārena agginā pacitvā paribhuñjanti. Tattha kira jotikapāsāṇā nāma honti, atha te tayo pāsāṇe ṭhapetvā tattha¹ ukkhaliṁ āropenti, pāsāṇehi tejo samuṭṭhahitvā taṁ pāceti, añño sūpo vā byañjano vā na hoti, bhuñjantānaṁ cittānukūloyevassa raso hoti. Taṁ pana bhuñjantānaṁ nesaṁ kuṭṭhaṁ gaṇḍo kilāso soso kāso apamāro jaroti evamādiko na koci rogo uppajjati. Te taṁ ṭhānaṁ sampattānaṁ dentiyeva, macchariyacittaṁ nāma neva hoti, buddhapaccekabuddhādayopi mahiddhikā tattha gantvā piṇḍapātaṁ gaṇhanti. Na ca te khujjā vā vāmanā vā kāṇā vā kuṇī vā khañjā vā pakkhahatā vā vikalaṅgā vā vikalindriyā vā honti.

Itthiyopi tattha nātidīghā nātirassā nātikisā nātithūlā nātikāļikā nāccodātā sobhaggappattarūpā honti. Tathā hi dīghaṅgulī tambanakhā alambathanā tanumajjhā puṇṇacandamukhī visālakkhī mudugattā sahibhorū odātadantā gambhīranābhī tanujaṅghā dīghanīlavellitakesī puthulasussoṇī nātilomā nālāmo subhagā² utusukhasamphassā saṇhā sakhilasambhāsā nānābharaṇavibhūsitā vicaranti, sabbadāpi soļasavassuddesikā viya honti.

Purisāpi pañcavīsativassuddesikā viya, na puttā mātādīsu rajjanti, ayam tattha dhammatā. Sattāhikameva ca tattha itthipurisā kāmaratiyā

viharanti, tato vītarāgā viya yathāsukhaṁ gacchanti, na tattha idha viya gabbhokkantimūlakaṁ gabbhapariharaṇamūlakaṁ vā dukkhaṁ vijāyanamūlakaṁ vā dukkhaṁ hoti, rattakañcukato kañcanapaṭimā viya dārakā mātukucchito amakkhitā eva semhādinā sukheneva nikkhamanti, ayaṁ tattha dhammatā. Mātā pana puttaṁ vā dhītaraṁ vā vijāyitvā tesaṁ vicaraṇakappadese ṭhapetvā anapekkhā yathāruci gacchati. Tesaṁ tattha sayitānaṁ ye passanti purisā vā itthiyo vā, te attano aṅguliyo upanāmenti, tesaṁ kammabalena tato khīraṁ pavattati, tena te dārakā yāpenti. Evaṁ pana vaḍḍhantā katipayadivaseyeva laddhabalā hutvā dārikā itthiyo upagacchanti, dārakā purise.

Kapparukkhato eva ca tesam tattha vatthābharaṇāni nipphajjanti. Nānāvirāgavaṇṇavicittāni hi vatthāni sukhumāni mudusukhasampassāni tattha tattha kapparukkhesu olambantāni tiṭṭhanti. Nānāvidharamsijālasamujjalavividhavaṇṇaratanavinaddhāni anekavidhamālākammalatākammabhittikammavicittāni sīsūpagagīvūpagakaṭūpagahatthūpagapādūpagāni sovaṇṇamayāni ābharaṇāni ca kapparukkhato olambanti. Tathā vīṇāmudiṅgapaṇavasammatāļasaṅkhavaṁsavetāļaparivārādīni vallakīpabhutikāni tūriyabhaṇḍānipi tato olambanti. Tattha ca bahū phalarukkhā kumbhamattāni phalāni phalanti, madhurarasāni yāni paribhuñjitvā te sattāhampi khuppipāsāhi na bādhīyanti.

Najjopi tattha suvisuddhajalā supatitthā ramaņīyā akaddamā vālukatalā nātisītā nāti-uṇhā surabhigandhīhi jalajapupphehi sañchannā sabbakālaṁ surabhī vāyantiyo sandanti, na tattha kaṇṭakinā¹ kakkhaļagacchalatā honti, akaṇṭakā pupphaphalasacchannā eva honti, candananāgarukkhā sayameva rasaṁ paggharanti. Nahāyitukāmā ca nadītitthe ekajjhaṁ vatthābharaṇāni ṭhapetvā nadiṁ otaritvā nahāyitvā uttiṇṇā uttiṇṇā upariṭṭhimaṁ upariṭṭhimaṁ vatthābharaṇaṁ gaṇhanti, na tesaṁ evaṁ hoti "idaṁ mama, idaṁ parassā"ti. Tato eva na tesaṁ koci viggaho vā vivādo vā, sattāhikā eva ca nesaṁ kāmaratikīļā hoti, tato vītarāgā viya vicaranti. Yattha ca rukkhe sayitukāmā honti, tattheva sayanaṁ upalabbhati.

Mate ca satte na rodanti na socanti, tañca maṇḍayitvā nikkhipanti. Tāvadeva ca tathārūpā sakuṇā upagantvā mataṁ dīpantaraṁ nenti, tasmā susānaṁ vā asuciṭṭhānaṁ vā tattha natthi, na ca tato matā nirayaṁ vā tiracchānayoniṁ vā pettivisayaṁ vā upapajjanti. "Dhammatāsiddhassa pañcasīlassa ānubhāvena te devaloke nibbattantī"ti vadanti. Vassasahassameva ca nesaṁ sabbakālaṁ āyuppamāṇaṁ, sabbametaṁ nesaṁ pañcasīlaṁ viya dhammatāsiddhamevāti veditabbaṁ.

Tadantaresūti tesam cakkavālānam antaresu. Lokantarikanirayāti lokānam lokadhātūnam antaro vivaro lokantaro, tattha bhavā lokantarikā, nirayā. Tinnañhi sakatacakkānam pattānam vā aññamaññam āsannabhāvena thapitānam antarasadisesu tinnam tinnam cakkavāļānam antaresu ekeko lokantarikanirayo. So pana parimanato atthayojanasahassappamano hoti niccavivato hetthā upari ca kenaci na pihito. Yathā hi hetthā udakassa pidhāyikā pathavī natthīti asamvutā lokantarikanirayā, evam uparipi cakkavālesu viya devavimānānam abhāvato asamvutā apihitā cakkhuviññānuppattinivāranasamatthena ca andhakārena samannāgatā. Tattha kira cakkhuviññānam na jāyati ālokassa abhāvato. Tīsu dīpesu ekappahārena ālokakaranasamatthāpi candimasūriyā tattha ālokam na dassenti. Te hi yugandharasamappamāne ākāsappadese vicaranato cakkavāļapabbatassa vemajihena vicaranti, cakkavāļapabbatañca atikkamma lokantarikanirayā, tasmā te tattha ālokam na dassentīti cakkhuviññāṇam nuppajjati. Yadā pana sabbaññubodhisattassa patisandhiggahanādīsu obhāso uppajjati, tadā cakkhuviññānam uppajjati. "Aññepi kira bho santi sattā idhūpapannā"ti tam divasam aññamaññam passanti. Ayam pana obhāso ekam yāgupānamattampi na titthati, accharāsanghātamattameva vijjobhāso viya niccharitvā "kim idan"ti bhanantānamyeva antaradhāyati.

Kim pana kammam katvā tattha sattā nibbattantīti? Bhāriyam dāruņam garukam mātāpitūnam dhammikasamaṇabrāhmaṇānañca upari aparādham aññañca divase divase pāṇavadhādim sāhasikakammam katvā uppajjanti tambapaṇṇidīpe abhayacoranāgacorādayo viya. Tesam attabhāvo tigāvutiko hoti,

vaggulīnam viya dīghanakhā honti. Te rukkhe vagguliyo viya nakhehi cakkavāļapāde lagganti, yadā samsappantā aññamaññassa hatthapāsagatā honti, atha "takkho no laddho"ti maññamānā khādanattham gaṇhitum upakkamantā viparivattitvā lokasandhārake udake patanti, vāte paharantepi madhukaphalāni viya chijjitvā udake patanti, patitamattāva accantakhāre udake piṭṭhapiṇḍam viya vilīyanti atisītalabhāvato ātapasantāpābhāvena. Atisītalabhāvameva hi sandhāya accantakhāratā vuttā. Na hi tam kappasaṇṭhahana-udakam sampattikaramahāmeghavuṭṭham pathavīsandhārakam kappavināsaka-udakam viya khāram bhavitum arahati. Tathā hi sati pathavīpi vilīyeyya, tesam vā pāpakammabalena petānam pakati-udakassa pubbakheļabhāvāpatti viya tassa udakassa tadā khārabhāvappatti hotīti vuttam "accantakhāre udake piṭṭhapiṇḍam viya vilīyantī"ti.

Anantānīti aparimāṇāni, "ettakānī"ti aññehi minitum asakkuņeyyāni. Tāni ca bhagavā anantena buddhañāṇena avedi "ananto ākāso, ananto sattanikāyo, anantāni cakkavāļānī"ti. Tividhampi hi anantam buddhañāṇena paricchindati sayampi anantattā. Yāvatakañhi ñeyyam, tāvatakam ñāṇam. Yāvatakam ñāṇam, tāvatakameva ñeyyam. Ñeyyapariyantikam ñāṇam, ñāṇapariyantikam ñeyyanti. Tena vuttam "anantena buddhañāṇena avedī"tiādi. Anantatā cassa anantañeyyappaṭivijjhaneneva veditabbā tattha appaṭihatacārattā. Idāni yathāvuttamattham nigamento āha "evamassa okāsalokopi sabbathā vidito"ti.

Api cettha vivaṭṭādīnampi viditatā vattabbā, tasmā vivaṭṭādayopi ādito pabhuti evam veditabbā—samvaṭṭo samvaṭṭaṭṭhāyī vivaṭṭo vivaṭṭaṭṭhāyīti kappassa cattāri asankhyeyyāni. Tattha samvaṭṭanam vinassanam samvaṭṭo, vinassamāno asankhyeyyakappo. So pana atthato kāloyeva, tadā pavattamānasankhāravasenassa vināso veditabbo. Samvaṭṭato uddham tathāṭhāyīkālo samvaṭṭaṭṭhāyī. Vivaṭṭānam nibbattanam vaḍḍhanam vā vivaṭṭo, vaḍḍhamāno asankhyeyyakappo. Sopi atthato kāloyeva, tadā pavattamānasankhāravasenassa vaḍḍhi veditabbā. Vivaṭṭato

uddham tathāṭhāyīkālo **vivaṭṭaṭṭhāyī**. Tattha¹ tayo samvaṭṭā tejosamvaṭṭo āposamvaṭṭo vāyosamvaṭṭoti. Tisso samvaṭṭasīmā ābhassarā subhakinhā vehapphalāti. Yadā kappo tejena samvaṭṭati, tadā ābhassarato heṭṭhā agginā ḍayhati. Yadā āpena samvaṭṭati, tadā subhakinhato heṭṭhā udakena vilīyati. Yadā vāyunā samvaṭṭati, tadā vehapphalato heṭṭhā vātena viddhamsati.

Vitthārato pana tīsupi samvattakālesu ekam buddhakkhettam vinassati. Buddhakkhettam nāma tividham hoti jātikkhettam ānākkhettam visayakkhettañca. Tattha **jātikkhettaṁ** dasasahassacakkavālapariyantaṁ hoti, yam tathāgatassa patisandhiggahanādīsu kampati. Yattake hi thāne tathāgatassa patisandhiñānādiñānānubhāvo puññaphalasamutteiito saraseneva pativijambhati, tam sabbampi buddhankurassa nibbattanakkhettam nāmāti buddhakkhettanti vuccati. Ānākkhettam pana kotisatasahassacakkavālapariyantam, yattha ratanasuttam² khandhaparittam³ dhajaggaparittam⁴ ātānātiyaparittam⁵ moraparittanti⁶ imesam parittānam ānubhāvo vattati. Iddhimā hi cetovasippatto ānākkhettapariyāpanne vattha katthaci cakkavāle thatvā attano atthāya parittam katvā tattheva aññam cakkavālam gatopi kataparitto eva hoti. Ekacakkavāle thatvā sabbasattānam atthāya paritte kate ānākkhette sabbasattānampi abhisambhunāteva parittānubhāvo tattha devatāhi parittānam sampaticchitabbato, tasmā tam āṇākkhettanti vuccati. **Visayakkhettam** pana anantam aparimāṇam. Anantāparimānesu hi cakkavālesu yam yam tathāgato ākankhati, tam tam jānāti ākankhappatibaddhavuttitāya buddhanānassa. Evametesu tīsu buddhakkhettesu ekam ānākkhettam vinassati, tasmim pana vinassante jātikkhettam vinatthameva hoti. Vinassantampi ekatova vinassati, santhahantampi ekatova santhahati, tassevam vināso santhahanañca veditabbam.

Yasmim samaye kappo **agginā** nassati, āditova kappavināsakamahāmegho uṭṭhahitvā koṭisatasahassacakkavāļe ekam mahāvassam

^{1.} Visuddhi-Ttha 2. 44 pitthādīsu passitabbam.

^{3.} Vi 4. 245; Am 1. 384; Khu 5. 53 pitthesu.

^{5.} Dī 3. 158 pitthe.

^{2.} Khu 1. 4, 312 pitthesu.

^{4.} Sam 1. 220 pitthe.

^{6.} Khu 5. 38 pitthe Jātake.

vassati, manussā tuṭṭhā sabbabījāni nīharitvā vapanti, sassesu pana gokhāyitamattesu jātesu gadrabharavam ravanto ekabindumpi na vassati, tadā pacchinnapacchinnameva hoti vassam. Idam sandhāya hi bhagavatā "hoti so bhikkhave samayo yam bahūni vassāni bahūni vassasatāni bahūni vassasatasahassāni devo na vassatī"ti¹ vuttam. Vassūpajīvinopi sattā kālam katvā parittābhādibrahmaloke nibbattanti, pupphaphalūpajīviniyo ca devatā. Evam dīghe addhāne vītivatte tattha tattha udakam parikkhayam gacchati, athānupubbena macchakacchapāpi kālam katvā brahmaloke nibbattanti nerayikasattāpi. Tattha nerayikā sattamasūriyapātubhāve vinassantīti eke.

Jhānam pana vinā natthi brahmaloke nibbatti, etesañca keci dubbhikkhapīļitā, keci abhabbā jhānādhigamāya, te katham tattha nibbattantīti? Devaloke paṭiladdhajjhānavasena. Tadā hi "vassasatasahassassa accayena kappavuṭṭhānam bhavissatī"ti lokabyūhā nāma kāmāvacaradevā muttasirā vikiṇṇakesā rudammukhā assūni hatthehi puñchamānā rattavatthanivatthā ativiya virūpavesadhārino hutvā manussapathe vicarantā evam ārocenti "mārisā mārisā ito vassasatasahassassa accayena kappavuṭṭhānam bhavissati, ayam loko vinassissati, mahāsamuddopi ussussissati, ayañca mahāpathavī sineru ca pabbatarājā ḍayhissanti vinassissanti, yāva brahmalokā lokavināso bhavissati, mettam mārisā bhāvetha, karuṇam, muditam, upekkham mārisā bhāvetha, mātaram upaṭṭhahatha, kule jeṭṭhāpacāyino hothā"ti. Te pana devā lokam byūhenti sampiṇḍentīti "lokabyūhā"ti vuccanti. Te kira disvā manussā yattha katthaci ṭhitāpi nisinnāpi samvegajātā sambhamappattāva hutvā tesam āsanne thāne sannipatanti.

Katham panete kappavuṭṭhānam jānantīti? "Dhammatāya sañcoditā"ti ācariyā. "Tādisanimittadassanenā"ti eke. "Brahmadevatāhi uyyojitā"ti apare. Tesam pana vacanam sutvā yebhuyyena manussā ca bhummadevatā ca samvegajātā aññamaññam muducittā hutvā mettādīni puññāni karitvā devaloke nibbattanti. Tattha dibbasudhābhojanam bhuñjitvā tato

vāyokasiņe parikammam katvā jhānam paṭilabhanti. Devānam kira sukhasamphassavātaggahaṇaparicayena vāyokasiņe jhānāni sukheneva ijjhanti. Tadaññepana āpāyikā sattā aparāpariyavedanīyena kammena devaloke nibbattanti. Aparāpariyavedanīyakammarahito hi samsāre samsaranto nāma satto natthi. Tepi tattha tatheva jhānam paṭilabhanti. Evam devaloke paṭiladdhajjhānavasena sabbepi brahmaloke nibbattanti. Idañca yebhuyyavasena vuttam.

Keci pana "apāyasattā samvaṭṭamānalokadhātūhi aññesu lokadhātūsupi nibbattanti. Na hi sabbe apāyasattā tadā rūpārūpabhavesu uppajjantīti sakkā viññātum apāyesu dīghāyukānam devalokūpapattiyā asambhavato. Niyatamicchādiṭṭhiko pana vinassamānepi kappe nirayato na muccatiyeva, tasmā so tattha anibbattitvā piṭṭhicakkavāļe nibbattati. Niyatamicchādiṭṭhiyā hi samannāgatassa bhavato vuṭṭhānam nāma natthi. Tāya hi samannāgatassa neva saggo atthi, na maggo, tasmā so samvaṭṭamānacakkavāļato aññattha niraye nibbattitvā paccati. Kim pana piṭṭhicakkavāļam na jhāyatīti? Jhāyati. Tasmim jhāyamānepi esa ākāse ekasmim padese paccatī"ti vadanti.

Vassūpacchedato pana uddham dīghassa addhuno accayena dutiyo sūriyo pātubhavati, pātubhūte pana tasmim neva rattiparicchedo, na divāparicchedo paññāyati. Eko sūriyo uṭṭheti, eko attham gacchati, avicchinnasūriyasantāpova loko hoti. Yathā ca kappavuṭṭhānakālato pubbe uppannasūriyavimāne sūriyadevaputto hoti, evam kappavināsakasūriye natthi. Kappavuṭṭhānakāle pana yathā aññe kāmāvacaradevā, evam sūriyadevaputtopi jhānam nibbattetvā brahmalokam upapajjati. Sūriyamaṇḍalam pana pabhassaratarañceva tejavantatarañca hutvā pavattati. Tam antaradhāyitvā aññameva uppajjatīti apare. Tattha pakatisūriye vattamāne ākāse valāhakāpi dhūmasikhāpi vattanti, kappavināsakasūriye vattamāne vigatadhūmavalāhakam ādāsamaṇḍalam viya nimmalam nabham hoti. Thapetvā pañca mahānadiyo sesakunnadi-ādīsu udakam sussati.

Tatopi dīghassa addhuno accayena tatiyo sūriyo pātubhavati, yassa pātubhāvā mahānadiyopi sussanti.

Tatopi dīghassa addhuno accayena catuttho sūriyo pātubhavati, yassapātubhāvā himavati mahānadīnam pabhavāsīhappapātadaho¹ mandākinīdaho kaṇṇamuṇḍadaho rathakāradaho anotattadaho chaddantadaho kunāladahoti ime satta mahāsarā sussanti.

Tatopi dīghassa addhuno accayena pañcamo sūriyo pātubhavati, yassa pātubhāvā anupubbena mahāsamudde aṅgulipabbatemanamattampi udakaṁ na saṇṭhāti.

Tatopi dīghassa addhuno accayena chaṭṭho sūriyo pātubhavati, yassa pātubhāvā sakalacakkavāļaṁ ekadhūmaṁ hoti pariyādinnasinehaṁ dhūmena. Yāya hi āpodhātuyā tattha tattha pathavīdhātu ābandhattā sampiṇḍitā hutvā tiṭṭhati, sā chaṭṭhasūriyapātubhāvena parikkhayaṁ gacchati. Yathā cidaṁ, evaṁ kotisatasahassacakkavālānipi.

Tatopi dīghassa addhuno accayena sattamo sūriyo pātubhavati, yassa pātubhāvā sakalacakkavāļam ekajālam hoti saddhim koṭisatasahassacakkavāļehi, yojanasatikādibhedāni sinerukūṭāni palujjitvā ākāseyeva antaradhāyanti. Sā aggijālā uṭṭhahitvā cātumahārājike gaṇhāti. Tattha kanakavimānaratanavimānamaṇivimānāni jhāpetvā tavatimsabhavanam gaṇhāti. Etenevūpāyena yāva paṭhamajjhānabhūmim gaṇhāti, tattha tayopi brahmaloke jhāpetvā ābhassare āhacca tiṭṭhati. Sā yāva aṇumattampi saṅkhāragatam atthi, tāva na nibbāyati. Sabbasaṅkhāraparikkhayā pana sappitelajjhāpanaggisikhā viya chārikampi anavasesetvā nibbāyati. Heṭṭhā-ākāsena saha upari-ākāso eko hoti mahandhakāro.

Evam ekamasankhyeyyam ekanganam hutva thite lokasannivase lokassa santhanatthaya devo vassitum arabhati, aditova antaratthake himapato viya hoti. Tato kanamatta tandulamatta muggamasabadara-amalaka-elalukakumbhanda-alabumatta udakadhara hutva

^{1.} Sīhapātano (Syā), sīhappapātano (Ka), Ma-Ṭṭha 3. 25; Aṁ-Ṭṭha 3. 218 piṭṭhesu pana passitabbaṁ.

anukkamena usabhadve-usabha-aḍḍhagāvutagāvuta-aḍḍhayojanayojanadviyojana -pa- yojanasatayojanasahassamattā hutvā koṭisatasahassacakkavāļagabbhantaraṁ yāva avinaṭṭhabrahmalokā pūretvā antaradhāyati. Taṁ udakaṁ heṭṭhā ca tiriyañca vāto samuṭṭhahitvā ghanaṁ karoti parivaṭumaṁ paduminīpatte udakabindusadisaṁ.

Katham tāvamahantam udakarāsim ghanam karotīti ce?
Vivarasampadānato vātassāti. Tañhissa tahim tahim vivaram deti. Tam evam vātena sampiņḍiyamānam ghanam kariyamānam parikkhayamānam anupubbena heṭṭhā otarati. Otiņņe otiņņe udake brahmalokaṭṭhāne brahmaloko, uparicatukāmāvacaradevalokaṭṭhāne ca devalokā pātubhavanti. Cātumahārājikatāvatimsabhavanāni pana pathavīsambandhatāya na tāva pātubhavanti. Purimapathaviṭṭhānam otiņņe pana balavavātā uppajjanti, te tam pihitadvāre dhammakaraņe ṭhita-udakamiva nirussāsam katvā rumbhanti. Madhurodakam parikkhayam gacchamānam upari rasapathavim samuṭṭhāpeti, udakapiṭṭhe uppalinīpattam viya pathavī saṇṭhāti. Sā vaṇṇasampannā ceva hoti gandharasasampannā ca nirudakapāyāsassa upari paṭalam viya. Ettha pana mahābodhipallankaṭṭhānam vinassamāne loke pacchā vinassati, saṇṭhahamāne paṭhamam saṇṭhahatīti veditabbam.

Tadā ca ābhassarabrahmaloke paṭhamatarābhinibbattā sattā āyukkhayā vā puññakkhayā vā tato cavitvā opapātikā hutvā idhūpapajjanti, te honti sayampabhā antalikkhacarā, te tam rasapathavim sāyitvā taṇhābhibhūtā āluppakārakam paribhuñjitum upakkamanti. Atha tesam sayampabhā antaradhāyati, andhakāro hoti. Te andhakāram disvā bhāyanti. Tato tesam bhayam nāsetvā sūrabhāvam janayantam paripuṇṇapaññāsayojanam sūriyamaṇḍalam pātubhavati. Te tam disvā "ālokam paṭilabhimhā"ti haṭṭhatuṭṭhā hutvā "amhākam bhītānam bhayam nāsetvā sūrabhāvam janayanto uṭṭhito, tasmā sūriyo hotū"ti sūriyotvevassa nāmam karonti.

Atha sūriye divasam ālokam katvā atthangate "yampi ālokam labhimha, sopi no naṭṭho"ti puna bhītā honti. Tesam evam hoti "sādhu vatassa, sace aññam ālokam labheyyāmā"ti. Tesam cittam ñatvā viya ekūnapaññāsayojanam candamaṇḍalam pātubhavati. Te tam disvā

bhiyyoso mattāya haṭṭhatuṭṭhā hutvā "amhākaṁ chandaṁ ñatvā viya uṭṭhito, tasmā cando hotū"ti **cando**tvevassa nāmaṁ karonti.

Evam candimasūriyesu pātubhūtesu nakkhattāni tārakarūpāni pātubhavanti, tato pabhuti rattindivā paññāyanti, anukkamena ca māsaḍḍhamāsa-utusamvaccharā, candimasūriyānam pātubhūtadivaseyeva sinerucakkavāļahimavantapabbatā dīpasamuddā ca pātubhavanti. Te ca kho apubbam acarimam phagguṇapuṇṇamadivaseyeva pātubhavanti. Katham? Yathā nāma kaṅgubhatte paccamāne ekappahāreneva pubbuļakā¹ uṭṭhahanti, eke padesā thūpathūpā honti, eke ninnaninnā, eke samasamā, evameva thūpathūpaṭṭhāne pabbatā honti, ninnaninnaṭṭhāne samuddā, samasamaṭṭhāne dīpāti.

Atha tesam sattānam rasapathavim paribhunjantānam kammena² ekacce vannavanto honti, ekacce dubbanna honti. Tattha vannavanto dubbanne atimaññanti, tesam atimanapaccaya sapi rasapathavī antaradhayati, bhūmipappatako pātubhavati. Atha nesam teneva nayena sopi antaradhāyati, atha **padālatā**³ pātubhavati. Teneva nayena sāpi antaradhāyati, akatthapāko sāli pātubhavati akano athuso sugandho tandulaphalo. Tato nesam bhājanāni uppajjanti. Te sālim bhājane thapetvā pāsānapitthiyam thapenti, sayameva jālasikhā utthahitvā tam pacati. So hoti odano sumanajātipupphasadiso, na tassa sūpena vā byañjanena vā karanīyam atthi, yam yam rasam bhuñjitukāmā honti, tamtamrasova hoti. Tesam tam olārikam āhāram āharayatam tato pabhuti muttakarīsam sanjāyati. Tathā hi rasapathavī bhūmipappatako padālatāti ime tāva paribhuttā sudhāhāro viya khudam vinodetvā rasaharanīhi rasameva paribyūhentā titthanti vatthuno sukhumabhāvena, na nissandā, sukhumabhāveneva gahanindhanameva ca hoti. Odano pana paribhutto rasam vaddhentopi vatthuno olārikabhāveneva nissandam vissajiento passāvam karīsanca uppādeti.

Atha nesam nikkhamanatthāya vaṇamukhāni pabhijjanti. Purisassa purisabhāvo, itthiyā itthibhāvo pātubhavati. Purimattabhāvesu hi pavatta-upacārajjhānānubhāvena yāva sattasantānesu kāmarāgo vikkhambhanavegena

^{1.} Bubbuļakā (Sī, Syā)

^{3.} Badālatā (Sī, Syā)

^{2.} Kamena (Sī) Visuddhi-Ţţha 2. 48 piţţhepi.

samito, na tāva bahalakāmarāgūpanissayāni itthipurisindriyāni pāturahesum. Yadā panassa vicchinnatāya bahalakāmarāgo laddhāvasaro ahosi, tadā tadupanissayāni tāni sattānam attabhāvesu sañjāyimsu, tadā itthī purisam, puriso ca itthim ativelam upanijjhāyati. Tesam ativelam upanijjhāyanapaccayā kāmapariļāho uppajjati, tato **methunam dhammam** paṭisevanti. Te asaddhammapaṭisevanapaccayā viññūhi garahiyamānā viheṭhiyamānā tassa asaddhammassa paṭicchādanahetu **agārāni** karonti. Te agāram ajjhāvasamānā anukkamena aññatarassa alasajātikassa sattassa diṭṭhānugatim āpajjantā sannidhim karonti. Tato pabhuti kaṇopi thusopi taṇḍulam pariyonandhanti, lāyitaṭṭhānampi na paṭiviruhati.

Te sannipatitvā anutthunanti "pāpakā vata bho dhammā sattesu pātubhūtā, mayam hi pubbe manomayā ahumhā"ti, aggaññasutte¹ vuttanayena vitthāretabbam. Tato mariyādam thapenti, athaññataro satto aññassa bhāgam adinnam ādiyati, tam dvikkhattum paribhāsetvā tatiyavāre pānileddudandehi paharanti. Te evam adinnādāne kalahamusāvādadandādānesu uppannesu ca sannipatitvā cintayanti² "yannūna mayam ekam sattam sammanneyyāma, yo no sammā khīyitabbam khīyeyya, garahitabbam garaheyya, pabbājetabbam pabbājeyya, mayam panassa sālīnam bhāgamanuppadassāmā"ti. Evam katasannitthānesu pana sattesu imasmim tāva kappe ayameva bhagavā bodhisattabhūto tena samayena tesu sattesu abhirūpataro ca dassanīyataro ca mahesakkhataro ca buddhisampanno patibalo niggahapaggaham kātum. Te tam upasankamitvā yācitvā sammannimsu. So tena mahājanena sammatoti mahāsammato, khettānam adhipatīti khattiyo, dhammena samena paresam ranjetīti rājāti tīhi nāmehi paññāyittha. Yañhi loke acchariyaṭṭhānam, bodhisattova tattha ādipurisoti evam bodhisattam ādim katvā khattiyamandale santhite anupubbena brāhmanādayopi vannā santhahimsu.

Tattha kappavināsakamahāmeghato yāva jālopacchedo, idamekamasankhyeyyam samvattoti vuccati. Kappavināsakajālopacchedato

yāva koṭisatasahassacakkavāļaparipūrako sampattimahāmegho, idam dutiyamasaṅkhyeyyam samvaṭṭaṭṭhāyīti vuccati. Sampattimahāmeghato yāva candimasūriyapātubhāvo, idam tatiyamasaṅkhyeyyam vivaṭṭoti vuccati. Candimasūriyapātubhāvato yāva puna kappavināsakamahāmegho, idam catutthamasaṅkhyeyyam vivaṭṭaṭṭhāyīti vuccati. Vivaṭṭaṭṭhāyī-asaṅkhyeyyam catusaṭṭhi-antarakappasaṅgaham. "Vīsati-antarakappasaṅgahan"ti keci. Sesāsaṅkhyeyyāni kālato tena samappamāṇāneva. Imāni cattāri asaṅkhyeyyāni eko mahākappo hoti. Evam tāva agginā vināso ca saṇṭhahanañca veditabbam.

Yasmim pana samaye kappo **udakena** nassati, āditova kappavināsakamahāmegho vutthahitvāti pubbe vuttanayeneva vitthāretabbam. Ayam pana viseso—yathā tattha dutiyasūriyo, evamidha kappavināsako khārudakamahāmegho vutthāti. So ādito sukhumam sukhumam vassanto anukkamena mahādhārāhi kotisatasahassacakkavālānam pūrento vassati. Khārudakena phutthaphutthā pathavīpabbatādayo vilīyanti, udakam samantato vātehi dhārīyati. Pathaviyā hetthimantato pabhuti yāva dutiyajihānabhūmim udakam ganhāti. Tena hi khārudakena phutthaphutthā pathavīpabbatādayo udake pakkhittalonasakkharā viya vilīyanteva, tasmā pathavīsandhāraka-udakena saddhim ekūdakameva tam hotīti keci. Apare pana "pathavīsandhāraka-udakam tam sandhārakavāyukkhandhañca anavasesato vināsetvā sabbattha sayameva eko ghanabhūto titthatī"ti vadanti, tam yuttam. Upari pana chapi brahmaloke vilīyāpetvā subhakinhe āhacca titthati, tam yāva anumattampi sankhāragatam atthi, tāva na vūpasammati, udakānugatam pana sabbam sankhāragatam abhibhavitvā sahasā vūpasammati, antaradhānam gacchati. Hetthā-ākāsena saha upariākāso eko hoti mahandhakāroti sabbam vuttasadisam. Kevalam panidha ābhassarabrahmalokam ādim katvā loko pātubhavati. Subhakinhato cavitvā ābhassaratthānādīsu sattā nibbattanti. Tattha kappavināsakamahāmeghato yāva kappavināsakakhārudakopacchedo, idamekamasankhyeyyam. Udakupacchedato yāva sampattimahāmegho, idam dutiyamasankhyeyyam. Sampattimahāmeghato yāva candimasūriyapātubhāvo, idam tatiyamasankhyeyyam.

Candimasūriyapātubhāvato yāva kappavināsakamahāmegho, idam catutthamasankhyeyyam. Imāni cattāri asankhyeyyāni eko mahākappo hoti. Evam udakena vināso ca santhahananca veditabbam.

Yasmim samaye kappo **vātena** nassati, āditova

kappavināsakamahāmegho vutthahitvāti pubbe vuttanayeneva vitthāretabbam. Ayam pana viseso—yathā tattha dutiyasūriyo, evamidha kappavināsanattham vāto samutthāti. So pathamam thūlarajam utthāpeti, tato sanharajam² sukhumavālikam thūlavālikam sakkharapāsānādayoti yāvakūtāgāramatte pāsāne visamatthāne thitamahārukkhe ca utthāpeti. Te pathavito nabhamuggatā na puna patanti, tattheva cunnavicunnā hutvā abhāvam gacchanti. Athānukkamena hetthā mahāpathaviyā vāto samutthahitvā pathavim parivattetvā uddham mūlam katvā ākāse khipati. Yojanasatappamānāpi pathavippadesā dviyojanatiyojanacatuyojanapañcayojanachayojanasattayojanappamānāpi pabhijjitvā vātavegukkhittā ākāseyeva cunnavicunnā hutvā abhāvam gacchanti. Cakkavālapabbatampi sinerupabbatampi vāto ukkhipitvā ākāse khipati. Te aññamaññam abhihantvā cunnavicunnā hutvā vinassanti. Etenevūpāyena bhūmatthakavimānāni ca ākāsatthakavimānāni ca vināsento chakāmāvacaradevaloke vināsetvā kotisatasahassacakkavālāni vināseti. Tattha cakkavāļā cakkavāļehi, himavantā himavantehi, sinerū sinerūhi aññamaññam samāgantvā cunnavicunnā hutvā vinassanti. Pathavito yāva tatiyajjhānabhūmi vāto ganhāti, navapi brahmaloke vināsetvā vehapphale āhacca titthati. Evam pathavīsandhāraka-udakena tam sandhārakavātena ca saddhim sabbasankhāragatam vināsetvā sayampi vinassati avatthānassa kāranābhāvato. Hetthā-ākāsena saha upari-ākāso eko hoti mahandhakāroti sabbam vuttasadisam. Idha pana subhakinhabrahmalokam ādim katvā loko pātubhavati. Vehapphalato cavitvā subhakinhatthānādīsu sattā nibbattanti. Tattha kappavināsakamahāmeghato yāva kappavināsakavātupacchedo, idamekamasankhyeyyam. Vatupacchedato yava sampattimahamegho, idam dutiyamasankhyeyyanti-ādi vuttanayameva. Evam vātena vināso ca santhahanañca veditabbam.

Atha kimkāraṇā evam loko vinassati. Yadipi hi sankhārānam ahetuko sarasanirodho vināsakābhāvato, santānanirodho¹ pana hetuvirahito natthi. Yathā tam sattanikāyesūti bhājanalokassapi sahetukena vināsena bhavitabbam, tasmā kimevam lokavināse kāraṇanti? Akusalamūlam kāraṇam. Yathā hi tattha nibbattanakasattānam puññabalena paṭhamam loko vivaṭṭati, evam tesam pāpakammabalena samvaṭṭati, tasmā akusalamūlesu ussannesu evam loko vinassati. Yathā hi rāgadosamohānam adhikabhāvena yathākkamam rogantarakappo satthantarakappo dubbhikkhantarakappoti ime tividhā antarakappā vivaṭṭaṭṭhāyimhi asankhyeyyakappe jāyanti. Evamete yathāvuttā tayo samvaṭṭā rāgādīnam adhikabhāveneva honti.

Tattha rāge ussannatare agginā vinassati, dose ussannatare udakena vinassati. Dose hi ussannatare adhikatarena dosena viya tikkhatarena khārudakena vināso yuttoti. Keci pana "dose ussannatare agginā, rāge udakenā"ti vadanti, tesam kira ayamadhippāyo—pākaṭasattusadisassa dosassa aggisadisatā, apākaṭasattusadisassa rāgassa khārudakasadisatā ca yuttāti. Mohe pana ussannatare vātena vinassati. Evam vinassantopi ca nirantarameva satta vāre agginā nassati, aṭṭhame vāre udakena, puna satta vāre agginā, aṭṭhame udakenāti evam aṭṭhame aṭṭhame vāre vinassanto sattakkhattum udakena vinassitvā puna satta vāre agginā nassati. Ettāvatā tesaṭṭhi kappā abhītā honti. Etthantare udakena nassanavāram sampattampi paṭibāhitvā laddhokāso vāto paripuṇṇacatusaṭṭhikappāyuke subhakiṇhe viddhamsento lokam vināseti. Ettha pana rāgo sattānam bahulam pavattatīti aggivasena bahuso lokavināso veditabbo. Iti evam imehi kāraṇehi vinassitvā saṇṭhahantam saṇṭhahitvā ṭhitañca okāsalokam bhagavā yāthāvato avedīti evampissa sabbathā okāsaloko viditoti datthabbam.

Yam pana heṭṭhā vuttam "sabbathā viditalokattā lokavidū"ti, idāni tam nigamento āha "evam sabbathā viditalokattā lokavidū"ti.

Tattha **sabbathā**ti lakkhaṇādippabhedato saṅkhāralokassa, āsayādippabhedato sattalokassa, parimāṇasaṇṭhānādippabhedato okāsalokassāti evaṁ sabbappakārena viditalokattāti attho.

Idāni anuttaroti padassa attham samvaņņento āha "attano pana guņehī"ti-ādi. Tattha attanoti nissakkatthe sāmivacanametam, attatoti¹ attho. Guņehi attano visiṭṭhatarassāti sambandho. Taraggahaṇañcettha "anuttaro"ti padassa atthaniddesatāya katam, na visiṭṭhassa kassaci atthitāya. Sadevake hi loke sadisakappopi nāma koci tathāgatassa natthi, kuto sadiso, visiṭṭhe pana kā kathā. Kassacīti kassacipi. Abhibhavatīti sīlasampadāya upanissayabhūtānam hirottappamettākaruṇānam visesapaccayānam saddhāsativīriyapaññanañca ukkamsappattiyā samudāgamato paṭṭhāya na aññasādhāraṇo savāsanapaṭipakkhassa pahīnattā ukkamsapāramippatto satthu sīlaguṇo, tena bhagavā sadevakam lokam aññadatthu abhibhuyya pavattati, na sayam kenaci abhibhuyyatīti adhippāyo. Evam samādhiguṇādīsupi yathāraham vattabbam. Sīlādayo cete lokiyalokuttaramissakā veditabbā, vimuttiñāṇadassanam pana lokiyam kāmāvacarameva.

Yadi evam katham tena sadevakam lokam abhibhavatīti? Tassapi ānubhāvato asadisattā. Tampi hi visayato pavattito pavatti-ākārato ca uttaritarameva. Tañhi anaññasādhāraṇam satthu vimuttiguṇam ārabbha pavattati, pavattamānañca atakkāvacaram paramagambhīram saṇham sukhumam sātisayam paṭipakkhadhammānam suppahīnattā suṭṭhu pākaṭam vibhūtataram katvā pavattati, sammadeva ca vasībhāvassa pāpakattā bhavaṅgaparivāsassa ca atiparittakattā lahu lahu pavattatīti.

Evam sīlādiguņehi bhagavato uttaritarassa abhāvam dassetvā idāni sadisassapi abhāvam dassetum "sīlaguņenapi asamo"ti-ādi vuttam. Tattha asamoti ekasmim kāle natthi etassa sīlādiguņena samo sadisoti asamo. Tathā asamehi samo asamasamo. Asamā vā samā etassāti asamasamo. Sīlādigunena natthi

etassa paṭimāti **appaṭimo.** Sesapadadvayepi eseva nayo. Tattha upamāmattaṁ paṭimā, sadisūpamā paṭibhāgo, yugaggāhavasena ṭhito paṭipuggaloti veditabbo.

Na kho panāham bhikkhave samanupassāmīti-ādīsu mama samantacakkhunā hatthatale āmalakam viya sabbam lokam passantopi tattha sadevake -pa- pajāya attano attato sīlasampannataram sampannatarasīlam kancipi puggalam na kho pana passāmi tādisassa abhāvatoti adhippāyo.

Aggappasādasuttādīnīti ettha—

"Yāvatā bhikkhave sattā apadā vā dvipadā vā catuppadā vā bahuppadā vā rūpino vā arūpino vā saññino vā asaññino vā nevasaññīnāsaññino vā, tathāgato tesam aggamakkhāyati araham sammāsambuddho¹. Ye bhikkhave buddhe pasannā, agge te pasannā.

Agge kho pana pasannānam aggo vipāko hotī"ti—

idam aggappasādasuttam. Ādi-saddena—

"Sadevake bhikkhave loke -pa- sadevamanussāya tathāgato abhibhū anabhibhūto aññadatthu daso vasavattī, tasmā tathāgatoti vuccatī"ti²— evamādīni suttapadāni veditabbāni. Ādikā gāthāyoti—

"Aham hi arahā loke, aham satthā anuttaro.

Ekomhi sammāsambuddho, sītibhūtosmi nibbuto³.

Danto damayatam settho, santo samayatam isi.

Mutto mocayatam aggo, tinno tārayatam varo4.

^{1.} Am 1. 343; Khu 1. 254 pitthesu.

^{2.} Am 1. 332; Dī 3. 111 pitthesu.

^{3.} Vi 3. 12; Ma 1. 227; Ma 2. 295 pitthesu.

^{4.} Khu 1. 277 pitthe.

Nayimasmim loke parasmim vā pana,
Buddhena seṭṭho sadiso ca vijjati.
Āhuneyyānam paramāhutim¹ gato,
Puññatthikānam vipulapphalesinan"ti²—

evamādikā gāthā vitthāretabbā.

Purisadammasārathīti-ādīsu damitabbāti dammā, damitum araharūpā. Purisā ca te dammā cāti purisadammā. Visesanassa cettha paranipātam katvā niddeso, dammapurisāti attho. "Satipi mātugāmassapi dammabhāve purisaggahanam ukkatthaparicchedavasenā"ti vadanti. Sāretīti imassa attham dassento āha "dametī"ti-ādi. Tattha dametīti sameti, kāyasamādīhi yojetīti attho. Tam pana kāyasamādīhi yojanam yathāraham tadangavinayādīsu patitthāpanam hotīti āha "vinetīti vuttam hotī"ti. Adantāti idam sabbena sabbam damatam³ anupagatā purisadammāti vuttāti katvā vuttam. Ye pana vippakatadammabhāvā sabbathā dametabbatam nātivattā, tepi purisadammā eva, yato⁴ te satthā dameti. Bhagavā hi visuddhasīlassa pathamajjhānam ācikkhati, pathamajjhānalābhino dutiyajjhānanti-ādinā tassa tassa uparūpari visesam ācikkhanto ekadesena dantepi sameti. Teneva vuttam visuddhimagge⁵ "api ca so bhagavā visuddhasīlādīnam pathamajjhānādīni sotāpannādīnañca uttarimaggappatipadam ācikkhanto dantepi dametiyevā'ti. Atha vā sabbena sabbam adantā ekadesena dantā ca idha adantaggahaneneva sangahitāti veditabbam. **Dametum yuttā**ti damanārahā.

Tiracchānapurisāti-ādīsu uddham anuggantvā tiriyam añcitā gatā vaḍḍhitāti tiracchānā, devamanussādayo viya uddham dīgham ahutvā tiriyam dīghāti attho. Tiracchānāyeva purisā tiracchānapurisā.

^{1.} Tamāhu dakkhineyyānam aggatam (Sī), yamāhu dakkhineyyānam aggatam (Syā, Ka)

^{2.} Khu 2. 95; Abhi 4. 403 pitthesu.

^{3.} Damatatam (Sī), damatham (Syā)

^{4.} Tato (Sī)

^{5.} Visuddhi 1. 201 pitthe.

manassa ussannatāya manussā.

Satisūrabhāvabrahmacariyayogyatādiguņavasena upacitamānasā ukkaṭṭhaguṇacittā. Ke pana te? Jambudīpavāsino sattavisesā. Tenāha bhagavā—

"Tīhi bhikkhave ṭhānehi jambudīpakā manussā uttarakuruke ca manusse adhiggaṇhanti deve ca tāvatimse. Katamehi tīhi, sūrā satimanto idha brahmacariyavāso"ti¹.

Tathā hi buddhā bhagavanto paccekabuddhā aggasāvakā mahāsāvakā cakkavattino aññe ca mahānubhāvā sattā tattheva uppajjanti. Tehi samānarūpāditāya pana saddhim parittadīpavāsīhi itaramahādīpavāsinopi manussātveva paññāyimsūti eke. Apare pana bhaṇanti—lobhādīhi ca alobhādīhi ca sahitassa manassa ussannatāya manussā. Ye hi sattā manussajātikā, tesu visesato lobhādayo alobhādayo ca ussannā, te lobhādiussannatāya apāyamaggam, alobhādi-ussannatāya sugatimaggam nibbānagāmimaggañca pūrenti, tasmā lobhādīhi alobhādīhi ca sahitassa manassa ussannatāya parittadīpavāsīhi saddhim catumahādīpavāsino sattavisesā manussāti vuccanti. Lokiyā pana "manuno apaccabhāvena manussā"ti vadanti. Manu nāma paṭhamakappiko lokamariyādāya ādibhūto hitāhitavidhāyako sattānam pituṭṭhāniyo, yo sāsane mahāsammatoti vuccati, paccakkhato paramparāya ca tassa ovādānusāsaniyam ṭhitā tassa puttasadisatāya manussā mānusāti ca vuccanti. Tato eva hi te māṇavā "manujā"ti ca voharīyanti, manussā ca te purisā cāti manussapurisā.

Amanussapurisāti ettha na manussāti amanussā. Tamsadisatā ettha jotīyati. Tena manussattamattam natthi, aññam samānanti yakkhādayo amanussāti adhippetā. Na ye keci manussehi aññe, tathā tiracchānapurisānam visum gahaṇam katam. Yakkhādayo eva ca niddiṭṭhā. Apalālo himavantavāsī, cūļhodaramahodarā nāgadīpavāsino, aggisikhadhūmasikhā sīhaļadīpavāsino nibbisā katā dosavisassa vinodanena. Tenāha "saraņesu ca sīlesu ca patiṭṭhāpitā"ti.

Kūṭadantādayoti ādi-saddena ghoramukha-upāligahapati-ādīnaṁ saṅgaho daṭṭhabbo. Sakkādayoti ādi-saddena ajakalāpayakkhabakabrahmādīnaṁ saṅgaho daṭṭhabbo. Etesaṁ pana damanaṁ tattha tattha vuttanayeneva sakkā viññātunti atippapañcabhāvato idha na vuccati. Idañcettha suttaṁ vitthāretabbanti idaṁkesīsuttaṁ "vinītā vicitrehi vinayanūpāyehī"ti etasmiṁ atthe vitthāretabbaṁ yathārahaṁ saṇhādīhi upāyehi vinayanassa dīpanato.

Atthapadanti atthābhibyañjanakaṁ padaṁ, vākyanti attho. Vākyena hi atthābhibyatti, na nāmādipadamattena, ekapadabhāvena ca anaññasādhāraṇo satthu purisadammasārathibhāvo dassito hoti. Tenāha "bhagavā hī"ti-ādi. Aṭṭha disāti aṭṭha samāpattiyo. Tā hi aññamaññaṁ sambandhāpi asaṁkiṇṇabhāvena dissanti apadissanti, disā viyāti vā disā. Asajjamānāti na sajjamānā vasībhāvappattiyā nissaṅgacārā. Dhāvantīti javanavuttiyogato dhāvanti. Ekaṁyeva disaṁ dhāvatīti attano kāyaṁ aparivattantoti adhippāyo, satthārā pana damitā purisadammā ekiriyāpatheneva aṭṭha disā dhāvanti. Tenāha "ekapallaṅkeneva nisinnā"ti. Aṭṭha disāti ca nidassanamattametaṁ lokiyehi agatapubbaṁ nirodhasamāpattidisaṁ amatadisañca pakkhandanato.

Diţṭhadhammikasamparāyikaparamatthehīti-ādīsu diṭṭhadhammo vuccati paccakkho attabhāvo, tattha niyuttoti diṭṭhadhammiko, idhalokattho. Kammakilesavasena samparetabbato sammā gantabbato samparāyo, paraloko. Tattha niyuttoti samparāyiko, paralokattho. Paramo uttamo attho paramattho, nibbānam. Tehi diṭṭhadhammikasamparāyikaparamatthehi. Yathārahanti yathānurūpam, tesu tesu atthesu yo yo puggalo yam yam arahati, tadanurūpam. Anusāsatīti vineti tasmim tasmim atthe patiṭṭhāpeti. Saha atthena vattatīti sattho, bhaṇḍamūlena vaṇijjāya desantaram gacchanto janasamūho. Hitupadesādivasena paripāletabbo sāsitabbo so etassa atthīti satthā satthavāho niruttinayena. So viya bhagavāti āha "satthā viyāti satthā, bhagavā satthavāho"ti.

Idāni tamattham niddesapāļinayena dassetum "yathā satthavāho"ti-ādi vuttam. Tattha sattheti satthike jane. Kam udakam tārenti etthāti kantāro, nirudako araññappadeso. Ruļhīvasena pana itaropi araññappadeso tathā vuccati. Corakantāranti corehi adhiṭṭhitakantāram, tathā vāļakantāram. Dubbhikkhakantāranti dullabhabhikkham kantāram. Tāretīti akhemantaṭṭhānam atikkāmeti. Uttāretīti-ādi upasaggena padam vaḍḍhetvā vuttam. Atha vā uttāretīti khemantabhūmim upanento tāreti. Nittāretīti akhemantaṭṭhānato nikkhāmento tāreti. Patāretīti pariggahetvā tāreti, hatthena pariggahetvā tāreti viya tāretīti attho. Sabbampetam tāraņuttāraṇādi khemaṭṭhāne ṭhapanamevāti āha "khemantabhūmim sampāpetī"ti. Satteti veneyyasatte. Mahāgahanatāya mahānatthatāya dunnittharatāya ca jātiyeva kantāro jātikantāro, tam jātikantāram.

Ukkatthaparicchedavasenāti ukkatthasattaparicchedavasena. Devamanussā eva hi ukkatthasattā, na tiracchānādayo. **Etan**ti "devamanussānan" ti etam vacanam. Bhabbapuggalaparicchedavasenāti sammattaniyāmokkamanassa yogyapuggalassa paricchindanavasena. Bhagavatoti nissakke sāmivacanam yathā "upajjhāyato ajjhetī"ti. Bhagavato santike vāti attho. **Upanissayasampattin**ti tihetukapaṭisandhi-ādikam maggaphalādhigamassa balavakāraṇam. **Gaggarāyā**ti gaggarāya nāma rañño deviyā, tāya vā kāritattā "gaggarā"ti laddhanāmāya. Sare nimittam aggahesīti "dhammo eso vuccatī'ti dhammasaññāya sare nimittam ganhi, ganhanto ca pasannacitto parisapariyante nipajji. Sannirumbhitvā atthāsīti tassa sīse dandassa thapitabhāvam apassanto tattha dandam uppīletvā atthāsi. Mandūkopi dande thapitepi uppīlitepi dhammagatena pasādena vissaramakarontova kālamakāsi. Devaloke nibbattasattānam ayam dhammatā, yā "kutoham idha nibbatto, tattha kinnu kho kammamakāsin"ti āvajjanā. Tasmā attano purimabhavassa ditthattā āha "are ahampi nāma idha **nibbatto**"ti. **Bhagavato pāde sirasā vandī**ti kataññutāsamvaddhitena pemagāravabahumānena vandi.

Jānantova pucchīti mahājanassa kammaphalam buddhānubhāvanca paccakkham kātukāmo bhagavā "ko me vandatī"ti gāthāya pucchi. Tattha¹ koti devanāgayakkhagandhabbādīsu ko, katamoti attho. Meti mama. Pādānīti pāde. Iddhiyāti imāya evarūpāya deviddhiyā. Yasasāti iminā edisena yasena ca parivārena ca. Jalanti vijjotamāno. Abhikkantenāti ativiya kantena kāmanīyena sundarena. Vaṇṇenāti chavivaṇṇena sarīravaṇṇanibhāya. Sabbā obhāsayam disāti sabbā dasapi disā pabhāsento, cando viya sūriyo viya ca ekobhāsam ekālokam karontoti attho.

Evam pana bhagavatā pucchito devaputto attānam pavedento "maṇḍūkoham pure āsin"ti gāthamāha. Tattha pureti purimajātiyam. Udaketi idam tadā attano uppattiṭṭhānadassanam. Udake maṇḍūkoti tena uddhumāyikādikassa thale maṇḍūkassa nivattanam katam hoti. Gāvo caranti etthāti gocaro, gunnam ghāsesanaṭṭhānam. Idha pana gocaro viyāti gocaro, vāri udakam gocaro etassāti vārigocaro. Udakacārīpi hi koci kacchapādi avārigocaropi hotīti "vārigocaro"ti visesetvā vuttam. Tava dhammam suṇantassāti brahmassarena karavīkarutamañjunā desentassa tava dhammam "dhammo eso vuccatī"ti sare nimittaggāhavasena suṇantassa. Anādare cetam sāmivacanam. Avadhī vacchapālakoti vacche rakkhanto gopālakadārako mama samīpam āgantvā daṇḍamolubbha tiṭṭhanto mama sīse daṇḍam sannirumbhitvā mam māresīti attho.

Sitam katvāti "tathā parittatarenapi puññānubhāvena evam ativiya uļārā lokiyalokuttarasampattiyo labbhantī"ti pītisomanassajāto bhāsurataradhavaļavipphurantadasanakhakiraṇāvaļīhi bhiyyosomattāya tam padesam obhāsento sitam katvā. Pītisomanassavasena hi so—

"Muhuttam cittapasādassa, iddhim passa yasanca me. Ānubhāvanca me passa, vannam passa jutinca me.

1. Vimāna-Ttha 202 pitthepi passitabbam.

Ye ca te dīghamaddhānam, dhammam assesum gotama.

Pattā te acalaṭṭhānam, yattha gantvā na socare"ti1—
imā dve gāthā vatvā pakkāmi.

Yaṁ pana kiñcīti ettha yanti aniyamitavacanaṁ, tathā kiñcīti. Panāti vacanālaṅkāramattaṁ. Tasmā yaṁ kiñcīti ñeyyassa anavasesapariyādānaṁ kataṁ hoti. Panāti vā visesatthadīpako nipāto. Tena "sammāsambuddho"ti iminā saṅkhepato vitthārato ca satthu catusaccābhisambodho vutto.

Buddhoti pana iminā tadaññassapi ñeyyassa avabodho. Purimena vā satthu paṭivedhañāṇānubhāvo, pacchimena desanāñāṇānubhāvo. Pīti upari vuccamāno viseso jotīyati. Vimokkhantikañāṇavasenāti ettha sabbaso paṭipakkhehi vimuccatīti vimokkho, aggamaggo, tassa anto, aggaphalaṁ, tasmiṁ laddhe laddhabbato tattha bhavaṁ vimokkhantikaṁ, ñāṇaṁ sabbaññutaññānena saddhiṁ sabbampi buddhañānaṁ.

Evam pavattoti ettha—

"Sabbaññutāya buddho, sabbadassāvitāya buddho, anaññaneyyatāya buddho, visavitāya buddho, khīṇāsavasaṅkhātena buddho, nirupalepasaṅkhātena buddho, ekantavītarāgoti buddho, ekantavītadosoti buddho, ekantavītamohoti buddho, ekantanikkilesoti buddho, ekāyanamaggaṁ gatoti buddho, eko anuttaraṁ sammāsambodhiṁ abhisambuddhoti buddho, abuddhivihatattā buddhipaṭilābhā buddho. Buddhoti netaṁ nāmaṁ mātarā kataṁ, na pitarā kataṁ, na bhātarā kataṁ, na bhaginiyā kataṁ, na mittāmaccehi kataṁ, na ñātisālohitehi kataṁ, na samaṇabrāhmaṇehi kataṁ, na devatāhi kataṁ, vimokkhantikametaṁ buddhānaṁ bhagavantānaṁ bodhiyā mūle saha sabbaññutaññāṇassa paṭilābhā sacchikā paññatti yadidaṁ buddho"ti²—

ayam niddesapāļinayo. Yasmā cettha tassā paṭisambhidāpāļiyā¹ bhedo natthi, tasmā dvīsu ekenapi atthasiddhīti dassanattham "paṭisambhidānayo vā"ti aniyamattho vāsaddo vutto.

Tattha² yathā loke avagantā "avagato"ti vuccati, evam bujjhitā saccānīti buddho suddhakattuvasena. Yathā paṇṇasosā vātā "paṇṇasusā"ti vuccanti, evam bodhetā pajāyāti buddho hetukattuvasena. Hetu-attho cettha antonīto. Sabbaññutāya buddhoti sabbadhammabujjhanasamatthāya buddhiyā buddhoti attho. Sabbadassāvitāya buddhoti sabbadhammabodhanasamatthāya buddhoti attho.

Anaññaneyyatāya buddhoti aññena abodhito sayameva buddhattā buddhoti attho. Visavitāya buddhoti nānāguṇavisavanato³ padumamiva vikasanaṭṭhena buddhoti attho. Khīṇāsavasaṅkhātena buddhoti evamādīhi chahi padehi cittasaṅkocakaradhammappahānena niddākkhayavibuddho puriso viya sabbakilesaniddākkhayavibuddhattā buddhoti vuttaṁ hoti. Tattha saṅkhā saṅkhātanti atthato ekattā saṅkhātenāti vacanassa koṭṭhāsenāti attho. Taṇhālepadiṭṭhilepābhāvena nirupalepasaṅkhātena. Savāsanānaṁ sabbakilesānaṁ pahīnattā ekantavacaneneva visesetvā "ekantavītarāgo"tiādi vuttaṁ. Ekantanikkilesoti rāgadosamohāvasesehi sabbakilesehi nikkileso. Ekāyanamaggaṁ gatoti buddhoti gamanatthānaṁ buddhi-atthatā viya buddhi-atthānampi gamanatthatā labbhatīti ekāyanamaggaṁ gatattā buddhoti vuccatīti attho. Eko anuttaraṁ sammāsambodhiṁ abhisambuddhoti buddhoti na parehi buddhattā buddho, atha kho sayameva anuttaraṁ sammāsambodhiṁ abhisambuddhattā buddhoti attho.

Abuddhivihatattā buddhipaṭilābhā buddhoti buddhi buddham bodhoti anatthantaram. Tattha yathā rattaguṇayogato ratto paṭo, evam buddhaguṇayogato buddhoti ñāpanattham vuttam. Tato param buddhoti netam nāmanti-ādi atthānugatāyam paññattīti bodhanattham vuttanti evamettha imināpi kāraṇena bhagavā buddhoti veditabbo.

^{1.} Khu 9. 172 pitthe.

^{2.} Paţisam-Ţtha 2. 84; Mahāniddesa-Ţtha 390 piţthādīsupi passitabbam.

^{3.} Vikasitāya buddhoti nānāgunavikasanato (Sī, Ka)

Idāni **bhagavā**ti imassa attham dassento āha **"bhagavāti idam panassā"**ti-ādi. Tattha **assā**ti bhagavato.

Guṇavisiṭṭhasattuttamagarugāravādhivacananti sabbehi sīlādiguṇehi visiṭṭhassa tato eva sabbasattehi uttamassa garuno gāravavasena vuccamānavacanametam bhagavāti. Tathā hi lokanātho aparimitanirupamappabhāvasīlādiguṇavisesasamaṅgitāya sabbānatthaparihārapubbaṅgamāya niravasesahitasukhavidhānatapparāya niratisayāya payogasampattiyā sadevamanussāya pajāya accantupakāritāya ca aparimāṇāsu lokadhātūsu aparimāṇānam sattānam uttamam gāravaṭṭhānanti.

Bhagavāti vacanam seṭṭhanti seṭṭhavācakam vacanam seṭṭhaguṇasahacaraṇato "seṭṭhan"ti vuttam. Atha vā vuccatīti vacanam, attho, tasmā yo "bhagavā"ti vacanena vacanīyo attho, so seṭṭhoti attho. Bhagavāti vacanamuttamanti etthāpi eseva nayo. Gāravayuttoti garubhāvayutto garuguṇayogato. Garukaraṇam vā sātisayam arahatīti gāravayutto, gāravārahoti attho. "Sippādisikkhāpakā garū honti, na ca gāravayuttā, ayam pana tādiso na hoti, tasmā 'garū'ti vatvā 'gāravayutto'ti vuttan"ti keci.

Guṇavisesahetukaṁ "bhagavā"ti idaṁ bhagavato nāmanti saṅkhepato vuttamatthaṁ vitthārato vibhajitukāmo nāmaṁyeva tāva atthuddhāravasena dassento "catubbidhaṁ hi nāman"ti-ādimāha. Tattha āvatthikanti avatthāya viditaṁ taṁ taṁ avatthaṁ upādāya paññattaṁ voharitaṁ. Tathā liṅgikaṁ tena tena liṅgena voharitaṁ. Nemittikanti nimittato āgataṁ.

Adhiccasamuppannanti yadicchāya pavattam, yadicchāya āgatam yadicchakam¹. Idāni āvatthikādīni nāmāni sarūpato dassento āha "tattha vaccho dammo balibaddo"ti-ādi. Tattha paṭhamena ādi-saddena bālo yuvā vuḍḍhoti evamādim saṅgaṇhāti, dutiyena muṇḍī jaṭīti evamādim, tatiyena bahussuto dhammakathiko jhāyīti evamādim, catutthena aghapadīpanam² pāvacananti evamādim saṅgaṇhāti. Nemittikanti vuttamattham byatirekavasena patiṭṭhāpetum "na mahāmāyāyā"ti-ādi vuttam.

Vimokkhantikanti iminā pana idam nāmam ariyāya jātiyā jātakkhaņeyeva jātanti dasseti.

Yadi vimokkhantikam, atha kasmā añnehi khīnāsavehi asādhāraṇanti āha "saha sabbañnutañnāṇassa paṭilābhā"ti. Buddhānanhi arahattaphalam nipphajjamānam sabbañnutañnāṇādīhi sabbehi buddhaguṇehi saddhim yeva nipphajjati. Tena vuttam "vimokkhantikan"ti. Sacchikā pañnattīti sabbadhammānam sacchikiriyāya nimittā pañnatti. Atha vā sacchikā pañnattīti paccakkhasiddhā pañnatti. Yamguṇanimittā¹ hi sā,²te satthu paccakkhabhūtā, tamguṇā viya sāpi² sacchikatā eva nāma hoti, na paresam vohāramattenāti adhippāyo.

Vadantīti mahātherassa garubhāvato bahuvacanenāha, saṅgītikārehi vā katamanuvādaṁ sandhāya. Issariyādibhedo bhago assa atthīti bhagī.

Maggaphalādi-ariyadhammaratanaṁ araññavanapatthāni pantāni senāsanāni appasaddādiguṇayuttāni bhaji sevi sīlenāti bhajī, bhajanasīloti attho. Bhāgīti cīvarapiṇḍapātādīnaṁ catunnaṁ paccayānañceva atthadhammavimuttirasassa ca adhisīlādīnañca bhāgīti attho. Vibhaji pavibhaji dhammaratananti vibhattavā. Akāsi bhagganti rāgādipāpadhammaṁ bhaggaṁ akāsīti bhagavāti attho. Garupi loke bhagavāti vuccatīti āha "garū"ti. Yasmā garu, tasmāpi bhagavāti vuttaṁ hoti. Hetu-attho hi iti-saddo. So ca yattha iti-saddo natthi bhagīti-ādīsu, tattha paccekaṁ yojetabbo. Bhāgyamassa atthīti bhāgyavā. Bahūhi ñāyehīti kāyabhāvanādikehi anekehi bhāvanākkamehi. Subhāvitattanoti sammadeva bhāvitasabhāvassa. Paccatte cetaṁ sāmivacanaṁ, tena subhāvitattāti vuttaṁ hoti, subhāvitasabhāvoti attho. Mahāgaṇṭhipade pana "subhāvitattano subhāvitakāyo"ti vuttaṁ. Bhavānaṁ antaṁ nibbānaṁ gatoti bhavantago.

Niddese vuttanayenāti etthāyam niddesanayo—

"Bhagavāti gāravādhivacanametam. Apica bhaggarāgoti bhagavā, bhaggadosoti bhagavā, bhaggamohoti bhagavā, bhaggamānoti bhagavā, bhaggadiṭṭhīti bhagavā, bhaggataṇhoti bhagavā, bhaggakilesoti bhagavā, bhaji vibhaji pavibhaji dhammaratananti bhagavā, bhavānam anta-

^{1.} Yā gunanimittā (Sī)

^{2-2.} Te satthu paccakkhabhūtā guṇavisesā viya (Sī), te satthu paccakkhabhūtāti guṇā viya sāpi (Syā)

karoti bhagavā, bhāvitakāyo bhāvitasīlo bhāvitacitto bhāvitapaññoti bhagavā, bhaji vā bhagavā araññavanapatthāni pantāni senāsanāni appasaddāni appanigghosāni vijanavātāni manussarāhasseyyakāni patisallānasāruppānīti bhagavā. Bhāgī vā bhagavā cīvarapindapātasenāsanagilānapaccayabhesajjaparikkhārānanti bhagavā. Bhāgī vā bhagavā attharasassa dhammarasassa vimuttirasassa adhisīlassa adhicittassa adhipaññāyāti bhagavā. Bhāgī vā bhagavā catunnam jhānānam catunnam appamaññānam catunnam arūpasamāpattīnanti bhagavā. Bhāgī vā bhagavā atthannam vimokkhānam atthannam abhibhāyatanānam navannam anupubbavihārasamāpattīnanti bhagavā. Bhāgī vā bhagavā dasannam saññābhāvanānam dasannam kasinasamāpattīnam ānāpānassatisamādhissa asubhasamāpattiyāti bhagavā. Bhāgī vā bhagavā catunnam satipatthānānam catunnam sammappadhānānam catunnam iddhipādānam pañcannam indriyānam pañcannam balānam sattannam bojjhanganam ariyassa atthangikassa maggassati bhagava. Bhāgī vā bhagavā dasannam tathāgatabalānam catunnam vesārajjānam catunnam patisambhidanam channam abhiññanam channam buddhadhammānanti bhagavā. Bhagavāti netam nāmam -pa- sacchikā paññatti yadidam bhagavā"ti¹.

Ettha ca "gāravādhivacanan"ti-ādīni yadipi gāthāyam āgatapadānukkamena na niddiṭṭhāni, yathāraham pana tesam sabbesampi niddesabhāvena veditabbāni. Tattha gāravādhivacananti garūnam garubhāvavācakam vacanam. Bhajīti bhāgaso kathesi. Tenāha "vibhaji pavibhaji dhammaratanan"ti. Maggaphalādi ariyadhammoyeva dhammaratanam. Puna bhajīti imassa sevīti attho. Bhāgīti bhāgābhidheyyavā. Puna bhāgīti ettha bhajanasīloti attho. Attharasassāti atthasannissayassa rasassa. Vimuttāyatanasīse hi ṭhatvā dhammam kathentassa suṇantassa ca tadattham ārabbha uppajjanakapītisomanassam attharaso. Dhammam ārabbha dhammaraso. Yam sandhāya vuttam "labhati atthavedam, labhati dhammavedan"ti². Vimuttirasassāti vimuttibhūtassa vimuttisannissayassa vā rasassa.

Saññābhāvanānanti aniccasaññādīnaṁ dasannaṁ saññābhāvanānaṁ.
Channaṁ buddhadhammānanti cha asādhāraṇañāṇāni sandhāya vuttaṁ.
Tattha tattha bhagavātisaddasiddhi niruttinayeneva veditabbā.

Yadipi "bhāgyavā"ti-ādīhi padehi vuccamāno attho "bhagī bhajī"ti¹ niddesagāthāya saṅgahito eva, tathāpi padasiddhi-atthavibhāga-atthayojanādisahito saṁvaṇṇanānayo tato aññākāroti vuttaṁ "ayaṁ pana aparo nayo"ti. Vaṇṇavipariyāyoti etanti ettha iti-saddo ādi-attho, tena vaṇṇavikāro vaṇṇalopo dhātu-atthena² niyojanañcāti imaṁ tividhaṁ lakkhaṇaṁ saṅgaṇhāti. Saddanayenāti saddalakkhaṇanayena. Pisodarādīnaṁ saddānaṁ ākatigaṇabhāvato vuttaṁ "pisodarādipakkhepalakkhaṇaṁ gahetvā"ti. Pakkhipanameva lakkhaṇaṁ. Tappariyāpannatākaraṇañhi pakkhipanaṁ. Pārappattanti paramukkaṁsagataṁ pāramībhāvappattaṁ. Bhāgyanti kusalaṁ. Tattha maggakusalaṁ lokuttarasukhanibbattakaṁ, itaraṃpi vā vivaṭṭupanissayaṁ pariyāyato lokuttarasukhanibbattakaṁ siyā.

Idāni bhagavāti imassa attham vibhajitvā dassento āha "yasmā panā"tiādi. Tattha lobhādayo ekakavasena gahitā, tathā viparītamanasikāro vipallāsabhāvasāmaññena, ahirikādayo dukavasena. Tattha kujjhanalakkhaņo kodho, so navavidha-āghātavatthusambhavo. "Akkocchi mam avadhi man"ti-ādinā³ punappunam kujjhanavasena cittapariyonandhano upanāho. Ubhayampi paṭighoyeva, so pavattinānattato bhinditvā vutto. Sakim uppanno kodho kodhoyeva, taduttari upanāho. Vuttañcetam "pubbakāle kodho, aparakāle upanāho"ti⁴. Agāriyassa⁵ anagāriyassa vā sukatakaraṇavināsano makkho. Agāriyopi hi kenaci anukampakena daliddo samāno ucce ṭhāne ṭhapito aparena samayena "kim tayā mayham katan"ti tassa sukatakaraṇam vināseti. Anagāriyopi sāmaṇerakālato pabhuti ācariyena vā upajjhāyena vā catūhi paccayehi uddesaparipucchādīhi ca anuggahetvā dhammakathānayappakaranakosallādīni sikkhāpito

^{1.} Khu 7. 162 piṭṭhe. 2. Dhātu-atthātisayena (Sī) 3. Khu 1. 13 piṭṭhe Dhammapade.

^{4.} Abhi 2. 371 pitthe. 5. Ma-Ttha 1. 173 pitthādīsupi passitabbam.

aparena samayena rājarājamahāmattādīhi sakkato garukato ācariyupajjhāyesu acittīkato caramāno "ayam amhehi daharakāle evam anuggahito samvaḍḍhito ca, atha ca panidāni nissineho jāto"ti vuccamāno "kim mayham tumhehi katan"ti tesam sukatakaraṇam vināseti, tasseso pubbakāritālakkhaṇassa guṇassa vināsano udakapuñchaniyā viya sarīrānugatam udakam nipuñchanto makkho. Tathā hi so paresam guṇānam makkhanaṭṭhena "makkho"ti vuccati. Paļāsatīti **paļāso**, parassa guṇe dassetvā¹ attano guṇehi same karotīti attho. So pana bahussutepi puggale ajjhottharitvā "īdisassa ca bahussutassa aniyatā gati, tava vā mama vā ko viseso"ti, rattaññū cirapabbajite puggale ajjhottharitvā "tvampi imasmim sāsane pabbajito, ahampi pabbajito, tvampi sīlamatte ṭhito, ahampī"ti-ādinā nayena uppajjamāno yugaggāho. Yugaggāhalakkhano hi palāso.

Paresam sakkārādīni khīyamānā usūyamānā issā. Attano sampattiyā nigūhanam parehi sādhāraṇabhāvam asahamānam macchariyam.

Vancanikacariyabhūtā māyā, sā sakadosapaṭicchādanalakkhaṇā. Tathā hi sā attano vijjamānadosapaṭicchādanato cakkhumohanamāyā viyāti "māyā"ti vuccati. Attano avijjamānaguṇappakāsanalakkhaṇam kerāṭikabhāvena uppajjamānam sāṭheyyam. Asantaguṇadīpanañhi "kerāṭiyan"ti vuccati. Kerāṭiko hi puggalo āyanamaccho² viya hoti. Āyanamaccho² nāma sappamukhamacchavālā ekā macchajāti. So kira macchānam naṅguṭṭham dasseti, sappānam sīsam "tumhākam sadiso ahan"ti jānāpetum, evameva kerāṭiko puggalo yam yam suttantikam vā ābhidhammikam vā upasaṅkamati, tam tam evam vadati "aham tumhākam antevāsī, tumhe mayham anukampakā, nāham tumhe muncāmī"ti. Evamete "sagāravo ayam amhesu sappatisso"ti maññissanti, tassevam kerāṭikabhāvena uppajjamānam sātheyyam.

Sabbaso maddavābhāvena vātabharitabhastasadisassa thaddhabhāvassa anonamitadandasadisatāya paggahitasira-anivātavuttikāyassa ca

^{1.} Damsitvā (Syā)

^{2.} Ānandamaccho (Sī), āyandamaccho (Syā), āyatanamaccho (Ma-Ttha 1. 174 pitthe)

kārako thambho. Taduttarikaraņo sārambho. So duvidhena labbhati akusalavasena ceva kusalavasena ca. Tattha agāriyassa parena katam alankārādim disvā taddigunataddigunakaranena uppajjamāno, anagāriyassa ca yattakam yattakam paro pariyapunati va katheti va, manavasena taddigunataddigunakaranena uppajjamāno akusalo. Tena hi samannāgato puggalo taddigunam taddigunam karoti. Agāriyo samāno ekenekasmim gharavatthusmim sajjite aparo dve vatthūni sajjeti, aparo cattāro, aparo attha, aparo solasa. Anagāriyo samāno ekenekasmim nikāye gahite "nāham etassa hetthā bhavissāmī"ti aparo dve ganhāti, aparo tayo, aparo cattāro, aparo pañca. Sārambhavasena hi ganhitum na vattati. Akusalapakkho hesa nirayagāmimaggo. Agāriyassa pana param ekam salākabhattam dentam disvā attano dve vā tīni vā dātukāmatāya uppajjamāno, anagāriyassa ca parena ekanikāye gahite mānam anissāya kevalam tam disvā attano ālasiyam abhibhuyya dve nikāye gahetukāmatāya uppajjamāno kusalo, kusalapakkhavasena hi ekasmim ekam salākabhattam dente dve, dve dente cattari datum vattati. Bhikkhunapi parena ekasmim nikaye gahite "dve nikāve gahetvā sajjhāvantassa me phāsu hotī"ti vivattapakkhe thatvā taduttari ganhitum vattati, idha pana akusalapakkhiyo taduttarikarano "sārambho"ti vutto.

Jāti-ādīni nissāya seyyassa "seyyohamasmī"ti-ādinā unnativasena paggaņhanavasena pavatto **māno**. Abbhunnativasena pavatto **atimāno**. Pubbe kenaci attānam sadisam katvā pacchā tato adhikato dahato uppajjamānako atimānoti veditabbo. Jāti-ādim paṭicca majjanākāro **mado**, sopi atthato māno eva. So pana jātimado gottamado ārogyamado yobbanamado jīvitamado lābhamado sakkāramado garukāramado purekkhāramado parivāramado bhogamado vaṇṇamado sutamado paṭibhānamado rattaññumado piṇḍapātikamado anavaññattimado iriyāpathamado iddhimado yasamado sīlamado jhānamado sippamado ārohamado pariṇāhamado saṇṭhānamado pāripūrimadoti anekavidho.

Tattha¹ jātim nissāya uppanno majjanākārappavatto māno **jātimado.** so khattiyādīnam catunnampi vannānam uppajjati. Jātisampanno hi khattiyo "mādiso añño natthi, avasesā antarā utthāya khattiyā jātā, aham pana vamsāgatakhattivo"ti mānam karoti. Brāhmanādīsupi eseva nayo. Gottam nissāva uppanno majjanākārappavatto māno gottamado, sopi khattivādīnam catunnampi vannānam uppajjati. Khattiyopi hi "aham kondaññagotto, aham ādiccagotto"ti mānam karoti. Brāhmanopi "aham kassapagotto, aham bhāradvājagotto"ti mānam karoti. Vessopi suddopi attano attano kulagottam nissāya mānam karoti. Ārogyamadādīsupi "aham arogo, sesā rogabahulā, kanduvanamattampi mayham byādhi nāma natthī"ti majjanavasena uppanno māno **ārogyamado** nāma. "Aham taruno, avasesasattānam attabhāvo papāte thitarukkhasadiso, aham pana pathamavaye thito"ti majjanavasena uppanno māno **vobbanamado.** "Aham ciram jīvim, ciram jīvāmi, ciram jīvissāmi, sukham jīvim, sukham jīvāmi, sukham jīvissāmī"ti majjanavasena uppanno māno **jīvitamado** nāma. "Aham lābhī, avasesā sattā appalābhā, mayham pana lābhassa pamānam natthī"ti majjanavasena uppanno māno lābhamado nāma.

"Avasesā sattā yam vā tam vā labhanti, aham pana sukatam paṇītam cīvarādipaccayam labhāmī"ti majjanavasena uppanno māno sakkāramado nāma. "Avasesabhikkhūnam pādapiṭṭhiyam akkamitvā gacchantā manussā 'ayam samaṇo'tipi na vandanti, mam pana disvā vandanti, pāsāṇacchattam viya garukam katvā aggikkhandham viya ca durāsadam katvā maññantī"ti majjanavasena uppanno māno garukāramado nāma. "Uppanno pañho mayhameva mukhena chijjati, bhikkhācāram gacchantāpi āgacchantāpi mameva purato katvā parivāretvā gacchantī"ti majjanavasena uppanno māno purekkhāramado nāma. Agāriyassa tāva mahāparivārassa "purisasatampi purisasahassampi mam parivāretī"ti, anagāriyassa "samaṇasatampi samaṇasahassampi mam parivāretī, sesā appaparivārā, aham mahāparivāro ceva suciparivāro cā"ti majjanavasena uppanno māno parivāramado nāma. "Avasesā sattā

attano paribhogamattakampi na labhanti, mayham pana nidhānagatasseva dhanassa pamāṇam natthī''ti majjanavasena uppanno māno **bhogamado** nāma. "Avasesā sattā dubbaṇṇā durūpā, aham abhirūpo pāsādiko''tipi "avasesasattā nigguṇā patthaṭa-akittino. Mayham pana kittisaddo devamanussesu pākaṭo 'itipi thero bahussuto, itipi sīlavā, itipi dhutaguṇayutto'ti'', evam sarīravaṇṇam guṇavaṇṇañca paṭicca majjanavasena uppanno māno **vannamado** nāma.

"Avasesā sattā appassutā, aham pana bahussuto"ti majjanavasena uppanno māno sutamado nāma. "Avasesā sattā appaṭibhānā, mayham pana paṭibhānassa pamāṇam natthī"ti majjanavasena uppanno māno paṭibhānamado nāma. "Aham rattaññū asukam buddhavamsam rājavamsam janapadavamsam gāmavamsam rattindivaparicchedam nakkhattamuhuttayogam jānāmī"ti majjanavasena uppanno māno rattaññumado nāma. "Avasesā bhikkhū antarā piṇḍapātikā jātā, aham pana jātipiṇḍapātiko"ti majjanavasena uppanno māno piṇḍapātikamado nāma. "Avasesā sattā uññātā avaññātā, aham pana anavaññāto"ti majjanavasena uppanno māno anavaññattimado nāma. "Avasesānam sattānam iriyāpatho apāsādiko, mayham pana pāsādiko"ti majjanavasena uppanno māno iriyāpathamado nāma. "Avasesā sattā chinnapakkhakākasadisā, aham pana mahiddhiko mahānubhāvo"ti vā "aham yam yam kammam karomi, tam tam ijjhatī"ti vā majjanavasena uppanno māno iddhimado nāma.

Yasamado pana agārikenapi anagārikenapi dīpetabbo. Agārikopi hi ekacco aṭṭhārasasu seṇīsu ekissā jeṭṭhako hoti, tassa "avasese purise ahaṁ paṭṭhapemi, ahaṁ vicāremī"ti, anagārikopi ekacco katthaci jeṭṭhako hoti, tassa "avasesā bhikkhū mayhaṁ ovāde vattanti, ahaṁ jeṭṭhako"ti majjanavasena uppanno māno yasamado nāma. "Avasesā sattā dussīlā, ahaṁ pana sīlavā"ti majjanavasena uppanno māno sīlamado nāma. "Avasesānaṁ sattānaṁ kukkuṭassa udakapānamattepi kāle cittekaggatā natthi, ahaṁ pana upacārappanānaṁ lābhī'ti majjanavasena uppanno māno jhānamado nāma. "Avasesā sattā nissippā, ahaṁ sippavā"ti majjanavasena uppanno

māno **sippamado** nāma. "Avasesā sattā rassā, ahaṁ dīgho"ti majjanavasena uppanno māno **ārohamado** nāma. "Avasesā sattā rassā vā honti dīghā vā, ahaṁ nigrodhaparimaṇḍalo"ti majjanavasena uppanno māno **pariṇāhamado** nāma. "Avasesānaṁ sattānaṁ sarīrasaṇṭhānaṁ virūpaṁ bībhacchaṁ, mayhaṁ pana manāpaṁ pāsādikan"ti majjanavasena uppanno māno **saṇṭhānamado** nāma. "Avasesānaṁ sattānaṁ sarīre bahū dosā, mayhaṁ pana sarīre kesaggamattampi vajjaṁ natthī"ti majjanavasena uppanno māno **pāripūrimado** nāma. Evamayaṁ sabbopi jāti-ādiṁ nissāya majjanākāravasappavatto māno idha "mado"ti vutto. Kāmaguṇesu cittassa vossaggo **pamādo**, pañcasu kāmaguṇesu satiyā aniggaṇhitvā cittassa vossajjanaṁ, sativirahoti vuttaṁ hoti. **Taṇhāvijjā** pākaṭāyeva.

Lobhādayo ca puna tividhākusalamūlanti tikavasena gahitā. Duccaritādīsupi tividha-saddo paccekam yojetabbo. Tattha kāyaduccaritādīni tividhaduccaritāni. Taṇhāsamkilesādayo tividhasamkilesā. Rāgamalādayo malīnabhāvakarattā tividhamalāni. Rāgādayo hi cittam malīnam karonti, malam gāhāpenti, tasmā "malānī"ti vuccanti. "Rāgo visamam, doso visamam, moho visaman"ti¹ evam vuttā rāgādayo "kāyavisamam vacīvisamam manovisaman"ti¹ evamāgatā kāyaduccaritādayo ca tividhavisamāni. Tāni pana yasmā rāgādīsu ceva kāyaduccaritādīsu ca sattā pakkhalanti, pakkhalitā ca sāsanatopi sugatitopi patanti, tasmā pakkhalanapātahetubhāvato "visamānī"ti vuccanti. "Kāmasaññā byāpādasaññā vihimsāsaññā"ti² evamāgatā kāmādipaṭisamyuttā saññā tividhasaññā. Tathā "kāmavitakko byāpādavitakko vihimsāvitakko"ti² evamāgatā tividhavitakkā. Taṇhāpapañco diṭṭhipapañco mānapapañcoti ime tividhapapañcā. Vaṭṭasmim satte papañcentīti taṇhādayo "papañcā"ti vuccanti.

Catubbidhavipariyesāti-ādīsu catubbidha-saddo paccekam yojetabbo. Tattha aniccādīni vatthūni niccanti-ādinā nayena viparītato esantīti vipariyesā. "Anicce niccanti saññāvipariyeso cittavipariyeso

ditthivipariyeso, dukkhe sukhanti saññāvipariyeso cittavipariyeso ditthivipariyeso, asubhe subhanti saññāvipariyeso cittavipariyeso ditthivipariyeso, anattani attāti saññāvipariyeso cittavipariyeso ditthivipariyeso"ti evamāgatā dvādasa vipallāsā catunnam aniccādivatthūnam vasena "catubbidhavipariyesā"ti vuttā. Ettha pana cittakiccassa dubbalatthāne ditthivirahitāya akusalasaññāya sakakiccassa balavakāle saññāvipallāso veditabbo, ditthivirahitasseva akusalacittassa sakakiccassa balavakāle cittavipallāso, ditthisampayuttacitte ditthivipallāso. Tasmā sabbadubbalo saññāvipallāso, tato balavataro cittavipallāso, sabbabalavataro ditthivipallaso. Ajatabuddhidarakassa kahapanadassanam viya saññā ārammanassa upatthānākāramattagahanato. Gāmikapurisassa kahāpanadassanam viya cittam lakkhanappativedhassapi sampādanato¹. Kammārassa mahāsandāsena ayogahanam viya ditthi abhinivesaparāmasanato. Tattha cattāro ditthivipallāsā, aniccānattesu niccanti-ādivasappavattā cattāro saññācittavipallāsāti ime attha vipallāsā sotāpattimaggena pahīyanti. Asubhe subhanti saññācittavipallāsā sakadāgāmimaggena tanukā honti, anāgāmimaggena pahīyanti. Dukkhe sukhanti saññācittavipallāsā arahattamaggena pahīyantīti veditabbā.

"Kāmāsavo bhavāsavo diṭṭhāsavo avijjāsavo"ti² evamāgatā kāmataṇhādayo cattāro āsavanti cakkhu-ādito sandanti pavattantīti **āsavā**. Kiñcāpi cakkhu-ādito kusalādīnampi pavatti atthi, kāmāsavādayo eva pana vaṇato yūsaṁ viya paggharaṇaka-asucibhāvena sandanti, tasmā te eva "āsavā"ti vuccanti. Tattha hi paggharaṇaka-asucimhi niruļho āsavasaddoti. Atha vā dhammato yāva gotrabhuṁ, okāsato yāva bhavaggaṁ savanti gacchanti ārammaṇakaraṇavasena pavattantīti āsavā, ete dhamme etañca okāsaṁ antokaritvā pavattantīti attho. Avadhi-attho hi **ā**-kāro. Avadhi ca mariyādābhividhibhedato duvidho. Tattha mariyādaṁ kiriyaṁ bahikatvā pavattati yathā "āpāṭaliputtaṁ vuṭṭho devo"ti, abhividhi pana kiriyaṁ byāpetvā pavattati yathā "ābhavaggaṁ

bhagavato yaso pavattatī"ti, abhividhi-attho cāyam **ā**-kāro idha gahito, tasmā te dhamme tañca okāsam antokaritvā ārammaṇakaraṇavasena savantīti "āsavā"ti vuccanti. Cirapārivāsiyaṭṭhena madirādayo āsavā viyātipi āsavā. Lokasmiñhi cirapārivāsikā madirādayo "āsavā"ti vuccanti. Yadi ca cirapārivāsiyaṭṭhena āsavā, eteyeva bhavitumarahanti. Vuttañhetam "purimā bhikkhave koṭi na paññāyati avijjāya, ito pubbe avijjā nāhosī"ti-ādi¹. Aññesu pana yathāvutte dhamme okāsañca ārammaṇam katvā pavattamānesu mānādīsu ca vijjamānesu attattaniyādiggāhavasena abhibyāpanam madanakaraṇavasena āsavasadisatā ca etesamyeva, na aññesanti dvīsupi atthavikappesu etesuyeva āsavasaddo niruļhoti daṭṭhabbo. Āyatam vā samsāradukkham savanti pasavantītipi āsavā. Na hi tam kiñci samsāradukkham atthi, yam āsavehi vinā uppajjeyya.

"Abhijjhā kāyagantho byāpādo kāyagantho sīlabbataparāmāso kāyagantho idamsaccābhiniveso kāyagantho"ti² evamāgatā abhijjhādayo cattāro yassa samvijjanti, tam cutipaṭisandhivasena vaṭṭasmim ganthenti ghaṭentīti ganthā. "Kāmogho bhavogho diṭṭhogho avijjogho"ti³ evamāgatā cattāro kāmataṇhādayo yassa samvijjanti, tam vaṭṭasmim ohananti osīdāpentīti oghā. Teyeva "kāmayogo bhavayogo diṭṭhiyogo avijjāyogo"ti⁴ evamāgatā vaṭṭasmim yojentīti yogā. Ariyā etāya na gacchantīti agati, sā chandādivasena catubbidhā. "Cīvarahetu vā bhikkhuno taṇhā uppajjamānā uppajjatī, piṇḍapāta, senāsana, itibhavābhavahetu vā bhikkhuno taṇhā uppajjamānā uppajjamānā uppajjatī"ti⁵ evamāgatā cattāro gaṇhuppādā. Tattha itibhavābhavahetūti ettha itīti nidassane nipāto, yathā cīvarādihetu, evam bhavābhavahetupīti attho. Bhavābhavoti cettha paṇītapaṇītatarāni telamadhuphāṇitādīni adhippetāni. Kāmupādānādīni cattāri upādānāni.

^{1.} Am 3. 346 pitthe.

^{2.} Sam 3. 55; Khu 7. 76, 256 pitthesu.

^{3.} Sam 3. 54; Khu 7. 43; Khu 8. 72, 85 pitthesu.

^{4.} Sam 3. 54; Am 1. 316 pitthesu.

^{5.} Am 1. 316 pitthe.

Pañcacetokhilāti-ādīsu "buddhe kaṅkhati, dhamme, saṁghe, sikkhāya kaṅkhati, sabrahmacārīsu kupito hoti anattamano āhatacitto khilajāto"ti¹ evamāgatāni pañca cetokhilāni, ceto khīlayati thaddhabhāvaṁ āpajjati etehīti cetokhilāni. Vinibandhādīsupi pañca-saddo paccekaṁ yojetabbo. "Kāme avītarāgo hoti, kāye avītarāgo, rūpe avītarāgo, yāvadatthaṁ udarāvadehakaṁ bhuñjitvā seyyasukhaṁ passasukhaṁ middhasukhaṁ anuyutto viharati, aññataraṁ devanikāyaṁ paṇidhāya brahmacariyaṁ caratī"ti² āgatā pañca cittaṁ bandhitvā muṭṭhiyaṁ katvā viya gaṇhantīti cetovinibandhā. Ete hi taṇhāppavattibhāvato kusalappavattiyā avasarāppadānavasena cittaṁ bandhaṁ viya samorodhetvā gaṇhanti. Saddatthato pana ceto virūpaṁ nibandhīyati saṁyamīyati etehīti cetovinibandhā. Kāmacchandādīni pañca kusaladhamme nīvārenti āvarantīti nīvaraṇāni. Rūpābhinandānādayo pañcābhinandanā.

Cha vivādamūlāti-ādīsu kodho makkho issā sāṭheyyam pāpicchatā sandiṭṭhiparāmāsoti imāni cha vivādamūlāni. Yasmā kuddho vā kodhavasena -pa- sandiṭṭhiparāmāsī vā sandiṭṭhiparāmasitāya kalaham viggaham vivādam āpajjati, tasmā kodhādayo "cha vivādamūlānī"ti vuccanti. Rūpataṇhāsaddataṇhādayo cha taṇhākāyā.

Kāmarāgapaṭighadiṭṭhivicikicchābhavarāgamānāvijjā sattānusayā.

Thāmagataṭṭhena appahīnaṭṭhena ca anusentīti anusayā.

Micchādiṭṭhimicchāsaṅkappamicchāvācāmicchākammantamicchāājīvamicchāvāyāmamicchāsatimicchāsamādhī aṭṭha micchattā.

"Taṇhaṁ paṭicca pariyesanā, pariyesanaṁ paṭicca lābho, lābhaṁ paṭicca vinicchayo, vinicchayaṁ paṭicca chandarāgo, chandarāgaṁ paṭicca ajjhosānaṁ, ajjhosānaṁ paṭicca pariggaho, pariggahaṁ paṭicca macchariyaṁ, macchariyaṁ paṭicca ārakkho, ārakkhādhikaraṇaṁ daṇḍādānasatthādānakalahaviggahavivādatuvaṁtuvaṁpesuññamusāvādā aneke pāpakā akusalā dhammā sambhavantī"ti³ evamāgatā pariyesanādayo nava taṇhāmūlakā. Tattha⁴ taṇhaṁ paṭiccāti taṇhaṁ nissāya. Pariyesanāti rūpādi-ārammaṇapariyesanā.

^{1.} Ma 1. 145; Dī 3. 198 piṭṭhesu.

^{3.} Dī 2. 50; Dī 3. 253 pitthesu.

^{2.} Ma 1. 146; Dī 3. 198 piṭṭhesu.

^{4.} Dī-Ttha 2. 89 pitthādīsupi passitabbam.

Sā hi tanhāya sati hoti. **Lābho**ti rūpādi-ārammanapatilābho. So hi pariyesanāya sati hoti. **Vinicchayo**ti idha vitakko adhippeto. Lābham labhitvā hi itthānittham sundarāsundarañca vitakkeneva vinicchinati "ettakam me rūpārammanatthāya bhavissati, ettakam saddādiārammanatthāya, ettakam mayham bhavissati, ettakam parassa, ettakam paribhuñjissāmi, ettakam nidahissāmī"ti. Tena vuttam "lābham paticca vinicchayo"ti. **Chandarāgo**ti evam akusalavitakkena vitakkite vatthusmim dubbalarago ca balavarago ca uppajjati. **Chando**ti hi idha dubbalarāgassādhivacanam. Ajihosānanti aham mamanti balavasannitthānam. **Pariggaho**ti tanhāditthivasena pariggahakaranam. Macchariyanti parehi sādhāranabhāvassa asahanatā. Tenevassa porānā evam vacanattham vadanti "idam acchariyam mayhameva hotu, mā aññassa acchariyam hotūti pavattattā macchariyanti vuccatī"ti. Ārakkhoti dvārapidahanamañjusagopanādivasena sutthu rakkhanam. Adhikarotīti adhikaranam, kāranassetam nāmam. Ārakkhādhikarananti bhāvanapumsakam, ārakkhahetūti attho. Dandādānādīsu paranisedhanattham dandassa ādānam dandādānam. Ekatodhārādino satthassa ādānam satthādānam. Kalahoti kāyakalahopi vācākalahopi. Purimo purimo virodho viggaho. Pacchimo pacchimo vivādo. Tuvam tuvanti agāravavacanam, tvam tvanti attho.

Pāṇātipāta-

adinnādānakāmesumicchācāramusāvādapisuņavācāpharusavācāsamphappalā pa-abhijjhābyāpādamicchādiṭṭhi dasa akusalakammapathā. Cattāro sassatavādā cattāro ekaccasassatavādā cattāro antānantikā cattāro amarāvikkhepikā dve adhiccasamuppannikā soļasa saññīvādā aṭṭha asaññīvādā aṭṭha nevasaññīnāsaññīvādā satta ucchedavādā pañca paramadiṭṭhadhammanibbānavādāti etāni dvāsaṭṭhi diṭṭhigatāni. Rūpataṇhādichataṇhāyeva paccekaṁ kāmataṇhā bhavataṇhāvibhavataṇhāvasena aṭṭhārasa honti. Tathā hi rūpārammaṇā taṇhā, rūpe vā taṇhāti rūpataṇhā, sā kāmarāgabhāvena rūpaṁ assādentī pavattamānā kāmataṇhā, sassatadiṭṭhisahagatarāgabhāvena "rūpaṁ niccaṁ dhuvaṁ sassatan"ti evaṁ assādentī pavattamānā bhavataṇhā, ucchedadiṭṭhisahagatarāgabhāvena "rūpaṁ ucchijjati vinassati pecca na bhavatī"ti evaṁ assādentī pavattamānā

vibhavataṇhāti evam tividhā hoti. Yathā ca rūpataṇhā, evam saddataṇhādayopīti etāni aṭṭhārasa taṇhāvicaritāni honti, tāni aṭṭhārasa, bahiddhārūpādīsu aṭṭhārasāti chattimsa, iti atītāni chattimsa, anāgatāni chattimsa, paccuppannāni chattimsāti aṭṭhasatataṇhāvicaritāni, aṭṭhuttarasatataṇhāvicaritānīti attho. Pabheda-saddo paccekam sambandhitabbo. Tatthāyam yojanā "lobhappabhedo dosappabhedo yāva aṭṭhasatataṇhāvicaritappabhedo"ti. Sabbadarathapariļāhakilesasatasahassānīti sabbāni sattānam darathapariļāhakarāni kilesānam anekāni satasahassāni. Ārammaṇādivibhāgato hi pavatti-ākāravibhāgato ca anantappabhedā kilesā.

Saṅkhepato vāti-ādīsu sampati āyatiñca sattānaṁ anatthāvahattā māraṇaṭṭhena vibādhanaṭṭhena kilesāva māroti kilesamāro. Vadhakaṭṭhena khandhāva māroti khandhamāro. Tathā hi vuttaṁ "vadhakaṁ rūpaṁ, vadhakaṁ rūpaṁti yathābhūtaṁ nappajānātī"ti-ādi.
Jātijarādimahābyasananibbattanena abhisaṅkhārova māro abhisaṅkhāramāro. Saṁkilesanimittaṁ hutvā guṇamāraṇaṭṭhena devaputtova māroti devaputtamāro. Sattānaṁ jīvitassa jīvitaparikkhārānañca jānikaraṇena¹ mahābādharūpattā maccu eva māroti maccumāro. Tattha samucchedappahānavasena sabbaso appavattikaraṇena kilesamāraṁ, samudayappahānapariññāvasena khandhamāraṁ, sahāyavekallakaraṇavasena sabbaso appavattikaraṇena abhisaṅkhāramāraṁ, balavidhamanavisayātikkamanavasena devaputtamaccumārañca abhañji, bhagge akāsīti attho. Parissayānanti upaddavānaṁ.

Satapuññajalakkhaṇadharassāti2 aneka sata puññanibbattamahā purisalakkhaṇadharassa. Ettha hi "kevalam satamattena puññakammena ekekalakkhaṇam nibbattan"ti imamattham na rocayimsu aṭṭhakathācariyā "evam sante yo koci buddho bhaveyyā"ti, anantāsa pana lokadhātūsu yattakā sattā, tehi sabbehi paccekam satakkhattum katāni dānādīni puññakammāni yattakāni, tato ekekam puññakammam mahāsattena sataguṇam katam satanti adhippetanti imamattham rocayimsu. Tasmā idha sata-saddo bahubhāvapariyāyo, na sankhyāvisesavacanoti daṭṭhabbo "sataggham satam

devamanussā"ti-ādīsu¹ viya. **Rūpakāyasampatti dīpitā hoti** itarāsam phalasampadānam mūlabhāvato adhiṭṭhānabhāvato ca. **Dīpitā hotī**ti idam dhammakāyasampattīti-ādīsupi yojetabbam. Tattha pahānasampadāpubbakattā ñāṇasampadādīnam dhammakāyasampatti dīpitā hotīti veditabbam. **Lokiyasarikkhakānam bahumatabhāvo**ti ettha bhāgyavantatāya lokiyānam bahumatabhāvo, bhaggadosatāya sarikkhakānam bahumatabhāvoti yojetabbam. Evam ito paresupi yathākkamam yojanā veditabbā.

Puññavantaṁ gahaṭṭhā khattiyādayo abhigacchanti, pahīnadosaṁ dosavinayāya dhammaṁ desetīti pabbajitā tāpasaparibbājakādayo abhigacchantīti āha "gahaṭṭhapabbajitehi abhigamanīyatā"ti. Abhigatānañca tesaṁ kāyacittadukkhāpanayane paṭibalabhāvo āmisadānadhammadānehi upakārasabbhāvato rūpakāyaṁ tassa pasādacakkhunā, dhammakāyaṁ paññācakkhunā disvā dukkhadvayassa paṭippassambhanatoti veditabbo. Bhāgyavantatāya upagatānaṁ āmisadānaṁ deti, bhaggadosatāya dhammadānaṁ detīti āha "āmisadānadhammadānehi upakāritā"ti. Lokiyalokuttarasukhehi ca saṁyojanasamatthatā dīpitā hotīti "pubbe āmisadānadhammadānehi mayā ayaṁ lokaggabhāvo adhigato, tasmā tumhehipi evameva paṭipajjitabban"ti evaṁ sammāpaṭipattiyaṁ niyojanena abhigatānaṁ lokiyalokuttarasukhehi saṁyojanasamatthatā ca dīpitā hoti.

Sakacitte issariyam nāma attano cittassa vasībhāvāpādanamyeva, paṭikūlādīsu appaṭikūlasaññitādivihārasiddhi, adhiṭṭhāniddhi-ādiko iddhividhopi cittissariyameva cittabhāvanāya vasībhāvappattiyā ijjhanato. Aṇimālaghimādikanti ādi-saddena mahimā patti pākammam īsitā vasitā yatthakāmāvasāyitāti ime chapi saṅgahitā. Tattha kāyassa aṇubhāvakaraṇam aṇimā. Ākāse padasā gamanādīnam arahabhāvena² lahubhāvo laghimā. Mahattam mahimā kāyassa mahantatāpādanam. Iṭṭhadesassa pāpuṇanam patti. Adhiṭṭhānādivasena icchitanipphādanam pākammam. Sayamvasitā issarabhāvo īsitā. Iddhividhe vasībhāvo vasitā. Ākāsena vā gacchato aññam vā kiñci karoto yattha katthaci

^{1.} Satagghi satadevamanussāti-ādīsu (Sī, Syā)

^{2.} Gamanādīsu arahabhāvena (Sī), gamanādi-arahabhāvena (Syā)

vosānappatti **yatthakāmāvasāyitā.** "Kumārakarūpādidassanan"tipi vadanti. Evamidam aṭṭhavidham lokiyasammatam issariyam. Tam pana bhagavato iddhividhantogadham anaññasādhāraṇañcāti āha "**sabbakāraparipūram atthī**"ti. Tathā¹ lokuttaro dhammo atthīti sambandho. Evam yasādīsupi **atthi**saddo yojetabbo.

Kesañci yaso padesavutti ayathābhūtaguṇasannissayattā aparisuddho ca hoti, na evaṁ tathāgatassāti dassetuṁ "lokattayabyāpako"ti vuttaṁ. Tattha idha adhigatasatthuguṇānaṁ āruppe uppannānaṁ "itipi so bhagavā"ti-ādinā bhagavato yaso pākaṭo hotīti āha "lokattayabyāpako"ti.

Yathābhuccaguṇādhigatoti yathābhūtaguṇehi adhigato. Ativiya parisuddhoti yathābhūtaguṇādhigatattā eva accantaparisuddho. Sabbākāraparipūrāti anavasesalakkhaṇānubyañjanādisampattiyā sabbākārehi paripuṇṇā. Sabbaṅgapaccaṅgasirīti sabbesaṁ aṅgapaccaṅgānaṁ sobhā. Yaṁ yaṁ etena icchitaṁ patthitanti "tiṇṇo tāreyyan"ti-ādinā yaṁ yaṁ etena lokanāthena manovacīpaṇidhānavasena icchitaṁ kāyapaṇidhānavasena patthitaṁ. Tathevāti paṇidhānānurūpameva. Sammāvāyāmasaṅkhāto payattoti vīriyapāramibhāvappatto ariyamaggapariyāpanno ca sammāvāyāmasaṅkhāto ussāho.

Kusalādīhi bhedehīti sabbattikadukapadasaṅgahitehi kusalādippabhedehi. Paṭiccasamuppādādīhīti ādi-saddena na kevalaṁ vibhaṅgapāḷiyaṁ āgatā satipaṭṭhānādayova saṅgahitā, atha kho saṅgahādayo samayavimuttādayo ṭhapanādayo tikapaṭṭhānādayo ca saṅgahitāti veditabbaṁ. Pīḷanasaṅkhatasantāpavipariṇāmaṭṭhena vā dukkhamariyasaccanti-ādīsu pīḷanaṭṭho taṁsamaṅgino sattassa hiṁsanaṁ avipphārikatākaraṇaṁ. Saṅkhataṭṭho samecca saṅgamma sambhūya paccayehi katabhāvo. Santāpaṭṭho dukkhadukkhatādīhi santāpanaṁ paridahanaṁ. Vipariṇāmaṭṭho jarāya maraṇena cāti dvidhā vipariṇāmetabbatā. Samudayassa āyūhanaṭṭho dukkhassa nibbattanavasena sampiṇḍanaṁ. Nidānaṭṭho "idaṁ taṁ dukkhan"ti nidassentassa viya samuṭṭhāpanaṁ. Saṁyogaṭṭho saṁsāradukkhena saṁyojanaṁ. Palibodhaṭṭho maggādhigamassa nivāraṇaṁ. Nirodhassa nissaraṇaṭṭho sabbūpadhīnaṁ patinissaggasabhāvattā

tato vinissaṭatā, taṁnissaraṇanimittatā vā. Vivekaṭṭho sabbasaṅkhāravisaṁyuttatā. Asaṅkhataṭṭho kenacipi paccayena anabhisaṅkhatatā. Amataṭṭho niccasabhāvattā maraṇābhāvo, sattānaṁ maraṇābhāvahetutā vā. Maggassa niyyānaṭṭho vaṭṭadukkhato nikkamanaṭṭho. Hetu-attho nibbānassa sampāpakabhāvo. Dassanaṭṭho accantasukhumassa nibbānassa sacchikaraṇaṁ. Ādhipateyyaṭṭho catusaccadassane sampayuttānaṁ ādhipaccakaraṇaṁ, ārammaṇādhipatibhāvo vā visesato maggādhipativacanato. Satipi hi jhānādīnaṁ ārammaṇādhipatibhāve "jhānādhipatino dhammā"ti evamādiṁ avatvā "maggādhipatino dhammā"icceva vuttaṁ, tasmā viññāyati "atthi maggassa ārammaṇādhipatibhāve viseso"ti. Eteyeva ca pīṭanādayo soṭasākārāti vuccanti.

Dibbabrahma-ariyavihāreti-ādīsu kasiṇādi-ārammaṇāni rūpāvacarajjhānāni dibbavihāro. Mettādijjhānāni brahmavihāro. Phalasamāpatti ariyavihāro. Kāmehi vivekaṭṭhakāyatāvasena ekībhāvo kāyaviveko. Paṭhamajjhānādinā nīvaraṇādīhi vivittacittatā cittaviveko. Upadhiviveko nibbānam. Upadhīti cettha cattāro upadhī kāmupadhi khandhupadhi kilesupadhi abhisaṅkhārupadhīti. Kāmāpi hi "yam pañca kāmaguṇe paṭicca uppajjati sukham somanassam, ayam kāmānam assādo"ti¹ evam vuttassa sukhassa adhiṭṭhānabhāvato upadhīyati ettha sukhanti iminā vacanatthena "upadhī"ti vuccanti, khandhāpi khandhamūlakassa dukkhassa adhiṭṭhānabhāvato, kilesāpi apāyadukkhassa adhiṭṭhānabhāvato, abhisaṅkhārāpi bhavadukkhassa adhiṭṭhānabhāvato vuttanayena "upadhī"ti vuccanti. Imehi pana catūhi upadhīhi vivittatāya nibbānam "upadhiviveko"ti vuccati.

Suññatākārena nibbānam ārammaṇam katvā pavatto ariyamaggo suññatavimokkho. So hi suññatāya dhātuyā uppannattā suññato, kilesehi ca vimuttattā vimokkho. Eteneva nayena appaṇihitākārena nibbānam ārammaṇam katvā pavatto appaṇihitavimokkho. Animittākārena nibbānam ārammaṇam katvā pavatto animittavimokkho. Atha vā suññatānupassanāsamkhātāya anattānupassanāya vasena paṭiladdho ariyamaggo āgamanavasena "suññatavimokkho"ti vuccati. Tathā

appaṇihitānupassanāsaṅkhātāya dukkhānupassanāya vasena paṭiladdho appaṇihitavimokkho. Animittānupassanāsaṅkhātāya aniccānupassanāya vasena paṭiladdho "animittavimokkho"ti veditabbo. Vuttañhetaṁ—

"Aniccato manasikaronto adhimokkhabahulo animittavimokkham paṭilabhati, dukkhato manasikaronto passaddhibahulo appaṇihitavimokkham paṭilabhati, anattato manasikaronto vedabahulo suññatavimokkham paṭilabhatī"ti¹.

Aññeti lokiya-abhiññādike.

Kilesābhisaṅkhāravasena bhavesu paribbhamanaṁ, tañca taṇhāpadhānanti āha "taṇhāsaṅkhātaṁ gamanan"ti. Vantanti ariyamaggamukhena uggiritaṁ puna apaccāgamanavasena chaḍḍitaṁ. Bhagavāti vuccati niruttinayenāti dassento āha "yathā loke"ti-ādi. Yathā loke niruttinayena ekekapadato ekekamakkharaṁ gahetvā "mekhalā"ti vuttaṁ, evamidhāpīti attho. Mehanassāti guyhappadesassa. Khassāti okāsassa.

Aparo nayo²—bhāgavāti bhagavā. Bhatavāti bhagavā. Bhāge vanīti bhagavā. Bhage vanīti bhagavā. Bhage vanīti bhagavā. Bhāge vamīti bhagavā. Bhāge vamīti bhagavā.

Bhāgavā bhatavā bhāge, bhage ca vani bhattavā. Bhage vami tathā bhāge, vamīti bhagavā jino.

Tattha katham bhagavāti bhagavā? Ye te sīlādayo dhammakkhandhā guṇakoṭṭhāsā, te anaññasādhāraṇā niratisayā tathāgatassa atthi upalabbhanti. Tathā hissa sīlam samādhi paññā vimutti vimuttiñāṇadassanam, hirī ottappam, saddhā vīriyam, sati sampajaññam, sīlavisuddhi diṭṭhivisuddhi, samatho vipassanā, tīṇi kusalamūlāni, tīṇi sucaritāni, tayo sammāvitakkā, tisso anavajjasaññā, tisso dhātuyo, cattāro satipaṭṭhānā, cattāro sammappadhānā, cattāro iddhipādā, cattāro ariyamaggā, cattāri ariyaphalāni, catasso paṭisambhidā, catuyoniparicchedakañāṇāni, cattāro ariyavamsā, cattāri vesārajjañānāni,

^{1.} Khu 9. 254 pitthe Patisambhidāmagge. 2. Itivuttaka-Ttha 5 pitthādīsu passitabbam.

pañca padhāniyangāni, pañcangiko sammāsamādhi, pañcanāniko sammāsamādhi, pañcindriyāni, pañca balāni, pañca nissāranīyā dhātuyo, pañca vimuttayatanañanani, pañca vimuttiparipacaniya sañña, cha anussatitthānāni, cha gāravā, cha nissāranīyā dhātuyo, cha satatavihārā, cha anuttariyāni, chanibbedhabhāgiyā saññā, cha abhiññā, cha asādhāranañānāni, satta aparihānīyā dhammā, satta ariyadhanāni, satta bojjhangāni, satta sappurisadhammā, satta nijjaravatthūni, satta saññā, sattadakkhineyyapuggaladesanā, sattakhīnāsavabaladesanā, aţţhapaññapaţilabhahetudesana, attha sammattani, atthalokadhammatikkamo, attha ārambhavatthūni, attha-akkhanadesanā, attha mahāpurisavitakkā, atthaabhibhāyatanadesanā, attha vimokkhā, nava yonisomanasikāramūlakā dhammā, nava pārisuddhipadhāniyangāni, navasattāvāsadesanā, nava āghātappativinayā, nava saññā, nava nānattā, nava anupubbavihārā, dasa nāthakaranā dhammā, dasa kasināyatanāni, dasa kusalakammapathā, dasa sammattāni, dasa ariyavāsā, dasa asekkhadhammā, dasa tathāgatabalāni, ekādasa mettānisamsā, dvādasa dhammacakkākārā, terasa dhutaguņā, cuddasa dubbhañanani, pañcadasa vimuttiparipacaniya dhamma, solasavidha ānāpānassati, solasa aparantapanīyā dhammā, atthārasa buddhadhammā, ekūnavīsati paccavekkhanañānāni, catucattālīsa ñānavatthūni, paññāsa udayabbayañānāni, paropannāsa kusaladhammā, sattasattati ñānayatthūni, catuvīsatikotisatasahassasamāpattisancārimahāvajiranānam, anantanayasamantapatthānapavicayapaccavekkhanadesanāñānāni, tathā anantāsu lokadhātūsu anantānam sattānam āsayādivibhāvanañānāni cāti evamādayo anantāparimānabhedā anaññasādhāranā niratisayā gunabhāgā gunakotthāsā samvijjanti upalabbhanti, tasmā yathāvuttavibhāgā gunabhāgā assa atthīti bhāgavāti vattabbe ākārassa rassattam katvā "bhagavā"ti vutto. Evam tāva bhāgavāti bhagavā.

> Yasmā sīlādayo sabbe, guņabhāgā asesato. Vijjanti sugate tasmā, bhagavāti pavuccati.

Katham **bhatavāti bhagavā**? Ye te sabbalokahitāya ussukkamāpannehi manussattādike attha dhamme samodhānetvā sammāsambodhiyā

katamahābhinīhārehi mahābodhisattehi paripūretabbā dānapāramī sīla, nekkhamma, paññā, vīriya, khanti, sacca, adhiṭṭhāna, mettā, upekkhāpāramīti dasa pāramiyo dasa upapāramiyo dasa paramatthapāramiyoti samatimsa pāramiyo, dānādīni cattāri saṅgahavatthūni, cattāri adhiṭṭhānāni, attapariccāgo nayana, dhana, rajja puttadārapariccāgoti pañca mahāpariccāgā, pubbayogo, pubbacariyā, dhammakkhānam, ñātatthacariyā, lokatthacariyā, buddhatthacariyāti evamādayo saṅkhepato vā puññasambhārañāṇasambhārā buddhakarā dhammā, te mahābhinīhārato paṭṭhāya kappānam satasahassādhikāni cattāri asaṅkhyeyyāni yathā hānabhāgiyā saṁkilesabhāgiyā ṭhitibhāgiyā vā na honti, atha kho uttaruttari visesabhāgiyāva honti, evam sakkaccam nirantaram anavasesato bhatā sambhatā assa atthīti bhatavāti bhagavā niruttinayena ta-kārassa ga-kāram katvā. Atha vā bhatavāti teyeva yathāvutte buddhakare dhamme vuttanayena bhari sambhari, paripūresīti attho. Evampi bhatavāti bhagavā.

Yasmā sambodhiyā sabbe dānapārami-ādike. Sambhāre bhatavā nātho, tasmāpi bhagavā mato.

Katham bhāge vanīti bhagavā? Ye te catuvīsatikoţisatasahassasankhā devasikam vaļanjanakasamāpattibhāgā, te anavasesato lokahitattham attano ca diṭṭhadhammasukhavihārattham niccakappam vani bhaji sevi bahulamakāsīti bhāge vanīti bhagavā. Atha vā abhinneyyadhammesu kusalādīsu khandhādīsu ca ye te parinneyyādivasena sankhepato vā catubbidhā abhisamayabhāgā, vitthārato pana "cakkhu parinneyyam, sotam parinneyyam -pa- jarāmaraṇam parinneyyan"ti-ādinā¹ aneke parinneyyabhāgā, "cakkhussa samudayo pahātabbo -pa- jarāmaraṇassa samudayo pahātabbo"ti-ādinā nayena pahātabbabhāgā, "cakkhussa nirodho -pa- jarāmaraṇassa nirodho sacchikātabbo"ti-ādinā sacchikātabbabhāgā, "cakkhussa nirodhagāminī paṭipadā"ti-ādinā "cattāro satipaṭṭhānā"ti-ādinā ca anekabhedā bhāvetabbabhāgā ca dhammā vuttā, te sabbe vani bhaji yathāraham gocarabhāvanāsevanānam vasena sevi. Evampi bhāge vanīti bhagavā. Atha vā ye ime sīlādayo dhammakkhandhā sāvakehi

sādhāraṇā guṇakoṭṭhāsā guṇabhāgā, kinti nu kho te vineyyasantānesu patiṭṭhapeyyanti¹ mahākaruṇāya vani abhipatthayi, sā cassa abhipatthanā yathādhippetaphalāvahā ahosi. Evampi bhāge vanīti bhagavā.

Yasmā ñeyyasamāpatti-guṇabhāge tathāgato. Bhaji patthayi sattānaṁ, hitāya bhagavā tato.

Katham bhage vanīti bhagavā? Samāsato tāva katapuñnehi payogasampannehi yathāvibhavam bhajīyantīti bhagā, lokiyalokuttarasampattiyo. Tattha lokiye tāva tathāgato sambodhito pubbe bodhisattabhūto paramukkamsagate² vani bhaji sevi, yattha patiṭṭhāya niravasesato buddhakaradhamme samannānento buddhadhamme paripācesi. Buddhabhūto pana te niravajjasukhūpasamhite anañnasādhāraṇe lokuttarepi vani bhaji sevi. Vitthārato pana padesarajjasampatti-ādivasena jhānavimokkhasamādhisamāpattināṇadassanamaggabhāvanāphalasacchikiriy ādi-uttarimanussadhammavasena ca anekavihite anañnasādhāraṇe bhage vani bhaji sevi. Evam bhage vanīti bhagavā.

Yā tā sampattiyo loke, yā ca lokuttarā puthu. Sabbā tā bhaji sambuddho, tasmāpi bhagavā mato.

Katham bhattavāti bhagavā? Bhattā daļhabhattikā assa bahū atthīti bhattavā. Tathāgato hi mahākaruņāsabbañnutañnānādi-aparimitanirupamappabhāvaguņavisesasamangībhāvato sabbasattuttamo, sabbānatthaparihārapubbangamāya niravasesahitasukhavidhānatapparāya niratisayāya payogasampattiyā sadevamanussāya pajāya accantupakāritāya dvattimsa mahāpurisalakkhaņāsīti anubyañjana byāmappabhādi anañnasādhāraṇavisesapaṭimaṇḍitarūpakāyatāya yathābhuccaguṇādhigatena "itipi so bhagavā"ti-ādinayappavattena lokattayabyāpinā suvipulena suvisuddhena ca thutighosena samannāgatattā ukkamsapāramippattāsu appicchatāsantuṭṭhitā-ādīsu suppatiṭṭhitabhāvato dasabalacatuvesārajjādiniratisayaguṇavisesasamangībhāvato ca rūpappamāṇo rūpappasanno, ghosappamāṇo ghosappasanno, lūkhappamāṇo lūkhappasanno, dhammappamāṇo

dhammappasannoti evam catuppamāṇike lokasannivāse sabbathāpi pasādāvahabhāvena samantapāsādikattā aparimāṇānam sattānam sadevamanussānam ādarabahumānagāravāyatanatāya paramapemasambhattiṭṭhānam. Ye cassa ovāde patiṭṭhitā aveccappasādena samannāgatā honti, kenaci asamhāriyā tesam sambhatti samaṇena vā brāhmaṇena vā devena vā mārena vā brahmunā vāti. Tathā hi te attano jīvitapariccāgepi tattha pasādam na pariccajanti tassa vā āṇam daļhabhattibhāvato. Tenevāha—

"Yo ve kataññū katavedi dhīro, Kalyāṇamitto daļhabhatti ca hotī"ti¹,

"Seyyathāpi bhikkhave mahāsamuddo ṭhitadhammo velam nātivattati, evameva kho bhikkhave yam mayā sāvakānam sikkhāpadam paññattam, tam mama sāvakā jīvitahetupi nātikkamantī"ti² ca.

Evam bhattavāti bhagavā niruttinayena ekassa ta-kārassa lopam katvā itarassa ta-kārassa ga-kāram katvā.

Guṇātisayayuttassa, yasmā lokahitesino. Sambhattā bahavo satthu, bhagavā tena vuccati.

Katham bhage vamīti bhagavā? Yasmā tathāgato bodhisattabhūtopi purimāsu jātīsu pāramiyo pūrento bhagasankhātam sirim issariyam yasanca vami uggiri, khelapindam viya anapekkho chaddayi. Tathā hissa somanassakumārakāle³ hatthipālakumārakāle⁴ ayogharapanditakāle⁵ mūgapakkhapanditakāle⁶ cūļasutasomakāle⁵ti evamādīsu nekkhammapāramīpūranavasena devarajjasadisāya rajjasiriyā pariccattattabhāvānam pamānam natthi, carimattabhāvepi hatthagatam cakkavattisirim devalokādhipaccasadisam catudīpissariyam cakkavattisampattisannissayam sattaratanasamujjalam yasanca

^{1.} Khu 6. 10 pitthe Jātake.

^{3.} Khu 5. 334 pitthe Jātake.

^{5.} Khu 5. 353 pitthe Jātake.

^{7.} Khu 6. 25 pitthe Jātake.

^{2.} Am 3. 45; Khu 1. 142; Vi 4. 421 pitthesu.

^{4.} Khu 5. 350 pitthe Jātake.

^{6.} Khu 6. 149 pitthe Jātake.

tiṇāyapi amaññamāno nirapekkho pahāya abhinikkhamitvā sammāsambodhim abhisambuddho, tasmā ime siri-ādike bhage vamīti bhagavā. Atha vā bhāni nāma nakkhattāni, tehi samam gacchanti pavattantīti bhagā, sineruyugandhara-uttarakuruhimavantādibhājanalokavisesasannissayā sobhā kappaṭṭhāyibhāvato¹, tepi bhagavā vami tamnivāsisattāvāsasamatikkamanato tappaṭibaddhachandarāgappahānena pajahīti. Evampi bhage vamīti bhagavā.

Cakkavattisirim yasmā, yasam issariyam sukham. Pahāsi lokacittañca, sugato bhagavā tato.

Katham bhāge vamīti bhagavā? Bhāgā nāma sabhāgadhammakotthāsā, te khandhāyatanadhātādivasena, tatthāpi rūpavedanādivasena atītādivasena ca anekavidhā, te ca bhagavā sabbam papañcam sabbam yogam sabbam gantham sabbam samyojanam samucchindityā amatadhātum samadhigacchanto vami uggiri, anapekkho chaddayi na paccāgami. Tathā hesa sabbatthakameva pathavim āpam tejam vāyam, cakkhum sotam ghānam givham kāyam manam, rūpe sadde gandhe rase photthabbe dhamme, cakkhuviññānam -pa- manoviññānam, cakkhusamphassam -pamanosamphassam, cakkhusamphassajam vedanam-pa- manosamphassajam vedanam, cakkhusampassajam saññam -pa- manosamphassajam saññam, cakkhusamphassajam cetanam -pa- manosampassajam cetanam, rūpatanham -pa- dhammatanham, rūpavitakkam -pa- dhammavitakkam, rūpavicāram -pa- dhammavicāranti-ādinā anupadadhammavibhāgavasenapi sabbeva dhammakotthāse anavasesato vami uggiri, anapekkhapariccāgena chaddayi. Vuttañhetam "yam tam ananda cattam vantam muttam pahinam paţinissattham, tam tathagato puna paccagamissatīti netam thanam vijjatī"ti². Evampi bhāge vamīti bhagavā. Atha vā **bhāge vamī**ti sabbepi kusalākusale sāvajjānavajje hīnapanīte kanhasukkasappatibhāge dhamme ariyamaggañānamukhena vami uggiri, anapekkho pariccaji pajahi, paresañca tathattāya dhammam desesi. Vuttampi cetam "dhammāpi vo bhikkhave pahātabbā pageva adhammā³. Kullūpamam vo bhikkhave dhammam desessāmi nittharanatthāya, no gahanatthāyā''ti-ādi⁴. Evampi bhāge vamīti bhagavā.

^{1.} Kappatthiyabhāvato (Syā)

^{3.} Ma 1. 188 pitthe.

^{2.} Dī 2. 99 pitthe.

^{4.} Ma 1. 187 pitthe.

Khandhāyatanadhātādi-dhammabhedā mahesinā. Kaṇhā sukkā yato vantā, tatopi bhagavā mato.

Tena vuttam—

"Bhāgavā bhatavā bhāge, bhage ca vani bhattavā. Bhage vami tathā bhāge, vamīti bhagavā jino"ti.

Ettha ca yasmā saṅkhepato attahitasampattiparahitapaṭipattivasena duvidhā buddhaguṇā, tāsu attahitasampatti pahānasampadāñāṇasampadābhedato duvidhā ānubhāvasampadādīnaṁ tadavinābhāvena tadantogadhattā. Parahitapaṭipatti payogāsayabhedato duvidhā. Tattha payogato lābhasakkārādinirapekkhacittassa sabbadukkhaniyyānikadhammūpadeso, āsayato paṭiviruddhesupi niccaṁ hitesitā ñāṇaparipākakālāgamanādiparahitappaṭipatti. Āmisapaṭiggahaṇādināpi atthacariyā parahitapaṭipatti hotiyeva, tasmā tesampi vibhāvanavasena pāṭiyaṁ "arahan"ti-ādīnaṁ padānaṁ gahaṇaṁ veditabbaṁ.

Tattha arahanti iminā padena pahānasampadāvasena bhagavato attahitasampatti vibhāvitā, sammāsambuddho lokavidūti ca imehi padehi ñāṇasampadāvasena. Nanu ca "lokavidū"ti imināpi sammāsambuddhatā vibhāvīyatīti? Saccam vibhāvīyati, atthi pana viseso "sammāsambuddho"ti iminā sabbañnutañnāṇānubhāvo vibhāvito, "lokavidū"ti pana iminā āsayānusayañaṇādīnampi ānubhāvo vibhāvitoti. Vijjācaraṇasampannoti iminā sabbāpi bhagavato attahitasampatti vibhāvitā. Sugatoti pana iminā samudāgamato paṭṭhāya bhagavato attahitasampatti parahitapaṭipatti ca vibhāvitā. Anuttaro purisadammasārathi satthā devamanussānanti imehi padehi bhagavato parahitapaṭipatti vibhāvitā. Buddhoti iminā bhagavato attahitasampatti parahitapaṭipatti ca vibhāvitā. Evañca katvā "sammāsambuddho"ti vatvā "buddho"ti vacanam samatthitam hoti. Tenevāha "attanāpi bujjhi, aññepi satte bodhesī"ti-ādi. Bhagavāti ca imināpi samudāgamato paṭṭhāya bhagavato sabbā attahitasampatti parahitapaṭipatti ca vibhāvitā.

Aparo nayo—hetuphalasattupakāravasena saṅkhepato tividhā buddhaguṇā. Tattha **Arahaṁ Sammāsambuddho Vijjācaraṇasampanno Lokavidū**ti imehi padehi phalasampattivasena buddhaguṇā vibhāvitā. **Anuttaro purisadammasārathi satthā devamanussānan**ti imehi sattupakāravasena buddhaguṇā pakāsitā. **Buddho**ti iminā phalavasena sattupakāravasena ca buddhaguṇā vibhāvitā. **Sugato bhagavā**ti pana imehi padehi hetuphalasattupakāravasena buddhaguṇā vibhāvitāti veditabbaṁ.

So imam lokanti-ādīsu so bhagavāti yo "arahan"ti-ādinā kittitaguņo, so bhagavā. **Imam lokan**ti nayidam mahājanassa sammukhāmattam sandhāya vuttam, atha kho anavasesam pariyādāyāti dassetum "sadevakan"ti-ādi vuttam. Tenāha "idāni vattabbam nidassetī"ti. Pajātattāti yathāsakam kammakilesehi nibbattattā. Sadeva kavacanena pañcakāmāvacaradevaggahanam pārisesañāyenāti veditabbam itaresam padantarehi sangahitatta. **Sadevakan**ti ca avayavena viggaho samudayo samāsattho. Samārakavacanena chatthakāmāvacaradevaggahanam paccāsattiñāyenāti datthabbam. Tattha hi so jāto tamnivāsī ca. Sabrahmakayacanena brahmakāyikādibrahmaggahananti etthāpi eseva nayo. Paccatthikā -pa- samanabrāhmanaggahananti nidassanamattametam apaccatthikānam asamitābāhitapāpānanca samanabrāhmanānam sassamanabrāhmanīvacanena gahitattā. Kāmam "sadevakan"tiādivisesanānam vasena sattavisayo loka-saddoti viññāyati tulyayogavisayattā tesam, "salomako sapakkhako"ti-ādīsu pana atulyayogepi ayam samāso labbhatīti byaticāradassanato pajāgahananti āha "pajāvacanena sattalokaggahanan"ti. Sadevakādivacanena upapattidevānam, sassamanabrāhmanīvacanena visuddhidevānañca gahitattā āha **"sadevamanussavacanena sammutideva-avasesamanussaggahanan"**ti. Tattha sammutidevā rājāno. Avasesamanussaggahananti samanabrāhmanehi avasesamanussaggahanam. Tīhi padehīti sadevakasamārakasabrahmakavacanehi. **Dvīhī**ti sassamanabrāhmanim sadevamanussanti imehi dvīhi padehi.

1. Sammukhīmattam (Syā), sammukhapattam (Ka)

Arūpī sattā attano āneñjavihārena viharantā dibbantīti devāti imam nibbacanam labhantīti āha "sadevakaggahaņena arūpāvacaraloko gahito"ti. Tenevāha bhagavā "ākāsānañcāyatanūpagānam devānam sahabyatan"ti-ādi¹. Chakāmāvacaradevalokassa savisesam mārassa vase vattanato āha "samārakaggahaņena chakāmāvacaradevaloko"ti. Arūpībrahmalokassa visum gahitattā āha "rūpī brahmaloko"ti. Catuparisavasenāti khattiyaparisā, brāhmaṇa, gahapati, samaṇa, cātumahārājika, tāvatimsa, māra, brahmaparisāti imāsu aṭṭhasu parisāsu khattiyādicatuparivasavasena. Itarā pana catasso parisā samārakaggahaṇena gahitā evāti.

Katham panettha catuparisavasena manussaloko gahito? "Sassamanabrāhmanin"ti iminā samanaparisā brāhmanaparisā ca gahitā honti, "sadevamanussan"ti iminā khattiyaparisā gahapatiparisā ca gahitā, "pajan"ti iminā pana imāyeva catasso parisā vuttā, catuparisasankhātam pajanti vuttam hoti, katham pana sammutidevehi saha manussaloko gahito? Etthāpi "sassamanabrāhmanin"ti iminā samanabrāhmanā gahitā, "sadevamanussan"ti iminā sammutidevasankhātā khattiyā, gahapatisuddasankhātā avasesamanussā ca gahitā honti. Ito pana aññesam manussasattānam abhāvato "pajan"ti iminā catūhi pakārehi thitā eteyeva manussasattā vuttāti datthabbam. Evam vikappadvayepi pajāggahanena catuparisādivasena thitānam manussānamyeva gahitattā idāni "pajan"ti iminā avasesasatte sangahetvā dassetukāmo āha "avasesasabbasattaloko vā"ti. Tattha nāgagarulādivasena avasesasattaloko veditabbo. Etthāpi catuparisavasena sammutidevehi vā saha avasesasabbasattaloko vāti yojetabbam. Catuparisasahito avasesasuddhanāgasupannanerayikādisattaloko, catudhā thitamanussasahito vā avasesanāgasupannanerayikādisattaloko gahitoti vuttam hoti.

Ettāvatā bhāgaso lokam gahetvā yojanam dassetvā idāni tena tena visesena abhāgaso lokam gahetvā

yojanam dassetum "apicetthā"ti-ādi vuttam. Tattha ukkaṭṭhaparicchedatoti ukkamsagativijānanena. Pañcasu hi gatīsu devagatipariyāpannāva seṭṭhā, tatthāpi arūpino dūrasamussāritakilesadukkhatāya santapaṇīta-āneñjavihārasamaṅgitāya ativiya dīghāyukatāyāti evamādīhi visesehi ativiya ukkaṭṭhā. Brahmā mahānubhāvoti dasasahassiyam mahābrahmuno vasena vadati. "Ukkaṭṭhaparicchedato"ti hi vuttam. Anuttaranti seṭṭham navalokuttaram. Anusandhikkamoti atthānañceva padānañca anusandhānukkamo¹. Porāṇā panettha evam vaṇṇayanti—sadevakanti devatāhi saddhim avasesam lokam. Samārakanti mārena saddhim avasesam lokam. Sabrahmakanti brahmehi saddhim avasesam lokam. Evam sabbepi tibhavūpage satte devamārabrahmasahitatāsaṅkhātehi tīhi pakārehi "sadevakan"ti-ādīsu tīsu padesu pakkhipitvā puna dvīhi padehi pariyādiyanto "sassamaṇabrāhmaṇim pajam sadevamanussan"ti āha. Evam pañcahipi padehi sadevakattādinā tena tena pakārena tedhātukameva pariyādinnanti.

Abhiññāti yakāralopenāyam niddeso, abhijānitvāti ayamettha atthoti āha "abhiññāya adhikena ñāṇena ñatvā"ti. Anumānādipaṭikkhepoti anumāna-upamāna-atthāpatti-ādipaṭikkhepo ekappamāṇattā. Sabbattha appaṭihatañāṇacāratāya hi sabbapaccakkhā buddhā bhagavanto. Anuttaram vivekasukhanti phalasamāpattisukham. Tena vīthimissāpi² kadāci bhagavato dhammadesanā hotīti hitvāpīti pisaddaggahaṇam. Bhagavā hi dhammam desento yasmim khaṇe parisā sādhukāram vā deti, yathāsutam vā dhammam paccavekkhati, tam khaṇam pubbabhāgena³ paricchinditvā phalasamāpattim samāpajjati, yathāparicchedañca samāpattito vuṭṭhāya ṭhitaṭṭhānato paṭṭhāya dhammam deseti. Appam vā bahum vā desentoti ugghaṭitaññussa vasena appam vā, vipañcitaññussa neyyassa vā vasena bahum vā desento. Ādikalyāṇādippakārameva desetīti-ādimhipi kalyāṇam bhaddakam anavajjameva katvā desetīti vuttam hoti. Dhammassa

^{1.} Anusandhānakkamo (Sī)

^{2.} Vītikkamissāmīti (Sī), paṭimissāpi (Syā)

^{3.} Pubbābhogena (Sī, Syā)

hi kalyāṇatā niyyānikatāya niyyānikatā ca sabbaso anavajjabhāvena.

Samantabhaddakattāti sabbabhāgehi sundarattā. Dhammassāti pariyattidhammassa. Kiñcāpi avayavavinimutto samudāyo nāma paramatthato koci natthi, yesu pana avayavesu samudāyarūpena apekkhitesu gāthāti samaññā, tam tato bhinnam viya katvā samsāmivohāram āropetvā dassento "paṭhamapādena ādikalyāṇā"ti-ādimāha. Ekānusandhikanti idam nātibahuvibhāgam yathānusandhinā ekānusandhikam sandhāya vuttam. Itarassa pana teneva desetabbadhammavibhāgena ādimajjhapariyosānabhāgā labbhantīti. Nidānenāti ānandattherena ṭhapitakāladesadesakaparisādiapadisanalakkhaṇena nidānaganthena. Nigamenāti "idamavocā"ti-ādikena "iti yam tam vuttam, idametam paṭicca vuttan"ti vā yathāvuttatthanigamanena. Saṅgītikārakehi ṭhapitānipi hi nidānanigamanāni dassetvā tīṇi piṭakāni satthu desanāya anuvidhānato¹ tadantogadhāneva. Teneva dīghanikāyaṭṭhakathāyam² "ekānusandhikassa suttassa nidānam ādi, idamavocāti pariyosānam, ubhinnamantarā majjhan"ti vuttam.

Evam suttantapiṭakavasena dhammassa ādikalyāṇāditam dassetvā idāni tīṇi piṭakāni ekajjham gahetvā tam dassetum "sakalopī"ti-ādi vuttam. Tattha sāsanadhammoti—

"Sabbapāpassa akaraṇam, kusalassa upasampadā. Sacittapariyodapanam, etam buddhāna sāsanan"ti³—

evam vuttassa satthusāsanassa pakāsako pariyattidhammo. Sīlamūlakattā sāsanassa "sīlena ādikalyāņo"ti vuttam. Samathādīnam sāsanasampattiyā vemajjhabhāvato āha "samathavipassanāmaggaphalehi majjhekalyāņo"ti. Nibbānādhigamato uttari karaņīyābhāvato vuttam "nibbānena pariyosānakalyāņo"ti. Sāsane sammāpaṭipatti nāma paññāya hoti, tassā ca sīlam samādhi ca mūlanti āha

^{1.} Anuvijānato (Ka)

^{2.} Dī-Ṭṭha 1. 158 piṭṭhe.

^{3.} Dī 2. 42; Khu 1. 41; Khu 10. 37; 68 pitthesu.

"sīlasamādhīhi vā ādikalyāņo"ti. Paññā pana anubodhapaṭivedhavasena duvidhāti tadubhayampi gaṇhanto "vipassanāmaggehi majjhekalyāņo"ti āha. Tassā nipphattiphalakiccaṁ nibbānasacchikiriyā, tato paraṁ kattabbaṁ natthīti dassento āha "phalanibbānehi pariyosānakalyāṇo"ti. Phalaggahaṇena vā sa-upādisesaṁ nibbānamāha, itarena itaraṁ tadubhayañca sāsanasampattiyā osānanti āha "phalanibbānehi pariyosānakalyāṇo"ti.

Buddhasubodhitāya vā ādikalyāņoti buddhassa subodhitā sammāsambuddhatā, tāya ādikalyāņo tappabhavattā. Sabbaso samkilesappahānam vodānapāripūrī ca dhammasudhammatā, tāya majjhekalyāņo tamsarīrattā. Satthārā yathānusiṭṭham tathā paṭipatti samghasuppaṭipatti, tāya pariyosānakalyāņo tāya sāsanassa loke suppatiṭṭhitabhāvato. Tanti sāsanadhammam. Tathattāyāti yathattāya bhagavatā dhammo desito, tathattāya tathabhāvāya. So pana abhisambodhi paccekabodhi sāvakabodhīti tividho ito aññathā nibbānādhigamassa abhāvato. Tattha sabbaguṇehi aggabhāvato itarabodhidvayamūlatāya ca paṭhamāya bodhiyā ādikalyāṇatā, guṇehi vemajjhabhāvato dutiyāya majjhekalyāṇatā, tadubhayatāya vā vosānatāya ca sāsanadhammassa tatiyāya pariyosānakalyānatā vuttā.

Esoti sāsanadhammo. **Nīvaraṇavikkhambhanato**ti vimuttāyatanasīse thatvā saddhammam suṇantassa nīvaraṇānam vikkhambhanasabbhāvato. Vuttañhetam—

"Yathā yathāvuso bhikkhuno satthā vā dhammam deseti, aññataro vā garuṭṭhānīyo sabrahmacārī, tathā tathā so tattha labhati atthavedam labhati dhammavedan"ti.

"Yasmim bhikkhave samaye ariyasāvako ohitasoto dhammam sunāti, pañcassa nīvaranāni tasmim samaye pahīnāni hontī"ti—

ca ādi. **Samathavipassanāsukhā vahanato**ti samathasukhassa vipassanāsukhassa ca sampāpanato. Vuttampi cetam "so vivicceva kāmehi vivicca

akusalehi dhammehi savitakkam savicāram vivekajam pītusukhan"ti-ādi, tathā—

"Yato yato sammasati, khandhānam udayabbayam. Labhatī pītipāmojjam, amatam tam vijānatam. Amānusī ratī hoti, sammā dhammam vipassato"ti¹ ca.

Tathā paṭipannoti yathā samathavipassanāsukhaṁ āvahati, yathā vā satthārā anusiṭṭhaṁ, tathā paṭipanno sāsanadhammo. Tādibhāvāvahanatoti chaḷaṅgupekkhāvasena iṭṭhādīsu tādibhāvassa lokadhammehi anupalepassa āvahanato. Nāthappabhavattāti pabhavati etasmāti pabhavo, uppattiṭṭhānaṁ, nāthova pabhavo etassāti nāthappabhavo, tassa bhāvo nāthappabhavattaṁ, tasmā, sāsanadhammassa nāthahetukattāti attho. Atthasuddhiyā majjhekalyāṇoti nirupakkilesatāya niyyānikatā atthasuddhi, tāya majjhekalyāṇo. Kiccasuddhiyā pariyosānakalyāṇoti suppaṭipattisaṅkhātakiccassa suddhiyā pariyosānakalyāṇo suppaṭipattipariyosānattā sāsanadhammassa. Yathāvuttamatthaṁ nigamento āha "tasmā"ti-ādi.

Sāsanabrahmacariyanti-ādīsu avisesena tisso sikkhā sakalo ca tantidhammo sāsanabrahmacariyam. Yam sandhāya vuttam "katamesānam kho bhante buddhānam bhagavantānam brahmacariyam na ciraṭṭhitikamahosī"ti-ādi². Ariyo aṭṭhaṅgiko maggo maggabrahmacariyam. Yam sandhāya vuttam "khīṇā jāti, vusitam brahmacariyam, katam karaṇīyan"ti³. Yathānurūpanti yathāraham. Sikkhattayasaṅgahañhi sāsanabrahmacariyam atthasampattiyā sāttham, tathā maggabrahmacariyam. Itaram pana tantidhammasaṅkhātam sāsanabrahmacariyam yathāvuttenatthena sāttham sabyañjanañca. Atthasampattiyāti sampannatthatāya. Sampatti-attho hi idha sahasaddo. Byañjanasampattiyāti etthāpi eseva nayo. Yassa hi yāgubhattādi-itthipurisādivaṇṇanānissitā desanā hoti, na so sāttham deseti niyyānatthavirahato tassā desanāya. Bhagavā pana tathārūpam desanam pahāya catusatipaṭṭhānādinissitam desanam deseti, tasmā "atthasampattiyā sāttham desetī"ti

vuccati. Yassa pana desanā sithiladhanitādibhedesu byañjanesu ekappakāreneva dvippakāreneva vā byañjanena yuttatāya ekabyañjanādiyuttā vā damiļabhāsā viya, vivaṭakaraṇatāya oṭṭhe aphusāpetvā uccāretabbato sabbaniroṭṭhabyañjanā vā kirātabhāsā viya, sabbattheva vissajjanīyayuttatāya sabbavissaṭṭhabyañjanā vā yavanabhāsā viya, sabbattheva sānusāratāya sabbaniggahītabyañjanā vā pādasikādi¹ milakkhubhāsā viya, tassa byañjanapāripūriyā abhāvato abyañjanā nāma desanā hoti. Sabbāpi hi esā byañjanekadesavaseneva pavattiyā aparipuṇṇabyañjanāti katvā "abyañjanā"ti vuccati. Bhagavā pana—

"Sithilam dhanitañca dīgharassam, Garukam lahukañca niggahītam. Sambandham vavatthitam vimuttam, Dasadhā byañjanabuddhiyā pabhedo"ti²—

evam vuttam dasavidham byañjanam amakkhetvā paripuṇṇabyañjanameva katvā dhammam deseti, tasmā "byañjanasampattiyā sabyañjanam desetī"ti vuccati.

Idāni "sāttham sabyanjanan" ti ettha nettinayenapi attham dassetum "sankāsanam -pa- sabyanjanan"ti vuttam. Tattha yadipi nettiyam "byañjanamukhena byañjanatthaggahanam hotīti akkharam padan"ti-ādinā byañjanapadāni pathamam udditthāni, idha pana pāliyam "sāttham sabyañjanan"ti āgatattā atthapadāniyeva pathamam dassetum "saṅkāsanapakāsanā"ti-ādi vuttam. Tattha saṅkhepato kāsanam dīpanam saṅkāsanam. Kāsananti ca kāsīyati dīpīyati vibhāvīyatīti attho. "Maññamāno kho bhikkhu baddho mārassa amaññamāno mutto"ti-ādīsu viya sankhepena dīpanam sankāsanam nāma. Tattakena hi tena bhikkhunā patividdham. Tenāha "aññātam bhagavā"ti-ādi. Pathamam kāsanam **pakāsanam.** "Sabbam bhikkhave ādittan"ti evamādīsu pacchā kathitabbamattham pathamam vacanena dīpanam pakāsanam nāma. Ādikammasmiñhi ayam pa-saddo "paññapeti patthapetī"ti-ādīsu viya. Tikkhindriyāpekkhañcetam padadvayam uddesabhāvato. Tikkhindriyo hi sankhepato pathamañca vuttamattham patipajjati. Sankhittassa vitthāravacanam sakim vuttassa puna vacananca vivaranavibhajanāni, yathā "kusalā dhammā"ti sankhepato sakimyeva ca vuttassa atthassa "katame dhammā kusalā? Yasmim samaye kāmāvacaram kusalam cittan"ti-ādinā vitthārato

vivaraņavasena vibhajanavasena ca puna vacanam.

Majjhimindriyāpekkhametam padadvayam niddesabhāvato. Vivaṭassa vitthāratarābhidhānam vibhattassa ca pakārehi ñāpanam vineyyānam cittaparitosanam **uttānīkaraṇapaññāpanāni**, yathā "phasso hotī"ti-ādinā vivaṭavibhattassa atthassa "katamo tasmim samaye phasso hoti? Yo tasmim samaye phasso phusanā samphusanā"ti-ādinā uttānīkiriyā paññāpanā ca. Mudindriyāpekkhametam padadvayam paṭiniddesabhāvato.

Atha vā "sabbam bhikkhave ādittan"ti evam pathamam dīpitamattham puna pākatam katvā dīpanena "kiñca bhikkhave sabbam ādittam? Cakkhu bhikkhave ādittam, rūpā ādittā"ti evamādinā sankhittassa vitthārābhidhānena sakim vuttassa punapi abhidhānena vitthāretvā desanam vivaranam nāma. "Kusalā dhammā"ti sankhepena nikkhittassa "katame dhammā kusalā? Yasmim samaye kāmāvacaram kusalam cittam uppannam hotī"ti niddesavasena vivarite kusale dhamme "tasmim samaye phasso hoti vedanā hotī"ti vibhāgakaraṇam vibhajanam nāma. Vivatassa vitthārābhidhānena vibhattassa ca upamābhidhānena uttānim karotīti vivaranena vivaritatthassa "katamo tasmim samaye phasso hoti? Yo tasmim samaye phasso phusanā samphusanā"ti ativivaritvā kathanam, vibhajanena vibhattassa "seyyathāpi bhikkhave gāvī niccammā, evameva khvāyam bhikkhave phassāhāro datthabboti vadāmī"ti evamādi-upamākathanañca **uttānīkaranam** nāma. Dhammam sunantānam dhammadesanena vicittena anekavidhena somanassassa uppādanam abhikhinabuddhīnam anekavidhena ñānatikhinakaranañca paññatti nāma sotūnam cittatosanena cittanisānena ca paññapanam paññattīti katvā. Atthapadasamāyogato sātthanti pariyattiatthassa sankāsanādi-atthapadarūpattā yathāvuttacha-atthapadasamāyogato sāttham. Sankāsanapakāsanādayo hi atthākārattā "atthapadānī"ti vuccanti. Atthoyeva hi byañjanapadehi saṅkāsīyati pakāsīyati vivarīyati vibhajīyati uttānī karīyati paññāpīyati.

Akkharapadabyañjanākāraniruttiniddesasampattiyāti ettha "saṭṭhi vassasahassānī"ti evamādīsu sa-kāra du-kāra so-kārādi viya uccāraṇavelāya apariyosite pade vaṇṇo akkharaṁ pariyāyavasena

akkharanato avevacanato. Na hi vannassa pariyāyo vijjati. Yathā hi padam savevacanatāya atthavasena pariyāyam carantam sancarantam viya hoti, na evam vanno avevacanattā. Ekakkharam vā padam akkharam "mā evam kira tan"ti-ādīsu mā-kārādayo viya. Keci pana "tīsu dvāresu parisuddhapayogabhāvena visuddhakaranatthānānam cittena pavattitadesanāvācāhi akkharanato avevacanato akathitattā akkharanti saññitā. Tam pārāyanikabrāhmanānam manasā pucchitapañhānam vasena bhagavatā ratanaghare nisīditvā sammasitapatthānamahāpakaranavasena ca gahetabban''ti vadanti. Vibhattiyantam atthassa ñāpanato padam. Pajjati attho etenāti hi padam. Tam nāmapadam ākhyātapadam upasaggapadam nipātapadanti catubbidham. Tattha phasso vedanā cittanti evamādikam dabbapadhānam **nāmapadam**, Nāmapadehi dabbamāvibhūtarūpam, kiriyā anāvibhūtarūpā. Phusati vedayati vijānātīti evamādikam kiriyāpadhānam **ākhyātapadam.** Ākhyātapadehi kiriyā āvibhūtarūpā, dabbamanāvibhūtarūpam. Yathā "cirappavāsin"ti ettha pa-saddo vasanakiriyāya viyogavisitthatam dīpeti, evam kiriyāvisesadīpanato kiriyāvisesāvabodhanimittam. Pa-iti evamādikam upasaggapadam. Kiriyāya dabbassa ca sarūpavisesappakāsanahetubhūtam evanti evamādikam nipātapadam. "Evam manasi karotha, mā evam manasākatthā"ti-ādīsu hi kiriyāvisesadīpanato kiriyāvisesassa jotako evamsaddo, "evamsīlā evamdhammā"ti-ādīsu dabbavisesassa. Sankhepato vuttam padābhihitam attham byanjetīti byanjanam, vākyam. "Cattāro iddhipādā"ti sankhepena kathitamattham "katame cattaro? Idha bhikkhave bhikkhu chandasamādhipadhānasankhārasamannāgatam iddhipādam bhāveti, vīriya, citta, vīmamsasamādhipadhānasankhārasamannāgatam iddhipādam bhāvetī"ti-ādinā pākatam karotīti vākyameva byañjanam, tam pana atthato padasamudāyoti datthabbam. Sa-ākhyātam sanipātam sakārakam savisesanam vākyanti hi vadanti. Nanu ca padenapi attho byañjīyatīti padampi byañjananti āpajjatīti? Tam na. Padamattasavanepi hi adhikārādivasena labbhamānehi padantarehi anusandhānam katvāva atthasampatipatti hotīti vākyameva attham byanjayatīti.

Pakārato vākyavibhāgo **ākāro.** "Tattha katamo chando? Yo chando chandikatā kattukamyatā" ti evamādīsu kathitasseva

vākyassa anekavidhena vibhāgakaraṇaṁ ākāro nāma. Ākārābhihitaṁ nibbacanaṁ nirutti. "Phasso vedanā"ti evamādīsu ākārena kathitaṁ "phusatīti phasso, vedayatīti vedanā"ti nīharitvā vitthāravacanaṁ nirutti nāma. "Nibbānaṁ maggati, nibbānatthikehi vā maggīyati, kilese vā mārento gacchatīti maggo"ti-ādinā nibbacanavitthāro niravasesadesanattā niddeso. Atha vā vedayatīti vedanāti nibbacanaladdhapadesu sukhadukkhaadukkhamasukhāsu sukhayatīti sukhā, dukkhayatīti dukkhā, neva dukkhayatīti na sukhayatīti adukkhamasukhāti atthavitthāro niravasesena kathitattā niddeso nāma. Etesaṁ akkharādīnaṁ byañjanapadānaṁ sampattiyā sampannatāya sabyañjanaṁ.

Evam panassa atthapadasamāyogo byañjanapadasampatti ca veditabbā. Tattha bhagavā akkharehi sankāseti, padehi pakāseti, byanjanehi vivarati, ākārehi vibhajati, niruttīti uttānim karoti, niddesehi paññapeti. Tathā hi padavayavaggahanamukhena padaggahanam, gahitena ca padena padatthāvabodho gahitapubbasanketassa hotīti bhagavā akkharehi sankāseti. Yasmā pana akkharehi sankhittena dīpiyamāno attho padapariyosāne vākyassa apariyositattā padena pathamam pakāsito dīpito hoti, tasmā padehi pakāseti. Vākyapariyosāne pana so attho vivarito vivato kato hotīti byañjanehi vivarati. Yasmā ca pakārehi vākyabhede kate tadattho vibhatto nāma hoti, tasmā ākārehi vibhajati. Tathā vākyāvayavānam paccekam nibbacanavibhāge kate so attho pākato hotīti niruttīhi uttānim karoti. Katanibbacanehi pana vākyāvayavehi vitthāravasena niravasesato desitehi veneyyānam cittaparitosanam buddhinisānanca katam hotīti niddesehi paññapeti. Apica bhagavā akkharehi ugghatetvā padehi vineti ugghatitaññum, byañjanehi vipañcetvā ākārehi vineti vipañcitaññum, niruttīhi netvā niddesehi vineti neyyam. Evancāyam dhammo ugghatiyamāno ugghatitaññum vineti, vipañciyamāno vipañcitaññum, nīyamāno neyyam. Tattha ugghatanā ādi, vipañcanā majjhe, nayanam ante. Evam tīsu kālesu tidhā desito dosattayavidhamano guņattayāvaho tividhavineyyavinayanoti evampi

tividhakalyānoyam dhammo atthabyañjanapāripūriyā sāttho sabyañjanoti veditabbo. Vuttañhetam nettipakarane¹—

"Tattha bhagavā akkharehi sankāseti, padehi pakāseti, byanjanehi vivarati, ākārehi vibhajati, niruttīhi uttānim karoti, niddesehi paññapeti. Tattha bhagavā akkharehi ca padehi ca ugghateti, byañjanehi ca ākārehi ca vipañceti, niruttīhi ca niddesehi ca vitthāreti. Tattha ugghatanā ādi, vipañcanā majjhe, vitthāranā pariyosānam. Soyam dhammavinayo ugghatiyanto ugghatitaññum puggalam vineti, tena nam āhu ādikalyānoti. Vipañciyanto vipañcitaññum puggalam vineti, tena nam āhu majjhekalyānoti. Vitthāriyanto neyyam puggalam vineti, tena nam āhu pariyosānakalyānotī"ti.

Atthagambhīratāti-ādīsu attho nāma tanti-attho. Dhammo tanti. Pativedho tantivā tanti-atthassa ca vathābhūtāvabodho. Desanā nāma manasā vavatthāpitāya tantiyā desanā. Te panete atthādayo yasmā sasādīhi viya mahāsamuddo mandabuddhīhi dukkhogāhā alabbhaneyyapatitthā ca, tasmā gambhirā. Atha vā attho nāma hetuphalam. Dhammo hetu. Desanā paññatti, yathādhammam dhammābhilāpo.

Anulomapațilomasankhepavitthārādivasena vā kathanam. Paţivedho abhisamayo, atthanurupam dhammesu, dhammanurupam atthesu, paññattipathānurūpam paññattīsu avabodho. Tesam tesam vā dhammānam pativijjhitabbo lakkhanasankhāto aviparītasabhāvo. Tepi cete atthādayo yasmā anupacitakusalasambhārehi duppaññehi sasādīhi viya mahāsamuddo dukkhogāhā alabbhaneyyapatitthā ca, tasmā gambhīrā. Tesu pativedhassapi atthasannissitattā vuttam "atthagambhīratāpativedhagambhīratāhi sātthan"ti atthagunadīpanato. Tāsam dhammadesanānam byanjanasannissitattā vuttam "dhammagambhīratādesanāgambhīratāhi sabyañjanan"ti tāsam

byañjanasampattidīpanato. Atthesu pabhedagatam ñānam atthapatisambhidā, atthadhammaniruttipatisambhidāsu pabhedagatam ñānam patibhānapatisambhidāti imissāpi patisambhidāya atthavisayattā āha

"atthapatibhanapatisambhidavisayato satthan"ti

atthasampattiyā asati tadabhāvato. **Dhammo**ti tanti. **Niruttī**ti tantipadānam niddāretvā vacanam. Tattha pabhedagatāni ñāṇāni dhammaniruttipaṭisambhidāti āha "**dhammaniruttipaṭisambhidāvisayato sabyañjanan**"ti asati byañjanasampattiyā tadabhāvato.

Parikkhakajanappasādakantīti ettha iti-saddo hetu-attho. Yasmā parikkhakajanānam kimkusalagavesīnam pasādāvaham, tasmā sāttham. Atthasampannanti phalena hetuno anumānam nadīpūrena viva upari vutthipavattiyā. Sātthakatā panassa panditavedanīyatāya, sā paramagambhīrasanhasukhumabhāvato veditabbā. Vuttañhetam "gambhīro duddaso"ti-ādi. Lokiyajanappasādakanti sabyañjananti yasmā lokiyajanassa pasādāvaham, tasmā sabyanjanam. Lokiyajano hi byanjanasampattiyā tussati. Idhāpi phalena hetuno anumānam. Sabyanjanatā panassa saddheyyatāya, sā ādikalyānādibhāvato veditabbā. Atha vā panditavedanīyato sātthanti paññāpadatthānatāya atthasampannatam āha, tato sarikkhakajanappasādakam saddheyyato sabyañjananti saddhāpadatthānatāya byañjanasampannatam, tato lokiyajanappasādatanti evamettha attho datthabbo. **Gambhīrādhippāyato sātthan**ti adhippāyato agādhāpāratāya¹ atthasampannam aññathā tadabhāvato. **Uttānapadato** sabyañjananti subodhasaddakatāya byañjanasampannam paramagambhīrassapi atthassa vineyyānam suviñneyyabhāvāpādanato. Sabbopesa atthasampattiyā sāttham, byanjanasampattiyā sabyanjananti sabbapathamam vuttasseva atthadvayassa papañcoti datthabbo. Tatha ceva tattha tattha samvannitam. Tatha hettha vikappassa samuccayassa va aggahanam. Upanetabbassa abhāvatoti pakkhipitabbassa vodānatthassa avuttassa abhāvato. Kevalasaddo sakalādhivacananti āha "sakalaparipunnabhāvenā"ti, sabbabhāgehi paripunnatāyāti attho. Apanetabbassāti samkilesadhammassa.

Brahmacariyam pakāsetīti ettha pana ayam brahmacariya-saddo dāne veyyāvacce pañcasikkhāpadasīle appamaññāsu methunaviratiyam sadārasantose vīriye uposathangesu ariyamagge sāsaneti imesu atthesu dissati.

"Kim te vatam kim pana brahmacariyam, Kissa sucinnassa ayam vipāko. Iddhī jutī balavīriyūpapatti, Idanca te nāga mahāvimānam.

Ahañca bhariyā ca manussaloke, Saddhā ubho dānapatī ahumhā. Opānabhūtaṁ me gharaṁ tadā'si, Santappitā samanabrāhmanā ca.

Taṁ me vataṁ taṁ pana brahmacariyaṁ,
Tassa suciṇṇassa ayaṁ vipāko.
Iddhī jutī balavīriyūpapatti,
Idañca me dhīra mahāvimānan"ti—

imasmiñhi **punṇakajātake**¹ dānam "brahmacariyan"ti vuttam.

"Kena pāṇi kāmadado, kena pāṇi madhussavo. Kena te brahmacariyena, puññaṁ pānimhi ijjhati.

Tena pāṇi kāmadado, tena pāṇi madhussavo.
Tena me brahmacariyena, puññaṁ pāṇimhi ijjhatī"ti—

imasmim **aṅkurapetavatthumhi**² veyyāvaccam "brahmacariyan"ti vuttam. "Evam kho tam bhikkhave tittiriyam nāma brahmacariyam ahosī"ti³ imasmim **tittirajātake** pañcasikkhāpadasīlam "brahmacariyam"ti vuttam. "Tam kho pana me pañcasikha brahmacariyam neva nibbidāya na virāgāya na nirodhāya yāvadeva brahmalokūpapattiyā"ti imasmim **mahāgovindasutte**⁴ catasso appamaññāyo "brahmacariyan"ti vuttā. "Pare abrahmacārī bhavissanti, mayamettha brahmacārī bhavissāmā"ti imasmim **sallekhasutte**⁵ methunavirati "brahmacariyan"ti vuttā.

^{1.} Khu 6. 303, 304 pitthe vidhurajātake.

^{3.} Vi 4. 311 pitthe.

^{4.} Dī 2. 201 pitthe.

^{2.} Khu 2. 156 piṭṭhe.

^{5.} Ma 1. 51 pitthe.

"Mayañca bhariyā nātikkamāma, Amhe ca bhariyā nātikkamanti. Aññatra tāhi brahmacariyaṁ carāma, Tasmā hi amhaṁ daharā na mīyare"ti—

mahādhammapālajātake¹ sadārasantoso "brahmacariyan"ti vutto. "Abhijānāmi kho panāham sāriputta caturangasamannāgatam brahmacariyam caritā, tapassī sudam homī"ti lomahamsanasutte² vīriyam "brahmacariyan"ti vuttam.

"Hīnena brahmacariyena, khattiye upapajjati. Majjhimena ca devattam, uttamena visujjhatī"ti—

evam nimijātake³ attadamanavasena kato aṭṭhaṅgiko uposatho "brahmacariyan"ti vutto. "Idaṁ kho pana me pañcasikha brahmacariyaṁ ekantanibbidāya virāgāya -pa- ayameva ariyo aṭṭhaṅgiko maggo"ti mahāgovindasuttasmiṁ yeva⁴ ariyamaggo "brahmacariyan"ti vutto. "Tayidaṁ brahmacariyaṁ iddhañceva phītañca vitthārikaṁ bāhujaññaṁ puthubhūtaṁ yāvadeva manussehi suppakāsitan"ti pāsādikasutte⁵ sikkhattayasaṅgahaṁ sakalasāsanaṁ "brahmacariyan"ti vuttaṁ. Imasmimpi ṭhāne idameva "brahmacariyan"ti adhippetanti āha "sikkhattayapariggahitattā"ti-ādi. Seṭṭhehīti buddhādīhi seṭṭhehi. Seṭṭhaṭṭhena brahmabhūtaṁ vā cariyaṁ brahmacariyaṁ.

Sanidānanti heṭṭhā vuttalakkhaṇena nidānena sanidānam. Sauppattikanti sa-aṭṭhuppattikam. Veneyyānam anurūpatoti veneyyānam
cariyādi-anurūpato. Atthassāti desiyamānassa sīlādi-atthassa.
Hetudāharaṇayuttatoti "tam kissa hetu seyyathāpi bhikkhave"ti ca ādinā
tattha tattha hetupamaggahaṇena hetudāharaṇehi yuttato.
Saddhāpaṭilābhenāti "te tam dhammam sutvā tathāgate saddham
paṭilabhantī"ti-ādinā vuttasaddhāpaṭilābhena. Paṭipattiyāti
sīlavisuddhiyādisammāpaṭipattiyā, paṭipattinimittanti attho.
Adhigamabyattitoti saccappaṭivedhena adhigamaveyyattiyasabbhāvato
sāttham kapilamatādi viya tuccham niratthakam

^{1.} Khu 5. 214 pitthe.

^{2.} Ma 1. 110 piṭṭhe Mahāsīhanādasutte.

^{3.} Khu 6. 185 pitthe.

^{4.} Dī 2. 201 pitthe.

^{5.} Dī 3. 102 pitthe.

ahutvā atthasampannanti katvā. **Pariyattiyā**ti pariyattidhammaparicayena. **Āgamabyattito**ti durakkhātadhammesu paricayam karontassa viya sammoham ajanetvā¹ bāhusaccaveyyattiyasabbhāvato **sabyañjanam**. Byañjanasampattiyā hi sati āgamabyattīti.

Sīlādipañcadhammakkhandhayuttatoti sīlādīhi pañcahi dhammakoṭṭhāsehi avirahitattā. Kevalaparipuṇṇanti anavasesena samantato puṇṇaṁ pūritaṁ. Nirupakkilesatoti diṭṭhimānādi-upakkilesābhāvato. Nittharaṇatthāyāti vaṭṭadukkhato nissaraṇāya. Lokāmisanirapekkhatoti kathañcipi taṇhāsannissayassa anissayato parisuddhaṁ. Idaṁ vuttaṁ hoti—yo "imaṁ dhammadesanaṁ nissāya lābhaṁ vā sakkāraṁ vā labhissāmī"ti deseti, tassa aparisuddhā desanā hoti. Bhagavā pana lokāmisanirapekkho hitapharaṇena mettābhāvanāya muduhadayo ullumpanasabhāvasaṇṭhitena cittena deseti, tasmā tassa desanā parisuddhāti.

Sādhūti ayam saddo "sādhu me bhante bhagavā sankhittena dhammam desetū"ti-ādīsu² āyācane dissati. "Sādhu bhanteti kho so bhikkhu bhagavato bhāsitam abhinanditvā anumoditvā"ti-ādīsu³ sampaṭicchane. "Sādhu sādhu sāriputtā"ti-ādīsu⁴ sampatamsane. "Tena hi brāhmaṇa sādhukam suṇohī"ti-ādisu⁵ dalhīkamme ānattiyañca dissati.

"Sādhu dhammaruci rājā, sādhu paññāṇavā naro. Sādhu mittānamaddubbho, pāpassākaraṇaṁ sukhan"ti—

ādīsu⁶ sundare. Idhāpi sundareyeva daṭṭhabboti āha "sādhu kho panāti sundaraṁ kho panā"ti. Tattha sundaranti bhaddakaṁ. Bhaddakatā ca passantassa hitasukhāvahabhāvenāti āha "atthāvahaṁ sukhāvahan"ti. Tattha atthāvahanti diṭṭhadhammikasamparāyikaparamatthasaññitahitāvahaṁ. Sukhāvahanti yathāvuttatividhasukhāvahaṁ. Tathārūpānanti tādisānaṁ. Yādisehi pana guṇehi bhagavā samannāgato, tehi catuppamāṇikassa lokassa sabbakālepi accantāya pasādanīyo tesaṁ yathābhūtasabhāvattāti dassento "yathārūpo"ti-ādimāha. Tattha yathābhucca -pa- arahatanti iminā dhammappamānānaṁ lūkhappamānānañca sattānaṁ

^{1.} Apanetvā (Sī)

^{2.} Sam 2. 294 pitthe.

^{3.} Ma 3. 66 pitthe.

^{4.} Dī 3. 226 pitthe.

^{5.} Am 2. 197 pitthe.

^{6.} Khu 6. 45 pitthe.

bhagavato pasādāvahatam dasseti, tamdassanena ca itaresampi rūpappamāṇaghosappamāṇānam pasādāvahatā dassitā hotīti daṭṭhabbam tadavinābhāvato. Brahmacariyam pakāsetīti kittisaddo abbhuggatoti evamettha sambandhoti āha "dassanamattampi sādhu hotīti evamajjhāsayam katvā"ti-ādi. Tattha dassanamattampi sādhu hotīti ettha kosiyasakuṇavatthu kathetabbam.

2. Yena vā kāraņenāti hetumhi idam karaņavacanam. Hetu-attho hi kiriyākaraņam, na karaņam viya kiriyattho¹, tasmā nānappakāraguņavisesādhigamatthā idha upasankamanakiriyāti "annena vasatī"ti-ādīsu viya hetu-atthamevetam karaņavacanam yuttam, na karaņattham tassa ayujjamānattāti vuttam "yena vā kāraņenā"ti. Avibhāgato hi satatappavattaniratisayasāduvipulāmatarasasaddhammaphalatāya'ssa sāduphalaniccaphalitamahārukkhena bhagavā upamito.
Sāduphalūpabhogādhippāyaggahaņeneva hi mahārukkhassa sāduphalatā gahitāti. Upasankamīti upasankamanto². Sampattakāmatāya hi kiñci ṭhānam gacchanto tamtampadesātikkamanena upasankami upasankamantoti³ vattabbatam labhati. Tenāha "gatoti vuttam hotī"ti, upagatoti attho. Upasankamitvāti pubbakālakiriyāniddesoti āha "upasankamanapariyosānadīpanan"ti. Tatoti yam ṭhānam patto upasankamīti vutto, tato upagataṭṭhānato. Āsannataram ṭhānanti pañham vā pucchitum dhammam vā sotum sakkuņeyyaṭṭhānam.

Yathā khamanīyādīni pucchantoti yathā bhagavā "kacci te brāhmaņa khamanīyam, kacci yāpanīyan"ti-ādinā khamanīyādīni pucchanto tena brāhmaņena saddhim samappavattamodo ahosi. Pubbabhāsitāya tadanukaraņena evam sopi brāhmaņo bhagavatā saddhim samappavattamodo ahosīti yojanā. Tam pana samappavattamodatam upamāya dassetum "sītodakam viyā"ti-ādi vuttam. Sammoditanti samsanditam. Ekībhāvanti sammodanakiriyāya samānatam ekarūpatam. Khamanīyanti "idam catucakkam navadvāram sarīrayantam

^{1.} Kiriyattā (Sī, Syā) mūlapannāsake bhayabheravasuttatīkā passitabbā.

^{2.} Upasankanto (Sī)

dukkhabahulatāya sabhāvato dussaham, kacci khamitum sakkuņeyyanti pucchati. Yāpanīyanti paccayāyattavuttikam cirappabandhasankhātāya yāpanāya kacci yāpetum sakkuņeyyam. Sīsarogādi-ābādhābhāvena kacci appābādham. Dukkhajīvikābhāvena kacci appātankam. Tamtamkiccakaraņe uṭṭhānasukhatāya kacci lahuṭṭhānam. Tadanurūpabalayogato kacci balam. Sukhavihārasambhavena kacci phāsuvihāro atthīti tattha tattha kaccisaddam yojetvā attho veditabbo. Balappattā pīti pītiyeva. Taruṇapīti pāmojjam. Sammodam janeti karotīti sammodanikam, tadeva sammodanīyanti āha "sammodajananato"ti. Sammoditabbato sammodanīyanti idam pana attham dassento "sammoditum yuttabhāvato"ti āha. Saritabbabhāvatoti anussaritabbabhāvato. "Saraṇīyan"ti vattabbe dīgham katvā "sāraṇīyan"ti vuttam. Suyyamānasukhatoti āpāthamadhuratamāha.

Anussariyamānasukhatoti vimaddaramaņīyatam. Byañjanaparisuddhatāyāti sabhāvaniruttibhāvena tassā kathāya vacanacāturiyamāha.

Atthaparisuddhatāyāti atthassa nirupakkilesatam. Anekehi pariyāyehīti anekehi kāranehi.

Atidūra-accāsannapaṭikkhepena nātidūranāccāsannaṁ nāma gahitaṁ, taṁ pana avakaṁsato ubhinnaṁ pasāritahatthāsaṁghaṭṭanena daṭṭhabbaṁ. Gīvaṁ pasāretvāti gīvaṁ parivattanavasena pasāretvā. Meti kattu-atthe sāmivacananti āha "mayā sutan"ti. Jātibrāhmaṇeti jātiyā brāhmaṇe, na bāhitapāpatāyāti vuttaṁ hoti. Khaṇḍiccādibhāvaṁ āpāditeti khaṇḍitadantapalitakesādibhāvaṁ sampāpite. Vuḍḍhimariyādappatteti vuḍḍhiparicchedaṁ sampatte, vuḍḍhipariyantappatteti vuttaṁ hoti. Jātimahallakatāyāti uppattiyā mahallakabhāvena. Mahattaṁ lāti gaṇhātīti mahallako, jātiyā mahallako, na vibhavādināti jātimahallako. Addhānanti dīghakālaṁ. Kittako pana soti āha "dve tayo rājaparivaṭṭe"ti, dvinnaṁ tiṇṇaṁ rājūnaṁ rajjapasāsanapaṭipāṭiyoti attho. "Addhagate"ti vatvā kathaṁ vayogahaṇaṁ osānavayāpekkhanti āha "pacchimavayaṁ anuppatte"ti. Pacchimo tatiyabhāgoti sattasatthito patthāya pacchimavayo kotthāso.

Dutiye atthavikappe jiṇṇeti nāyaṁ jiṇṇatā vayomattena, atha kho kulaparivaṭṭena purāṇatāyāti āha "jiṇṇeti porāṇe"ti-ādi. Tena tesaṁ brāhmaṇānaṁ kulavasena uditoditabhāvamāha. "Vayo-anuppatte"ti iminā jāti vuḍḍhiyā vakkhamānattā guṇavuḍḍhiyā tato sātisayattā ca "vuḍḍheti sīlācārādiguṇavuḍḍhiyutte"ti āha. Tathā jātimahallakatāyapi teneva vakkhamānattā mahallaketi padena vibhavamahattatā yojitā.

Maggapaṭipanneti brāhmaṇānaṁ paṭipattividhiṁ¹ upagate taṁ avokkamma caraṇato. Antimavayanti pacchimavayaṁ.

Paccuṭṭhānaṁ nāma āsanā vuṭṭhānanti āha "nāsanā vuṭṭhahatī"ti, nisinnāsanato na vuṭṭhātīti attho. Ettha ca jiṇṇe -pa- vayo-anuppatteti upayogavacanaṁ āsanā vuṭṭhānakiriyāpekkhaṁ na hoti, tasmā jiṇṇe -pa-vayo-anuppatte disvāti ajjhāhāraṁ katvā attho veditabbo. Atha vā paccuggamanakiriyāpekkhaṁ upayogavacanaṁ, tasmā na paccuṭṭhetīti uṭṭhāya paccuggamanaṁ na karotīti attho veditabbo. Paccuggamanampi hi paccuṭṭhānanti vuccati. Vuttañhetaṁ "ācariyaṁ pana dūratova disvā paccuṭṭhāya paccuggamanakaraṇaṁ paccuṭṭhānaṁ nāmā"ti. Nāsanā vuṭṭhātīti iminā pana paccuggamanābhāvassa upalakkhaṇamattaṁ dassitanti daṭṭhabbaṁ. Vibhāvane nāma attheti pakativibhāvanasaṅkhāte atthe, na abhivādeti vāti na abhivādetabbanti sallakkhetīti vuttaṁ hoti.

Taṁ aññāṇanti "ayaṁ mama abhivādanādīni kātuṁ araharūpo na hotī"ti ajānanavasena pavattaṁ aññāṇaṁ. Olokentoti "dukkhaṁ kho agāravo viharati appatisso, kiṁ nu kho ahaṁ samaṇaṁ vā brāhmaṇaṁ vā sakkareyyaṁ, garuṁ kareyyan"ti-ādisuttavasena² ñāṇacakkhunā olokento. Nipaccakārārahanti paṇipātārahaṁ. Sampatijātoti muhuttajāto, jātasamanantaramevāti vuttaṁ hoti. Uttarena mukhoti uttarābhimukho, uttaradisābhimukhoti vuttaṁ hoti. Sattapadavītihārena gantvā sakalaṁ dasasahassilokadhātuṁ olokesinti idaṁ "dhammatā esā bhikkhave sampatijāto bodhisatto samehi pādehi patiṭṭhahitvā uttarābhimukho sattapadavītihārena gacchati, setamhi chatte

anudhāriyamāne sabbā disā viloketi, āsabhiñca vācam bhāsatī"ti evam pāļiyam¹ sattapadavītihārūpariṭṭhitassa viya sabbadisānuvilokanassa kathitattā vuttam, na panetam evam daṭṭhabbam, sattapadavītihārato pageva disāvilokanassa katattā. Mahāsatto hi manussānam hatthato muccitvā puratthimadisam olokesi, anekāni cakkavāļasahassāni ekanganāni ahesum. Tattha devamanussā gandhamālādīhi pūjayamānā "mahāpurisa idha tumhehi sadisopi natthi, kuto uttaritaro"ti āhamsu. Evam catasso disā catasso anudisā heṭṭhā uparīti dasapi disā anuviloketvā attano sadisam adisvā "ayam uttarā disā"ti sattapadavītihārena agamāsīti veditabbo. Olokesinti mama puññānubhāvena lokavivaraṇapāṭihāriye jāte paññāyamānam dasasahassilokadhātum mamsacakkhunāva olokesinti attho.

Mahāpurisoti jātigottakulappadesādivasena mahantapuriso. Aggoti guņehi sabbapadhāno. Jeṭṭhoti guṇavaseneva sabbesaṁ vuḍḍhatamo, guṇehi mahallakatamoti vuttaṁ hoti. Seṭṭhoti guṇavaseneva sabbesaṁ pasatthatamo. Atthato pana pacchimāni dve purimasseva vevacanānīti veditabbaṁ. Tayāti nissakke karaṇavacanaṁ. Uttaritaroti adhikataro. Patimānesīti pūjesi. Āsabhinti uttamaṁ. Mayhaṁ abhivādanādiraho puggaloti mayhaṁ abhivādanādikiriyāya araho anucchaviko puggalo. Niccasāpekkhatāya panettha samāso daṭṭhabbo. Tathāgatāti² tathāgatato, tathāgatassa santikāti vuttaṁ hoti. Evarūpanti abhivādanādisabhāvaṁ. Paripākasithilabandhananti paripākena sithilabandhanaṁ.

3. Taṁ vacananti "nāhaṁ taṁ brāhmaṇā"ti-ādivacanaṁ. "Nāhaṁ arasarūpo, mādisā vā arasarūpā"ti vutte brāhmaṇo thaddho bhaveyya. Tena vuttaṁ "cittamudubhāvajananatthan"ti. Ayañhi pariyāyasaddo desanāvārakāraṇesu vattatīti ettha pariyāyeti desetabbamatthaṁ avagameti bodhetīti pariyāyo, desanā. Pariyāyati aparāparaṁ parivattetīti

pariyāyo, vāro. Pariyāyati attano phalam pariggahetvā vattati, tassa vā kāraṇabhāvam gacchatīti pariyāyo, kāraṇanti evam pariyāyasaddassa desanāvārakāraṇesu pavatti veditabbā. Aññāya saṇṭhaheyyāti arahatte patiṭṭhaheyya. Katamo pana soti pariyāyāpekkho pulliṅganiddeso, katamo so pariyāyoti attho. Jātivasenāti khattiyādijātivasena. Upapattivasenāti devesu upapattivasena. Seṭṭhasammatānampīti api-saddena pageva aseṭṭhasammatānanti dasseti. Abhinandantānanti sappītikataṇhāvasena pamodamānānam. Rajjantānanti balavarāgavasena rajjantānam. Rūpādiparibhogena uppannataṇhāyuttasomanassavedanā rūpato nibbattitvā hadayatappanato ambarasādayo viya "rūparasā"ti vuccanti. Āviñchantīti ākaḍḍhanti. Vatthārammaṇādisāmaggiyanti vatthuārammaṇādikāraṇasāmaggiyam. Anukkhipantoti attukkamsanavasena kathite brāhmaṇassa asappāyabhāvato attānam anukkhipanto anukkamsento.

Etasmim panatthe karane sāmivacananti "jahitā"ti etasmim atthe. **Tathāgatassā**ti karane sāmivacanam, tathāgatena jahitāti attho. **Mūlan**ti bhavamūlam. "Tālavatthuvatthukatā"ti vattabbe "oṭṭhamukho"ti-ādīsu viya majjhepadalopam katvā akārañca dīgham katvā "tālāvatthukatā"ti vuttanti āha "tālavatthu viya nesam vatthu katanti tālāvatthukatā"ti. Tattha tālassa vatthu tālavatthu. Yathā ārāmassa vatthubhūtapubbo padeso ārāmassa abhāve "ārāmavatthū" ti vuccati, evam tālassa patitthitokāso samūlam uddharite tāle padesamatte thite tālassa vatthubhūtapubbattā "tālavatthū"ti vuccati. Nesanti rūparasādīnam. Katham pana tālavatthu viya nesam vatthu katanti āha "yathā hī"ti-ādi. Rūpādiparibhogena uppannatanhāyuttasomanassavedanāsankhātarūparasādīnam cittasantānassa adhitthanabhavato vuttam "tesam pubbe uppannapubbabhavena vatthumatte cittasantāne kate"ti. Tattha pubbeti pure, sarāgakāleti vuttam hoti. Tālāvatthukatāti vuccantīti tālavatthu viya attano vatthussa katattā rūparasādayo "tālāvatthukatā" ti vuccanti. Etena pahīnakilesānam puna uppattiyā abhāvo dassito.

Aviruļidhammattāti aviruļhisabhāvatāya. Matthakacchinno tālo pattaphalādīnam avatthubhūto tālāvatthūti āha "matthakacchinnatālo viya katā"ti. Etena "tālāvatthu viya katāti tālāvatthukatā"ti ayam viggaho dassito. Ettha pana avattubhūto tālo viya katāti avatthutālākatāti vattabbe visesanassa padassa paranipātam katvā "tālāvatthukatā"ti vuttanti daṭṭhabbam. Iminā panatthena idam dasseti—rūparasādivacanena vipāka dhammadhammā hutvā pubbe uppannā kusalākusaladhammā gahitā, te uppannāpi matthakasadisānam taṇhāvijjānam maggasatthena chinnattā āyatim tālapattasadise vipākakkhandhe nibbattetum asamatthā jātā, tasmā tālāvatthu viya katāti tālāvatthukatā rūparasādayoti. Imasmiñhi atthe "abhinandantānan"ti iminā padena kusalasomanassampi saṅgahitanti vadanti.

Anabhāvaṁkatāti ettha anu-saddo pacchā-saddena samānatthoti āha "yathā nesaṁ pacchābhāvo na hotī"ti-ādi. Anu-abhāvaṁ gatāti pacchā anuppattidhammatāvasena abhāvaṁ gatā vināsamupagatā, pahīnāti attho. "Imā anacchariyā gāthāyo paṭibhaṁsū"ti¹ ettha anacchariyasaddaṁ udāharaṇavasena dassento āha "yathā anu-acchariyā anacchariyā"ti. Tattha anu-acchariyāti savanakāle uparūpari vimhayakarāti attho.

Yañca kho tvam vadesi, so pariyāyo na hotīti yam vandanādisāmaggirasābhāvasankhātam kāraṇam arasarūpatāya vadesi, tam kāraṇam na hoti, na vijjatīti attho. Nanu ca brāhmaņo yam vandanādisāmaggirasābhāvasankhātam pariyāyam sandhāya "arasarūpo bhavam gotamo"ti āha, so pariyāyo natthīti vutte vandanādīni bhagavā karotīti āpajjatīti imam aniṭṭhappasangam dassento āha "kasmā pana bhagavā evamāhā"ti-ādi.

4. **Sabbapariyāyesū**ti sabbavāresu. **Sandhāya bhāsitamattan**ti² yam sandhāya brāhmaņo "nibbhogo bhavam gotamo"ti-ādimāha, bhagavā ca yam sandhāya nibbhogatādim attani anujānāti, tam sandhāya

bhāsitamattam. **Chandarāgaparibhogo**ti chandarāgavasena paribhogo. **Aparam pariyāyan**ti aññam kāranam.

5. **Kulasamudācārakamman**ti kulācārasankhātam kammam. kulacārittanti vuttam hoti. Akiriyanti akaranabhāvam. Dutthu caritam duccaritam, kāyadvāre bāhullavuttito kāyato pavattam duccaritanti kāyaduccaritam. Tam sarūpato dassento "tattha cā"ti-ādimāha. Pānātipātaadinnādānamicchācāracetanā veditabbāti ettha¹ pānoti paramatthato jīvitindriyam, vohārato satto. Jīvitindriyancettha rūpārūpavasena veditabbam. Rūpajīvitindriye hi vikopite itarampi tamsambandhatāya vinassati. **Satto**ti ca khandhasantāno gahetabbo. Tattha hi sattapaññatti. Saraseneva patanasabhāvassa antarā eva atīva pātanam atipāto, sanikam patitum adatvā sīgham pātananti attho. Atikkamma vā satthādīhi abhibhavitvā pātanam atipāto, pānassa atipāto **pānātipāto**, pānavadho pānaghātoti vuttam hoti. Atthato pana pāne pānasaññino parassa jīvitindriyupacchedakapayogasamutthāpikā kāyavacīdvārānamaññatarappavattā vadhakacetanā. Yāya hi cetanāya vattamānassa jīvitindriyassa nissayabhūtesu mahābhūtesu upakkamakaranahetukamahābhūtapaccayā uppajjanakamahābhūtā nuppajjissanti, sā tādisappayogasamutthāpikā cetanā pānātipāto. Laddhupakkamāni hi bhūtāni itarabhūtāni viya na visadānīti samānajātiyānam kāraņāni na honti.

Etthāha—khaņe khaņe nirujjhanasabhāvesu saṅkhāresu ko hantā, ko vā haññati, yadi cittacetasikasantāno, so arūpatāya na chedanabhedanādivasena vikopanasamattho, napi vikopanīyo. Atha rūpasantāno, so acetanatāya kaṭṭhakaliṅgarūpamoti na tattha chedanādinā pāṇātipāto labbhati yathā matasarīre. Payogopi pāṇātipātassa paharaṇappahārādi atītesu vā saṅkhāresu bhaveyya anāgatesu vā paccuppannesu vā, tattha na tāva atītānāgatesu sambhavati tesaṁ abhāvato, paccuppannesu ca saṅkhārānaṁ khaṇikattā

1. Itivuttaka-Ţţha 217 piţṭhādīsupi passitabbam.

saraseneva nirujjhanasabhāvatāya vināsābhimukhesu nippayojano payogo siyā, vināsassa ca kāraṇarahitattā na paharaṇappahārādippayogahetukaṁ maraṇaṁ, nirīhakatāya ca saṅkhārānaṁ kassa so payogo, khaṇikattā vadhādhippāyasamakālabhijjanato kassa kiriyā, pariyosānakālānavaṭṭhānato kassa vā pāṇātipātakammabaddhoti¹?

Vuccate—yathāvuttavadhakacetanāsahito sankhārānam punjo sattasankhāto hantā. Tena pavattitavadhappayoganimittam apagatusmāviññānajīvitindriyo matavohārappavattinibandhano yathāvuttavadhappayogakarane uppajjanāraho rūpārūpadhammasamūho haññati, kevalo vā cittacetasikasantāno. Vadhappayogāvisayabhāvepi tassa pañcavokārabhave rūpasantānādhīnavuttitāya rūpasantāne parena payojitajīvitindriyupacchedakapayogavasena tannibbattivinibandhakavisadisarūpuppattiyā vihate vicchedo hotīti na pānātipātassa asambhavo, napi ahetuko pānātipāto, na ca payogo nippayojano. Paccuppannesu sankhāresu katapayogavasena tadanantaram uppajjanārahassa saṅkhārakalāpassa tathā anuppattito khanikānam sankhārānam khanikamaranassa idha maranabhāvena anadhippetattā santatimaranassa ca yathāvuttanayena sahetukabhāvato na ahetukam maranam, na ca katturahito pānātipātapayogo nirīhakesupi sankhāresu sannihitatāmattena upakārakesu attano attano anurūpaphaluppādaniyatesu kāraņesu kattuvohārasiddhito yathā "padīpo pakāseti, nisākarova candimā"ti. Na ca kevalassa vadhādhippāyasahabhuno cittacetasikakalāpassa pānātipāto icchitabbo santānavasena avatthitasseva patijānanato. Santānavasena vattamānānañca padīpādīnam atthakiriyā dissatīti attheva pāṇātipātena kammabaddho. Ayañca vicāro adinnādānādīsupi yathāsambhavam vibhāvetabbo.

So² ca pāṇātipāto guṇavirahitesu tiracchānagatādīsu pāṇesu khuddake pāṇe appasāvajjo, mahante mahāsāvajjo. Kasmā? Payogamahantatāya, payogasamattepi vatthumahantatāya. Guṇavantesu

^{1.} Pānātipātakammabandhoti (Sī, Syā)

^{2.} Ma-Ţṭha 1. 201; Abhi-Ṭṭha 1. 140 piṭṭhādīsupi passitabbam.

manussādīsu appaguņe pāņe appasāvajjo, mahāguņe mahāsāvajjo. Sarīraguņānam pana samabhāve satipi kilesānam upakkamānanca mudutāya appasāvajjo, tibbatāya mahāsāvajjoti veditabbo.

Kāyavācāhi na dinnanti adinnam, parasantakam, tassa ādānam adinnādānam. Parassaharaṇam theyyam, corikāti vuttam hoti. Atthato pana parapariggahe parapariggahitasaññino tadādāyaka-upakkamasamuṭṭhāpikā kāyavacīdvārānamaññataradvārappavattā theyyacetanā. Tam hīne parasantake appasāvajjam, paṇīte mahāsāvajjam. Kasmā? Vatthupaṇītatāya. Vatthusamatte sati guṇādhikānam santake vatthusmim mahāsāvajjam, tamtam guṇādhikam upādāya tato tato hīnaguṇassa santake vatthusmim appasāvajjam.

Micchā caraṇaṁ **micchācāro**, methunasamācāresu ekantanindito lāmakācāro. So pana lakkhaṇato asaddhammādhippāyena kāyadvārappavattā agamanīyaṭṭhānavītikkamacetanā. So panesa micchācāro sīlādiguṇavirahite agamanīyaṭṭhāne appasāvajjo, sīlādiguṇasampanne mahāsāvajjo. Tassa cattāro sambhārā—agamanīyavatthu, tasmiṁ sevanacittaṁ, sevanapayogo, maggenamaggappatipatti-adhivāsananti. Eko payogo sāhatthiko eva.

Vacīdvāre bāhullavuttito vācato pavattam duccaritanti **vacīduccaritam**. Tam sarūpato dassento āha

"musāvādapisuṇavācāpharusavācāsamphappalāpacetanā veditabbā"ti. Tattha musāti abhūtam ataccham vatthu. Musā vadīyati vuccati etāyāti musāvādo, atatham vatthum tathato param viñnāpetukāmassa tathāviñnattisamuṭṭhāpikā cetanā. So yamattham bhanjati, tassa appatāya appasāvajjo, mahantatāya mahāsāvajjo. Apica gahaṭṭhānam attano santakam adātukāmatāya natthīti-ādinayappavatto appasāvajjo, sakkhinā hutvā atthabhanjanattham vutto mahāsāvajjo. Pabbajitānam appakampi telam vā sappim vā labhitvā hasādhippāyena "ajja gāme telam nadī manne sandatī"ti pūraṇakathānayena pavatto appasāvajjo, adiṭṭhamyeva pana diṭṭhanti-ādinā nayena vadantānam mahāsāvajjo. Tassa cattāro sambhārā honti—atatham vatthu, visamvādanacittam, tajjo vāyāmo, parassa tadatthavinnāpananti. Eko payogo sāhattikova. So kāyena vā kāyapaṭibaddhena vā vācāya vā

paravisamvādakakiriyākaraņe daṭṭhabbo. Tāya ce kiriyāya paro tamattham jānāti, ayam kiriyāsamuṭṭhāpikacetanākkhaņeyeva musāvādakammunā bajjhati. Yasmā pana yathā kāyakāyapaṭibaddhavācāhi param visamvādeti, tathā "idamassa bhaṇāhī"ti āṇāpentopi, paṇṇam likhitvā purato nissajjantopi, "ayam attho evam veditabbo"ti kuṭṭādīsu likhitvā ṭhapentopi, tasmā ettha āṇattikanissaggiyathāvarāpi payogā yujjanti. Aṭṭhakathāsu pana anāgatattā vīmamsitvā gahetabbā.

Pisatīti **pisuṇā**, samagge satte avayavabhūte vagge bhinne karotīti attho. Niruttinayena vā piyasuñākaraṇato **pisuṇā**. Yāya hi vācāya yassa taṁ vācaṁ bhāsati, tassa hadaye attano piyabhāvaṁ, parassa ca piyasuññabhāvaṁ karoti, sā **pisuṇavācā**. Lakkhaṇato pana saṁkiliṭṭhacittassa paresaṁ vā bhedāya attano piyakamyatāya vā kāyavacīpayogasamuṭṭhāpikā cetanā pisuṇavācā pisuṇaṁ vadati etāyāti katvā. Sā yassa bhedaṁ karoti tassa appaguṇatāya appasāvajjā, mahāguṇatāya mahāsāvajjā. Tassā cattāro sambhārā—bhinditabbo paro, "iti ime nānā bhavissanti vinā bhavissantī"ti bhedapurekkhāratā vā "iti ahaṁ piyo bhavissāmi vissāsiko"ti piyakamyatā vā, tajjo vāyāmo, tassa tadatthavijānananti. Pare pana abhinne kammapathabhedo natthi, bhinne eva hoti.

Pharusayatīti **pharusā**, vācā. Yāya hi vācāya attānampi parampi pharusam sinehābhāvena lūkham karoti, sā **pharusavācā**. Atha vā sayampi pharusā domanassasamuṭṭhitattā sabhāvenapi kakkasā neva kaṇṇasukhā na hadayasukhāti **pharusavācā**. Ettha pana paresam mammacchedanavasena pavattiyā ekantaniṭṭhuratāya sabhāvena kāraṇavohārena ca vācāya pharusasaddappavatti daṭṭhabbā. Tam pharusam vadati etāyāti pharusavācā, parassa mammacchedakakāyavacīpayogasamuṭṭhāpikā ekantapharusā cetanā. Tassā āvibhāvatthamidam vatthu—eko kira dārako mātu vacanam anādiyitvā araññam gacchati, tam mātā nivattetum asakkontī "caṇḍā tam mahimsī anubandhatū"ti akkosi. Athassa tatheva araññe mahimsī uṭṭhāsi. Dārako "yam mama mātā mukhena kathesi, tam mā hotu. Yam cittena cintesi, tam hotū"ti saccakiriyamakāsi. Mahimsī tattheva baddhā viya

aṭṭhāsi. Evaṁ mammacchedakopi payogo cittasaṇhatāya pharusavācā na hoti. Mātāpitaro hi kadāci puttake evampi vadanti "corā vo khaṇḍākhaṇḍikaṁ karontū"ti, uppalapattampi ca nesaṁ upari patantaṁ na icchanti. Ācariyupajjhāyā ca kadāci nissitake evaṁ vadanti "kiṁ ime ahirikā anottappino caranti, niddhamatha ne"ti. Atha ca nesaṁ āgamādhigamasampattiṁ icchanti, yathā cittasaṇhatāya pharusavācā na hoti, evaṁ vacanasaṇhatāya apharusavācāpi na hoti. Na hi mārāpetukāmassa "imaṁ sukhaṁ sayāpethā"ti vacanaṁ apharusavācā hoti, cittapharusatāya pana esā pharusavācāva. Sā yaṁ sandhāya pavattitā, tassa appaguṇatāya appasāvajjā, mahāguṇatāya mahāsāvajjā. Tassā tayo sambhārā—akkositabbo paro, kupitacittaṁ, akkosanāti.

Sam sukham hitanca phalati visarati vināsetīti sampham, attano paresanca anupakārakam yam kinci, sampham palapati etāyāti samphappalāpo, anatthavinnāpikakāyavacīpayogasamuṭṭhāpikā akusalacetanā. So āsevanamandatāya appasāvajjo, āsevanamahantatāya mahāsāvajjo. Tassa dva sambhārā— bhāratayuddhasītāharaṇādiniratthakakathāpurekkhāratā, tathārūpīkathākathananca. Pare pana tam katham agaṇhante kammapathabhedo natthi, parena pana samphappalāpe gahiteyeva hoti.

Abhijjhābyāpādamicchādiṭṭhiyoti ettha parasampattim abhimukham jhāyatīti abhijjhā, parasampattīsu lobho. Sā pana "aho vata idam mamassā"ti evam parabhaṇḍābhijjhāyanalakkhaṇā. Adinnādānam viya appasāvajjā mahāsāvajjā ca. Tassā dve sambhārā—parabhaṇḍam, attano pariṇāmanañca. Parabhaṇḍavatthuke hi lobhe uppannepi na tāva kammapathabhedo hoti, yāva "aho vata idam mamassā"ti attano na parināmeti.

Hitasukham byāpādeti vināsetīti **byāpādo**, paṭigho. So paravināsāya manopadosalakkhaņo. So pharusavācā viya appasāvajjo mahāsāvajjo ca. Tassa dve sambhārā—parasatto, tassa ca vināsanacintā. Parasattavatthuke hi kodhe uppannepi na tāva kammapathabhedo hoti, yāva "aho vatāyam ucchijjeyya vinasseyyā"ti tassa vināsanam na cinteti.

Yathābhuccagahaṇābhāvena micchā passatīti **micchādiṭṭhi.** Sā "natthi dinnan"ti-ādinā nayena viparītadassanalakkhaṇā. Samphappalāpo viya appasāvajjā mahāsāvajjā ca. Apica aniyatā appasāvajjā, niyatā mahāsāvajjā. Tassa dve sambhārā—vatthuno gahitākāraviparītatā, yathā ca taṁ gaṇhāti, tathābhāvena tassupaṭṭhānanti. Tattha natthikāhetuka-akiriyadiṭṭhīhi eva kammapathabhedo hoti.

"Anekavihitānam pāpakānam akusalānam dhammānan"ti sāmaññavacanepi pārisesañāyato vuttāvasesā akusalā dhammā gahetabbāti āha "ṭhapetvā te dhamme"ti-ādi. Te yathāvuttakāyaduccaritādike akusaladhamme ṭhapetvāti attho. Anekavihitāti anekappakārā.

- 6. Ayam lokatantīti ayam vuḍḍhānam abhivādanādikiriyālakkhaṇā lokappaveṇī. Anāgāmibrāhmānam alankārādīsu anāgāmibhikkhūnañca cīvarādīsu nikantivasena rāguppatti hotīti anāgāmimaggena pañcakāmaguṇikarāgasseva pahānam veditabbanti āha "pañcakāmaguṇikarāgassā"ti. Rūpādīsu pañcasu kāmaguṇesu vatthukāmakoṭṭhāsesu uppajjamāno rāgo "pañcakāmaguṇikarāgo"ti veditabbo. Koṭṭhāsavacano hettha guṇa-saddo "vayoguṇā anupubbam jahantī"ti-ādīsu¹ viya. Dvīsu akusalacittesūti domanassasahagatesu dvīsu akusalacittesu. Mohassa sabbākusalasādhāraṇattā āha "sabbākusalasambhavassā"ti. Avasesānanti sakkāyaditthi-ādīnam.
- 7. Jigucchati maññeti "ahamabhijāto rūpavā paññavā, kathaṁ nāma aññesaṁ abhivādanādiṁ kareyyan"ti jigucchati viya jigucchatīti vā sallakkhemi. Akosallasambhūtaṭṭhenāti aññāṇasambhūtaṭṭhena. Akusale dhamme jigucchamāno tesaṁ samaṅgībhāvampi jigucchatīti vuttaṁ "akusalānaṁ dhammānaṁ samāpattī"ti. Samāpattīti etasseva vevacanaṁ samāpajjanā samaṅgibhāvoti. Maṇḍanakajātiyoti maṇḍanasabhāvo, maṇḍanasīloti attho. Jegucchitanti jigucchanasīlataṁ.
- 8. **Lokajeṭṭhakakamman**ti loke jeṭṭhakānaṁ kattabbakammaṁ, loke vā seṭṭhasammataṁ kammaṁ. **Tatrā**ti yathāvuttesu dvīsupi atthavikappesu.

padābhihito attho **padattho**, byañjanatthoti vuttam hoti. **Vinayam vā arahatī**ti ettha vinayanam vinayo, niggaņhananti attho. Tenāha "**niggaham arahatīti vuttam hotī**"ti. Nanu ca paṭhamam vuttesu dvīsupi atthavikappesu sakatthe arahatthe ca taddhitapaccayo saddalakkhaṇato dissati, na pana "vinayāya dhammam desetī"ti imasmim atthe, tasmā kathamettha taddhitapaccayoti āha "**vicitrā hi taddhitavuttī**"ti. Vicitratā cettha lokappamāṇato veditabbā. Tathā hi yasmim yasmim atthe taddhitavutti. Tasmā yathā "mā saddamakāsī"ti vadanto "māsaddiko"ti vuccati, evam vinayāya dhammam desetīti venayikoti vuccatīti adhippāyo.

- 9. **Kapaṇapuriso**ti guṇavirahitatāya dīnamanusso. **Byañjanāni avicāretvā**ti tissadattādisaddesu¹ viya "imasmim atthe ayam nāma paccayo"ti evam byañjanam vicāram akatvā, anipphannapāṭipadikavasenāti vuttam hoti.
- 10. Devalokagabbhasampattiyāti vatvā ṭhapetvā bhummadeve sesesu devesu gabbhaggahaṇassa abhāvato paṭisandhiyevettha gabbhasampattīti veditabbāti vuttamevatthaṁ vivaritvā dassento āha "devalokapaṭisandhipaṭilābhāya saṁvattatī"ti. Assāti abhivādanādisāmīcikammassa. Mātukucchismiṁ paṭisandhiggahaṇe dosaṁ dassentoti mātito aparisuddhabhāvaṁ dassento, akkositukāmassa dāsiyā puttoti dāsikucchismiṁ nibbattabhāve dosaṁ dassetvā akkosanaṁ viya bhagavato mātukucchismiṁ paṭisandhiggahaṇe dosaṁ dassetvā akkosantopi evamāhāti adhippāyo. Gabbhatoti devalokapaṭisandhito. Tenevāha "abhabbo devalokūpapattiṁ pāpuṇitunti adhippāyo"ti. Hīno vā gabbho assāti apagabbhoti imassa viggahassa ekena pariyāyena adhippāyaṁ dassento āha "devalokagabbhaparibāhirattā āyatiṁ hīnagabbhapaṭilābhabhāgītī"ti.

Iti-saddo hetu-attho, yasmā āyatimpi hīnagabbhapaṭilābhabhāgī, tasmā hīno vā gabbho assāti apagabbhoti adhippāyo.

Puna tasseva viggahassa kodhavasena -pa- dassentoti heṭṭhā vuttanayassa anurūpam katvā adhippāyam dassento āha "hīno vāssa mātukucchismim gabbhavāso ahosīti adhippāyo"ti. Gabbha-saddo atthi mātukucchipariyāyo "gabbhe vasati māṇavo"ti-ādīsu¹ viya. Atthi mātukucchismim nibbattasattapariyāyo "antamaso gabbhapātanam upādāyā"ti-ādīsu² viya. Tattha mātukucchipariyāyam gahetvā attham dassento āha "anāgate gabbhaseyyā"ti. Gabbhe seyyā gabbhaseyyā. Anuttarena maggenāti aggamaggena. Kammakilesānam maggena vihatattā āha "vihatakāraṇattā"ti. Itarā tissopīti aṇḍajasamsedaja-opapātikā. Ettha ca yadipi "apagabbho"ti imassa anurūpato gabbhaseyyā eva vattabbā, pasaṅgato pana labbhamānam sabbampi vattum vaṭṭatīti punabbhavābhinibbattipi vuttāti veditabbā.

Idāni sattapariyāyassa gabbhasaddassa vasena viggahanānattam dassento āha "apicā"ti-ādi. Imasmim pana vikappe gabbhaseyyā punabbhavābhinibbattīti ubhayampi gabbhaseyyavaseneva vuttantipi vadanti. Nanu ca "āyatim gabbhaseyyā pahīnā"ti³ vuttattā gabbhassa seyyā eva pahīnā, na pana gabbhoti āpajjatīti āha "yathā cā"ti-ādi. Atha "abhinibbattī"ti ettakameva avatvā punabbhavaggahaṇam kimatthanti āha "abhinibbatti ca nāmā"ti-ādi. Apunabbhavabhūtāti khaṇe khaṇe uppajjamānānam dhammānam abhinibbatti.

11. **Dhammadhātun**ti ettha dhamme anavasese dhāreti yāthāvato upadhāretīti dhammadhātu, dhammānam yathāsabhāvato avabujjhanasabhāvo, sabbaññutaññāṇassetam adhivacanam. **Paṭivijjhitvā**ti sacchikatvā, paṭilabhitvāti attho, paṭilābhahetūti vuttam hoti. **Desanāvilāsappatto hotī**ti rucivasena parivattetvā desetum samatthatā desanāvilāso, tam patto adhigatoti attho. **Karuṇāvipphāran**ti sabbasattesu mahākaruṇāya pharaṇam. Tādiguṇalakkhaṇameva puna upamāya

vibhāvetvā dassento āha "pathavīsamacittatan" ti. Yathā pathavī suciasucinikkhepachedanabhedanādīsu na vikampati, anurodhavirodham na pāpuņāti, evam iṭṭhāniṭṭhesu lābhālābhādīsu anurodhavirodhappahānato avikampitacittatāya pathavīsamacittatanti attho. Akuppadhammatanti ettha "akuppadhammo nāma phalasamāpattī" ti tīsupi gaṇṭhipadesu vuttam. "Paresu pana akkosantesupi attano pathavīsamacittatālakkhaṇam akujjhanasabhāvatanti evamettha attho gahetabbo" ti amhākam khanti. Jarāya anusaṭanti jarāya paliveṭhitam. Vaṭṭakhāṇubhūtanti anekesam anayabyasanānam nipātalakkhaṇatthambhabhūtatāya samsārakhāṇubhūtam. Brāhmaṇassa vuḍḍhatāya āsannavittimaraṇanti sambhāvanavasena "ajja maritvā" ti-ādi vuttam. Mahantena kho pana ussāhenāti "sādhu kho pana tathārūpānam arahatam dassanam hotī" ti evam sañjātamahussāhena. Appaṭisamam purejātabhāvanti anaññasādhāraṇam purejātabhāvam. Natthi etassa paṭisamoti appaṭisamo, purejātabhāvo.

"Apī"ti avatvā "pī"ti vadanto pi-saddopi visum atthi nipātoti dasseti. Sambhāvanattheti "api nāmevam siyā"ti vikappanattho sambhāvanattho, tasmim jotakatāya pisaddo vattati. Vacanasiliṭṭhatāyāti vacanassa madhurabhāvattham, mudubhāvatthanti attho. Evañhi loke siliṭṭhavacanam hotīti evam ekameva gaṇanam avatvā aparāya gaṇanāya saddhim vacanam loke siliṭṭhavacanam hoti yathā "dve vā tīṇī vā udakaphusitānī"ti. Sammā adhisayitānīti pādādīhi attanā nesam kiñci upaghātam akarontiyā bahivātādiparissayaparihārattham sammadeva upari sayitāni. Upari-attho hettha adhi-saddo. Utum gaṇhāpentiyāti tesam allasinehapariyādānattham attano kāyusmāvasena utum gaṇhāpentiyā. Tenāha "usmīkatānī"ti. Sammā paribhāvitānīti sammadeva sabbaso kukkuṭavāsanāya vāsitāni. Tenāha "kukkuṭagandham gāhāpitānī"ti.

Ettha ca sammā parisedanam kukkuṭagandhaparibhāvanañca sammā adhisayananipphattiyā ānubhāvanipphāditanti¹ daṭṭhabbam. Sammā adhisayaneneva hi itaradvayam

ijjhati. Na hi sammā adhisayanato visum sammā parisedanassa sammā paribhāvanassa ca karaṇam atthi, tena pana saddhimyeva itaresam dvinnampi ijjhanato vuttam "evam tīhi pakārehi tāni aṇḍāni paripāliyamānānī"ti. Nakhasikhāti nakhaggāni. Mukhatuṇḍakanti mukhaggam. Kapālassa tanukattāti ettha yathā kapālassa tanutā ālokassa anto paññāyamānassa kāraṇam, tathā kapālassa tanutāya nakhasikhāmukhatuṇḍakānam kharatāya ca allasinehapariyādānam kāraṇavacananti daṭṭhabbam. Saṅkuṭitahatthapādāti ettha hatthāti pakkhā. Na hi kukkuṭānam pakkhato añño hattho nāma atthi. Etthāti ālokaṭṭhāne. Pakkhe vidhunantāti pakkhe cālentā. Nikkhamantānanti niddhāraṇe sāmivacanam, nikkhamantesūti attho.

So jettho iti assa vacanīyoti yo pathamataram andakosato nikkhanto kukkutapotako, soyeva jetthoti vacanīyo assa, bhaveyyāti attho. Sampatipādentoti samsandento. Tibhūmakapariyāpannāpi sattā avijjākosassa anto pavitthā tattha tattha appahīnāya avijjāya vethitattāti āha "avijjākosassa anto pavitthesu sattesū"ti. Andakosanti bījakapālam. Lokasannivāseti loko eva lokasannivāso. Sammāsambodhinti ettha sammāti aviparītattho, samsaddo sāmanti imamattham dīpeti, tasmā sammā aviparītenākārena sayameva cattāri saccāni bujjhati paţivijjhatīti sammāsambodhīti maggo vuccati. Tenāha "sammā sāmañca bodhin"ti, sammā sayameva ca bujjhanakanti attho. **Sammā**ti vā pasatthavacano, **sam**-saddo sundaravacanoti āha "atha vā pasattham sundarañca bodhin"ti. Bodhisaddassa anekatthatam dassetvā idhādhippetamattham niddhāretvā dassetukāmo āha "bodhīti rukkhopi maggopī"ti-ādi. Tattha abujjhi etthāti rukkho bodhi. Sayam bujjhati, bujjhanti vā tena ariyāti **maggo** bodhi. Sabbadhamme sabbākārato bujjhati pativijjhatīti **sabbaññutaññānam** bodhi. Bujjhīyati sacchikarīyatīti nibbanam bodhi. Antara ca bodhinti dutiyamudaharanam vinapi rukkhasaddena bodhisaddassa rukkhe pavattidassanattham vuttam. Varabhūrimedhasoti mahāpathavī viya patthaṭavarapaññoti attho. Asabbagunadāyakattāti sabbagunānam adāyakattā. Sabbagune na dadātīti

hi asabbaguṇadāyako, ayuttasamāsoyam gamakattā yathā "asūriyampassāni mukhānī"ti.

Tisso vijjāti upanissayavato saheva arahattaphalena tisso vijjā deti. Nanu cettha tīsu vijjāsu āsavakkhayañāṇassa maggapariyāpannattā kathametaṁ yujjati "maggo tisso vijjā detī"ti? Nāyaṁ doso. Satipi āsavakkhayañāṇassa maggapariyāpannabhāve aṭṭhaṅgike magge sati maggañāṇena saddhiṁ tisso vijjā paripuṇṇā hontīti "maggo tisso vijjā detī"ti vuccati. Cha abhiññāti etthāpi eseva nayo. Sāvakapāramiñāṇanti aggasāvakehi paṭilabhitabbaṁ sabbameva lokiyalokuttarañāṇaṁ. Paccekabodhiñāṇanti etthāpi imināva nayena attho veditabbo. Abbhaññāsinti jāniṁ. Jānanañca na anussavādivasenāti āha "paṭivijjhin"ti, paccakkhamakāsinti attho. Paṭivedhopi na dūre ṭhitassa lakkhaṇappaṭivedho viyāti āha "pattomhī"ti, pāpuṇinti attho. Pāpuṇanañca na sayaṁ gantvāti āha "adhigatomhī"ti, sakasantāne uppādanavasena patilabhinti attho.

Opammasampaṭipādananti opammatthassa upameyyena sammadeva paṭipādanam. Atthenāti upameyyatthena. Yathā kukkuṭiyā aṇḍesu tividhakiriyākaraṇam kukkuṭacchāpakānam aṇḍakosato nikkhamanassa mūlakāraṇam, evam bodhisattabhūtassa bhagavato tividhānupassanākaraṇam avijjaṇḍakosato nikkhamanassa mūlakāraṇanti āha "yathā hi tassā kukkuṭiyā -pa- tividhānupassanākaraṇan"ti. "Santāne"ti vuttattā aṇḍasadisatā santānassa bahi nikkhantakukkuṭacchāpakasadisatā buddhaguṇānam, buddhaguṇāti ca atthato buddhoyeva "tathāgatassa kho etam vāseṭṭha adhivacanam dhammakāyo itipī"ti vacanato. Avijjaṇḍakosassa tanubhāvoti balavavipassanāvasena avijjaṇḍakosassa tanubhāvo, paṭicchādanasāmaññena ca avijjāya aṇḍakosasadisatā. Mudubhūtassapi kharabhāvāpatti hotīti tannivattanattham "thaddhakharabhāvo"ti vuttam.

Tikkhakharavippasannasūrabhāvoti ettha pariggayhamānesu saṅkhāresu vipassanāñāṇassa samādhindriyavasena sukhānuppaveso tikkhatā, anupavisitvāpi satindriyavasena anatikkamanato akuṇṭhatā kharabhāvo. Tikkhopi hi ekacco saro lakkhaṁ patvā kuṇṭho hoti, na tathā idaṁ. Satipi kharabhāve

sukhumappavattivasena kilesasamudācārasankhobharahitatāya saddhindriyavasena pasannabhāvo, satipi ca pasannabhāve antarā anosakkitvā kilesapaccatthikānam suṭṭhu abhibhavanato vīriyindriyavasena sūrabhāvo veditabbo. Evamimehi pakārehi sankhārupekkhāñāṇameva gahitanti daṭṭhabbam. Vipassanāñāṇassa pariṇāmakāloti vipassanāya vuṭṭhānagāminibhāvappatti, tadā ca sā maggañāṇagabbham dhārentī viya hotīti āha "gabbhaggahaṇakālo"ti. Gabbham gaṇhāpetvāti sankhārupekkhāya anantaram sikhāppatta-anulomavipassanāvasena maggavijāyanattham gabbham gaṇhāpetvā. Anupubbādhigatenāti paṭhamamaggapaṭipāṭiyā adhigatena. Abhiññāpakkheti lokiyābhiññāpakkhe. Lokuttarābhiññā hi avijjaṇḍakosam padālitā. Potthakesu pana katthaci "chaabhiñāpakkhe"ti likhanti, so apāṭhoti veditabbo. Jeṭṭho seṭṭhoti vuddhatamattā jeṭṭho, sabbaguṇehi uttamattā pasatthatamoti seṭṭho.

Idāni "āraddham kho pana me brāhmana vīriyan"ti-ādikāya desanāya anusandhim dassento āha "evam bhagavā" ti-ādi. Tattha pubbabhāgato pabhutīti bhāvanāya pubbabhāgiyavīriyārambhādito patthāya. Cittamevamuppannanti evam upari vakkhamānaparivitakkavasena cittamuppannanti attho. "Cittameva uppannan"tipi patho, tattha cittameva uppannam, na tāva bhagavati pasādoti attho. Mutthassatināti vinatthassatinā, sativirahitenāti attho. **Sāraddhakāyenā**ti sadarathakāyena. **Bodhimande**ti bodhisankhātassa nānassa mandabhāvappatte thāne. Bodhīti hi pannā vuccati, sā ettha mandā pasannā jātāti so padeso "bodhimando"ti paññāto. Caturangasamannagatanti "kamam taco ca nharu ca atthi ca avasissatu, sarīre upasussatu mamsalohitan"ti¹ evam vuttacaturangasamannāgatam vīriyam. Tattha tacoti ekam angam nhāru ekam angam atthi ekam angam mamsalohitam ekam anganti veditabbam. Taco ekam anganti ca tace nirapekkhabhāvo ekam anganti gahetabbam. Padhānam anuyunjantassa hi tace palujjamānepi tamnimittam avosānāpajjanam tassa vīriyassa ekam angam ekam kāranam. Evam sesesupi attho veditabbo. **Paggahitan**ti ārambham²

sithilam akatvā daļhaparakkamasankhātussāhanabhāvena gahitam. Tenāha "asithilappavattitanti vuttam hotī"ti.

Asallīnanti asankucitam kosajjavasena sankocam anāpannam. Upatthitāti ogāhanasankhātena apilāpabhāvena ārammanam upagantvā thitā. Tenāha "ārammanābhimukhībhāvenā"ti. Sammosassa viddhamsanavasena pavattiyā na sammutthāti **asammutthā**. Kiñcāpi cittapassaddhivaseneva cittameva passaddham, kāyapassaddhivaseneva ca kāyo passaddho hoti, tathāpi yasmā kāyapassaddhi uppajjamānā cittapassaddhiyā saheva uppajjati, na vinā, tasmā vuttam "kāyacittapassaddhivasenā"ti. Kāyapassaddhiyā ubhayesampi kāyānam passambhanāvahattā vuttam "rūpakāyopi passaddhoyeva hotī"ti. So ca khoti so ca kho kāyo. Vigatadarathoti vigatakilesadaratho. Nāmakāye hi vigatadarathe rūpakāyopi vūpasantadarathaparilāho hoti. **Sammā āhitan**ti nānārammanesu vidhāvanasankhātam vikkhepam vicchinditvā ekasmimyeva ārammane avikkhittabhāvāpādanena sammadeva āhitam thapitam. Tenāha "sutthu thapitan"ti-ādi. Cittassa anekaggabhāvo vikkhepavasena cañcalatā, sā sati ekaggatāya na hotīti āha **"ekaggam acalam nipphandanan"**ti. **Ettāvatā**ti "āraddham kho panā"ti-ādinā vīriyasatipassaddhisamādhīnam kiccasiddhidassanena.

Nanu ca saddhāpaññānampi kiccasiddhi jhānassa pubbapaṭipadāya icchitabbāti? Saccaṁ icchitabbā, sā pana nānantarikabhāvena avuttasiddhāti na gahitā. Asati hi saddhāya vīriyārambhādīnaṁ asambhavoyeva, paññāpariggahe ca nesaṁ asati ñāyārambhādibhāvo na siyā, tathā asallīnāsammosatādayo vīriyādīnanti asallīnatādiggahaṇenevettha paññākiccasiddhi gahitāti daṭṭhabbaṁ. Jhānabhāvanāyaṁ vā samādhikiccaṁ adhikaṁ icchitabbanti dassetuṁ samādhipariyosānāva jhānassa pubbapaṭipadā kathitāti daṭṭhabbaṁ.

Pathamajjhānakathā

Idāni "vivicceva kāmehī"ti-ādinayappavattāya pāļiyā jhānavibhaṅge¹ vuttampi atthaṁ aṭṭhakathānayeneva saṁvaṇṇetukāmo vibhaṅgapāḷiyaṁ vuttanayena avacane kāraṇaṁ dassetuṁ "kiñcāpi tattha katame

kāmā"ti-ādimāha. Tattha patthanākārena pavatto dubbalo lobho chandanaṭṭhena chando, tato balavā rañjanaṭṭhena rāgo, tatopi balavataro bahalarāgo chandarāgo. Nimittānubyañjanāni saṅkappeti etenāti saṅkappo, tathāpavatto lobho. Tattha nimittasaṅkappanā nāma avayave samodhānetvā "itthī puriso"ti-ādinā ekajjhaṁ katvā uparūpari kilesuppattiyā nimittassa kappanā. Anubyañjanasaṅkappanā pana "hatthā sobhanā, pādā sobhanā"ti evaṁ anubyañjanavasena vibhajitvā kappanāti. Kilesānañhi anu anu byañjanato paribyañjanato paribyattivasena uppattiyā paccayabhāvato anubyañjanaṁ hatthapādādi-avayavā vuccanti. Tato balavā rañjanaṭṭhena rāgo, saṅkappavaseneva pavatto tatopi balavataro saṅkapparāgo. Svāyaṁ pabhedo ekasseva lobhassa pavatti-ākāravasena avatthābhedavasena ca veditabbo yathā "vaccho dammo balībaddo"ti. Kāmāti kilesakāmā, kāmentīti kāmā, kāmenti etehīti vā.

Seyyathidanti imassa tam katamam, tam kathanti vā attho. Viviccitvāti visum hutvā. Tenāha "vinā hutvā apasakkitvā"ti, pajahanavasena apakkamitvāti attho. Vivicceva kāmehīti ettha viviccāti iminā vivecanam jhānakkhaņe kāmānam abhāvamattam vuttam. Viviccevāti pana iminā ekamsato kāmānam vivecetabbatādīpanena tappaṭipakkhatā jhānassa kāmavivekappahānassa ca jhānādhigamūpāyatā dassitā hotīti imamattham dassetum "paṭhamajjhānan"ti-ādim vatvā tamevattham pākaṭataram kātum "kathan"ti-ādi vuttam. Andhakāre sati padīpo viyāti etena yathā padīpābhāvena rattiyam andhakārābhibhavo, evam jhānābhāvena cittasantatiyam kāmābhibhavoti dasseti.

Etanti pubbapadeyeva avadhāraṇavacanaṁ, na kho pana evaṁ daṭṭhabbaṁ "kāmehi evā"ti avadhāraṇassa akatattā. Tannissaraṇatoti nissaranti niggacchanti etena, ettha vāti nissaraṇaṁ. Ke niggacchanti? Kāmā. Tesaṁ kāmānaṁ nissaraṇaṁ pahānaṁ tannissaraṇaṁ, tato kāmanissaraṇatoti attho. Kathaṁ pana samāne vikkhambhane kāmānamevetaṁ nissaraṇaṁ, na byāpādādīnanti codanaṁ yuttito āgamato ca sādhetuṁ "kāmadhātū"ti-ādi vuttaṁ. Tattha kāmadhātusamatikkamanatoti sakalassapi kāmabhavassa samatikkamapatipadābhāvato. Tena imassa jhānassa

kāmapariññābhāvamāha. **Kāmarāgapaṭipakkhato**ti "chando kāmo"ti-ādinā¹ vuttavibhāgassa kilesakāmassa paccatthikabhāvato. Tena yathā mettā byāpādassa, karuṇā vihiṁsāya, evamidaṁ jhānaṁ kāmarāgassa ujuvipaccanīkabhūtanti dasseti. Vipākena cettha kāmadhātusamatikkamo attano pavattikkhaṇe kāmarāgapaṭipakkhatā ca veditabbā. Evamattano pavattiyā vipākappavattiyā ca kāmarāgato kāmadhātuto ca vinivattasabhāvattā idaṁ jhānaṁ visesato kāmānameva nissaraṇaṁ, svāyamattho pāṭhāgato evāti āha "yathāhā"ti-ādi. Nekkhammanti paṭhamajjhānaṁ.

Kāmañcettha tamattham dīpetum purimapadeyeva avadhāranam gahitam, uttarapadepi pana tam gahetabbameva tatha atthasambhavatoti dassetum "uttarapadepī"ti-ādi vuttam. Itoti kāmacchandato. Esa datthabboti esa niyamo datthabbo. **Sādhāranavacanenā**ti sabbavivekasādhāranavacanena. Tadangavikkhambhanasamucchedapatippassaddhinissaranavivekā tadangavivekādayo. Kāyacitta-upadhivivekā kāyavivekādayo. Tayo eva idha datthabbati tayo eva idha jhanakathayam datthabba samucchedavivekādīnam asambhavato. **Niddese**ti mahāniddese². Tattha hi "uddānato dve kāmā vatthukāmā kilesakāmā cā"ti uddisitvā tattha "katame vatthukāmā manāpiyā rūpā -pa- manāpiyā photthabbā"ti-ādinā vatthukāmā nidditthā. Te pana kāmīyantīti kāmāti veditabbā. **Tatthevā**ti niddeseyeva. Vibhangeti jhanavibhange. Evanhi satīti evam ubhayesampi kamanam sangahe sati. Vatthukāmehipīti vatthukāmehi viviccevātipi attho yujjatīti evam yujjamānatthantarasamuccayattho pi-saddo, na kilesakāmasamuccayattho. Kasmā? Imasmim atthe kilesakāmehi vivekassa dutiyapadena vuttattā. Tenāti vatthukāmavivekena. Kāyaviveko vutto hotīti puttadārādipariggahavivekadīpanato kāyaviveko vutto hoti.

Purimenāti kāyavivekena. **Etthā**ti "vivicceva kāmehi vivicca akusalehi dhammehī"ti etasmim padadvaye. Ito vā niddhārite vivekadvaye, akusalasaddena yadi kilesakāmā, sabbākusalāpi

vā gahitā, sabbathā kilesakāmehi viveko vuttoti āha "dutiyena kilesakāmehi vivekavacanato"ti. Dutiyenāti ca cittavivekenāti attho. Etesanti yathāvuttānam dvinnam padānam. Niddhāraņe cetam sāmivacanam. Taṇhādisamkilesānam vatthuno pahānam samkilesavatthuppahānam. Lolabhāvo nāma tattha tattha rūpādīsu taṇhuppādo, tassa hetū vatthukāmā eva veditabbā. Bālabhāvassa hetupariccāgoti sambandho. Bālabhāvo nāma avijjā, ducintitacintitādi vā, tassa ayonisomanasikāro, sabbepi vā akusalā dhammā hetū. Kāmaguṇādhigamahetu pāṇātipātādi-asuddhappayogo hotīti tabbivekena payogasuddhi vibhāvitā. Taṇhāsamkilesasodhanena vivaṭṭūpanissayasamvaḍḍhanena ca ajjhāsayavisodhanam āsayaposanam. Āsayaposananti ca jhānabhāvanāya paccayabhūtā pubbayogādivasena siddhā ajjhāsayasampadā, sā pana taṇhupatāpavigamena hoti. Tena vuttam "taṇhāsamkilesavisodhanenā"ti. Kāmesūti niddhāraņe bhummam.

Anekabhedoti kāmāsavakāmarāgasamyojanādivasena rūpatanhādivasena ca anekappabhedo. Kāmacchandoyevāti kāmasabhāvoyeva chando, na kattukamyatāchando napi kusalacchandoti adhippāyo. Akusalapariyāpannopīti "vivicca akusalehī"ti ettha vutta-akusalesu antogadhopi. Jhānapaṭipakkhatoti jhānassa paṭipakkhabhāvato tamhetu tamnimittam visum vutto, akusalabhāvasāmaññena aggahetvā visum sarūpena gahito. Yadi kilesakāmova purimapade vutto, tam katham bahuvacananti āha "anekabhedato"ti-ādi. Aññesampīti diṭṭhimāna-ahirikānottappādīnam tamsahitaphassādīnañca.

Uparijhānaṅgapaccanīkapaṭipakkhabhāvadassanatoti "savitakkaṁ savicāran"ti-ādinā upari vuccamānāni jhānaṅgāni uparijhānaṅgāni, tesaṁ attano paccanīkānaṁ paṭipakkhabhāvadassanato tappaccanīkanīvaraṇavacanaṁ. "Uparijhānaṅgānaṁ paccanīkapaṭipakkhabhāvadassanato"tipi pāṭho. Tattha paccanīkapaṭipakkhabhāvadassanatoti upari vuccamānajhānaṅgānaṁ ujuvipaccanīkavasena paṭipakkhabhāvadassanatoti atthaṁ vadanti.

Jhānaṅgapaccanīkānīti jhānaṅgānaṁ pavattinivāraṇato jhānaṅgapaccanīkāni. Viddhaṁsakānīti vighātakāni. Samādhi

kāmacchandassa paṭipakkhoti rāgapaṇidhiyā ujuvipaccanīkabhāvato nānārammaṇehi palobhitassa paribbhamantassa cittassa samādhānato kāmacchandassa samādhi paṭipakkho. Pīti byāpādassāti pāmojjena samānayogakhemattā byāpādassa pīti paṭipakkhā. Vitakko thinamiddhassāti yoniso saṅkappanavasena savipphārappavattito vitakko thinamiddhassa paṭipakkho. Sukhaṁ uddhaccakukkuccassāti sukhaṁ vūpasantasītalasabhāvattā avūpasamānutāpasabhāvassa uddhaccakukkuccassa paṭipakkhaṁ. Vicāro vicikicchāyāti vicāro ārammaṇe anumajjanavasena paññāpatirūpasabhāvattā vicikicchāya paṭipakkho. Mahākaccānattherena desitā piṭakānaṁ saṁvaṇṇanā peṭakaṁ, tasmiṁ peṭake.

Pañcakāmaguṇabhedavisayassāti rūpādipañcakāmaguṇavisesavisayassa. Āghātavatthubhedādivisayānanti byāpādavivekavacanena "anatthaṁ me acarī"ti-ādi āghātavatthubhedavisayassa dosassa, mohādhikehi thinamiddhādīhi vivekavacanena paṭicchādanavasena dukkhādipubbantādibhedavisayassa mohassa vikkhambhanaviveko vutto. Kāmarāgabyāpādatadekaṭṭhathinamiddhādivikkhambhakañcetaṁ sabbākusalapaṭipakkhasabhāvattā sabbakusalānaṁ, tena sabhāvena sabbākusalappahāyakaṁ hontampi kāmarāgādivikkhambhanasabhāvameva hoti taṁsabhāvattāti avisesetvā nīvaraṇākusalamūlādīnaṁ vikkhambhanaviveko vutto hotīti āha.

Yathāpaccayam pavattamānānam sabhāvadhammānam natthi kāci vasavattitāti vasavattibhāvanivāraṇattham "vitakkanam vitakko"ti vuttam. Vitakkananti hi vitakkanakiriyā, sā ca vitakkassa attano paccayehi pavattimattamevāti bhāvaniddeso vasavattibhāvanivāraṇāya hoti. Tayidam vitakkanam "īdisamidan"ti ārammaṇaparikappananti āha "ūhananti vuttam hotī"ti. Yasmā cittam vitakkabalena ārammaṇam abhiniruļham viya hoti, tasmā so ārammaṇābhiniropanalakkhaṇo vutto. Yathā hi koci rājavallabham ñātimvā mittam vā nissāya rājageham ārohati anupavisati, evam vitakkam nissāya cittam ārammaṇam ārohati. Yadi evam katham avitakkam cittam ārammaṇam ārohatīti? Vitakkabaleneva. Yathā hi so puriso paricayena tena vināpi nirāsanko rājageham pavisati, evam paricayena vitakkena vināpi avitakkam cittam ārammaṇam ārohati.

Paricayenāti ca santāne pavattavitakkabhāvanāsankhātena paricayena. Vitakkassa hi santāne abhiṇham pavattassa vasena cittassa ārammaṇābhiruhanam ciraparicitam, tena tam kadāci vitakkena vināpi tattha pavattateva. Yathā tam ñāṇasahitam hutvā sammasanavasena ciraparicitam kadāci ñāṇarahitampi sammasanavasena pavattati, yathā vā kilesasahitam hutvā pavattam sabbaso kilesarahitampi paricayena kilesavāsanāvasena pavattati, evamsampadamidam datthabbam.

Āhananapariyāhananarasoti-ādiso, abhimukham vā hananam āhananam. Parito, parivattitvā vā āhananam pariyāhananam. "Rūpam rūpam, pathavī pathavī"ti ākoṭentassa viya pavatti āhananam pariyāhanananti ca veditabbam. Yasmiñhi ārammaņe cittam abhiniropeti, tam tassa gahaṇayogyam karonto vitakko ākoṭento viya hoti. Yadi evam nāgasenattherena "ākoṭanalakkhaṇo vitakko. Yathā mahārāja bherī ākoṭitā atha pacchā anuravati anusaddāyati, evameva kho mahārāja yathā ākoṭanā, evam vitakko daṭṭhabbo. Atha pacchā anuravanā anusaddanā, evam vicāro daṭṭhabbo"ti ākoṭanalakkhaṇatā vitakkassa kasmā vuttā? Nāyam virodho. Therena hi kiccasannissitam katvā lakkhaṇam vuttam. Dhammānañhi sabhāvavinimuttā kāci kiriyā nāma natthi tathā gahetabbākāro ca. Bodhaneyyajanānurodhena pana paramatthato ekībhāvopi sabhāvadhammo pariyāyavacanehi viya samāropitarūpehi bahūhi pakārehi pakāsīyati. Evañhi so suṭṭhu pakāsito hoti. Ānayanapaccupaṭṭhānoti ettha ānayanam citte ārammaṇassa upanayanam, ākaḍḍhanam vā.

Anusañcaraṇaṁ anuparibbhamanaṁ. Svāyaṁ viseso santānamhi labbhamāno eva santāne pākaṭo hotīti daṭṭhabbo. Sesesupi eseva nayo. Anumajjananti ārammaṇe cittassa anumasanaṁ, parimajjananti attho. Tathā hi "vicāro parimajjanahattho viya sañcaraṇahattho viyā"ti ca vutto. Tatthāti ārammaṇe. Sahajātānaṁ anuyojanaṁ ārammaṇe anuvicaraṇasaṅkhāta-anumajjanavaseneva veditabbaṁ. Anuppabandhanaṁ ārammaṇe cittassa avicchinnassa viya pavatti. Tathā hi so "anuppabandhanatā"ti niddiṭṭho. Teneva ca "ghantānuravo viya, paribbhamanaṁ viyā"ti ca vutto. Katthacīti

paṭhamajjhāne parittacittuppādesu ca. **Oṭārikaṭṭhenā**ti vicārato oṭārikaṭṭhena. Yathā ghaṇṭābhighātasaddo paṭhamābhinipāto hoti, evam ārammaṇābhimukhaniropanaṭṭhena vitakko cetaso paṭhamābhinipāto viya hotīti āha "ghaṇṭābhighātasaddo viyā"ti-ādi. Vipphāravāti ettha vipphāro nāma vitakkassa thinamiddhapaṭipakkho ārammaṇe anolīnatā asaṅkoco, so pana abhiniropanabhāvena calanam viya hotīti adhippāyenāha "paripphandanabhāvo cittassā"ti. Paribbhamanam viyāti ettha parissayābhāvavīmamsanattham paribbhamananti veditabbam.

Dukanipātatthakathāyam pana—

"Ākāse gacchato mahāsakuņassa ubhohi pakkhehi vātam gahetvā pakkhe sannisīdāpetvā gamanam viya ārammaņe cetaso abhiniropanabhāvena pavatto vitakko, vātaggahaņattham pakkhe phandāpayamānassa gamanam viya anumajjanabhāvena pavatto vicāro"ti—

vuttam, tam anuppabandhanena pavattiyam yujjati. Tathā hi upacāre vā appanāyam vā santānena pavattiyam vitakko niccalo hutvā ārammaṇam anupavisitvā viya pavattati, na paṭhamābhinipāte pākaṭo hoti. Yathā hi apubbārammaṇe paṭhamābhinipātabhūto vitakko vipphāravā hoti, na tathā ekasmimyeva ārammaṇe nirantaram anuppabandhavasena pavattiyam,nātivipphāravā pana tattha hoti sannisinnabhāvato.

Paṭhamadutiyajjhānesu pākaṭo hotīti vitakkassa viseso abhiniropanākāro oļārikattā paṭhamajjhāne pākaṭo hoti, tadabhāvato pañcakanaye dutiyajjhāne vicārassa viseso anumajjanākāro pākaṭo hoti.

Ayam panettha aparo nayo—malaggahitam kamsabhājanam ekena hatthena daļham gahetvā itarena hatthena cuṇṇatela-eļakalomādikatacumbaṭakena parimajjantassa daļham gahaṇahattho viya vitakko, parimajjanahattho viya vicāro. Tathā kumbhakārassa daṇḍappahārena cakkam bhamayitvā bhājanam karontassa piṇḍassa uppīļanahattho viya vitakko, tasseva ito cito ca sañcaraṇahattho viya vicāro. Tathā kamsabhājanādīsu kiñci maṇḍalam vaṭṭalekham karontassa majjhe sannirumbhitvā ṭhitakaṇṭako

viya abhiniropano vitakko, bahi paribbhamanakantako viya anumajjano vicāroti veditabbam.

Yathā pupphaphalasākhādi-avayavavinimutto avijjamānopi rukkho "sapuppho saphalo"ti voharīyati, evam vitakkādi-aṅgavinimuttam avijjamānampi jhānam "savitakkam savicāran"ti voharīyatīti dassetum "rukkho viyā"ti-ādi vuttam. Vibhaṅge panāti-ādīsu jhānabhāvanāya puggalavasena desetabbattā "idha bhikkhu vivicceva kāmehī"ti-ādinā¹ puggalādhiṭṭhānena jhānāni uddiṭṭhānīti. Yadipi vibhaṅge puggalādhiṭṭhānā desanā katā, attho pana tatrāpi vibhaṅgepi yathā idha "iminā ca vitakkenā"ti-ādinā dhammavasena vutto, evameva daṭṭhabbo, paramatthato puggalasseva abhāvatoti adhippāyo. Atha vā jhānasamaṅgino vitakkavicārasamaṅgitādassanena jhānasseva savitakkasavicāratā vuttāti āha "attho pana tatrāpi evameva daṭṭhabbo"ti.

Vivekasaddassa bhāvasādhanatam sandhāyāha "tasmā vivekā"ti. Hetuatthe cetam nissakkavacanam, tasmā vivekā hetubhūtāti attho. **Viveka**saddassa kattusādhanatam kammasādhanatam vā sandhāyāha "tasmim vā viveke"ti. "Vivitto"ti hi iminā nīvaranehi vinābhūto tehi vivecitoti ca sādhanadvayampi sangahitamevāti. Pinayatīti tappeti vaddheti vā. Sampiyāyanalakkhanāti paritussanalakkhanā. Pīnanarasāti paribrūhanarasā. **Pharanarasā**ti panītarūpehi kāyassa byāpanarasā. Udaggabhāvo **odagyam.** Sukhayatīti **sukham,** attanā sampayuttadhamme laddhassāde karotīti attho. Svāyam kattuniddeso pariyāyaladdho dhammato aññassa kattunivattanattho, nippariyāyena pana bhāvasādhanameva labbhatīti "sukhanam sukhan"ti vuttam. Sātalakkhananti itthasabhāvattā tamsamangīpuggalam, sampayuttadhamme vā attani sādayatīti sātam dakārassa ta-kāram katvā. Sātam madhuranti vadanti, sātam lakkhanam etassāti sātalakkhaņam. Upabrūhanarasanti-ādīsu upabrūhanam sampayuttadhammānam samvaddhanam, dukkham viya avissajjetvā adukkhamasukhā viya anajjhupekkhitvā anu anu ganhanam upakāritā vā anuggaho. Katthacīti pathamajjhānādike. Patilābhatutthīti patilābhavasena uppajjanakatutthi.

Paṭiladdharasānubhavananti paṭiladdhassa ārammaṇarasassa anubhavanaṁ. Etena pītisukhāni sabhāvato vibhajitvā dassitāni. Yattha pīti, tattha sukhanti vitakkassa viya vicārena pītiyā sukhena accantasaṁyogamāha. Yattha sukhaṁ, tattha na niyamato pītīti vicārassa viya vitakkena, sukhassa pītiyā anaccantasaṁyogaṁ. Tena accantānaccantasaṁyogitāya pītisukhānaṁ visesaṁ dasseti.

Kam udakam tārenti etthāti **kantāram**, nirudakamarutthānam¹. Vanameva vanantam. Vanacchāyappavesana-udakaparibhogesu viya sukhanti yathā hi puriso mahākantāramaggam patipanno ghammapareto tasito pipāsito patipathe purisam disvā "kattha pānīyam atthī"ti puccheyya, so "atavim uttaritvāva jātassaravanasando atthi, tattha gantvā labhissasī'ti vadeyya, so tassa katham sutvāva hatthapahattho bhaveyya, tato gacchanto bhūmiyam patitāni uppaladalanālapattādīni disvā sutthutaram hatthapahattho hutvā gacchanto allavatthe allakese purise passeyya, vanakukkutavanamorādīnam saddam suneyya, jātassarapariyante jātamanijālasadisam nīlavanasandam passeyya, sare jātāni uppalapadumakumudāni passevya, accham vippasannam udakampi passeyya, so bhiyyo bhiyyo hatthapahattho hutvā jātassaram otaritvā yathāruci nhatvā ca pivitvā ca passaddhadaratho bhisamulālapokkharādīni khāditvā nīluppalādīni pilandhitvā mandālavamūlāni khandhe khipitvā uttaritvā sātakam nivāsetvā udakasātakam ātape katvā sītacchāyāya mandamande vāte paharante nipannova "aho sukham aho sukhan"ti vadeyya, evamsampadamidam datthabbam. Tassa hi purisassa jātassaravanasandasavanato patthāya yāva udakadassanā hatthapahatthakālo viya pubbabhāgārammaņe hatthapahatthākārā pīti, nhāyitvā ca pivitvā ca sītacchāyāya mandamande vāte paharante "aho sukham aho sukhan"ti vadanto nipannakālo viya balappattam ārammanarasānubhavanākārasanthitam sukham.

Tasmim tasmim samayeti iṭṭhārammaṇassa paṭilābhasamaye paṭiladdhassa rasānubhavanasamaye vanacchāyādīnam savanadassanasamaye paribhogasamaye ca. Pākaṭabhāvatoti yathākkamam pītisukhānam vibhūtabhāvato.

Vivekajam pītisukhanti ettha purimasmim atthe vivekajanti jhānam vuttam. Pītisukhasaddato ca atthi-atthavisesavato **assa jhānassa, asmim vā jhāne**ti ettha akāro¹ daṭṭhabbo yathā arisasoti². Dutiye pītisukhameva vivekajam, vivekajampītisukhanti ca aññapadatthasamāso paccattaniddesassa ca alopo kato, lope vā sati "vivekajapītisukhan"ti pāthoti ayam viseso.

Gananānupubbato pathamanti iminā desanākkamam ullingeti. "Gananānupubbatā pathaman"tipi pātho, tatthāpi gananānupubbatāyāti attho, gananānupubbatāmattam vā pathamanti idam vacananti attho. Pathamam samāpajjatīti pathamanti idam pana na ekantalakkhaņam. Ciņņavasībhāvo hi atthasamāpattilābhī ādito patthāya matthakam pāpentopi samāpajjitum sakkoti, matthakato patthāya ādim pāpentopi samāpajjitum sakkoti, antarantarā okkamantopi sakkoti. Evam pubbuppattiyatthena pana pathamam uppannantipi pathamam. Teneva visuddhimagge³ "gananānupubbatā pathamam, pathamam uppannantipi pathaman"ti ettakameva vuttam. Paccanīkadhamme jhāpetīti nīvaranādipaccanīkadhamme dahati, vikkhambhanavasena pajahatīti attho. Gocaranti kasinādi-ālambanam. Tanti tam gocaram. Upanijihāyatīti passati. Saha upacārenāti saddhim upacārajjhānena. Kasinārammanūpanijjhāyanatoti pathavīkasinādino attano ārammaņassa rūpam viya cakkhunā upanijihāyanato. **Lakkhanūpanijihāyanato**ti yathāsambhavam aniccādilakkhanattayassa nibbānadhātuyā tathalakkhanassa ca upanijjhāyanato. Tenevāha "ettha hī"ti-ādi. Niccādivipallāsappahānena maggo asammohato aniccādilakkhanāni upanijjhāyatīti lakkhanūpanijihānanti āha "vipassanāya upanijihāyanakiccan"ti-ādi. Tathalakkhananti avināsadhammassa nibbānassa anaññathābhāvato aviparītasabhāvo tathalakkhanam, maggassapi vā nibbānārammanato tathalakkhanūpanijjhānatā yojetabbā.

Visadisodāharaṇaṁ tāva dassento āha "yathā sadhano"ti-ādi. Añño apadesāraho hotīti dhanato parijanato ca añño dhanavā parijanavā ca puriso saha dhanena vattati parijanena cāti sadhano saparijanoti apadesaṁ arahatīti apadesāraho

^{1.} Jakāro (Sī)

^{2.} Arisajoti (Sī)

hoti, apadisitabbo hotīti vuttam hoti. Senangesu eva senāsammutīti rathādisenangavinimuttāya senāya abhāvepi rathehi pattīhi ca saha vattanato sarathā sapatti senāti rathādisenangesuyeva senāvohāroti attho. Kasmā panettha jhānapāṭhe aggahitā cittekaggatā gahitāti anuyogam sandhāyāha "avuttattā"ti-ādi. Evam vuttāyevāti evam sarūpato vibhange vuttāyeva. Sacittekaggatanti idha avuttepīti "sacittekaggatan"ti evam sarūpato imasmim jhānapāṭhe avuttepīti attho, sāmaññato pana jhānaggahaṇena gahitā eva. Tenevāha "yena hī"ti-ādi. Idam vuttam hoti—yena vitakkādīhi saha vattabbam, tam dhammam dīpetum tassa pakāsanādhippāyena "savitakkam savicāran"ti-ādinā uddeso kato, so eva adhippāyo tena bhagavatā vibhange¹ "cittassekaggatā"ti niddisantena pakāsito, tasmā sā jhānapāṭhe aggahitāti na cintetabbanti.

Upasampajjāti ettha upa-sam-saddā "upalabbhatī"ti-ādīsu viya niratthakāti dassetum "upagantvā"ti-ādim vatvā puna tesam sātthakabhāvam dassetum "upasampādayitvā"ti-ādi vuttam, tasmā upasampajjāti ettha patvā sādhetvāti vā attho. Iriyanti kiriyam. Vuttinti-ādīni tasseva vevacanāni. Ekam iriyāpathabādhanam iriyāpathantarehi rakkhaṇam pālanam. Sabbabuddhānam āciṇṇattā ānāpānassatikammaṭṭhānameva vuttam. Tañhi sabbabuddhānam āciṇṇanti vadanti.

 $Pa \rlap{.}tha majjh \bar{a} nakath \bar{a} \ ni \rlap{.}t\rlap{.}thit \bar{a}.$

Dutiyajjhānakathā

Vūpasamāti vūpasamahetu. Vūpasamoti cettha pahānam adhippetam, tanca vitakkavicārānam atikkamo atthato dutiyajjhānakkhane anuppādoti āha "samatikkamā"ti-ādi. Katamesam panettha vitakkavicārānam vūpasamo adhippeto, kim paṭhamajjhānikānam, udāhu dutiyajjhānikānanti, kincettha—yadi paṭhamajjhānikānam, natthi tesam vūpasamo. Na hi kadāci

pathamajjhānam vitakkavicārarahitam atthi. Atha dutiyajjhānikānam, evampi nattheva vūpasamo sabbena sabbam tesam tattha abhāvatoti imam anuyogam sandhāyāha "tattha kiñcāpī"ti-ādi. Yasmā ditthādīnavassa tamtamijhānakkhane anuppattidhammatāpādanam vūpasamanam adhippetam, vitakkādayo eva ca jhānangabhūtā tathā karīyanti, na tam sampayuttā phassādayo, tasmā vitakkādīnamyeva vūpasamādhivacanam jhāne āgatam¹. Yasmā pana vitakkādīnam viya tamsampayuttadhammānampi "etena etam olārikan"ti ādīnavadassanam sutte āgatam, tasmā avisesena vitakkādīnam tamsahagatānañca vūpasamādike vattabbe vitakkādīnamyeva vūpasamo vuccamāno adhikavacanam aññamattham bodhetīti katvā kañci visesam dīpetīti dassento "olārikassa panā"ti-ādimāha. Ayañhettha adhippāyo—yehi vitakkavicārehi pathamajjhānassa olārikatā, tesam samatikkamā dutiyajjhānassa samadhigamo, na sabhāvato anolārikānam phassādīnam samatikkamāti ayamattho "vitakkavicārānam vūpasamā"ti etena dīpito, tasmā "kim pathamajjhānikānam vitakkavicārānam vūpasamo idhādhippeto, udāhu dutiyajjhānikānan"ti edisī codanā anokāsāva. "Pītiyā ca virāgā"tiādīsupi eseva nayo. Tasmā vitakkavicārapītisukhasamatikkamavacanāni olārikolārikangasamatikkamā dutiyādi-adhigamadīpakānīti tesam ekadesabhūtam vitakkavicārasamatikkamavacanam avayavena samudāyopalakkhaņanayena tam dīpakam vuttam. Visum visum thitepi hi vitakkavicārasamatikkamavacanādike paheyyanganiddesatāsāmaññena cittena samūhato gahite vitakkavicāravūpasamavacanassa tadekadesatā hotīti. Atha vā vitakkavicāravūpasamavacaneneva tamsamatikkamā dutiyādi-adhigamadīpakena pītivirāgādivacanānam pīti-ādisamatikkamā tatiyādi-adhigamadīpakatā dīpitā hotīti tassa tamdīpakatā vuttā. Evañhi avayavena samudāyopalakkhanam vinā vitakkavicāravūpasamavacanena pītivirāgādivacanānam savisaye samānabyāpāratā dassitā hoti.

Ajjhattanti niyakajjhattam adhippetam, na ajjhattajjhattādīti dassento āha "ajjhattanti niyakajjhattam adhippetan"ti. Tattha kāraṇamāha

^{1.} Ñayāgatam (Visuddhimaggatīkāyam pathavīkasiņaniddesavannanāyam)

"vibhange pana"ti-ādi. Pana-saddopi apisaddattho, vibhangepīti attho. Ayameva vā pātho.

Nīlavaṇṇayogato nīlavatthaṁ viyāti nīlayogato vatthaṁ nīlaṁ viyāti adhippāyo. Imasmiñca atthavikappeti "ceto¹ sampasādayatī"ti etasmiṁ pakkhe. Cetasoti ca upayogatthe sāmivacanaṁ. Purimasminti "sampasādanayogato jhānampi sampasādanan"ti vuttapakkhe. Cetasoti sambandhe sāmivacanaṁ. "Yāva na pare ekagate² karomī"ti-ādīsu seṭṭhavacanopi ekasaddo loke dissatīti āha "seṭṭhopi hi loke ekoti vuccatī"ti. "Ekākīhi³ khuddakehi jitan"ti-ādīsu asahāyatthopi ekasaddo diṭṭhoti āha "eko asahāyo hutvā"ti. Saddhādayopi kāmaṁ sampayuttadhammānaṁ sādhāraṇato ca asādhāraṇato ca paccayā hontiyeva, samādhi pana jhānakkhaṇe sampayuttadhammānaṁ avikkhepalakkhaṇe indaṭṭhakaraṇena sātisayaṁ paccayo hotīti dassento "sampayuttadhamme -pa- adhivacanan"ti āha.

"Sampasādanam cetaso ekodibhāvan"ti visesanadvayam jhānassa atisayavacanicchāvasena gahitam. Svāyamatisayo yathā imasmim jhāne labbhati, na tathā paṭhamajjhāneti imam visesam dassetum "nanu cā"ti-ādi vuttam. Ārammaņe āhananapariyāhananavasena anumajjana-anuyujjanavasena ca pavattamānā dhammā satipi nīvaraṇappahānena kilesakālussiyāpagame sampayuttānam kiñci khobham karontā viya tehi ca te na sannisinnā hontīti vuttam "vitakkavicārakkhobhena -pa- na suppasannan"ti. Tattha khuddikā ūmiyo vīciyo, mahatiyo taraṅgā. Samādhipi na suṭṭhu pākaṭoti satipi indriyasamatthe vīriyasamatāya ca teneva khotena sampasādābhāvena ca bahale viya jale maccho samādhipi na suṭṭhu pākaṭo. Vitakkavicārapalibodhābhāvenāti ettha yathāvuttakhobho eva palibodho. Evam vuttenāti yassā saddhāya vasena sampasādanam, yassā ca cittekaggatāya vasena ekodibhāvanti ca jhānam vuttam, tāsam eva "saddahanā"ti-ādinā⁴ pavatti-ākāravisesavibhāvanavasena vuttena tena vibhaṅgapāṭhena. Ayam atthavaṇṇanāti "sampasādanayogato,

^{1.} Cetaso (Ka)

^{2.} Ekāhante (Visuddhimaggatīkāyam pathavīkasiṇaniddesavaṇṇanāyam)

^{3.} Ekakāhi (Ka) 4. Abhi 2. 268 pitthe.

sampasādanato vā sampasādanam. Ekodim bhāvetīti ekodibhāvanti jhānam vuttan"ti evam pavattā ayam atthavannanā. **Aññadatthu samsandati ceva** sameti ca, evam veditabbāti katham panāyam atthavannanā tena vibhangapāthena saddhim samsandati sameti, nanu jhānavibhange "sampasādanan"ti padam uddharitvā "yā saddhā saddahanā"ti-ādinā¹ saddhāyeva vuttā, "cetaso ekodibhāvan"ti ca padam uddharitvā "yā cittassa thiti santhiti avatthitī"ti-ādinā¹ samādhisseva niddeso kato, atthakathāyam pana "sampasādanam ekodibhāvan"ti jhānameva vuttanti atthakathāya vibhangapāthena saddhim virodho āpajjatīti? Nāpajjati vibhangepi imināva adhippāyena niddesassa katattā. Tathā hi yena sampasādanena yogā jhānam "sampasādanan"ti vuccati, tasmim "yā saddhā saddahanā"ti-ādinā dassite sampasādanam jhānanti samānādhikarananiddeseneva tamyogā jhāne tamsaddappavatti dassitā hoti. "Ekodibhāvan"ti ca padam uddharitvā ekodimhi dassite ekodibhāvam jhānanti samānādhikarananiddeseneva jhānassa ekodivaddhanatā vuttāva hotīti iminā adhippāyena byañjanavicāram akatvā dhammamattameva nidditthanti avirodho yutto.

Yam pana vuttam tīkākārehi ācariyadhammapālattherādīhi "yadi ekodīti samādhissa gahaṇam adhippetam, tadā 'ekodibhāvan'ti padam uddharitvā samādhissa niddeso na kattabbo siyā. Tasmā ekodibhāvasaddo eva samādhimhi pavatto sampasādana-saddo viya jhāne pavattatīti yuttan"ti, tam aṭṭhakathāya virujjhati. Tasmā so aṭṭhakathānirapekkho visumyeveko atthavikappoti gahetabbam. Ayañhi nesam adhippāyo—vitakkavicārehi anajjhāruļhattā ekam udetīti ekodīti tathāvidhasamādhiyuttam jhānacittameva gahetvā ekodissa bhāvo ekodibhāvoti samādhissa gahaṇam sakkā vattunti. Yo panāyam tesamabhiniveso "ekodīti samādhissa gahaṇe sati 'ekodibhāvan'ti padam uddharitvā samādhissa niddeso na kattabbo siyā"ti, so anekantikattā ayutto. Aññatthapi hi byañjanavicāram akatvā atthamattasseva bāhullena vibhaṅge niddeso dissati.

Santāti samam nirodham gatā. Samitāti bhāvanāya samam gamitā nirodhitā. Vūpasantāti tato eva suṭṭhu upasantā. Atthaṅgatāti atthaṁ vināsaṁ gatā. Abbhatthaṅgatāti upasaggena padaṁ vaḍḍhetvā vuttaṁ. Appitāti gamitā vināsaṁ gatā. Sositāti pavattisaṅkhātassa santānassa abhāvena sosaṁ sukkhabhāvaṁ gatā. Byantīkatāti vigatantā katā.

Ayamatthoti bhāvanāya pahīnattā vitakkavicārānam abhāvasankhāto attho. Codakena vuttamattham sampaticchityā pariharitum "evametam" siddhovāyamattho"ti vatvā "na panetan"ti-ādi vuttam. Tattha etanti "vitakkavicārānam vūpasamā"ti etam vacanam. **Tadatthadīpakan**ti tassa vitakkavicārābhāvamattasankhātassa atthassa dīpakam. Na kilesakālussiyassāti upacārakkhane viya nīvaranasankhātassa kilesasankhobhassa vupasama na sampasadananti attho. Nanu ca "purimam vatvāpi vattabbamevā"ti idam kasmā vuttam. Tathā hi dutiyajjhānādiadhigamūpāyadīpakena ajjhattam sampasādanatāya cetaso ekodibhāvatāya ca hetudīpakena avitakka-avicārabhāvahetudīpakena ca vitakkavicāravūpasamavacaneneva vitakkavicārābhāvo dīpitoti, kim puna avitakka-avicāravacanena katenāti? Na, adīpitattā. Na hi vitakkavicāravūpasamavacanena vitakkavicārānam appavatti vuttā hoti. Vitakkavicāresu hi tanhāppahānam etesam vūpasamanam. Olārikangamukhena hi tamtamihānanikantiyā vikkhambhanam vitakkavicāravūpasamavacanādīhi pakāsitam. Yato vitakkavicāresu virattabhāvadīpakam vitakkavicāravūpasamavacanam, ye ca sankhāresu tanhāppahānam karonti, tesu maggesu pahīnatanhesu ca phalesu sankhārappavatti hoti, evamidhāpi vikkhambhitavitakkavicāratanhassa dutiyajjhānassa vitakkavicārasampayogo purimena na nivārito siyāti tannivāranattham āvajjitukāmatādi-atikkamo ca tesam vūpasamoti dassanatthañca "avitakkam avicāran"ti vuttam. Pathamajjhānam dutiyajjhānassa upanissayapaccayena paccayo hotīti āha "pathamajjhānasamādhito"ti. Pathamampīti pathamajjhānampi.

Gaṇanānupubbatoti-ādi heṭṭhā vuttanayeneva veditabbam. Etthāpi "dutiyam uppannantipi dutiyan"ti vattum vaṭṭatiyeva. Vuttamevattham vibhangapāṭhena sādhento āha "yathāhā"ti-ādi. Yam pana vibhange¹ "jhānanti

sampasādo pīti sukham cittassekaggatā"ti vuttam, tam saparikkhāram jhānam dassetum pariyāyena vuttam. Rathassa paṇḍukambalam viya hi sampasādo jhānassa parikkhāro, na jhānanganti āha "pariyāyoyeva ceso"ti. Nippariyāyato pana upanijjhānalakkhaṇappattānam aṅgānam vasena tivaṅgikamevetam hotīti āha "sampasādanam pana ṭhapetvā"ti-ādi.

Dutiyajjhānakathā niṭṭhitā.

Tatiyajjhānakathā

Virajjanam virādo. Tam pana virajjanam nibbindanamukhena hīļanam vā tappaṭibaddharāgappahānam vāti dassetum "tassā pītiyā jigucchanam vā samatikkamo vā"ti vuttam. Ubhinnamantarāti pītiyā virāgāti imesam dvinnam padānam antarā, majjheti attho. Sampiṇḍanam samuccayo. Maggoti upāyo. Dutiyajjhānassa hi paṭilābham vinā tatiyajjhānassa adhigamo na hotīti vitakkavicārānam vūpasamo tatiyajjhānādhigamassa upāyo. Tadadhigamāyāti tatiyamaggādhigamāya.

Upapattitoti samavāhitabhāvena patirūpato jhānupekkhāpi samavāhitameva antonītam katvā pavattatīti āha "samam passatī"ti. Visadāyāti samkilesavigamena paribyattāya. Vipulāyāti sātisayam mahaggatabhāvappattito mahatiyā. Thāmagatāyāti pītivigamena thirabhāvappattāya. Nanu cettha upekkhāvedanāva na sambhavati, tasmā kathamayam tatiyajjhānasamangī upekkhāya samannāgatattā "upekkhako"ti vuccatīti ce? Na kevalam vedanupekkhāva upekkhāti vuccati, atha kho aññāpi upekkhā vijjantīti dassento āha "upekkhā pana dasavidhā hotī"ti-ādi. Tattha¹ "idha bhikkhave² bhikkhu cakkhunā rūpam disvā neva sumano hoti na dummano, upekkhako viharati sato sampajāno"ti³ evamāgatā khīṇāsavassa chasu dvāresu iṭṭhāniṭṭhachaļārammaṇāpāthe parisuddhapakatibhāvāvijahanākārabhūtā upekkhā chaļaṅgupekkhā nāma.

^{1.} Abhi-Ṭṭha 1. 216; Visuddhi 1. 155 piṭṭhādīsupi passitabbam.

^{2.} Khīnāsavo (sabbattha)

^{3.} Am 2. 247 pitthe.

Yā pana "upekkhāsahagatena cetasā ekam disam pharitvā viharatī"ti¹ evamāgatā sattesu majjhattākārabhūtā upekkhā, ayam **brahmavihārupekkhā** nāma.

Yā "upekkhāsambojjhaṅgaṁ bhāveti vivekanissitan"ti² evamāgatā sahajātadhammānaṁ majjhattākārabhūtā upekkhā, ayaṁ **bojjhaṅgupekkhā** nāma.

Yā pana "kālena kālaṁ upekkhānimittaṁ manasi karotī"ti³ evamāgatā anaccāraddhanātisithilavīriyasaṅkhātā upekkhā, ayaṁ **vīriyupekkhā** nāma.

Yā—

"Kati saṅkhārupekkhā samathavasena uppajjanti, kati saṅkhārupekkhā vipassanāvasena uppajjanti? Aṭṭha saṅkhārupekkhā samathavasena uppajjanti, dasa saṅkhārupekkhā vipassanāvasena uppajjanti.

Katamā attha saṅkhārupekkhā samathavasena uppajjanti? Pathamajjhānapatilābhatthāya nīvarane patisankhā santitthanā paññā sankhārupekkhāsu ñānam, dutiyajjhānapatilābhatthāya vitakkavicāre patisankhā santitthanā pannā sankhārupekkhāsu nānam, tatiyajjhānapatilābhatthāya pītim patisankhā santitthanā pannā sankhārupekkhāsu nānam, catutthajjhānapatilābhatthāya sukhadukkhe patisankhā santitthanā pannā sankhārupekkhāsu nānam, ākāsānañcāyatanasamāpattipatilābhatthāya rūpasaññam patighasaññam nānattasaññam patisankhā santitthanā paññā sankhārupekkhāsu ñānam, viññānañcāyatanasamāpattipatilābhatthāya ākāsānañcāyatanasaññam patisankhā santitthanā pannā sankhārupekkhāsu nānam, ākiñcaññāyatanasamāpattipatilābhatthāya viññānañcāyatanasaññam patisankhā santitthanā pannā sankhārupekkhāsu nānam, nevasaññanasaññayatanasamapattipatilabhatthaya ākiñcaññāyatanasaññam paṭisaṅkhā santiṭṭhanā paññā saṅkhārupekkhāsu ñāṇam, imā attha sankhārupekkhā samathavasena uppajjanti.

Katamā dasa saṅkhārupekkhā vipassanāvasena uppajjanti? Sotāpattimaggapatilābhatthāya uppādam pavattam nimittam āyūhanam patisandhim gatim nibbattim upapattim jatim jaram byadhim maranam sokam paridevam upāyāsam patisankhā santitthanā paññā sankhārupekkhāsu ñānam, sotāpattiphalasamāpattatthāya uppādam pavattam nimittam ayuhanam patisandhim patisankha santitthana pañña sankhārupekkhāsu nānam, sakadāgāmimaggapatilābhatthāya -pasakadāgāmiphalasamāpattatthāya -pa- anāgāmimaggapatilābhatthāya -pa- anāgāmiphalasamāpattatthāya -pa- arahattamaggapatilābhatthāya uppādam pavattam nimittam āvūhanam patisandhim gatim nibbattim upapattim jātim jaram byādhim maranam sokam paridevam upāyāsam patisankhā santitthanā paññā sankhārupekkhāsu ñānam, arahattaphalasamāpattatthāya -pa- suññatavihārasamāpattatthāya -paanimittavihārasamāpattatthāya uppādam pavattam nimittam āyūhanam patisandhim patisankhā sanitthanā paññā sankhārupekkhāsu ñānam, imā dasa sankhārupekkhā vipassanāvasena uppajjantī"ti¹—

evamāgatā nīvaraņādipaṭisaṅkhāsantiṭṭhanākārabhūtā upekkhā, ayaṁ saṅkhārupekkhā nāma.

Tattha² nīvaraņe paṭisaṅkhāti pañca nīvaraṇāni pahātabbabhāvena paṭisaṅkhāya, pariggahetvāti attho. Santiṭṭhanāti nīvaraṇānaṁ pahānābhimukhībhūtattā tesaṁ pahānepi abyāpārabhāvūpagamanena majjhattatāya santiṭṭhanā. Saṅkhārupekkhāsūti nīvaraṇappahāne byāpārākaraṇena nīvaraṇasaṅkhātānaṁ saṅkhārānaṁ upekkhanāsūti attho. Esa nayo vitakkavicārādīsu uppādādīsu ca. Tattha uppādanti purimakammapaccayā khandhānaṁ idha uppattimāha. Pavattanti tathā-uppannassa pavattiṁ. Nimittanti sabbampi tebhūmakaṁ saṅkhāragataṁ nimittabhāvena upaṭṭhānato. Āyūhananti āyatiṁ paṭisandhihetubhūtaṁ kammaṁ. Paṭisandhinti āyatiṁ upapattiṁ. Gatinti yāya gatiyā sā paṭisandhi hoti. Nibbattinti khandhānaṁ nibbattanaṁ. Upapattinti vipākappavattiṁ. Jātinti jarādīnaṁ paccayabhūtaṁ bhavapaccayā jātiṁ. Jarāmaraṇādayo pākaṭā eva.

^{1.} Khu 9. 62 pitthe Patisambhidāmagge.

^{2.} Paţisam-Ţtha 1. 251 piţthādīsupi passitabbam.

Ettha ca uppādādayo pañceva saṅkhārupekkhāñāṇassa visayavasena vuttā, sesā tesaṁ vevacanavasena. Nibbatti jātīti idañhi dvayaṁ uppādassa ceva paṭisandhiyā ca vevacanaṁ. Gati upapatti cāti idaṁ dvayaṁ pavattassa, jarādayo nimittassāti veditabbaṁ. Nanu cettha catūsu maggavāresu "uppādan"ti-ādīni pañca mūlapadāni, "gatī"ti-ādīni dasa vevacanapadānīti pannarasa padāni vuttāni, chasu pana phalasamāpattivāresu pañca mūlapadāneva vuttāni, taṁ kasmāti ce? Saṅkhārupekkhāya tikkhabhāve sati kilesappahānasamatthassa maggassa sabbhāvato tassā tikkhabhāvadassanatthaṁ vevacanapadehi saha daṭhaṁ katvā mūlapadāni vuttāni, phalassa nirussāhabhāvena santasabhāvattā maggāyattattā ca mandabhūtāpi saṅkhārupekkhā phalassa paccayo hotīti dassanatthaṁ mūlapadāneva vuttānīti veditabbāni.

Tattha "sotāpattimaggapaṭilābhatthāyā"ti-ādīsu catūsu maggavāresu suññatānimittappaṇihitamaggānam aññataro vutto.

"Sotāpattiphalasamāpattatthāyā" ti-ādīsu catūsu phalavāresu pana appaṇihitaphalasamāpatti veditabbā. Kasmā? Suñňatavihārasamāpattatthāya animittavihārasamāpattatthāyāti itarāsam dvinnam phalasamāpattīnam visum vuttattā. Aniccānupassanāvuṭṭhānavasena hi animittamaggo, tatheva phalasamāpattikāle animittaphalasamāpatti, dukkhānupassanāvuṭṭhānavasena appaṇihitamaggaphalasamāpattiyo, anattānupassanāvuṭṭhānavasena suñňatamaggaphalasamāpattiyo suttantanayena veditabbā. Evañca katvā suñňatādivimokkhavasena magguppattihetubhūtā catasso, tathā appaṇihitaphalasamāpattiyā catasso, suñňatavihāra-animittavihāravasena dveti dasa saṅkhārupekkhāvipassanāpaññā vuttā, samathasaṅkhārupekkhā pana appanāvīthiyā āsannapubbabhāge balappattam bhāvanāmayañāṇam.

Yā pana "yasmim samaye kāmāvacaram kusalam cittam uppannam hoti upekkhāsahagatan"ti¹ evamāgatā adukkhamasukhasaññitā upekkhā, ayam **vedanupekkhā** nāma.

Yā "yadatthi yam bhūtam, tam pajahati, upekkham paṭilabhatī"ti² evamāgatā vicinane majjhattabhūtā upekkhā, ayam **vipassanupekkhā** nāma.

Tattha yadatthi yaṁ bhūtanti khandhapañcakaṁ, taṁ muñcitukamyatāñāṇena pajahati. Upekkhaṁ paṭilabhatīti diṭṭhasovattikattayassa¹ sappassa lakkhaṇavicinane viya diṭṭhalakkhaṇattayassa khandhapañcakassa saṅkhāralakkhaṇavicinane upekkhaṁ paṭilabhatīti attho.

Yā pana chandādīsu yevāpanakesu āgatā sahajātānam samappavattihetubhūtā upekkhā, ayam **tatramajjhattupekkhā** nāma.

Yā "upekkhako ca viharatī"ti² evamāgatā aggasukhepi tasmim apakkhapātajananī upekkhā, ayam **jhānupekkhā** nāma.

Yā pana "upekkhāsatipārisuddhim catuttham jhānan"ti² evamāgatā sabbapaccanīkaparisuddhā paccanīkavūpasamanepi abyāpārabhūtā upekkhā, ayam **pārisuddhupekkhā** nāma.

Tattha chalangupekkhā ca brahmavihārupekkhā ca bojjhangupekkhā ca

tatramajjhattupekkhā ca jhānupekkhā ca pārisuddhupekkhā ca atthato ekā tatramajjhattupekkhāva hoti. Tena tena avatthābhedena panassā ayam bhedo ekassapi sato sattassa kumārayuvatherasenāpatirājādivasena bhedo viya. Tasmā tāsu yattha chalangupekkhā, na tattha bojjhangupekkhādayo. Yattha vā pana bojjhangupekkhā, na tattha chalangupekkhādyo hontīti veditabbā. Yathā cetāsam atthato ekībhāvo, evam sankhārupekkhāvipassanupekkhānampi. Paññā eva hi sā kiccavasena dvidhā bhinnā. Yathā hi purisassa sāyam geham pavittham sappam ajapadadandam gahetvā pariyesamānassa tam thusakotthake nipannam disvā "sappo nu kho, no"ti avalokentassa sovattikattayam disvā nibbematikassa "sappo, na sappo"ti vicinane majjhattatā hoti, evameva yā āraddhavipassakassa vipassanāñānena lakkhanattaye ditthe sankhārānam aniccabhāvādivicinane majjhattatā uppajjati, ayam vipassanupekkhā. Yathā pana tassa purisassa ajapadena dandena gālham sappam gahetvā "kintāham imam sappam avihethento attānañca iminā adamsāpento muñceyyan"ti muñcanākārameva pariyesato gahane majjhattatā hoti, evameva yā lakkhanattayassa ditthattā āditte viya tayo bhave passato

sankhāraggahaņe majjhattatā, ayam sankhārupekkhā. Iti vipassanupekkhāya siddhāya sankhārupekkhāpi siddhāva hoti. Iminā panesā vicinanagahaņesu majjhattasankhātena kiccena dvidhā bhinnā. Vīriyupekkhā pana vedanupekkhā ca annāmannānānca avasesāhi ca atthato bhinnā evāti.

Imāsam pana dasannampi upekkhānam bhūmipuggalādivasena vibhāgo tattha tattha vuttanayeneva veditabboti dassento āha "evamayam dasavidhāpī"ti-ādi. Tattha bhūmipuggalacittārammanatoti "chalangupekkhā kāmāvacarā, brahmavihārupekkhā rūpāvacarā"ti evamādinā **bhūmito**. "Chalangupekkhā khīnāsavasseva, brahmavihārupekkhā tinnampi puthujjanasekkhāsekkhānan"ti evamādinā puggalato, "Chalangupekkhā somanassupekkhāsahagatacittasampayuttā"ti-ādinā cittato. "Chalangupekkhā chalārammanā, brahmavihārupekkhā dhammārammanā"ti-ādinā ārammanato. Khandhasangaha-ekakkhanakusalattikasankhepavasenāti "vedanupekkhā vedanākkhandhena saṅgahitā, itarā nava sankhārakkhandhenā"ti khandhasangahavasena. Chalangupekkhā brahmavihārabojjhangajhānapārisuddhitatramajjhattupekkhā ca atthato ekā, tasmā ekakkhane tāsu ekāya sati na itarā, tathā sankhārupekkhāvipassanupekkhāpi veditabbā, vedanāvīriyupekkhānam ekakkhane siyā uppattīti evam ekakkhanavasena. Chalangupekkhā abyākatā, brahmaviharupekkhā kusalābyākatā, tathā sesā, vedanupekkhā pana siyā akusalāpīti evam kusalattikavasena. Dasapetā sankhepato cattārova dhammā vīriyavedanātatramajjhattatāñāņavasenāti evam sankhepavasena.

Idāni idhādhippetāya jhānupekkhāya lakkhaṇādiṁ niddhāretvā dassento āha "lakkhaṇādito panā"ti-ādi. Tattha anābhogarasāti paṇītasukhepi tasmiṁ avanatipaṭipakkhakiccāti¹ attho. Abyāpārapaccupaṭṭhānāti satipi sukhapāramippattiyaṁ tasmiṁ sukhe abyāvaṭā hutvā paccupatiṭṭhati, sampayuttānaṁ vā tattha abyāpāraṁ paccupaṭṭhapetīti attho. Sampayuttadhammānaṁ khobhaṁ uppilavañca āvahantehi vitakkādīhi abhibhūtattā aparibyattaṁ tattha tatramajjhattatāya kiccaṁ, tadabhāvato idha paribyattanti āha "aparibyattakiccato"ti. Tenevāha "aparibyattaṁ hī"ti-ādi.

Idāni sato ca sampajānoti ettha "vuccatī"ti ajjhāharitabbam. Saratīti iminā "sato"ti padassa kattusādhanatamāha. Sampajānātīti sammadeva pajānāti. Puggalenāti puggalādhitthānena. Saranam cintanam upatthānam lakkhanametissāti saranalakkhanā. Sammussanapatipakkho asammussanam kiccam etissati asammussanarasa. Kilesehi arakkha hutva paccupatitthati, tato vā ārakkham paccupatthapetīti **ārakkhapaccupatthānā**. Asammuyhanam sammadeva pajānanam, sammohapatipakkho vā asammoho lakkhanametassāti asammohalakkhanam. Tīranam kiccassa pāragamanam. Pavicayo vīmamsā. Kāmam upacārajjhānādim upādāya pathamadutiyajjhānānipi sukhumāneva, imam pana uparimajjhānam upādāya "olārikattā pana tesam ihānānan"ti vuttam, sā ca olārikatā vitakkādithūlangatāya veditabbā. Keci "bahucetasikatāyā"ti ca vadanti. Bhūmiyam viya purisassāti purisassa bhūmiyam gati viyāti vuttam hoti. Gati sukhā hotīti tesu jhānesu gati sukhā hoti. Abyattam tattha satisampajaññakiccanti "idam nāma dukkaram karīyatī"ti vattabbassa abhāvato vuttam. Olārikangappahānena pana sukhumattāti ayamattho kāmam dutiyajjhānepi sambhavati, tathāpi yebhuyyena avippayogībhāvena vattamānesu pītisukhesu pītisankhātassa olārikangassa pahānena sukhumatāya idha sātisayo satipaññābyāpāroti vuttam "purisassā"ti-ādi. Dhenum pivatīti **dhenupago**¹, dhenuyā khīram pivantoti vuttam hoti. Punadeva pītim upagaccheyyāti hānabhāgiyam jhānam siyā, dutiyajjhānameva sampajjeyyāti attho. Tenāha "pītisampayuttameva siyā"ti. Idañca atimadhuram sukhanti tatiyajjhāne sukham sandhāyāha, atimadhuratā cassa pahāsodagyasabhāvāya pītiyā abhāveneva veditabbā. Idanti "sato sampajāno"ti padadvayam.

Sukhañca kāyena paṭisaṁvedesinti ettha kathamābhogena vinā sukhapaṭisaṁvedanāti āha "kiñcāpī"ti-ādi. Yasmā tassa nāmakāyena sampayuttaṁ sukhaṁ, tasmā etamatthaṁ dassento "sukhañca kāyena paṭisaṁvedesin"ti āhāti yojetabbaṁ. Ayaṁ panettha saṅkhepattho— "sukhaṁ vedayāmī"ti evamābhoge asatipi nāmakāyena cetasikasukhaṁ,

kāyikasukhaheturūpasamuṭṭhāpanena kāyikasukhañca jhānasamaṅgī paṭisaṁvedetīti vuccatīti. **Tassā**ti jhānasamaṅgino. **Yaṁ vā tan**ti yaṁ vā taṁ yathāvuttaṁ nāmakāyasampayuttaṁ sukhaṁ. **Taṁsamuṭṭhānenā**ti tato samuṭṭhitena atipaṇītena rūpena assa jhānasamaṅgino rūpakāyo yasmā phuṭo, tasmā etamatthaṁ dassentoti sambandhitabbaṁ. **Yassā**ti rūpakāyassa. **Phuṭattā**ti byāpitattāti attho. Yathā hi udakena phuṭṭhasarīrassa tādise phoṭṭhabbe phuṭṭhe sukhaṁ uppajjati, evaṁ etehi jhānacittasamuṭṭhitehi rūpehi phuṭṭhasarīrassa. **Jhānā vuṭṭhitopī**ti jhānamhā vuṭṭhitopi. **Sukhaṁ paṭisaṁvedeyyā**ti cittasamuṭṭhitarūpehi avasesatisamuṭṭhitarūpasaṅghaṭṭanena uppannakāyaviññāṇena kāyikaṁ sukhaṁ paṭisaṁvedeyya. **Etamatthan**ti vuttanayena cetasikakāyikasukhapaṭisaṁvedanasaṅkhātaṁ atthaṁ.

Yanti hetu-atthe nipāto, yasmāti attho. Tenāha "yaṁjhānahetū"ti. Ācikkhantīti-ādīni padāni kittanatthānīti adhippāyenāha "pasaṁsantīti adhippāyo"ti. Kintīti pasaṁsanākārapucchā. Sukhapāramippatteti sukhassa paramaṁ pariyantaṁ patte. Sukhābhisaṅgenāti sukhasmiṁ ālayena. Edisesu ṭhānesu satiggahaṇeneva sampajaññampi gahitaṁ hotīti idha pāḷiyaṁ satiyā eva gahitattā evaṁ upaṭṭhitassatitāya satimā icceva vuttaṁ, sampajānoti heṭṭhā vuttattā vā. Asaṁkiliṭṭhanti kilesehi asammissattā asaṁkiliṭṭhaṁ. Jhānakkhaṇe nippariyāyato cetasikasukhameva labbhatīti "sukhaṁ nāmakāyena paṭisaṁvedetī"ti vuttaṁ. Tatiyanti gaṇanānupubbato tatiyantiādi heṭṭhā vuttanayānusārena veditabbaṁ.

Tatiyajjhānakathā niṭṭhitā.

$Catutth ajjh \bar{a} nakath \bar{a}$

"Pubbevā"ti vuttattā "kadā pana nesam pahānam hotī"ti codanam samuṭṭhāpetvā āha "catunnam jhānānam upacārakkhaṇe"ti. Evam veditabbanti sambandho. Pahānakkamena avuttānanti ettha pahānakkamo nāma pahāyakadhammānam uppattipaṭipāṭi. Tena pana vuccamāne "dukkham domanassam sukham somanassan"ti vattabbam siyā, kasmā ito aññathā vacananti āha

"indriyavibhaṅge"ti-ādi. **Uddesakkamenā**ti "sukhindriyaṁ dukkhindriyaṁ somanassindriyaṁ domanassindriyan"ti evaṁ pavatta-uddesakkamena.

Atha kasmā jhānesveva nirodho vuttoti sambandho. **Kattha cuppannam** dukkhindriyanti attano paccayehi uppannam avikkhambhitam dukkhindriyam. Kattha ca aparisesam nirujihatīti nirodhatthānam nirodhakāranam pucchati. Tena katthāti pucchāya etthāti vissajjanepi hetumhi bhummavacanam datthabbam. Jhānānubhāvanimittañhi anuppajjantam dukkhindriyam aparisesam nirujjhatīti vuttam. Atisayanirodho sutthu pahānam ujupatipakkhena vūpasamo. Nirodho pahānamattam. **Nānāvajjane**ti yena āvajjanena appanāvīthi, tato bhinnāvajjane anekāvajjane vā. Appanāvīthiyañhi upacāro ekāvajjano, itaro anekāvajjano anekakkhattum pavattanato. Visamanisajjāya uppannakilamatho visamāsanupatāpo. Pītipharanenāti pītiyā pharanarasattā pītisamutthānānam vā panītarūpānam kāyassa byāpanato vuttam. Tenāha "sabbo kāyo sukhokkanto hotī"ti. Panītarūpaphutthasarīrassa sukhokkantakāyattā kuto dukkhuppatti visamāsanupatāpādināti āha "patipakkhena avihatattā"ti. Vitakkavicārapaccayepīti pi-saddo atthānappayutto, so "pahīnassā"ti ettha ānetvā sambandhitabbo. Pahīnassapi domanassindriyassāti idañca "siyā uppattī"ti iminā sambandhitabbam. Etanti domanassindriyam. "Uppajjatī"ti iminā sambandho. "Tassa mayham aticiram vitakkayato vicārayato kāyopi kilami, cittampi ūhaññī''ti vacanato kāyacittakhedānam vitakkavicārapaccayatā veditabbā. Vitakkavicārabhāveti ettha "uppajjati domanassindriyan"ti ānetvā sambandhitabbam. **Tatthassa** siyā uppattīti tattha dutiyajjhānūpacāre assa pahīnassapi domanassindriyassa uppatti bhaveyya.

Ettha ca yadeke vadanti "tatthassa siyā uppattīti vadantena jhānalābhīnampi domanassuppatti atthīti dassitam hoti, tena ca anīvaraṇasabhāvo lobho viya dosopi atthīti dīpeti. Na hi dosena vinā domanassam pavattati, na cettha paṭṭhānapāḷiyā virodho cintetabbo. Yasmā tattha parihīnajjhānam ārammaṇam katvā pavattamānam domanassam dassitam, aparihīnajjhānam ārammaṇam katvā uppajjamānassa domanassassa asambhavato jhānalābhīnam sabbaso domanassam nuppajjatīti ca na

sakkā vattum atthasamāpattilābhino api tassa uppannattā, na heva kho so parihīnajjhāno ahosī"ti, tam ayuttam anīvaranasabhāvassa domanassassa abhāvato. Yadi siyā, rūpārūpāvacarasattānampi uppajjeyya, na ca uppajjati. Tathā hi āruppe kāmacchandanīvaranam paticca thinamiddhanīvaranam uddhaccanīvaranam avijjānīvarananti-ādīsu byāpādakukkuccanīvaranāni anuddhatāni, na cettha anīvaranatāpariyāyo kāmacchandādīnampi anīvaranānamyeva nīvaranasadisatāya nīvaranapariyāyassa vuttattā. Yam pana vuttam "atthasamāpattilābhino api tassa uppannattā"ti, tampi akāranam uppajjamānena ca domanassena jhānato parihāyanato. Lahukena pana paccayena parihīnam tādisā nam appakasireneva patipākatikam karontīti datthabbam. "Tatthassa siyā uppattī"ti idam pana parikappanavacanam upacārakkhane domanassassa appahīnabhāvadassanattham. Tathā hi vuttam "na tveva anto-appanāyan"ti. Yadi pana tadā domanassam uppajjeyya, pathamajihānampissa parihīnamevāti datthabbam. Pahīnampi somanassindriyam pīti viya na dūreti katvā "āsannattā" ti vuttam. Nānāvajjanūpacāre pahīnampi pahānangam patipakkhena avihatattā antarantarā uppajjeyya vāti imamattham dassento "appanāppattāvā" tiādimāha. Tādisāya āsevanāya icchitabbattā yathā maggavīthito pubbe dve tayo javanavārā sadisānupassanāva pavattanti, evamidhāpi appanāvārato pubbe dve tayo javanavārā upekkhāsahagatāva pavattantīti vadanti.

Samāharīti samānesi, saṅgahetvā abhāsīti attho. Sukhumāti sukhadukkhāni viya anoļārikattā avibhūtatāya sukhumā, tato eva anuminitabbasabhāvattā dubbiññeyyā. Duṭṭhassāti duṭṭhapayogassa, duddamassāti attho. Sakkā hoti esā gāhayitunti aññāpohananayena sakkā gāhayitunti adhippāyo. Adukkhamasukhāya cetovimuttiyāti idameva catuttham jhānam daṭṭhabbam. Paccayadassanatthanti adhigamassa upāyabhūtapaccayadassanattham. Tenāha "dukkhappahānādayo¹ hi tassā paccayā"ti. Dukkhappahānādayoti ca sopacārā paṭhamajjhānādayovettha adhippetā. Pahīnāti vuttāti "pañcannam orambhāgiyānam saṃyojanānam parikkhayā"ti² vuttattā. Etāti sukhādayo vedanā.

Sukham somanassassa paccayoti

vasanagandhālepanapupphābharaṇasamālepanādinibbattam kāyikasukham somanassassa paccayo. "Sukhāya kho āvuso visākha vedanāya rāgānusayo anusetī"ti¹ vacanato āha "somanassam rāgassa paccayo"ti. "Dukkhāya kho āvuso visākha vedanāya paṭighānusayo anusetī"ti¹ vacanato vuttam "domanassam dosassa paccayo"ti. Sukhādighātenāti sukhādīnam pahānena.

Adukkhamasukhanti ettha na dukkhanti adukkham, dukkhavidūram. Yasmā tattha dukkham natthi, tasmā vuttam "dukkhābhāvenā"ti. Asukhanti etthāpi eseva nayo. Etenāti dukkhasukhapatikkhepavacanena. Patipakkhabhūtanti idam idha tatiyavedanāya dukkhādīnam samatikkamavasena pattabbattā vuttam, na kusalākusalānam viya ujuvipaccanīkatāya. Itthānitthaviparītānubhavanalakkhanāti itthānitthaviparītassa majjhattārammanassa, itthānitthaviparītam vā majjhattakārena anubhavanalakkhanā. Tato eva majjhattarasā. Avibhūtapaccupatthānāti sukhadukkhāni viya na vibhūtākārā pitthipāsāne migagatamaggo viya tehi anumātabbāvibhūtākāropatthānā. Sukhanirodho nāma idha catutthajjhānūpacāro, so padatthānam etissāti sukhanirodhapadatthānā. Upekkhāsatipārisuddhinti purimapade uttarapadalopenetam samāsapadanti āha "upekkhāya janitasatipārisuddhin"ti. Sabbapaccanīkadhammaparisuddhāya paccanīkasamanepi abyāvatāya pārisuddhupekkhāya vattamānāya catutthajjhāne sati sampahamsanapaññā viya suparisuddhā suvisadā ca hotīti āha "satiyā pārisuddhi, sā upekkhāya katā na aññenā"ti. Yadi tatramajjhattatā idha "upekkhā" ti adhippetā, katham satiyeva pārisuddhāti vuttāti āha "na kevalan"ti-ādi. Satisīsenāti satim uttamangam katvā, padhānam katvāti vuttam hoti.

Evamapi kasmā idheva sati "upekkhāsatipārisuddhī"ti vuttāti anuyogam sandhāya "tattha kiñcāpī"ti-ādi vuttam. Tattha heṭṭhā tīsu jhānesu vijjamānāyapi tatramajjhattatāya paccanīkābhibhavanato sahāyapaccayavekallato ca apārisuddhi, tathā tamsampayuttānam tadabhāvato idha pārisuddhīti imamattham upamāvasena dassetum "yathā panā"ti-ādi vuttam. Sūriyappabhābhibhavāti sūriyappabhāya abhibhuyyamānattā. Atikkhatāya

candalekhā viya rattipi sommasabhāvā sabhāgāya rattiyameva ca candalekhā samujjalatīti sā tassā saṅgayhatīti dassento "sommabhāvena ca attano upakārakattena vā sabhāgāya rattiyā"ti āha. Sesamettha uttānatthameva.

Catutthajjhānakathā nitthitā.

Pubbenivāsakathā

12. Rūpavirāgabhāvanāvasena pavattam catubbidhampi arūpajjhānam catutthajjhānasangahamevāti āha "cattāri jhānānī"ti. Yuttam tāva cittekaggatā bhavokkamanatthatā viva vipassanāpādakatāpi catunnam jhānānam sādhāranāti tesam vasena "cattāri jhānānī"ti vacanam, abhiññāpādakatā pana nirodhapādakatā ca catutthasseva jhānassa āvenikā, sā katham catunnam jhanam sadharana vuttati? Paramparadhitthanabhavato. Padatthānapadatthānampi hi padatthānantveva vuccati, kāranakāranampi kārananti yathā "tinehi bhattam siddhan"ti. Evanca katvā payojananiddese atthasamāpattiggahanam samatthitam hoti. Cittekaggatatthānīti cittasamādhatthāni, ditthadhammasukhavihāratthānīti attho. Cittekaggatāsīsena hi ditthadhammasukhavihāro vutto, sukkhavipassakakhīnāsavavasena cetam vuttam. Tenāha "ekaggacittā sukham divasam viharissāmā"ti. Bhavokkamanatthānīti bhavesu nibbattiatthāni. Sattāhamnirodhasamāpattiyā samāpajjanato āha "sattāham acittakā hutvā"ti. Kasmā pana sattāhameva nirodham samāpajjantīti? Tathākālaparicchedakaranato, tañca yebhuyyena āhārūpajīvīnam sattānam upādinnakappavattassa ekadivasam bhuttāhārassa sattāhameva yāpanato.

Kā¹ panāyam nirodhasamāpatti nāma, ke tam samāpajjanti, ke na samāpajjanti, kattha samāpajjanti, kasmā samāpajjanti, kathañcassā samāpajjanam hotīti? Vuccate—tattha kā panā yam nirodhasamāpatti nāmāti yā anupubbanirodhavasena cittacetasikānam dhammānam appavatti. Ke tam

samāpajjanti, ke na samāpajjantīti sabbepi

puthujjanasotāpannasakadāgāmino sukkhavipassakā ca anāgāmi-arahanto na samāpajjanti, aṭṭhasamāpattilābhino pana anāgāmino khīṇāsavā ca samāpajjanti. Kattha samāpajjantīti pañcavokārabhave. Kasmā? Anupubbasamāpattisabbhāvato. Catuvokārabhave pana paṭhamajjhānādīnaṁ uppattiyeva natthi, tasmā na sakkā tattha samāpajjituṁ. Kasmā samāpajjantīti saṅkhārānaṁ pavattibhede ukkaṇṭhitvā "diṭṭhadhamme acittakā hutvā nirodhaṁ nibbānaṁ patvā sukhaṁ viharissāmā"ti. Kathañcassā samāpajjanaṁ hotīti samathavipassanāvasena ussakkitvā katapubbakiccassa nevasaññānāsaññāyatanaṁ nirodhayato evamassā samāpajjanaṁ hoti. Yo hi samathavaseneva ussakkati, so nevasaññānāsaññāyatanasamāpattiṁ patvā tiṭṭhati. Yopi¹ vipassanāvaseneva ussakkati, so phalasamāpattiṁ patvā tiṭṭhati. Yo pana ubhayavaseneva ussakkitvā nevasaññānāsaññāyatanaṁ nirodheti, so taṁ samāpajjatīti ayamettha saṅkhepo.

Ayam pana vitthāro—idha bhikkhu nirodham samāpajjitukāmo paṭhamajjhānam samāpajjitvā vuṭṭhāya tattha saṅkhāre aniccato dukkhato anattato vipassati. Vipassanā ca panesā tividhā saṅkhārapariggaṇhanakavipassanā phalasamāpattivipassanā nirodhasamāpattivipassanāti. Tattha saṅkhārapariggaṇhanakavipassanā mandā vā tikkhā vā maggassa padaṭṭhānam hotiyeva.

Phalasamāpattivipassanā tikkhāva vaṭṭati maggabhāvanāsadisā. Nirodhasamāpattivipassanā pana nātimandanātitikkhā vaṭṭati, tasmā esa nātimandāya nātitikkhāya vipassanāya te saṅkhāre vipassati. Tato dutiyajjhānaṁ -pa-. Tato viññāṇañcāyatanaṁ samāpajjitvā vuṭṭhāya tattha saṅkhāre tatheva vipassati. Atha ākiñcaññāyatanaṁ samāpajjitvā vuṭṭhāya catubbidhaṁ pubbakiccaṁ karoti nānābaddha-avikopanaṁ saṁghapatimānanaṁ satthupakkosanaṁ addhānaparicchedanti.

Tattha nānābaddhavikopananti yam iminā bhikkhunā saddhim ekābaddham na hoti, nānābaddham hutvā ṭhitam pattacīvaram vā mañcapīṭham vā nivāsageham vā aññam vā pana yam kiñci parikkhārajātam, tam yathā na vikuppati, aggi-udakavātacora-undūrādīnam vasena na vinassati, evam adhitthātabbam. Tatridam

adhiṭṭhānavidhānaṁ "idañcidañca imasmiṁ sattāhabbhantare mā agginā jhāyatu, mā udakena vuyhatu, mā vātena viddhaṁsatu, mā corehi harīyatu, mā undūrādīhi khajjatū"ti. Evaṁ adhiṭṭhite taṁ sattāhaṁ tassa na koci parissayo hoti, anadhiṭṭhahato pana aggi-ādīhi nassati, idaṁ nānābaddhavikopanaṁ nāma. Yaṁ pana ekābaddhaṁ hoti nivāsanapārupanaṁ vā nisinnāsanaṁ vā, tattha visuṁ adhiṭṭhānakiccaṁ natthi, samāpattiyeva naṁ rakkhati.

Saṁghapatimānananti bhikkhusaṁghassa patimānanaṁ udikkhanaṁ, yāva so bhikkhu āgacchati, tāva saṁghakammassa akaraṇanti attho. Ettha ca patimānanaṁ etassa na pubbakiccaṁ, patimānanāvajjanaṁ pana pubbakiccaṁ. Tasmā evaṁ āvajjitabbaṁ "sace mayi sattāhaṁ nirodhaṁ samāpajjitvā nisinne saṁgho apalokanakammādīsu kiñcideva kammaṁ kattukāmo hoti, yāva maṁ koci bhikkhu āgantvā na pakkosati, tāvadeva vuṭṭhahissāmī"ti. Evaṁ katvā samāpanno hi tasmiṁ samaye vuṭṭhahatiyeva. Yo pana evaṁ na karoti, saṁgho ce sannipatitvā taṁ apassanto "asuko bhikkhu kuhin"ti pucchitvā "nirodhaṁ samāpanno"ti vutte kañci bhikkhuṁ peseti "taṁ pakkosāhī"ti, athassa tena bhikkhunā savanūpacāre ṭhatvā "saṁgho taṁ āvuso patimānetī"ti vuttamatteyeva vuṭṭhānaṁ hoti. Evaṁ garukā hi saṁghassa āṇā nāma, tasmā taṁ āvajjitvā yathā paṭhamameva vuṭṭhāti, evaṁ samāpajjitabbaṁ.

Satthupakkosananti idhāpi satthupakkosanāvajjanameva imassa pubbakiccam, tasmā tampi evam āvajjitabbam. Sesam purimanayeneva veditabbam.

Addhānaparicchedoti jīvitaddhānassa paricchedo. Iminā bhikkhunā addhānaparicchedesu kusalena bhavitabbam, "attano āyusankhārā sattāham pavattissanti na pavattissantī"ti āvajjitvāva samāpajjitabbam. Sace hi sattāhabbhantare nirujjhanake āyusankhāre anāvajjitvāva samāpajjati, tassa nirodhasamāpatti maraṇam paṭibāhitum na sakkoti, antonirodhe maraṇassa natthitāya antarāva samāpattito vuṭṭhāti, tasmā etam āvajjitvāva samāpajjitabbam. Avasesanhi anāvajjitumpi vaṭṭati, idam pana āvajjitabbamevāti vuttam. So evam ākincannāyatanam samāpajjitvā vuṭṭhāya idam pubbakiccam katvā nevasannānāsannayatanam samāpajjati, athekam vā dve vā cittavāre atikkamitvā acittako hoti, nirodham

phusati. Kasmā panassa dvinnam cittānam upari cittāni na pavattantīti? Nirodhassa payogattā. Idañhi imassa bhikkhuno dve samathavipassanādhamme yuganaddhe¹ katvā atthasamāpatti-ārohanam anupubbanirodhassa payogo, na nevasaññānāsaññāyatanasamāpattiyāti nirodhassa payogattā dvinnam cittānam upari cittāni na pavattantīti.

Yasmā bodhisattena bodhimandupasankamanato pubbepi carimabhave catutthajjhānam nibbattitapubbam, tadā pana tam nibbattitamattameva ahosi, na vipassanādipādakam. Tasmā "bodhirukkhamūle nibbattitan"ti tato visesetvā vuttam. Vipassanāpādakanti vipassanārambhe vipassanāya pādakam. **Abhiññāpādakan**ti etthāpi eseva nayo. Buddhānañhi pathamārambhe eva pādakajjhānena payojanam ahosi, na tato param uparimaggādhigamaphalasamāpatti-abhiññāvalañjanādi-attham. Abhisambodhisamadhigamato patthāya hi sabbam ñānasamādhikiccam ākankhāmattapatibaddhamevāti. Sabbakiccasādhakanti anupubbavihārādisabbakiccasādhakam. Sabbalokiyalokuttaragunadāyakanti ettha vipassanābhiññāpādakattā eva catutthassa jhānassa bhagavato sabbalokiyalokuttaragunadāyakatā veditabbā. Sabbaññutaññāṇapadaṭṭhānañhi maggañāṇam tampadaṭṭhānañca

sabbaññutaññānam abhisambodhi, tadadhigamasamakālameva ca bhagavato sabbe buddhagunā hatthagatā ahesum, catutthajjhānasannissayo ca maggādhigamoti.

"Catuttham jhanam upasampajja vihasin"ti vatva "so"ti vuttatta aha "so ahan"ti. Evam samāhiteti ettha evam-saddo hetthā jhānattayādhigamapatipātisiddhassa catutthajjhānasamādhānassa nidassanatthoti āha "evanti catutthajihānakkamanidassanametan"ti. Catutthajjhānassa tassa ca adhigamamaggassa nidassanam, yena samādhānānukkamena catutthajjhānasamādhi laddho, tadubhayanidassananti attho. Tenāha "iminā -pa- vuttam hotī"ti. Tattha iminā kamenāti iminā pathamajjhānādhigamādinā kamena. Yadipi "evan"ti idam āgamanasamādhinā saddhim catutthajjhānasamādhānam dīpeti, satipārisuddhisamādhi eva pana iddhiyā adhitthānabhāvato padhānanti āha "catutthajihānasamādhinā samāhite"ti.

Sabbapaccanīkadhammupakkilesaparisuddhāya paccanīkasamanepi abyāvaṭāya pārisuddhupekkhāya

vattamānāya catutthajjhānam tamsampayuttā ca dhammā suparisuddhā suvisadā ca honti, satisīsena pana tattha desanā katāti āha "upekkhāsatipārisuddhibhāvena parisuddhe"ti, upekkhāya janitasatipārisuddhisambhavenāti attho. Parisuddhiyā eva paccayavisesena pavattiviseso pariyodātatā sudhantasuvaņņassa nighamsanena pabhassaratā viyāti āha "parisuddhattāyeva pariyodāte, pabhassareti vuttam hotī"ti.

Sukhādīnam paccayānam ghātenāti sukhasomanassānam dukkhadomanassānamca yathākkamam rāgadosapaccayānam vikkhambhanena. "Sukham somanassassa paccayo, somanassam rāgassa, dukkham domanassassa paccayo, domanassam dosassā"ti vuttam. Yathā rāgādayo cetaso malāsucibhāvena "aṅgaṇānī"ti vuccanti, evam upagantvā kilesanaṭṭhena upakkilesāti āha "anaṅgaṇattā eva ca vigatupakkilese"ti. Tenāha "aṅgaṇena hi cittam upakkilissatī"ti, vibādhīyati upatāpīyatīti attho. Subhāvitattāti paguṇabhāvāpādanena suṭṭhu bhāvitattā. Tenāha "vasībhāvappatte"ti, āvajjanādinā pañcadhā cuddasavidhena vā paridamanena vasam vattitum upagateti attho. Vase vattamānam hi cittam mudūti vuccatīti vase vattamānam cittam paguṇabhāvāpattiyā suparimadditam viya cammam suparikammakatā viya ca lākhā mudūti vuccati. Kammakkhameti vikubbanādi-iddhikammakkhame. Tadubhayanti mudutākammaniyadvayam.

Nāhanti-ādīsu¹ na-kāro paṭisedhattho. Ahanti satthā attānaṁ niddisati. Bhikkhaveti bhikkhū ālapati. Aññanti idāni vuccamānacittato aññaṁ. Ekadhammampīti ekampi sabhāvadhammaṁ. Na samanupassāmīti sambandho. Ayañhettha attho—ahaṁ bhikkhave sabbaññutaññāṇena olokentopi aññaṁ ekadhammampi na samanupassāmi, yaṁ vasībhāvāpādanena bhāvitaṁ tathā punappunaṁ karaṇena bahulīkataṁ evaṁ savisesamudubhāvappattiyā mudu kammakkhamatāya kammaniyañca hoti yathā idaṁ cittanti. Idaṁ cittanti ca attano tesañca paccakkhatāya evamāha.

Yathā yathāvuttā parisuddhatādayo na vigacchanti, evam subhāvitam cittam tattha avatthitam idha "thitam āneñjappattan"ti ca vuttanti āha "etesu

parisuddhabhāvādīsu thitattā thite, thitattāyeva āneñjappatte"ti. Yathā mudukammaññatā vasībhāvappattiyā lakkhīyati, evam vasībhāvappattipi mudukammaññatāhi lakkhīyatīti "mudukammaññabhāvena vā attano vase thitattā thite"ti vuttam. Yathā hi kāraņena phalam niddhārīyati, evam phalenapi kāraṇam niddhārīyatīti niccalabhāvena avaṭṭhānam āneñjappattiyā ca sampayuttadhammesu thirabhāvena paṭipakkhehi akammaniyatāya ca sambhavatam saddhādibalānam ānubhāvena hotīti āha "saddhādīhi pariggahitattā āneñjappatte"ti.

Idani sankhepato vuttamevattham vivaritum "saddhapariggahitam hī"tiādi vuttam. Tattha saddhāpariggahitanti evam subhāvitam vasībhāvappattam cittam ekamsena abhiññāsacchikaranīyānam dhammānam abhiññāsacchikiriyāya samvattatīti evam pavattāya saddhāya pariggahitam yathāvuttasaddhābalena upatthambhitam. **Assaddhiyenā**ti tappatipakkhena assaddhiyena hetunā. **Na iñjatī**ti na calati na kampati, aññadatthu uparivisesāvahabhāveneva titthati. Vīriyapariggahitanti-ādīsupi imināva nayena attho veditabbo. Ayam pana viseso—vīriyapariggahitanti vasībhāvāpādanaparidamanasādhanena vīriyena upatthambhitam. Satipariggahitanti yathāvutte bhāvanābahulīkāre asammosādikāya kusalānañca dhammānam gatiyo samanvesamānāya satiyā upatthambhitam. **Samādhipariggahitan**ti tattheva avikkhepasādhanena samādhānena upatthambhitam. **Paññāpariggahitan**ti tassā eva bhāvanāya upakārānupakāradhammānam pajānanalakkhanāya paññāya upatthambhitam. Obhāsagatanti ñānobhāsasahagatam. Obhāsabhūtena hi vathāvuttasamādhānasamvaddhitena ñānena samkilesapakkham vāthāvato passanto tato utrāsanto ottappanto tam abhibhavati, na tena abhibhuyyati. Tenāha "kilesandhakārena na iñjatī"ti. Etena ñānapariggahitam hirottappabalam dasseti. Atthangasamannagatanti catutthajjhanasamadhina samāhitatā parisuddhatā pariyodātatā ananganatā vigatupakkilesatā mudubhāvo kammaniyatā āneñjappattiyā thitatāti imehi atthahi angehi samannāgatam. Atha vā samāhitassa cittassa imāni angānīti "samāhite"ti imam angabhavena aggahetva thiti-anenjappattiyo visum gahetva yathāvuttehi atthahi angehi

samannāgatanti attho daṭṭhabbo. **Abhinīhārakkhaman**ti iddhividhādi-attham abhinīhārakkhamam tadabhimukhakaraṇayoggam. Tenāha "abhiññāsacchikaranīyānam dhammānam abhiññāsacchikiriyāyā"ti.

Kāmaṁ nīvaraṇāni vikkhambhetvā eva paṭhamajjhānasamadhigamo, vitakkādivūpasamā eva ca dutiyajjhānādisamadhigamo, tathāpi na tathā te tehi dūrībhūtā, apetā vā yathā catutthajjhānato, tasmā cetaso malīnabhāvasaṅkhobha-uppilābhāvakarehi¹ nīvaraṇādīhi suṭṭhu vimuttiyā tassa parisuddhipariyodātatā ca vuttāti āha "nīvaraṇa -pa- pariyodāte"ti. Jhānapaṭilābhapaccanīkānanti ettha ācariyadhammapālattherena "jhānapaṭilābhapaccayānan"ti pāṭhaṁ gahetvā "jhānapaṭilābhapaccanikānan"ti ayaṁ pāṭho paṭikkhitto. Vuttañhi tena—

"Jhānapatilābhapaccayānanti jhānapatilābhahetukānam jhānapatilābham nissāya uppajjanakānam. Pāpakānanti lāmakānam. Icchāvacarānanti icchāya avacarānam icchāvasena otiņņānam 'aho vata mameva satthā patipucchitvā bhikkhūnam dhammam deseyyā'tiādinayappavattānam mānamāyāsātheyyādīnam. Abhijihādīnanti ādisaddenapi tesamyeva sangaho. Abhijihā cettha pathamajihānena avikkhambhaneyyā mānādayo ca tadekatthā datthabbā jhānapatilābhapaccayānanti anuvattamānattā. Vikkhambhaneyyā pana nīvaranaggahanena gahitā. Katham pana pathamajjhānena avikkhambhaneyyā idha vigacchantīti? 'Sabbe kusalā dhammā sabbākusalānam patipakkhā'ti sallekhapatipattivasena evam vuttam jhānassa aparāmatthabhāvadassanato. Ye panettha 'icchāvacarānam abhijihādīnan'ti imehi padehi kopa-appaccayakāmarāgabyāpādādayo gahitāti adhippāyena 'jhānapatilābhapaccayānan'ti pātham patikkhipitvā 'jhānapatilābhapaccanīkānan'ti pāthoti vadanti, tam tesam matimattam tathā pāthasseva abhāvato, jhānapatilābhapaccanīkā ca nīvaranā ceva tadekatthā ca,

Malīnabhāvasankhobha-ubbillābhogakarehi (Sī), malīnabhāvasankhobhaubbillābhāvakarehi (Syā), malīnabhāvasankhāta-uppilābhogakarehi (Visuddhimaggaṭīkāyam iddhividhaniddesavannanāyam)

tesam dūrībhāvam vatvā puna tesamyeva abhāvavigamacodanāya ayujjamānattā. Nanu ca anangaṇasuttavatthasuttesu ayamattho labbhati oļārikānamyeva pāpadhammānam tattha adhippetattāti. Saccametam, idha pana adhigatacatutthajjhānassa vasena vuttattā sukhumāyeva te gahitā, angaṇupakkilesatāsāmañnena panettha suttānam apadisanam. Tathā hi 'suttānusārenā'ti vuttam, na pana suttavasenā"ti¹.

Avassañcetamevam sampaţicchitabbam adhigatajjhānānampi kesañci icchāvacarānam pavattisabbhāvatoti. Teneva ācariyadhammapālattherena "jhānapaṭilābhapaccayānan"ti pāṭham gahetvā "jhānapaṭilābhapaccanīkānan"ti ayam pāṭho paṭikkhitto. Mahāgaṇṭhipade visuddhimaggassa sīhaṭagaṇṭhipadepi ca "jhānapaṭilābhapaccayānan"ti imasseva pāṭhassa attho vutto, tasmā ayameva pāṭho gahetabbo, atthopi cettha yathāvuttanayeneva veditabbo. Tena "icchāvacarānanti icchāya avacarānam icchāvasena otiṇṇānam pavattānam nānappakārānam kopaapaccayānanti attho"ti ayampi pāṭho ayuttoyevāti gahetabbam, tatoyeva ca visuddhimagge ayam pāṭho sabbena sabbam na dassitoti.

Iddhipādakabhāvūpagamanenāti iddhiyā pādakabhāvassa padaṭṭhānabhāvassa upagamanena. Bhāvanāpāripūriyāti ito paraṁ kattabbassa abhāvavasena abhinīhārakkhamabhāvanāya paripuṇṇattā. Paṇītabhāvūpagamanenāti tato eva padhānabhāvaṁ nītatāya uttamaṭṭhena atittikaraṭṭhena ca paṇītabhāvassa upagamanena. Ubhayañcetaṁ bhāvanāya ṭhitiyā kāraṇavacanaṁ, paripuṇṇāya bhāvanāya paṇītabhāvappattiyā ṭhiteti. Āneñjappatteti idaṁ ṭhitiyā visesanaṁ. Tenāha "yathā āneñjappattaṁ hoti, evaṁ ṭhite"ti. Imasmiṁ pakkhe "ṭhite āneñjappatte"ti ubhayamekaṁ aṅgaṁ, "samāhite"ti pana idampi ekamaṅgaṁ. Tenevassa paṭhamavikappato visesaṁ sandhāyāha "evampi aṭṭhaṅgasamannāgatan"ti.

Pubbenivāsam anussarati, tassa vā anussaraņam **pubbenivāsānussati** tamnissayādipaccayabhūtam paṭicca uppajjanato. **Pubbenivāsānussatimhi** yam

^{1.} Visuddhimaggatīkāyam iddhividhaniddesavannanāyam.

ñānam tadatthāyāti sankhepena vuttamattham vivaranto pubbenivāsam tāva dassetvā tattha satiñānāni dassetum "pubbenivāso" ti-ādimāha. Tattha "pubbe"ti idam padam "ekampi jātin"ti-ādivacanato atītabhavavisayam idhādhippetanti āha "atītajātīsū"ti. Nivāsasaddo kammasādhano, khandhavinimutto ca nivasitadhammo natthīti āha "nivutthakkhandhā"ti. Nivutthatā cettha santāne pavattatā, tathābhūtā ca te anu anu bhūtā iātā pavattā, tattha uppajjitvā vigatā ca hontīti āha "nivutthāti ajjhāvutthā anubhūtā attano santāne uppajjitvā niruddhā"ti. Evam sasantatipariyāpannadhammavasena nivāsasaddassa attham vatvā idāni avisesena vattum "nivutthadhammā vā nivutthā" ti vatvā tam vivaritum "gocaranivāsenā" ti-ādi vuttam. Gocarabhūtāpi hi gocarāsevanāya āsevitā ārammanakaranavasena anubhūtā nivutthā nāma honti. Te pana duvidhā saparaviññanagocaratayati ubhayepi te dassetum "attano"ti-adi vuttam. Tattha "attano viññānena viññātā" ti vatvā "paricchinnā" ti vacanam ye te gocaranivāsena nivutthadhammā, na te kevalam viññānena viññātamattā, atha kho yathā pubbe nāmagottavannalingāhārādīhi visesehi paricchedakārikāya paññāya paricchijja gahitā, tathevetam ñānam paricchijja ganhātīti imassa atthassa dīpanattham vuttam. Paraviññanaviññatapi va nivutthati sambandho. Na kevalam attanova viññanena, atha kho paresam viññanena viññatāpīti attho. Idhāpi "paricchinna"ti padam anetva sambandhitabbam, paresampi va viññanena viññātā paricchinnāti. Tassa ca gahane payojanam vuttanayeneva vattabbam.

Te ca kho yasmā atītāsu eva jātīsu aññehi viññātā paricchinnā, te ca parinibbutāpi honti, yehi te viññātā, tesam tadā vattamānasantānānusārena tesampi atīte pavatti viññāyatīti sikhāppattam pubbenivāsānussatiñāṇassa visayabhūtam pubbenivāsam dassetum "chinnavaṭumakānussaraṇādīsū"ti vuttam. Chinnavaṭumakā sammāsambuddhā, tesam anussaraṇam chinnavaṭukamānussaraṇam. "Ādisaddena paccekabuddhabuddhasāvakānussaraṇāni gayhantī"ti keci vadanti. Chinnavaṭumakā pana sabbeva anupādisesāya nibbānadhātuyā parinibbutā chinnasamsāramaggattā, tesam anussaraṇam nāma tesam paṭipattiyā anussaraṇam. Sā pana patipatti

sankhepato chalarammanaggahanalakkhanati tani idha paraviññānaviññātaggahanena gahitāni. Tasmā purimāsu jātīsu attano viññanena aviññatanam parinibbutanam sabbesampi buddhapaccekabuddhasāvakānam anussaranam chinnavatumakānussarananti veditabbam. Ādi-saddena panettha purimāsu jātīsu attano viññānena aviññātānam aparinibbutānampi vattamānakkhandhapatipātiyā agantvā sīhokkantikavasena anussaranam gahitam, ime pana yathāvuttachinnavatumakānussaranādayo buddhānamyeva labbhanti. Na hi atīte buddhā bhagavanto evam vipassimsu, evam maggam bhāvesum, phalanibbānāni sacchākamsu, evam veneyye vinesunti ettha sabbathā aññesam ñānassa gati atthīti. Ye pana purimāsu jātīsu attanova viññānena viññātā, te parinibbutepi khandhapatibaddhattā sāvakā anussarantiyeva. Yāya satiyā pubbenivāsam anussarati, sā pubbenivāsānussatīti ānetvā sambandhitabbam. Abhiniharinti cittam jhanarammanato apanetva pubbenivāsābhimukham pesesim, pubbenivāsaninnam pubbenivāsaponam pubbenivāsapabbhāram akāsinti attho.

Pāliyam "abhininnāmesin" ti uttamapurisappayogattā "so" ti ettha ahamsaddo ānetvā vuccamāno tadattho pākato hotīti "so ahan"ti vuttam. Anekavidhanti nānābhavayonigativiññānatthitisattāvāsādivasena bahuvidham. Pakārehīti nāmagottādi-ākārehi saddhim. Sahayoge cetam karanavacanam. **Pavattitan**ti desanāvasena pavattitam. Tenāha "samvannitan"ti, vittharitanti attho. Nivasanti antogadhabhedasāmaññavacanametanti te bhede byāpanicchāvasena sangahetvā dassento "tattha tattha nivutthasantānan"ti āha. Anugantvā anugantvāti ñāṇagatiyā anugantvā anugantvā. Anudevāti anu eva, da-kāro padasandhivasena agato. "Abhininnamesin"ti vatva "anussarami"ti vuttatta cittassa abhinīhārasamanantarabhāvasaranam anusaddo dīpetīti āha "citte abhininnāmitamatte eva sarāmīti dassetī"ti. Parikammam vattabbam siyāti "pubbenivāsam anussaritukāmena ādikammikena bhikkhunā pacchābhattam pindapātapatikkantena rahogatena patisallīnena patipātiyā cattāri jhānāni samāpajjitvā abhiññāpādakacatutthajjhānato vutthāya sabbapacchimā nisajjā āvajjitabbā"ti evamādinā pubbenivāsañānassa parikammabhūtam pubbakaranam vattabbam bhaveyya.

Āraddhappakāradassanattheti anussaritum āraddhassa pubbenivāsassa pabhedadassanatthe. Ekampi jātinti ekampi bhavam. So hi ekakammanibbatto ādānanikkhepaparicchinno antogadhadhammappabhedo khandhappabandho idha "jātī"ti adhippeto jāyatīti jātīti katvā. Tenāha "ekampi -pa- khandhasantānan"ti. Parihāyamānoti khīyamāno vinassamāno. Kappoti asankhyeyyakappo. So pana atthato kālo, tadā pavattamānasankhāravasenassa parihāni veditabbā. Vaḍḍhamāno vivaṭṭakappoti etthāpi eseva nayo. Yo pana "kālam khepeti, kālo ghasati bhūtāni, sabbāneva sahattanā"ti¹ ca ādīsu kālassapi khayo vuccati, so idha nādhippeto aniṭṭhappasangato. Samvaṭṭaṭṭhāyī. Tammūlakattāti tampubbakattā. Vivattanam nibbattanam, vaddhanam vā vivatto.

Tejena samvatto tejosamvatto. Samvattasīmāti samvattanamariyādā. Samvattatīti vinassati. Sadāti sabbakālam, tīsupi samvattakālesūti attho. Ekam buddhakkhettanti idha yam sandhaya vuttam, tam niyametva dassetum "buddhakkhettam nāma tividhan"ti-ādi vuttam. Yattake thāne tathāgatassa patisandhiñānādiñānānubhāvo puññaphalasamuttejito saraseneva parijambhati, tam sabbampi buddhankurassa nibbattanakkhettam nāmāti āha "jātikkhettam dasasahassacakkavālapariyantan"ti. Ānubhāvo pavattatīti idha iddhimā cetovasippatto ānākkhettapariyāpanne yattha katthaci cakkavāle thatvā attano atthāya parittam katvā tattheva aññam cakkavālam gatopi kataparitto eva hotīti katvā vuttam. Atha vā tattha ekasmim cakkavāle thatvā sabbasattānam atthāya paritte kate ānākkhette sabbasattānam abhisambhunātveva parittānubhāvo tattha devatāhi parittānam sampatiechitabbatoti vuttam "ānubhāvo pavattatī"ti. Yam yāvatā vā pana ākankheyyāti vuttanti yam visayakkhettam sandhāya ekasmimyeva khane sarena² abhiviññāpanam attano rūpadassanañca paṭijānantena bhagavatā "yāvatā vā pana ākankheyyā"ti vuttam. Yatthāti yasmim padese anantāparimāne visayakkhette. Yam yam ākankhati, tam tam anussaratīti ākankhamattapatibaddhavuttitāya buddhañānassa yam yam

^{1.} Khu 5. 68 piṭṭhe Jātake.

anussaritum icchati, tam tam anussarati. Ekam āṇākkhettam vinassatīti iminā tiriyato samvaṭṭamānaparicchedo vutto. Saṇṭhahantanti vivaṭṭamānam jāyamānam. Tassa vināso ca saṇṭhahanañca visuddhimagge vuttanti amhehipi heṭṭhā "lokavidū"ti imassa atthasamvaṇṇanādhikāre pasaṅgato vuttattā idha na vuccati.

Evam pasangena samvattādike pakāsetvā idāni yathādhigatam tesam anussaranākāram dassetum "ye panete samvattavivattā vuttā"ti-ādimāha. Tattha etesūti niddhārane bhummam samvattavivattakappasamudāyato anekesam samvattakappādīnam niddhāriyamānattā. Amumhi samvattakappeti ettha vā-saddo luttaniddittho datthabbo. Tena ca aniyamatthena itarāsam asankhyeyyānampi sangaho siddhoti. Atha vā amumhi samvattakappeti idam samvattakappassa ādito pāliyam gahitattā vuttam. Tatthāpi hi imassa katipayakālam bhavādīsu samsaranam upalabbhatīti. Samvattakappe vā vattamāne yesu bhavādīsu imassa upapatti ahosi, tamdassanametam datthabbam. **Bhave vā**ti-ādīsu kāmādibhave vā andajādiyoniyā vā devādigatiyā vā nānattakāyanānattasaññīādiviññanatthitiyā vā sattāvāse vā khattiyādisattanikāye vā. Yasmā idam bhagavato vasena¹ pubbenivāsānussatiñānam āgatam, tasmā tasseva nāmādivasena attham vojetvā dassento āha "evamnāmoti vessantaro vā jotipālo vā"ti-ādi. Sālimamsodanāhāro vāti gihikālam sandhāya vuttam. Pavattaphalabhojano vāti tāpasādikālam sandhāya. Pavattaphalabhojanoti sayampatitaphalāhāro. Sāmisanirāmisādippabhedānanti ettha sāmisā gehassitasomanassādayo, nirāmisā nekkhammassitasomanassādayo. Ādisaddena vivekajasamādhijasukhādīnam sangaho.

Heṭṭhā sāmaññato vuttamevatthaṁ vibhajitvā dassetukāmo "atha vā"tiādimāha. Tattha amutrāsinti sāmaññaniddesoyaṁ, byāpanicchālopo vā, amutra amutra āsinti vuttaṁ hoti. Anupubbena ārohantassa yāvadicchakaṁ anussaraṇanti ettha ārohantassāti paṭilomato ñāṇena pubbenivāsaṁ ārohantassa. Paṭinivattantassāti pubbenivāsaṁ

anussaraṇavasena yāvadicchakaṁ gantvā paccāgacchantassa.

Paccavekkhaṇanti anussaritānussaritassa paccavekkhaṇaṁ. Tasmāti vuttassevatthassa kāraṇabhāvena paccāmasanaṁ, paṭinivattantassa paccavekkhaṇabhāvatoti vuttaṁ hoti. Idhūpapattiyāti idha carimabhave upapattiyā. Anantaranti atītānantaramāha. Amutrāti amukasmiṁ bhaveti attho. Udapādinti uppajjiṁ. Tāhi devatāhīti tusitadevatāhi. Ekagottoti tusitagottena ekagotto. Mahābodhisattānaṁ santānassa pariyosānāvatthāyaṁ devalokūpapattijanakaṁ nāma akusalena kammunā anupaddutameva hotīti adhippāyena "dukkhaṁ pana saṅkhāradukkhamattamevā"ti vuttaṁ. Mahāpuññānampi pana devaputtānaṁ pubbanimittuppattikālādīsu aniṭṭhārammaṇasamāyogo hotiyevāti "kadāci dukkhadukkhassapi sambhavo natthī"ti na sakkā vattuṁ, dhammānaṁ uppādanirodhasaṅkhāradukkhanti veditabbaṁ. Sattapaññāsa -pa- pariyantoti idaṁ manussavassagaṇanāvasena vuttaṁ. Tattha devānaṁ vassagananāya pana catusahassameva.

Itīti vuttatthanidassanametam, tañca kho yathārahato, na yathānupubbatoti dassento "nāmagottavasenā" ti-ādimāha. Uddisīyatīti disvāva aviñneyyattā "ayam ko nāmo"ti pucchite "tisso gotamo"ti nāmagottena uddisīyati. **Vaṇṇādīhī**ti vannāhāravedayitāyuparicchedehi. **Sāmotī**ti ettha **iti-**saddo ādi-attho, pakārattho vā. Tena evamādievampakāranānattatoti dassitam hoti. **Nāmagottam uddeso**ti uddisīyati satto etenāti uddeso nāmagottam. **Itare ākārā**ti ākarīvati disvāva satto viññāyati etehīti itare vannādayo ākārā. "No ca kho avisesenā"ti sankhepato vuttamevattham vittharena dassento aha "titthiya hī"ti-adi. Tattha titthiyati aññatitthiyā. Te pana kammavādino kiriyavādino tāpasādayo. Yasmā titthiyānam brahmajālādīsu cattālīsāya eva samvattavivattānam anussaraņam āgatam, tasmā "na tato paran"ti vatvā tattha kāraņam vadanto "dubbalapaññattā" ti-ādimāha. Tena vipassanābhiyogo pubbenivāsānussatiñāņassa visesakāraņanti dasseti. Tatoyeva ca balavapaññattā thapetvā aggasāvakamahāsāvake itare pakatisāvakā kappasatampi kappasahassampi

anussarantiyevāti datthabbam. Teneva vuttam visuddhimagge¹ "pakatisāvakā kappasatampi kappasahassampi anussarantiyeva balavapaññattā"ti. Ettako hi tesam abhinīhāroti kappānam satasahassampi tadadhikam ekam dve ca asankhyeyyānīti kālavasena evamparimāno vathākkamam tesam mahāsāvaka-aggasāvakapaccekabuddhānam puññañānābhinīhāro, sāvakapaccekabodhipāramitā siddhā. Yadi bodhisambhārasambharanakālaparicchinno tesam tesam ariyānam abhiññāñānavibhavo, evam sante buddhānampissa paricchedatā āpannāti āha "buddhānam pana paricchedo natthī"ti. "Yāvatakam ñeyyam, tāvatakam ñānan"ti² vacanato sabbañnutañnānassa viya buddhānam abhinnānānampi savisaye paricchedo nāma natthīti tattha yam yam ñātum icchanti, tam tam jānanti eva. Atha vā satipi kālaparicchede kāranūpāyakosallapariggahādinā³ sātisayattā mahābodhisambhārānam paññāpāramitāya pavatti-ānubhāvassa paricchedo nāma natthi, kuto tamnibbattānam abhinnānānanti āha "buddhānam pana paricchedo natthī"ti. Atīte "ettakānam kappānam asankhyeyyānī"ti evam kālaparicchedo natthi anāgate anāgatamsanānassa viya. Tenāha "yāva icchanti tāva sarantī"ti.

Evam pañcannam janānam pubbenivāsānussaraņam kālavibhāgato dassetvā idāni ārammaṇaggahaṇavasenassa pavattivisesam dassento "titthiyā cā"ti-ādimāha. Khandhapaṭipāṭimeva sarantīti ettha khandhapaṭipāṭi khandhānam anukkamo, sā ca kho cutito paṭṭhāya uppaṭipāṭivasena. Keci panettha "iriyāpathapaṭipāṭi khandhapaṭipāṭī"ti vadanti. Vuttamevattham byatirekato vibhāvento āha "paṭipāṭim muñcitvā"ti-ādi. Tattha cutipaṭisandhivasenāti attano parassa vā tasmim tasmim attabhāve cutim disvā antarā kiñci anāmasitvā paṭisandhiyā eva gahaṇavasena. Yathā pana andhā yaṭṭhim amuñcitvā gacchanti, evam te khandhapaṭipāṭim amuñcitvāva sarantīti āha "tesañhi andhānam viya icchitappadesokkamanam natthī"ti. Sāvakāti pakatisāvakāpi mahāsāvakāpi aggasāvakāpi sāmaññato vuttā. Pakatisāvakāpi hi khandhapaṭipāṭiyāpi

^{1.} Visuddhi 2. 41 pitthe.

^{2.} Khu 9. 376 pitthe.

^{3.} Karuṇūpāyakosallapariggahādinā (Visuddhimaggaṭīkāyaṁ Abhiññāniddesavannanāyaṁ)

anussaranti, cutipațisandhivasenapi saṅkamanti balavapaññattā, tathā asītimahāsāvakā. Dvinnaṁ pana aggasāvakānaṁ khandhapaṭipāṭikiccaṁ natthi. Ekassa attabhāvassa cutiṁ disvā paṭisandhiṁ passanti, puna aparassa cutiṁ disvā paṭisandhinti evaṁ cutipaṭisandhivasenapi saṅkamantā gacchanti. Yathā nāma saradasamaye ṭhitamajjhanhikavelāyaṁ caturatanike gehe cakkhumato purisassa rūpagataṁ supākaṭameva hotīti lokasiddhametaṁ. Siyā pana tassa sukhumataratirokuṭṭādibhedassa rūpagatassa agocaratā, na tveva buddhānaṁ ñātuṁ icchitassa ñeyyassa agocaratā, atha kho taṁ ñāṇālokena obhāsitaṁ hatthatale āmalakaṁ viya supākaṭaṁ suvibhūtameva hoti, tathā ñeyyāvaraṇassa suppahīnattāti āha "buddhā panā"ti-ādi.

Tattha sīhokkantavasenāti sīhagatipatanavasena. Yaṁ yaṁ ṭhānaṁ ākaṅkhantīti yasmiṁ kappe yasmiṁ bhave yaṁ yaṁ ṭhānaṁ jānituṁ icchanti. Taṁ sabbaṁ sarantiyevāti ñātuṁ icchitaṁ taṁ sabbaṁ sarantiyeva, na na saranti. Buddhānañhi neva khandhapaṭipāṭikiccaṁ, na ca cutipaṭisandhivasena saṅkamanakiccaṁ atthi. Tesañhi anekāsu kappakoṭīsu heṭṭhā vā upari vā yaṁ yaṁ ṭhānaṁ icchanti, taṁ taṁ pākaṭameva hoti. Tasmā yathā peyyālapāṭiṁ paṭhantā "paṭhamaṁ jhānaṁ -pa- pañcamaṁ jhānan"ti-ādipariyosānameva gaṇhantā saṅkhipitvā sajjhāyanti, na anupadaṁ, evaṁ anekāpi kappakoṭiyo peyyālapāṭiṁ viya saṅkhipitvā yaṁ yaṁ icchanti, tattha tattheva ñāṇena okkamantā sīhokkantavasena gacchanti. Evaṁ gacchantānañca tesaṁ ñāṇaṁ yathā nāma katavālavedhiparicayassa sarabhaṅgasadisassa dhanuggahassa khitto saro antarantarā rukkhalatādīsu asajjamāno lakkheyeva patati na sajjati na virajjhati, evaṁ antarantarāsu jātīsu na sajjati na virajjhati, asajjamānaṁ avirajjhamānaṁ icchiticchitaṭṭhānaṁyeva gaṇhāti.

Atītabhave khandhā tappaṭibaddhanāmagottāni ca sabbaṁ pubbenivāsantveva saṅgahitānīti āha "kiṁ viditaṁ karoti? Pubbenivāsan"ti. Moho paṭicchādakaṭṭhena tamo viya tamoti āha "sveva moho"ti-ādi. Obhāsakaraṇaṭṭhenāti kātabbato karaṇaṁ, obhāsova karaṇaṁ obhāsakaraṇaṁ, attano paccayehi obhāsabhāvena nibbattetabbaṭṭhenāti attho. Sesaṁ pasaṁsāvacananti paṭipakkhavidhamanapavattivisesānaṁ bodhanato vuttaṁ. Avijjā vihatāti etena vijānanatthena vijjāti

ayampi attho dīpitoti daṭṭhabbaṁ. Kasmā? Yasmā vijjā uppannāti etena vijjāpaṭipakkhā avijjā, paṭipakkhatā cassā pahātabbabhāvena vijjāya ca pahāyakabhāvenāti dasseti. Esa nayo itarasmimpi padadvayeti iminā tamo vihato vinaṭṭho. Kasmā? Yasmā āloko uppannoti imamatthaṁ atidisati. Kilesānaṁ ātāpanaparitāpanaṭṭhena vīriyaṁ ātāpoti āha "vīriyātāpena ātāpino"ti, vīriyavatoti attho. Pesitacittassāti¹ yathādhippetatthasiddhiṁ pativissaṭṭhacittassa². Yathā appamattassa ātāpino pahitattassa viharatoti aññassapi kassaci mādisassāti adhippāyo. Padhānānuyogassāti sammappadhānamanuyuttassa. Sesamettha uttānattā vuttanayattā ca suviñňeyyameva.

Pubbenivāsakathā niţţhitā.

Dibbacakkhuñānakathā

13. Cutiyāti cavane. Upapāteti upapajjane. Samīpatthe cetam bhummavacanam, cutikkhaṇasāmantā upapattikkhaṇasāmantā cāti vuttam hoti. Tathā hi vakkhati "ye pana āsannacutikā"ti-ādi. Yena ñāṇenāti yena dibbacakkhuñāṇena. Dibbacakkhuñāṇeneva hi sattānam cuti ca upapatti ca ñāyati. Parikammam vattabbam siyāti "dibbacakkhuñāṇam uppādetukāmena ādikammikena kulaputtena kusiṇārammaṇam abhiññāpādakajjhānam sabbākārena abhinīhārakkhamam katvā tejokasiṇam odātakasiṇam ālokakasiṇanti imesu tīsu kasiṇesu aññataram āsannam kātabbam, upacārajjhānagocaram katvā vaḍḍhetvā ṭhapetabban"ti-ādinā dibbacakkhuñānassa parikammam vattabbam bhaveyya.

So ahanti so katacittābhinīhāro aham. Dibbasadisattāti divi bhavanti dibbam, devānam pasādacakkhu, tena dibbena cakkhunā sadisattāti attho. Dibbasadisattāti ca hīnūpamādassanam devatānam dibbacakkhutopi

^{1.} Pesitattassāti (Sī, Ka)

^{2.} Yathādhippetatthasiddhipativissaṭṭhassa cittassa (Syā, Ka) Yathādhippetatthasiddhim pati vissaṭṭhacittassa (Sī)

imassa mahānubhāvattā. Idāni tam dibbasadisattam vibhāvetum "devatānañhī"ti-ādi vuttam. Tattha sucaritakammanibbattanti saddhābahulatāvisuddhaditthitā-ānisamsadassāvitādisampattiyā sutthu caritattā sucaritena devūpapattijanakena puññakammena nibbattam. Pittasemharuhirādīhīti ādi-saddena vātarogādīnam sangaho. Apalibuddhanti anupaddutam. Pittādīhi anupaddutattā kammassa ca uļāratāya upakkilesavimutti veditabbā. Upakkilesadosarahitañhi kammam tinādidosarahitam viva sassam ulāraphalam anupakkilittham hoti. Kāranūpacārena cassa phalam tathā voharīyati yathā "sukkam sukkavipākan"ti. **Dūrepī**ti **pi-**saddena sukhumassapi ārammanassa sampaticchanasamatthatam sanganhati. Pasadacakkhuti catunnam mahābhūtānam pasādalakkhanam cakkhu. Vīriyabhāvanābalanibbattanti vīriyārambhavaseneva ijjhanato sabbāpi kusalabhāvanā vīriyabhāvanā, padhānasankhārasamannāgatā vā iddhipādabhāvanā visesato vīriyabhāvanā, tassā ānubhāvena nibbattam vīriyabhāvanābalanibbattam. Nāņamayam cakkhu ñānacakkhu. Tādisamevāti upakkilesavimuttatāya dūrepi sukhumassapi ārammanassa sampaticchanasamatthatāya ca tamsadisameva.

Dibbavihāravasena patiladdhattāti dibbavihārasankhātānam catunnam jhānānam vasena patiladdhattā. Iminā kāranavasenassa dibbabhavamaha. Dibbaviharasannissitattati atthangasamannagamena ukkamsagatam pādakajjhānasankhātam dibbavihāram sannissāya pavattattā, dibbayihārapariyāpannam vā attanā sampayuttam rūpāvacaracatutthajjhānam nissāya paccayabhūtam sannissitattāti evamettha attho datthabbo. Ālokapariggahena mahājutikattāpi dibbanti kasinālokānuggahena pattabbattā sayam ñānālokapharanabhāvena ca mahājutikabhāvatopi dibbanti attho. Mahājutikampi hi dibbanti vuccati "dibbamidam byamhan"ti-ādīsu. **Mahāgatikattā**ti mahanīyagamanattā, vimhayanīyappavattikattāti attho. Vimhayanīyā hissa pavatti torokuttādigatarūpadassanato. **Tam sabban**ti "hetthā vuttam atthapañcakamapekkhitvā vuttan"ti vadanti. Keci pana "jutigati-atthesupi saddavidū divusaddam icchantīti mahājutikattā mahāgatikattāti idameva dvayam sandhāya vuttam, tasmā 'saddasatthānusārena veditabban'ti idam dibbati jotayatīti dibbam, dibbati gacchati asajjamānam pavattatīti dibbanti imamattham dassetum vuttan"ti vadanti. Ācariyadhammapālatthero pana"Dibbacakkhulābhāya yogino parikammakaraṇam tappaṭipakkhābhibhavassa atthato tassa vijayicchā nāma hoti, dibbacakkhulābhī ca iddhimā devatānam vacanagahaṇakkhamanamammadānavasena mahāmoggallānattherādayo viya dānaggahaṇalakkhaṇe vohāre ca pavatteyyāti evam vihāravijayicchāvohārajutigatisaṅkhātānam atthānam vasena imassa abhiññāñaṇassa dibbacakkhubhāvasiddhito saddavidū ca tesu eva atthesu divusaddam icchantīti 'tam sabbam saddasatthānusārena veditabban'ti vuttan'ti!—

āha.

Dassanaţţhenāti rūpadassanabhāvena. Cakkhunā hi sattā rūpam passanti. Yathā mamsacakkhu viññāṇādhiṭṭhitam samavisamam ācikkhantam viya pavattati, na tathā idam. Idam pana sayameva tato sātisayam cakkhukiccakārīti āha "cakkhukiccakaraṇena cakkhumivātipi cakkhū"ti. Diṭṭhivisuddhihetuttāti sankhepato vuttamattham vivaritum "yo hī"ti-ādi vuttam. Ucchedadiṭṭhim gaṇhātīti parato uppattiyā adassanato "etthevāyam satto ucchinno, evamitarepī"ti ucchedadiṭṭhim gaṇhāti.

Navasattapātubhāvadiṭṭhim gaṇhātīti jhānalābhī adhiccasamuppannito viya gaṇhāti. Yathā hi so asaññasattā cavitvā idhūpapanno pabbajito samāno abhiññālābhī hutvā pubbenivāsam anussaranto idhūpapattimeva disvā tato param asaññabhave uppattim anussaritumasakkonto "aham adhiccasamuppanno pubbe nāhosim, somhi etarahi ahutvā sattatāya pariṇato, sesāpi sattā tādisāyevā"ti abhinavasattapātubhāvadiṭṭhim gaṇhāti, evamayampi upapātamattameva disvā cutim apassanto navasattapātubhāvadiṭthim gaṇhāti.

Idāni aññathāpi visuddhikāraṇaṁ dassento āha "ekādasaupakkilesavirahato vā"ti-ādi. Yathāhāti upakkilesasutte āgatapāļiṁ nidasseti. Tattha hi anuruddho nandiyo kimiloti ime tayo kulaputte āmantetvā dhammaṁ dassentena "anuruddhā tumhe kiṁ imehi na āluļissanti, ahampi imehi upādāya ekādasahi upakkilesehi āluļitapubbo"ti dassetuṁ—

^{1.} Visuddhimaggatīkāyam abhiññāniddesavannanāyam.

"Ahampi sudam anuruddhā pubbeva sambodhā anabhisambuddho bodhisattova samāno obhāsañceva sañjānāmi dassanañca rūpānam, so kho pana me obhāso na cirasseva antaradhāyati dassanañca rūpānam. Tassa mayham anuruddhā etadahosi 'ko nu kho hetu, ko paccayo, yena me obhāso antaradhāyati dassanañca rūpānan'ti. Tassa mayham anuruddhā etadahosi 'vicikicchā kho me udapādi, vicikicchādhikaraṇañca me samādhi cavi, samādhimhi cute obhāso antaradhāyati dassanañca rūpānam, soham tathā karissāmi, yathā me puna na vicikicchā uppajjissatī'ti.

So kho aham anuruddhā appamatto ātāpī pahitatto viharanto obhāsanceva sanjānāmi dassananca rūpānam, so kho pana me obhāso na cirasseva antaradhāyati dassananca rūpānam. Tassa mayham anuruddhā etadahosi 'ko nu kho hetu, ko paccayo, yena me obhāso antaradhāyati dassananca rūpānan'ti. Tassa mayham anuruddhā etadahosi 'amanasikāro kho me udapādi, amanasikārādhikaraṇanca pana me samādhi cavi, samādhimhi cute obhāso antaradhāyati dassananca rūpānam, soham tathā karissāmi, yathā me puna na vicikicchā uppajjissati na amanasikāro'ti"—

ādinā¹ desanam ārabhitvā idam vuttam "so kho aham anuruddhā vicikicchā cittassa upakkilesoti iti viditvā"ti-ādi.

Tattha² vicikicchāti mahāsattassa ālokam vaḍḍhetvā dibbacakkhunā nānāvidhāni rūpāni passantassa "idam nu kho kin"ti uppannā vicikicchā. Manasikāravasena pana me rūpāni upaṭṭhahimsu, rūpāni passato vicikicchā uppajjati, tasmā idāni kiñci na manasi karissāmīti tuṇhī bhavati, tam tuṇhībhāvappattim sandhāyāha "amanasikāro"ti. Thinamiddhanti kiñci amanasikarontassa uppannam thinamiddham. Tathābhūtassa hi savipphārikamanasikārassa abhāvato thinamiddham uppajjati.

Chambhitattanti thinamiddham vinodetvā

yathāraddhamanasikāravasena himavantābhimukham ālokam vaḍḍhetvā dānavarakkhasa-ajagarādayo passantassa uppannam chambhitattam. Uppilanti¹ "mayā diṭṭhabhayam pakatiyā cakkhuviññāṇena olokiyamānam na passati, adiṭṭhe parikappitasadise kimnāma bhayan'ti bhayassa vinodanavasena cintentassa attano paccavekkhaṇākosallam nissāya uppannam uppilāvitattam². Duṭṭhullanti kāyālasiyam. "Mayā thinamiddham chambhitattānam vūpasamanattham gāļham vīriyam paggahitam, tena me uppilasankhātā cittasamādhidūsitā gehassitā balavapīti uppannā'ti vīriyam sithilam karontassa hi kāyadutthullam kāyadaratho kāyālasiyam udapādi.

Accāraddhavīriyanti "mama vīriyam sithilam karoto dutthullam uppannan''ti puna vīriyam pagganhato uppannam accāraddhavīriyam. Atilīnavīriyanti "mama vīriyam pagganhato evam jātan"ti puna vīriyam sithilayato uppannam atilīnavīriyam. **Abhijappā**ti devalokābhimukham ālokam vaddhetvā devasamgham passato uppannā tanhā. "Evam me hotū"ti hi abhinivisanavasena jappatīti abhijappā, tanhā. **Nānattasaññā**ti "mayham ekajātikam rūpam manasikarontassa abhijappā uppannā, nānāvidham rūpam manasikāram karissāmī"ti kālena devalokābhimukham kālena manussalokābhimukham vaddhetvā nānāvidhāni rūpāni manasikaroto uppannā nānattasaññā, nānatte nānāsabhāve saññāti nānattasaññā. Atinijihāyitattanti "mayham nānāvidhāni rūpāni manasikarontassa nānattasaññā udapādi, ittham vā anittham vā ekajātikameva rūpam manasi karissāmī"ti tathā manasikaroto uppannam rūpānam atinijjhāyitattam, ativiya uttari katvā nijjhānam pekkhanam atinijjhāyitattam. **Obhāsan**ti parikammasamutthitam obhāsam. Na ca rūpāni passāmīti parikammobhāsamanasikārappasutatāya dibbacakkhunā rūpāni na passāmi. Rūpāni hi kho passāmīti tena parikammobhāsena pharitvā thitatthāne dibbacakkhuno visayabhūtāni rūpagatāni passāmi.

Evamādīti ādi-saddena—

"Kevalampi rattim kevalampi divam kevalampi rattindivam tassa mayham anuruddhā etadahosi 'ko nu kho hetu, ko paccayo,

yvāham obhāsam hi kho sañjānāmi, na ca rūpāni passāmi, rūpāni kho passāmi, na ca obhāsam sañjānāmi kevalampi rattim kevalampi divam kevalampi rattindivan'ti. Tassa mayham anuruddhā etadahosi 'yasmim hi kho aham samaye rūpanimittam amanasikaritvā obhāsanimittam manasi karomi. Obhāsam hi kho tasmim samaye sañjānāmi, na ca rūpāni passāmi. Yasmim panāham samaye obhāsanimittam amanasikaritvā rūpanimittam manasi karomi. Rūpāni hi kho tasmim samaye passāmi, na ca obhāsam sañjānāmi kevalampi rattim kevalampi divam kevalampi rattindivan'ti¹—

evamādipāļim sanganhāti.

Manussānam idanti mānusakam, manussānam gocarabhūtam rūpārammaṇam. Tadaññassa pana dibbatirokuṭṭasukhumādibhedassa rūpassa dassanato atikkantamānusakam. Evarūpam tañca manussūpacāram atikkantam nāma hotīti āha "manussūpacāram atikkamitvā rūpadassanenā"ti. Tattha manussūpacāranti manussehi upacaritabbaṭṭhānam, pakatiyā cakkhudvārena gahetabbam visayanti adhippāyo. Evam visayamukhena dassetvā idāni visayimukhena dassetum "mānusakam vā"tiādi vuttam. Tatthāpi mamsacakkhātikkamo tassa kiccātikkameneva daṭṭhabbo. Dibbena cakkhunāti dibbacakkhuñāṇenapi daṭṭhum na sakkā khaṇassa ati-ittaratāya atisukhumatāya kesañci rūpassa, apica dibbacakkhussa paccuppannam rūpārammaṇam, tañca purejātapaccayabhūtam, na ca āvajjanaparikammehi vinā mahaggatassa pavatti atthi, nāpi uppajjamānameva rūpam ārammaṇapaccayo bhavitum sakkoti, bhijjamānam vā, tasmā cutūpapātakkhaṇe rūpam dibbacakkhunā daṭṭhum na sakkoti suvuttametam.

Yadi dibbacakkhuñāṇaṁ rūpārammaṇameva, atha kasmā "satte passāmī"ti vuttanti? Yebhuyyena sattasantānagatarūpadassanato evaṁ vuttaṁ. Sattagahaṇassa vā kāraṇabhāvato vohāravasena vuttantipi vadanti. Te cavamānāti adhippetāti sambandho. **Evarūpe**ti na cutūpapātakkhaṇasamaṅginoti adhippāyo. Mohūpanissayaṁ nāma kammaṁ nihīnaṁ nihīnaphalaṁ hotīti āha "mohanissandayuttattā"ti. Mohūpanissayatā ca kusalakammassa

pubbabhāge mohappavattibahulatāya veditabbā. Tāya pana mohappavattiyā samkiliṭṭham kusalakammam nihīnameva jāti-ādim nipphādetīti nihīnajāti-ādayo mohassa nissandaphalānīti āha "hīnānam jātikulabhogādīnan"ti-ādi. Hīļiteti garahite. Ohīļiteti visesato garahite. Uññāteti lāmakabhāvena ñāte. Avaññāteti visesato lāmakabhāvena vidite. Amohanissandayuttattāti ettha amoho sampayuttavasena pubbabhāgavasena ca pavatto kathito, tena ca tihetukapaṭisandhike dasseti. Tabbiparīteti tassa hīļitādibhāvassa viparīte, ahīļite anohīļite anuññāte anavaññāte cittīkateti attho.

Suvanneti sundaravanne. Dubbanneti asundaravanne. Sā panāyam suvannadubbannatā yathākkamam kammassa adosadosūpanissayatāya hotīti āha "adosanissandayuttattā" ti-ādi. Adosūpanissayatā ca kammassa mettādīhi paribhāvitasantānappavattiyā veditabbā. Abhirūpe virūpeti idam santhānavasena vuttam. Santhānavacanopi hi vannasaddo hoti "mahantam hatthivannam abhinimminitvā"ti-ādīsu¹ viya. Pathamam vutto pana atto vannavaseneva vutto. Sundaram gatim gatā sugatāti āha "sugatigate"ti, sugatim upapanneti attho. Alobhajjhāsayā sattā vadaññū vigatamaccherā alobhūpanissayena kammunā sugatā samiddhā hontīti āha "alobhanissandayuttattā vā addhe mahaddhane"ti. Dukkham gatim gatā duggatāti āha "duggatigate"ti. Lobhajjhāsayā sattā luddhā maccharino lobhūpanissayena kammunā duggatā durūpā hontīti āha "lobhanissandayuttattā vā dalidde appannapāne"ti. Upacitanti phalāvahabhāvena katam. Yathā katañhi kammam phaladānasamattham hoti, tathā katam upacitam. Cavamāneti-ādīhi dibbacakkhukiccam vuttanti visayamukhena visayibyāpāramāha. **Purimehī**ti "dibbena cakkhunā"ti-ādīni padāni sandhāya vuttam. Ādīhīti ettha ca-saddo luttaniddittho, tasmā "dibbena -pa- passāmī"ti imehi "cavamāne"ti-ādīhi ca dibbacakkhukiccam vuttanti attho.

Iminā pana padenāti "yathākammūpage satte pajānāmī"ti iminā vākyena. Pajjati ñāyati attho imināti hi padam vākyam.

Mahantam dukkhamanubhavamāneti ettha dibbacakkhuñānena rūpam disvā tesam dukkhānubhavanam kāmāvacaracitteneva jānātīti veditabbam. Soti nerayikasatte paccakkhato disvā thito dibbacakkhuñānalābhī. Evam manasi karotīti tesam nerayikānam nirayasamvattanikassa kammassa ñātukāmatāvasena pādakajihānam samāpajjitvā vutthāya parikammavasena manasi karoti. Kim nu khoti-ādi manasikāravidhidassanam. Evam pana parikammam katvā pādakajihānam samāpajjitvā vutthitassa tam kammam ārammanam katvā āvajjanam uppajjati, tasmim niruddhe cattāri pañca vā javanāni javanti. Yesam purimāni tīņi cattāri vā parikammaupacārānulomagotrabhunāmakāni kāmāvacarāni, catuttham pancamam vā appanācittam rūpāvacaram catutthajjhānikam, tattha yam tena appanācittena saddhim uppannam ñanam, tam yathakammupagañananti veditabbam. "Visum parikammam natthī"ti idam pana dibbacakkhuñānena vinā yathākammūpagañānassa visum parikammam natthīti adhippāyena vuttam. Evañcetam icchitabbam, aññatha yathakammupagañanassa mahaggatabhavo eva na siyā. Devānam dassanepi eseva nayo. Nerayikadevaggahanañcettha nidassanamattam datthabbam. Ākankhamāno hi dibbacakkhulābhī aññagatikesupi evam patipajjatiyeva. Tathā hi vakkhati "apāyaggahanena tiracchānayonim dīpetī"ti-ādi, "sugatiggahaņena manussagatipi sangayhatī"ti ca. Tam nirayasamvattaniyakammam ārammanametassāti tamkammārammanam. Phārusakavanādīsūti ādi-saddena cittalatāvanādīnam saṅgaho.

Yathā cimassāti yathā ca imassa yathākammūpagañāṇassa visum parikammam natthi, evam anāgatamsañāṇassapīti visum parikammābhāvañca nidasseti. Tattha kāraṇamāha "dibbacakkhupādakāneva hi imānī"ti. Tatrāyamadhippāyo—yathā dibbacakkhulābhī nirayādiabhimukham ālokam vaḍḍhetvā nerayikādike satte disvā tehi pubbe āyūhitam nirayasamvattaniyādikam kammam tādisena samādānena tajjena ca manasikārena parikkhate citte yāthāvato jānāti, evam yassa yassa sattassa samanantaram anāgatam attabhāvam ñātukāmo, tam tam odissa ālokam vaddhetvā tena tena atīte etarahi vā āyūhitam tassa nibbattakam kammam

yathākammūpagañāņena disvā tena tena nibbattetabbam anāgatam attabhāvam ñātukāmo tādisena samādānena tajjena ca manasikārena parikkhate citte yāthāvato jānāti. Esa nayo tato paresupi attabhāvesu. Etam anāgatamsañāṇam nāma. Yasmā etam dvayam dibbacakkhuñāṇe sati eva sijjhati, nāsati. Tena vuttam "imāni dibbacakkhunā saheva ijjhantī"ti.

Kāyena duccaritam, kāyato vā uppannam duccaritanti kāyena dutthu caritam, kāyato vā uppannam kilesapūtikattā dutthu caritam kāyaduccaritanti evam yathākkamam yojetabbam. **Kāyo**ti cettha copanakāyo adhippeto. Kāyaviññattivasena pavattam akusalam kāyakammam kāyaduccaritam. Yasmim santāne kammam katupacitam, asati¹ āhārupacchede vipākārahasabhāvassa avigacchanato so tena sahitoyevāti vattabboti āha "samannāgatāti samangībhūtā"ti. Anatthakāmā hutvāti etena mātāpitaro viya puttānam, ācariyupajjhāyā viya ca nissitakānam atthakāmā hutvā garahakā upavādakā na hontīti dasseti. Gunaparidhamsanenāti vijjamānānam gunānam viddhamsanena, vināsanenāti attho. Nanu ca animavatthunāpi upavādo gunaparidhamsanamevāti? Saccametam, gunāti panettha jhānādivisesā uttarimanussadhammā adhippetāti sīlaparidhamsanam visum gahitam. Tenāha "natthi imesam samanadhammo''ti-ādi. Samanadhammoti ca sīlasamyamam sandhāya vadati. **Jānam vā**ti yam upavadati, tassa ariyabhāvam jānanto vā. **Ajānam** vāti ajānanto vā. Jānanājānanañcettha appamānam, ariyabhāvo eva pamāṇam. Tenāha "ubhayathāpi ariyūpavādova hotī"ti. "Ariyoti pana ajānato adutthacittasseva tattha ariyagunabhāvam pavedentassa gunaparidhamsanam na hotīti tassa ariyūpavādo natthī"ti vadanti. **Bhāriyam** kammanti anantariyasadisatta bhariyam kammam, satekiccham pana hoti khamāpanena, na ānantariyam viya atekiccham.

Tassa ca āvibhāvatthanti bhāriyādisabhāvassa pakāsanattham. Tam jigucchīti tam theram, tam vā kiriyam jigucchi. Aticchātoti ativiya khudābhibhūto. Mahallakoti samaṇānam sāruppamasāruppam, lokasamudācāramattam vā na jānātīti adhippāyena vuttattā guṇaparidhamsanena

garahatīti veditabbam. Amhākam lajjitabbakam akāsīti "samaņena nāma evam katan"ti vutte mayam sīsam ukkhipitum na sakkomāti adhippāyo. Jānanto eva thero "atthi te āvuso imasmim sāsane patiṭṭhā"ti pucchi. Itaropi saccābhisamayo sāsane patiṭṭhāti āha "sotāpanno ahan"ti. Thero tam karuṇāyamāno "khīṇāsavo tayā upavadito"ti attānam āvi akāsi. Tenassa tam pākatikam ahosīti tena assa tam kammam maggāvaraṇam nāhosīti adhippāyo. Pubbeva pana sotāpannattā apāyagāmīnam suppahīnabhāvato saggāvaraṇamassa kātumasamatthameva tam kammam. Attanā vuḍḍhataro hotīti ettha "ukkuṭikam nisīditvā khamāpetabbo"ti visuddhimagge¹ vuttam. Sotāpannasakadāgāmino dosenapi nakkhamanti, sesa-ariyā vā tassa atthakāmā hutvā āyatim samvaraṇatthāya na khamāpeyyunti āha "sace so nakkhamatī"ti. Attanā vuḍḍhataro hoti, ṭhitakenevāti etthāpi "ukkuṭikam nisīditvā"ti visuddhimagge¹ vuttam. Evañhi tattha vuttam—

"Sace disāpakkanto hoti, sayam vā gantvā saddhivihārike vā pesetvā khamāpetabbo. Sace nāpi gantum, na pesetum sakkā hoti, ye tasmim vihāre bhikkhū vasanti, tesam santikam gantvā sace navakatarā honti, ukkuṭikam nisīditvā, sace vuḍḍhatarā, vuḍḍhesu vuttanayeneva paṭipajjitvā 'aham bhante asukam nāma āyasmantam idañcidañca avacam, khamatu me so āyasmā'ti vatvā khamāpetabbam. Sammukhā akhamantepi etadeva kātabban'ti.

Idam pana parampi tattha¹ vuttam—

"Sace ekacārikabhikkhu hoti, nevassa vasanaṭṭhānaṁ, na gataṭṭhānaṁ paññāyati, ekassa paṇḍitassa bhikkhuno santikaṁ gantvā 'ahaṁ bhante asukaṁ nāma āyasmantaṁ idañcidañca avacaṁ, taṁ me anussarato anussarato vippaṭisāro hoti, kiṁ karomī'ti vattabbaṁ. So vakkhati 'tumhe mā cintayittha, thero tumhākaṁ khamati, cittaṁ vūpasamethā'ti. Tenapi ariyassa gatadisābhimukhena² añjaliṁ paggahetvā 'khamatū'ti vattabban''ti.

Parinibbutamañcaṭṭhānanti pūjākaraṇaṭṭhānaṁ sandhāyāha.
Pākatikameva hotīti evaṁ kate attano cittaṁ pasīdatīti taṁ kammaṁ saggāvaraṇaṁ maggāvaraṇañca na hotīti adhippāyoti keci vadanti.
Cariyāpitake mātaṅgacaritasaṁvannanāyaṁ¹—

"Pāramitāparibhāvanasamiddhāhi nānāsamāpattivihāraparipūritāhi sīladiṭṭhisampadāhi susaṅkhatasantāne mahākaruṇādhivāse mahāsatte ariyūpavādakammabhisapasaṅkhātaṁ pharusavacanaṁ saṁyuttaṁ mahāsattassa khettavisesabhāvato tassa ca ajjhāsayapharusatāya diṭṭhadhammavedanīyaṁ hutvā sace so mahāsattaṁ na khamāpeti, sattame divase vipaccanasabhāvaṁ jātaṁ. Khamāpite pana mahāsatte payogasampattiyā vipākassa paṭibāhitattā avipākadhammataṁ āpajji ahosikammabhāvato. Ayañhi ariyūpavādapāpassa diṭṭhadhammavedanīyassa ca dhammatā"ti—

ācariyadhammapālattherena vuttattā evam khamāpite tam kammam payogasampattiyā vipākassa paṭibāhitattā ahosikammabhāvena avipākadhammatam āpannanti neva saggāvaraṇam na mokkhāvaraṇamca hotīti evamettha attho gahetabbo.

Viparītam dassanametesanti viparītadassanā. Samādātabbaṭṭhena samādānāni, kammāni samādānāni yesam te kammasamādānā, micchādiṭṭhivasena kammasamādānā micchādiṭṭhikammasamādānā, hetuatham vā antogadham katvā micchādiṭṭhivasena pare kammesu samādāpakā micchādiṭṭhikammasamādānā. Tayimam attham dassento "micchādiṭṭhivasenā"ti-ādimāha. Ye ca -pa- samādapenti, tepi micchādiṭṭhikammasamādānāti yojetabbam. Sīlasampannoti-ādi paripakkindriyassa maggasamangino vasena vuttam, aggamaggaṭṭhe pana vattabbameva natthi. Atha vā aggamaggapariyāpannā eva sīlādayo veditabbā. Aggamaggaṭṭhassa hi diṭṭheva dhamme ekamsikā aññārādhanā, itaresam anekamsikā. Aññanti arahattam. Evamsampadamidanti ettha sampajjanam sampadā, nipphatti, evam avirajjhanakanipphattikanti attho, yathā tam avassambhāvī, evamidampīti vuttam

hoti. Yathā hi maggānantaram avirajjhitvāva phalam nibbattam, evametam imassapi puggalassa cuti-anantaram avirajjhitvāva niraye patisandhi hotīti dasseti. Sakalasmiñhi buddhavacane na imāya upamāya gālhataram katvā vutta-upamā atthi. **Tam vācam appahāyā**ti-ādīsu¹ ariyūpavādam sandhāya "puna evarūpim vācam na vakkhāmī"ti vadanto vācam pajahati nāma, "puna evarūpam cittam na uppādessāmī"ti cintento cittam pajahati nāma, "puna evarūpim ditthim na ganhissāmī"ti pajahanto ditthim pajahati nāma. Tathā akaronto neva pajahati na patinissajjati. Yathābhatam nikkhitto evam nirayeti yathā nirayapālehi āharitvā niraye thapito, evam niraye thapitoyeva, nāssa nirayūpapattiyā koci vibandho. Tatrāyam yutti—nirayūpago ariyūpavādī tadādāyakassa avijahanato seyyathāpi micchāditthīti. Ettha ca "tam vācam appahāyā"ti evamādivacanena tadādāyakassa appahāneneva ariyūpavādo antarāyiko anatthāvahova, pahānena pana accayam desetvā khamāpanena na antarāyiko anatthāvaho yathā tam vutthitā desitā ca āpattīti dasseti. Micchāditthivasena akattabbam nāma pāpam natthi, yato samsārakhānubhāvopi nāma hotīti āha "micchāditthiparamāni bhikkhave vajjānī"ti.

"Ucchinnabhavanettiko bhikkhave tathāgatassa kāyo tiṭṭhati², ayañceva kāyo bahiddhā ca nāmarūpan"ti ca evamādīsu viya idha kāya-saddo khandhapañcakavisayoti āha "kāyassa bhedāti upādinnakkhandhapariccāgā"ti. Avītarāgassa maraṇato paraṁ nāma bhavantarūpādānamevāti āha "paraṁ maraṇāti tadanantaraṁ abhinibbattakkhandhaggahaṇe"ti³. Yena tiṭṭhati, tassa upacchedeneva kāyo bhijjatīti āha "kāyassa bhedāti jīvitindriyassa upacchedā"ti. Eti imasmā sukhanti ayo, puññanti āha "puññasammatā ayā"ti. Āyanti etasmā sukhānīti āyo, puññakammādīnaṁ sukhasādhanaṁ. Tenāha "sukhānaṁ vā āyassa abhāvā"ti. Vivasāti kammassa vase vattanato attano vase vattituṁ na sakkontīti vigato vaso etesanti vivasā,

^{1.} Ma-Ttha 1. 337 pitthepi passitabbam.

^{3.} Abhinibbattakkhandhaggahanāti (Syā)

avasavattinoti attho. Iyati¹ assādīyatīti ayo, assādoti āha **"assādasaññito** ayo"ti.

Nāgarājādīnanti ādi-saddena supaṇṇādīnaṁ saṅgaho. Asurasadisanti petāsurasadisaṁ. So hīti so asurakāyo. Sabbasamussayehīti sabbehi sampattisamussayehi, sabbasampattirāsitoti vuttaṁ hoti. Vuttavipariyāyenāti "suṭṭhu caritaṁ, sobhanaṁ vā caritaṁ anavajjattāti sucaritam"ti-ādinā kāyaduccaritenāti-ādīnaṁ padānaṁ vuttassa atthassa vipariyāyena. "Ito bho sugatiṁ gacchā"ti² vacanato manussagatipi sugatiyevāti āha "sugatiggahaṇena manussagatipi saṅgayhatī"ti. Sesamettha vuttanayattā uttānatthato ca suviññeyyameva.

Dibbacakkhuñāṇakathā nitthitā.

Āsavakkhayañānakathā

14. Vipassanāpādakanti vipassanāya padatthānabhūtam. Vipassanā ca tividhā vipassakapuggalabhedena. Mahābodhisattānañhi paccekabodhisattānañca cintāmayañāṇasaṁvaddhitattā³ sayambhūñānabhūtā, itaresam sutamayañānasamvaddhitattā paropadesasambhūtā. Sā "thapetvā nevasaññānāsaññāyatanam avasesarūpārūpajjhānānam aññatarato vutthāyā"ti-ādinā anekadhā arūpamukhavasena catudhātuvavatthāne vuttānam tesam tesam dhātupariggahamukhānam aññataramukhavasena anekadhāva visuddhimagge nānānayato vibhāvitā. Mahābodhisattānam pana catuvīsatikotisatasahassamukhena pabhedagamanato nānānayam sabbaññutaññāṇasannissayassa ariyamaggañāṇassa adhitthānabhūtaṁ pubbabhāgañānagabbham ganhāpentam paripākam gacchantam paramagambhīram sanhasukhumataram anaññasādhāranam vipassanāñānam hoti. Yam atthakathāsu mahāvajiraññānanti vuccati. Yassa ca pavattivibhāgena catuvīsatikotisatasahassapabhedassa pādakabhāvena samāpajjiyamānā catuvīsatikotisatasahassasankhyā devasikam satthu vaļanjanakasamāpattiyo vuccanti, svāyam buddhānam vipassanācāro

^{1.} Ayati (Sī, Syā) 2. Khu 1. 248 piṭṭhe. 3. Cintāmayañāṇasaṁvaddhitā (Sī, Syā)

paramatthamañjusāyam visuddhimaggavaṇṇanāyam uddesato dassito, atthikehi tato gahetabbo.

Āsavānam khepanato samucchindanato āsavakkhayo ariyamaggo, ukkatthaniddesavasena arahattamaggaggahanam. Āsavānam khaye ñānam āsavakkhayañānanti dassento "tatra cetam ñānan"ti vatvā khayeti ca ādhāre bhummam, na visayeti dassento "tappariyāpannattā" ti āha. Idam dukkhanti dukkhassa ariyasaccassa tadā paccakkhato gahitabhāvadassanam. Ettakam dukkhanti tassa paricchijja gahitabhāvadassanam. Na ito bhiyyoti anavasesetvā gahitabhāvadassanam. Tenāha "sabbampi dukkhasaccan"ti-ādi. Sarasalakkhanapativedhenāti sabhāvasankhātassa lakkhanassa asammohato pativijihanena. Asammohapativedhoti ca yathā tasmim ñāne pavatte pacchā dukkhassa sarūpādiparicchede sammoho na hoti, tathā pavatti. Tenāha "yathābhūtam abbhaññāsin"ti. Nibbattikanti nipphādentam. Yam thānam patvāti yam nibbānam maggassa ārammanapaccayatthena kāranabhūtam āgamma. Tadubhayavato hi puggalassa patti tadubhayassa pattīti vuttam. Patvāti vā pāpunanahetu. Appavattinti appavattinimittam. Te vā na pavattanti etthati appavatti, nibbanam. Tassati dukkhanirodhassa. Sampāpakanti sacchikiriyāvasena sammadeva pāpakam.

Kilesavasenāti āsavasankhātakilesavasena. Yasmā āsavānam dukkhasaccapariyāyo, tappariyāpannattā, sesasaccānañca tamsamudayādipariyāyo atthi, tasmā vuttam "pariyāyato"ti. Dassento saccānīti yojanā. Āsavānamyeva cettha gahaṇam "āsavānam khayañāṇāyā"ti āraddhattā. Tathā hi āsavavimuttisīseneva sabbasamkilesavimutti vuttā. Idam dukkhanti yathābhūtam abbhaññāsinti-ādinā missakamaggo idha kathitoti "saha vipassanāya koṭippattam maggam kathetī"ti vuttam. Ettha ca saccappaṭivedhassa tadā atītakālikattā "yathābhūtam abbhaññāsin"ti vatvāpi abhisamayakāle tassa paccuppannatam upādāya "evam jānato evam passato"ti vattamānakālena niddeso kato. So ca kāmam maggakkhaṇato param yāvajjatanā atītakāliko eva, sabbapaṭhamam panassa atītakālikattam phalakkhaṇeneva¹

veditabbanti āha "vimuccitthāti iminā phalakkhaṇaṁ dassetī"ti. Jānato passatoti vā hetuniddesoyaṁ. Jānanahetu dassanahetu kāmāsavāpi cittaṁ vimuccitthāti yojanā. Bhavāsavaggahaṇeneva cettha bhavarāgassa viya bhavadiṭṭhiyāpi samavarodhoti diṭṭhāsavassapi saṅgaho daṭṭhabbo.

Yasmā pahīnakilesapaccavekkhaņena vijjamānassapi kammassa āyatim appatisandhikabhāvato "khīnā jātī"ti jānāti, yasmā ca maggapaccavekkhanādīhi vusitam brahmacariyanti-ādim pajānāti, tasmā vuttam "khīnājātīti-ādīhi tassa bhūmin"ti. Tattha tassāti paccavekkhanañānassa. **Bhūmi**nti pavattitthānam. Yenādhippāyena "katamā panā"ti-ādinā codanā katā, tam pakāsetvā parihāram vattukāmo āha "na tāvassā"ti-ādi. Na tāvassa atītā jāti khīņāti maggabhāvanāya na khīņāti adhippāyo. Tattha kāranamāha "pubbeva khīnattā"ti. Na anāgatā assa jāti khīnāti yojanā. **Na anāgatā**ti ca anāgatattasāmaññam gahetvā lesena vadati. Tenāha "anāgate vāyāmābhāvato"ti. Vijjamāneyeva hi payogo sambhavati, nāvijjamāneti adhippāyo. Anāgataviseso panettha adhippeto, tassa ca khepane vāyāmopi labbhateva. Tenāha "yā pana maggassā"ti-ādi. "Yā panā"ti hi ādinā maggabhāvanāya anāgatajātiyā eva hetuvināsanadvārena khīnabhāvo pakāsīyati. **Ekacatupañcavokārabhavesū**ti bhavattayaggahanam vuttanayena anavasesato jātiyā khīnabhāvadassanattham. **Tan**ti yathāvuttajātim. Soti bhagavā.

Brahmacariyavāso nāma idha maggabrahmacariyassa nibbattanamevāti āha "niṭṭhitan"ti. Sammādiṭṭhiyā catūsu saccesu pariññādikiccasādhanavasena pavattamānāya sammāsaṅkappādīnampi dukkhasacce pariññābhisamayānuguṇā pavatti, itarasaccesu ca nesaṁ pahānābhisamayādivasena pavatti pākaṭā eva. Tena vuttaṁ "catūhi maggehi pariññāpahānasacchikiriyābhāvanābhisamayavasenā"ti. Nāparaṁ itthattāyāti ime pakārā itthaṁ, tabbhāvo itthattaṁ, tadatthanti vuttaṁ hoti. Te pana pakārā ariyamaggabyāpārabhūtā pariññādayo idhādhippetāti āha "evaṁsoļasakiccabhāvāyā"ti. Te hi maggaṁ paccavekkhato maggānubhāvena pākatā hutvā

upaṭṭhahanti, pariññādīsu ca pahānameva padhānam, tadatthattāya itaresanti āha "kilesakkhayāya vā"ti. Pahīnakilesapaccavekkhaṇavasena vā etam vuttam. "Nāparam itthattāyāti abbhaññāsin"ti etthāyamaparo nayo— itthattāyāti nissakke sampadānavacanam. Tenāyamattho—itthattāya itthambhāvato imasmā evampakārā idāni vattamānakkhandhasantānā aparam anāgatakkhandhasantānam mayham natthi, ime pana carimattabhāvasankhātā pañcakkhandhā pariññātā appatiṭṭhā tiṭṭhanti chinnamūlakā rukkhā viya. Apariññātamūlakā hi patiṭṭhā. Yathāha "kabaļīkāre ce bhikkhave āhāre atthi rāgo atthi nandī atthi taṇhā, patiṭṭhitam tattha viññāṇam viruļhan"ti-ādi¹. Te pana pañcakkhandhā carimakaviññāṇanirodhena anupādāno viya jātavedo nibbāyissantīti abbhaññāsinti.

Paccavekkhanañānapariggahitanti na

paṭhamadutiyañāṇadvayādhigamaṁ viya kevalanti adhippāyo. **Dassento**ti nigamanavasena dassento. Sarūpato hi pubbe dassitamevāti. Sesamettha vuttanayattā suviññeyyameva.

Tikkhattum jātoti iminā pana idam dasseti "aham brāhmana pathamavijjāya jātoyeva purejātassa sahajātassa vā abhāvato sabbesam vuddho mahallako, kimangam pana tīhi vijjāhi tikkhattum jātoti. Pubbenivāsañānena atītamsañānanti atītārammanasabhāgatāya tabbhāvībhāvato ca pubbenivāsañānena atītamsañānam pakāsetvāti yojetabbam. Tattha atītamsañānanti atītakkhandhāyatanadhātusankhāte atītakotthāse appatihatañānam. Dibbacakkhuñānassa paccuppannārammanattā yathākammūpagañānassa anāgatamsañānassa ca dibbacakkhuvaseneva ijihanato dibbacakkhuno paribhandañānattā dibbacakkhumhiyeva ca thitassa cetopariyañānasiddhito vuttam "dibbacakkhunā paccuppannānāgatamsañānan"ti. Tattha dibbacakkhunāti saparibhandena dibbacakkhuñanena. Paccuppannamso ca anagatamso ca paccuppannānāgatamsam, tattha ñānam paccuppannānāgatamsañānam. Asavakkhayañāṇādhigameneva sabbaññutaññāṇassa viya sesāsādhāranañānadasabalañāna-āvenikabuddhadhammādīnampi anaññasādhāraṇānam buddhaguṇānam

ijjhanato vuttam "āsavakkhayena sakalalokiyalokuttaraguņan"ti. Tenāha "sabbepi sabbaññuguņe pakāsetvā"ti.

Āsavakkhayañāņakathā niţţhitā.

Desanānumodanakathā

15. Pītivipphāraparipuṇṇagattacittoti pītipharaṇena paripuṇṇakāyacitto. Aññāṇanti aññāṇassāti attho. Dhīsaddassa yogato hi sāmi-atthe etam upayogavacanam. Abhikkantāti ettha atikkantā, vigatāti atthoti āha "khaye dissatī"ti. Teneva hi "nikkhanto paṭhamo yāmo"ti vuttam. Abhikkantataro cāti ativiya kantataro manoramo, tādiso ca sundaro bhaddako nāma hotīti āha "sundare dissatī"ti. Koti devanāgayakkhagandhabbādīsu ko katamo. Meti mama. Pādānīti pāde. Iddhiyāti imāya evarūpāya deviddhiyā. Yasasāti iminā edisena parivārena paricchedena. Jalanti vijjotamāno. Abhikkantenāti ativiya kantena kamanīyena abhirūpena. Vaṇṇenāti chavivaṇṇena sarīravaṇṇanibhāya. Sabbā obhāsayam disāti dasapi disā pabhāsento cando viya sūriyo viya ca ekobhāsam ekālokam karontoti gāthāya attho. Abhirūpeti uļārarūpe sampannarūpe.

Abhikkantarii bho gotama, abhikkantarii bho gotamāti vacanadvayassa "sādhu sādhu bho gotamā"ti āmeḍitavasena attharii dassetvā tassa visayarii niddhārento āha "bhaye kodhe"ti-ādi. Tattha "coro coro, sappo sappo"ti-ādīsu bhaye āmeḍitarii. "Vijjha vijjha, pahara paharā"ti-ādīsu kodhe. "Sādhu sādhū"ti-ādīsu pasarisāyarii. "Gaccha gaccha, lunāhi lunāhī"ti-ādīsu turite. "Āgaccha āgacchā"ti-ādīsu kotūhale. "Buddho buddhoti cintento"ti-ādīsu¹ acchare. "Atikkamathāyasmanto, abhikkamathāyasmanto"ti-ādīsu² hāse. "Kaharii ekaputtaka, kaharii ekaputtakā"ti-ādīsu soke. "Aho sukharii, aho sukhan"ti-ādīsu³ pasāde. Ca-saddo

^{1.} Khu 4. 310 pitthe.

^{2.} Dī 3. 12; Am 3. 181 piṭṭhesu.

^{3.} Khu 1. 98; Vi 4. 339 pitthādīsu.

avuttasamuccayattho. Tena garaha-asammānādīnam sangaho daṭṭhabbo. Tattha "pāpo pāpo"ti-ādīsu **garahāyam.** "Abhirūpaka abhirūpakā"ti-ādīsu **asammāne** datthabbam.

Navidam āmeditavasena dvikkhattum vuttam, atha kho atthadvayavasenāti dassento "atha vā"ti-ādimāha. Abhikkantanti vacanam apekkhitvā napumsakalingavasena vuttam. Tam pana bhagavato vacanam dhammassa desanāti katvā vuttam "vadidam bhoto gotamassa dhammadesanā"ti. Atthamattadassanam vā etam, tasmā atthavasena lingavibhattiviparināmo veditabbo. Dutivapadepi eseva nayo. Dosanāsanatoti rāgādikilesaviddhamsanato. Gunādhigamanatoti sīlādigunānam sampāpanato. Ye gune desanā adhigameti, tesu padhānabhūtā gunā dassetabbāti te padhānabhūte gune tāva dassetum "saddhājananato paññājananato"ti vuttam. Saddhāpamukhā hi lokiyā gunā, paññāpamukhā lokuttarā. **Sātthato**ti-ādīsu sīlādi-atthasampattiyā **sātthato**, sabhāvaniruttisampattiyā sabyañjanato. Suviññeyyasaddappayogatāya uttānapadato, sanhasukhumabhāvena duviññeyyatthatāya gambhīratthato. Siniddhamudumadhurasaddappayogatāya kannasukhato, vipulavisuddhapemanīyatthatāya hadayangamato. Mānātimānavidhamanena anattukkamsanato, thambhasārambhanimmaddanena aparayambhanato. Hitādhippāyappavattiyā paresam rāgaparilāhādivūpasamanena karunāsītalato, kilesandhakāravidhamanena paññāvadātato. Karavīkarutamanījutāya **āpātharamanīvato**. pubbāparāviruddhasuvisuddhatthatāya vimaddakkhamato. Āpātharamanīyatāya eva **suyyamānasukhato,** vimaddakkhamatāya hitajjhāsayappavattitāya ca vīmamsiyamānahitatoti evamattho veditabbo. Evamādīhīti ādi-saddena samsāracakkanivattanato. saddhammacakkappavattanato, micchāvādavidhamanato, sammāvādapatitthāpanato¹, akusalamūlasamuddharanato, kusalamūlasamropanato, apāyadvārapidhānato, saggamaggadvāravivaranato, pariyutthānavūpasamanato, anusayasamugghātanatoti evamādīnam sangaho datthabbo.

Adhomukhaṭhapitanti kenaci adhomukhaṁ ṭhapitaṁ. Heṭṭhāmukhajātanti sabhāveneva heṭṭhāmukhaṁ jātaṁ. Ugghāṭeyyāti vivaṭaṁ kareyya.

^{1.} Micchācāravidhamanato, sammācārapatitthāpanato (Ka)

Hatthe gahetvāti "puratthābhimukho uttarābhimukho vā gacchā"ti-ādīni avatvā hatthe gahetvā "nissandeham esa maggo, evam gacchā" ti dasseyya. **Kālapakkhacātuddasī**ti kālapakkhe cātuddasī kālapakkhacātuddasī. Nikkujiitam ukkujieyvāti ādheyyassa anādhārabhūtam bhājanam ādhārabhāvāpādanavasena ukkujjeyya. Hetthāmukhajātatāya saddhammavimukham adhomukhathapitatāya asaddhamme patitthitanti evam padadvayam yathāraham yojetabbam, na yathāsankhyam. Kāmam kāmacchandādayopi paticchādakā nīvaranabhāvato, micchāditthi pana savisesam paticchādikā satte micchābhinivesanenāti āha "micchāditthigahanapaticchannan"ti. Tenāha bhagavā "micchāditthiparamāham bhikkhave vajjam vadāmī"ti. Sabbo apāyagāmimaggo kummaggo kucchito maggoti katvā, sammāditthi-ādīnam ujupatipakkhatāya micchāditthi-ādayo attha micchattadhammā micchāmaggo. Teneva hi tadubhayapatipakkhatam sandhāya "saggamokkhamaggam acikkhantena"ti vuttam. Sappi-adisannissayo padipo na tathā, ujjalo yathā telasannissayoti telapajjotaggahanam. **Etehi** pariyāyehīti etehi nikkujjitukkujjanapaticchannavivaranādiupamopamitabbappakārehi, etehi vā yathāvuttehi arasarūpatādīnam attani aññathā patipādanapariyāyehi attano dibbavihāravibhāvanapariyāyehi vijjattayavibhāvanāpadesena attano sabbaññugunavibhāvanapariyāyehi ca. Tenāha "anekapariyāyena dhammo pakāsito"ti.

Desanānumodanakathā niţţhitā.

Pasannākārakathā.

Pasannākāranti pasannehi kātabbam sakkāram. Saraṇam gacchāmīti ettha iti-saddo luttaniddiṭṭhoti āha "saraṇanti gacchāmī"ti. Ettha hi nāyam gamisaddo nīsaddādayo viya dvikammako, tasmā yathā ajam gāmam netīti vuccati, evam "gotamam saraṇam gacchāmī"ti vattum na sakkā, "saraṇanti gacchāmī"ti pana vattabbam, tasmā ettha iti-saddo luttaniddiṭṭhoti veditabbam. Saraṇanti paṭisaraṇam. Tenāha "parāyaṇan"ti.

Parāyaṇabhāvo ca anatthanisedhanena atthasampaṭipādanena ca hotīti āha "aghassa tātā hitassa ca vidhātā"ti. Aghassāti dukkhatoti vadanti, pāpatoti pana attho yutto, nisakke cetaṁ sāmivacanaṁ. Saraṇanti gamanañcettha tadadhippāyena bhajanaṁ tathā jānanaṁ vāti dassento "iti iminā adhippāyenā"ti-ādimāha. Tattha gacchāmīti-ādīsu purimassa purimassa pacchimaṁ pacchimaṁ atthavacanaṁ. Bhajanaṁ vā saraṇādhippāyena upasaṅkamanaṁ, sevanā santikāvacaratā, payirupāsanaṁ vattappaṭivattakaraṇena upaṭṭhānanti evaṁ sabbathāpi anaññasaraṇataṁyeva dīpeti. Gacchāmīti padassa kathaṁ bujjhāmīti ayamattho labbhatīti āha "yesaṁ hī"ti-ādi.

Adhigatamagge sacchikatanirodheti padadvayenapi phalatthā eva dassitā, na maggatthāti te dassento "yathānusittham patipajjamāne cā"ti āha. Nanu ca kalyānaputhujjanopi yathānusittham patipajjatīti vuccatīti? Kiñcāpi vuccati, nippariyāyena pana maggatthā eva tathā vattabbā, na itare niyāmokkamanābhāvato. Tathā hi te eva "apāyesu apatamāne dhāretī"ti vuttā. Sammattaniyāmokkamanena hi apāyavinimuttasambhavo. **Akkhāyatīti** ettha iti-saddo ādi-attho, pakārattho vā. Tena "yāvatā bhikkhave dhammā sankhatā vā asankhatā vā, virāgo tesam aggamakkhāyatī"ti 1 suttapadam sanganhāti, "vitthāro" ti vā iminā. Ettha ca ariyamaggo niyyānikatāya, nibbānam tassa tadatthasiddhihetutāyāti ubhayameva nippariyāyena dhammoti vutto. Nibbānañhi ārammanapaccayabhūtam labhitvā ariyamaggassa tadatthasiddhi, tathāpi ariyaphalānam "yasmā tāya saddhāya² avūpasantāyā"ti-ādivacanato maggena samucchinnānam kilesānam patippassaddhippahānakiccatāya niyyānānugunatāya niyyānapariyosānatāya ca. Pariyattidhammassa pana niyyānadhammasamadhigamahetutāyāti iminā pariyāyena vuttanayena dhammabhāvo labbhati eva, svāyamattho pāthārulho evāti dassento "na kevalan"ti-ādimāha.

Rāgavirāgoti maggo kathitoti kāmarāgo bhavarāgoti evamādibhedo sabbopi rāgo virajjati pahīyati etenāti rāgavirāgoti maggo kathito.

Anejamasokanti phalanti ejāsankhātāya

tanhāya antonijihānalakkhanassa sokassa ca taduppattiyam sabbaso parikkhīnattā anejamasokanti phalam kathitam. **Appatikūlan**ti avirodhadīpanato kenaci aviruddham, ittham panītanti vā attho. Pagunarūpena pavattitattā, pakatthagunavibhāvanato vā pagunam. Yathāha "gihimsasaññī pagunam na'bhāsim, dhammam panītam manujesu brahme"ti¹. Sabbadhammakkhandhā kathitāti yojanā. **Ditthisīlasaṅghātenā**ti "yāyam ditthi ariyā niyyānikā niyyāti takkarassa sammā dukkhakkhayāya, tathārūpāya ditthiyā ditthisāmaññagato viharatī"ti² evam vuttāya ditthiyā, "yāni tāni sīlāni akhandāni acchiddāni asabalāni akammāsāni bhujissāni viññuppasatthāni aparāmatthāni samādhisamvattanikāni, tathārūpehi sīlehi sīlasāmaññagato viharatī"ti³ evam vuttānam sīlānañca samhatabhāvena, ditthisīlasāmaññenāti attho. Samhatoti ghatito sametoti attho. Ariyapuggalā hi yattha katthaci dūre thitāpi attano gunasāmaggiyā samhatā eva. Attha ca puggalā dhammadasā teti purisayugalavasena cattāropi puggalavasena attheva ariyadhammassa paccakkhadassāvitāya dhammadasā. Tīni vatthūni sarananti gamanena tikkhattum gamanena ca tīni saranagamanāni. Paţivedesīti attano hadayangatam vācāya pavedesi.

Pasannākārakathā niṭṭhitā.

Saraṇagamanakathā

Saraṇagamanassa visayappabhedaphalasamkilesabhedānam viya kattu ca vibhāvanā tattha kosallāya hotīti "saraṇagamanesu kosallattham saraṇam -pa- veditabbo"ti vuttam tena vinā saraṇagamanasseva asambhavato. Tattha saraṇanti padatthato tāva himsatīti saraṇam. Himsatthassa hi sarasaddassa vasenetam padam daṭṭhabbam, tasmā saraṇagatānam teneva saraṇagamanena vaṭṭabhayam cittutrāsam kāyikam dukkham duggatipariyāpannam sabbampi dukkham hanati, vināsetīti attho. Ratanattayassevetam

^{1.} Ma 1. 226; Vi 3. 10 pitthesu. 2. Dī 3. 204, 237; Ma 1. 379; Ma 3. 39 pitthesu.

^{3.} Dī 3. 203; Ma 1. 397; Ma 3. 39; Am 2. 256; Vi 5. 168 pitthesu.

adhivacanam. Atha vā hite pavattanena "sampannasīlā bhikkhave viharathā"ti-ādinā¹ atthe niyojanena ahitā ca nivattanena "pānātipātassa kho pana pāpako vipāko, pāpakam abhisamparāyan"ti-ādinā ādīnavadassanādimukhena anatthato nivattanena sattānam bhayam himsati, hitāhitesu appavattipavattihetukam byasanam apavattikaranena vināseti buddho. Bhavakantāra-uttaranena maggasankhāto dhammo sattānam bhayam himsati, itaro assāsadānena. Appakānampi dānavasena pūjāvasena ca upanītānam sakkārānam vipulaphalapatilābhakaranena sattānam bhayam himsati samgho anuttaradakkhineyyabhāvato, tasmā imināpi vibhajitvā vuttapariyāyena ratanattayam saranam. "Sammāsambuddho bhagavā, svākkhāto dhammo suppatipanno samgho"ti evam pavattaratanattayapasādataggarukatāhi vidhutaditthivicikicchāsammohaassaddhiyāditāya vihatakileso tadeva ratanattayam saranam parāyanam gati tānam lenanti evam pavattivā tapparāyanatākārappavatto cittuppādo saranagamanam sarananti gacchati etenāti katvā. Tena vathāvuttacittuppādena samannāgato satto sarananti gacchati, vuttappakārena cittuppādena "etāni me tīni ratanāni saranam, etāni parāyanan"ti evam upeti bhajati sevati payirupāsati, evam vā jānāti, bujjhatīti attho. Evam tāva saranam, saranagamanam, yo ca saranam gacchati, idam tayam veditabbam.

Saraṇagamanappabhede pana duvidham saraṇagamanam lokuttaram lokiyañca. Tattha lokuttaram diṭṭhasaccānam maggakkhaṇe saraṇagamanupakkilesasamucchedanena ārammaṇato nibbānārammaṇam hutvā kiccato sakalepi ratanattaye ijjhati. Atthato catusaccādhigamo eva hi lokuttarasaraṇagamanam. Tattha hi nibbānadhammo sacchikiriyābhisamayavasena, maggadhammo bhāvanābhisamayavasena paṭivijjhiyamānoyeva saraṇagamanattham sādheti, buddhaguṇā pana sāvakagocarabhūtā pariññābhisamayavasena, tathā ariyasamghaguṇā. Tena vuttam "kiccato sakalepi ratanattaye ijjhatī"ti. Ijjhantañca saheva ijjhati, na lokiyam viya paṭipāṭiyā asammohapaṭivedhena paṭividdhattā. Ye pana vadanti "na saraṇagamanam nibbānārammaṇam hutvā pavattati, maggassa adhigatattā pana adhigatameva hoti ekaccānam

tevijjādīnam lokiyavijjādayo viyā"ti, tesam lokiyameva saraṇagamanam siyā, na lokuttaram. Tañca ayuttam duvidhassapi icchitabbattā. Lokiyam pana saraṇagamanam puthujjanānam saraṇagamanupakkilesavikkhambhanena ārammaṇato buddhādīguṇārammaṇam hutvā ijjhati. Tam atthato buddhādīsu vatthūsu "sammāsambuddho bhagavā"ti-ādinā saddhāpaṭilābho yathāvuttasaddhāpubbaṅgamā ca sammādiṭṭhi, dasasu puññakiriyavatthūsu diṭṭhijukammanti vuccati. Ettha ca "saddhāpaṭilābho"ti iminā mātādīhi ussāhitadārakādīnam viya ñāṇavippayuttasaraṇagamanam dassitanti veditabbam. "Sammādiṭṭhī"ti iminā pana ñāṇasampayuttam saraṇagamanam dassitam buddhasubuddhatam dhammasudhammatam saṃghasuppaṭipattiñca lokiyāvabodhavaseneva sammā ñāyena dassanato.

Tayidam lokiyasaraṇagamanam catudhā pavattati attasanniyyātanena tapparāyaṇatāya sissabhāvūpagamanena paṇipātenāti. Tattha attasanniyyātanam nāma "ajja ādim katvā aham attānam buddhassa niyyātemi, dhammassa, saṃghassā"ti evam buddhādīnaṃyeva saṃsāradukkhanittharaṇattham attano attabhāvassa pariccajanam.

Tapparāyaṇatā nāma "ajja ādim katvā aham buddhaparāyaṇo dhammaparāyaṇo saṃghaparāyaṇoti mam dhārethā"ti evam tapparāyaṇabhāvo. Sissabhāvūpagamanam nāma "ajja ādim katvā 'aham buddhassa antevāsiko, dhammassa, saṃghassā'ti mam dhārethā"ti evam sissabhāvūpagamo. Paṇipāto nāma "ajja ādim katvā 'aham abhivādanam paccuṭṭhānam añjalikammam sāmīcikammam buddhādīnamyeva tiṇṇam vatthūnam karomī'ti mam dhārethā"ti evam buddhādīsu paramanipaccakāro. Imesañhi catunnam ākārānam aññatarampi karontena gahitamyeva hoti saranagamanam.

Apica "bhagavato attānaṁ pariccajāmi, dhammassa, saṁghassa attānaṁ pariccajāmi, jīvitaṁ pariccajāmi, pariccattoyeva me attā, pariccattaṁyeva me jīvitaṁ, jīvitapariyantikaṁ buddhaṁ saraṇaṁ gacchāmi, buddho me saraṇaṁ leṇaṁ tāṇan"ti evampi **attasanniyyātanaṁ** veditabbaṁ. "Satthārañca vatāhaṁ passāmi, bhagavantameva passāmi, sugatañca vatāhaṁ passāmi, bhagavantameva passāmi, sammāsambuddhañca vatāhaṁ passāmi, bhagavantameva passāmi"ti¹ evaṁ mahākassapattherassa saraṇagamanaṁ viya **sissabhāvūpagamanaṁ** daṭṭhabbaṁ.

"So aham vicarissāmi, gāmā gāmam purā puram. Namassamāno sambuddham, dhammassa ca sudhammatam¹.

Te mayam vicarissāma, gāmā gāmam nagā nagam -pasudhammatan"ti²—

evampi āļavakasātāgirahemavatādīnam saraņagamanam viya **tapparāyaṇatā** veditabbā. Nanu cete āļavakādayo maggeneva āgatasaraṇagamanā, katham tesam tapparāyaṇatāsaraṇagamanam vuttanti?

Maggenāgatasaraṇagamanehipi "sohaṁ vicarissāmi gāmā gāman"ti-ādinā¹ tehi tapparāyaṇatākārassa paveditattā tathā vuttaṁ. Atha kho brahmāyu brāhmaṇo uṭṭhāyāsanā ekaṁsaṁ uttarāsaṅgaṁ karitvā bhagavato pādesu sirasā nipatitvā bhagavato pādāni mukhena ca paricumbati, pāṇīhi ca parisambāhati, nāmañca sāveti "brahmāyu ahaṁ bho gotama brāhmaṇo, brahmāyu ahaṁ bho gotama brāhmaṇo"ti³ evampi **paṇipāto** daṭṭhabbo.

So panesa ñātibhayācariyadakkhiņeyyatāvasena⁴ catubbidho hoti. Tattha dakkhiņeyyatāhetukena paṇipātena saraṇagamanam hoti, na itarehi ñātibhayādivasappavattehi tīhi paṇipātehi. Seṭṭhavaseneva hi saraṇam gayhati, seṭṭhavasena bhijjati, tasmā yo sākiyo vā koliyo vā "buddho amhākam ñātako"ti vandati, aggahitameva hoti saraṇam. Yo vā "samaṇo gotamo rājapūjito mahānubhāvo avandiyamāno anatthampi kareyyā"ti bhayena vandati, aggahitameva hoti saraṇam. Yopi bodhisattakāle bhagavato santike kiñci uggahitam saramāno buddhakāle vā—

"Ekena bhogam bhuñjeyya, dvīhi kammam payojaye. Catutthañca nidhāpeyya, āpadāsu bhavissatī"ti⁵—

evarūpim diṭṭhadhammikam anusāsanim uggahetvā "ācariyo me"ti vandati, aggahitameva hoti saraṇam, samparāyikam pana niyyānikam vā anusāsanim paccāsīsanto dakkhiṇeyyapaṇipātameva karoti. Yo pana "ayam loke aggadakkhiṇeyyo"ti vandati, teneva gahitam hoti saraṇam.

^{1.} Sam 1. 217; Khu 1. 307 pitthesu. 2. Khu 1. 305 pitthe. 3. Ma 2. 345 pitthe.

^{4.} Ñātibhayācariyadakkhiņeyyavasena (Dī-Ṭṭha 1. 207; Ma-Ṭṭha 1. 137; Aṁ-Ṭṭha 2. 18 pitthesu.)
5. Dī 3. 153 pitthe.

Evam gahitasaraṇassa ca upāsakassa vā upāsikāya vā aññatitthiyesu pabbajitampi ñātim "ñātako me ayan"ti vandatopi saraṇagamanam na bhijjati, pageva apabbajitam. Tathā rājānam bhayavasena vandato. So hi raṭṭhapūjitattā avandiyamāno anatthampi kareyyāti. Tathā yam kiñci sippasikkhāpakam titthiyampi "ācariyo me ayan"ti vandatopi na bhijjati. Evam saraṇagamanassa pabhedo veditabbo.

Saranagamanakathā nitthitā.

Saranagamanaphalakathā

Ettha ca lokuttarassa saraṇagamanassa cattāri sāmaññaphalāni vipākaphalaṁ ariyamaggasseva lokuttarasaraṇagamananti adhippetattā. Sakalassa pana vaṭṭadukkhassa anuppādanirodho ānisaṁsaphalaṁ. Vuttañhetaṁ—

"Yo ca buddhañca dhammañca, saṁghañca saraṇaṁ gato. Cattāri ariyasaccāni, sammappaññāya passati.

Dukkham dukkhasamuppādam, dukkhassa ca atikkamam. Ariyañcaṭṭhaṅgikam maggam, dukkhūpasamagāminam.

Etam kho saranam khemam, etam saranamuttamam. Etam saranam gamma, sabbadukkh pamuccatī 'ti¹.

Apica niccato anupagamanādivasenapetassa ānisamsaphalam veditabbam. Vuttañhetam—

"Aṭṭhānametaṁ bhikkhave anavakāso, yaṁ diṭṭhisampanno puggalo kañci saṅkhāraṁ niccato upagaccheyya, sukhato upagaccheyya, kañci dhammaṁ attato upagaccheyya, mātaraṁ jīvitā voropeyya, pitaraṁ jīvitā voropeyya, arahantaṁ jīvitā voropeyya, paduṭṭhacitto tathāgatassa lohitaṁ uppādeyya, saṁghaṁ bhindeyya, aññaṁ satthāraṁ uddiseyya, netaṁ thānaṁ vijjatī"ti².

Lokiyassa pana saraṇagamanassa bhavasampadāpi bhogasampadāpi phalameva. Vuttañhetaṁ—

"Ye keci buddham saranam gatāse, Na te gamissanti apāyabhūmim. Pahāya mānusam deham, Devakāyam paripūressantī"ti¹.

Aparampi vuttam—

"Atha kho sakko devānamindo asītiyā devatāsahassehi saddhim yenāyasmā mahāmoggallāno tenupasaṅkami -pa- ekamantaṁ ṭhitaṁ kho sakkaṁ devānamindaṁ āyasmā mahāmoggallāno etadavoca 'sādhu kho devānaminda buddhasaraṇagamanaṁ hoti, buddhasaraṇagamanahetu kho devānaminda evamidhekacce sattā kāyassa bhedā paraṁ maraṇā sugatiṁ saggaṁ lokaṁ upapajjanti. Te aññe deve dasahi ṭhānehi adhigaṇhanti dibbena āyunā dibbena vaṇṇena sukhena yasena ādhipateyyena dibbehi rūpehi saddehi gandhehi rasehi photthabbehī'ti"².

Esa nayo dhamme samghe ca.

Apica velāmasuttēdivasenapi saraṇagamanassa phalaviseso veditabbo. Tathā hi velāmasutte³ "karīsassa catutthabhāgappamāṇānaṁ caturāsītisahassasaṅkhyānaṁ suvaṇṇapātirūpiyapātikaṁsapātīnaṁ yathākkamaṁ rūpīyasuvaṇṇahiraññapūrānaṁ sabbālaṅkārapaṭimaṇḍitānaṁ caturāsītiyā hatthisahassānaṁ caturāsītiyā assasahassānaṁ caturāsītiyā rathasahassānaṁ caturāsītiyā dhenusahassānaṁ caturāsītiyā kaññāsahassānaṁ caturāsītiyā pallaṅkasahassānaṁ caturāsītiyā vatthakoṭisahassānaṁ aparimāṇassa ca khajjabhojjādibhedassa āhārassa pariccajanavasena sattamāsādhikāni satta saṁvaccharāni nirantaraṁ pavattavelāmamahādānato ekassa sotāpannassa dinnaṁ mahapphalataraṁ, tato sataṁ sotāpannānaṁ dinnadānato ekassa sakadāgāmino,

tato ekassa anāgāmino, tato ekassa arahato, tato ekassa paccekasambuddhassa, tato sammāsambuddhassa, tato buddhappamukhassa samghassa dinnadānam mahapphalataram, tato cātuddisam samgham uddissa vihārakaraṇam, tato saraṇagamanam mahapphalataran"ti pakāsitam. Vuttañhetam—

"Yam gahapati velāmo brāhmaņo dānam adāsi mahādānam, yo cekam diṭṭhisampannam bhojeyya, idam tato mahapphalataran"ti¹—ādi. Evam saraṇagamanaphalam veditabbam.

Sāraņagamanaphalakathā niṭṭhitā.

Saranagamanasamkilesabhedakathā

Tattha ca lokiyasaraṇagamanam tīsu vatthūsu aññāṇasamsayamicchāñāṇādīhi samkilissati, na mahājutikam, na ujjalam aparisuddham apariyodātam hoti, na mahāvipphāram anuļāram. Ettha ca aññāṇam nāma vatthuttayassa guṇānam ajānanam tattha sammoho. "Buddho nu kho, na nu kho"ti-ādinā vicikicchā samsayo. Micchāñāṇam nāma tassa guṇānam aguṇabhāvaparikappanena viparītaggāhoti veditabbam. Lokuttarassa pana saraṇagamanassa natthi samkileso. Lokiyassa ca saraṇagamanassa duvidho bhedo sāvajjo anavajjo ca. Tattha sāvajjo aññasatthārādīsu attaniyyātanādīhi hoti, so aniṭṭhaphalo. Anavajjo pana kālakiriyāya hoti. Lokiyañhi saraṇagamanam sikkhāpadasamādānam viya aggahitakālaparicchedakam jīvitapariyantameva hoti, tasmā tassa khandhabhedena bhedo, so avipākattā aphalo. Lokuttarassa pana nevatthi bhedo. Bhavantarepi hi ariyasāvako aññam satthāram na uddisatīti. Evam saraṇagamanassa samkileso ca bhedo ca veditabbo.

Kasmā panettha vodānam na gahitam, nanu vodānavibhāvanāpi tattha kosallāya hotīti? Saccametam, tam pana samkilesaggahaņena atthato dīpitam hotīti na gahitam. Yāni hi tesam samkilesakāranāni

aññāṇādīni, tesaṁ sabbena sabbaṁ anuppādanena uppannānañca pahānena vodānaṁ hotīti. Evamettha "saraṇaṁ saraṇagamanan"ti-ādīnaṁ papañco veditabbo. Imassa pana yathāvuttapapañcassa idha avacane kāraṇaṁ dassento āha "so pana idha vuccamāno"ti-ādi. Tattha saraṇavaṇṇanatoti sāmaññaphalasutte vuttasaraṇavaṇṇanato.

Saraṇagamanasamkilesabhedakathā niṭṭhitā.

Upāsakattapativedanākathā

Evam dhāretūti evam jānātūti attho. Ettha ko upāsakoti sarūpapucchā, tasmā kimlakkhaņo upāsakoti vuttam hoti. Kasmāti hetupucchā. Tena kena pavattinimittena upāsakasaddo tasmim puggale niruļhoti dasseti. Tenāha "kasmā upāsakoti vuccatī"ti. Saddassa hi abhidheyyapavattinimittam tadatthassa tabbhāvakāraṇam. Kimassa sīlanti kīdisam assa upāsakassa sīlam, kittakena sīlenāyam sīlasampanno nāma hotīti attho. Ko ājīvoti ko assa sammā-ājīvo. So pana micchājīvassa parivajjanena hotīti sopi vibhajīyati. Kā vipattīti kassa sīlassa ājīvassa vā vipatti. Anantarassa hi vidhi vā paṭisedho vā. Sampattīti etthāpi eseva nayo.

Idam pakinnakam veditabbanti katham veditabbam? Vuccate—ko upāsakoti khattiyādīsu yo koci tisaraṇam gato gahaṭṭho. Saraṇagamanameva hettha kāraṇam, na jāti-ādiviseso. Vuttañhetam "yato kho mahānāma buddham saraṇam gato hoti, dhammam, samgham saraṇam gato hoti. Ettāvatā kho mahānāma upāsako hotī"ti¹.

Kasmā upāsakoti ratanattaya-upāsanato. Teneva saraṇagamanena tattha ca sakkaccakiriyāya ādaragāravabahumānādiyogena payirupāsanatoti vuttam hoti. So hi buddham upāsatīti upāsako. Dhammam, samgham upāsatīti upāsako.

Kimassa sīlanti pañca veramaṇiyo. Veramaṇiyoti cettha veram vuccati pāṇātipātādīsu dussīlyam, tassa mananato hananato vināsanato veramaṇiyo pañca viratiyo viratippadhānattā tassa sīlassa. Vuttañhetam "yato kho mahānāma upāsako pāṇātipātā paṭivirato hoti, adinnādānā, kāmesumicchācārā, musāvādā, surāmerayamajjapamādaṭṭhānā paṭivirato hoti. Ettāvatā kho mahānāma upāsako sīlavā hotī"ti¹.

Ko ājīvoti pañca micchāvaņijjā pahāya dhammena samena jīvitakappanam. Vuttañhetam "pañcimā bhikkhave vaņijjā upāsakena akaraņīyā. Katamā pañca? Satthavaņijjā sattavaņijjā mamsavaņijjā majjavaņijjā visavaņijjā. Imā kho bhikkhave pañca vaņijjā upāsakena akaranīyā"ti².

Ettha ca satthavaṇijjāti āvudhabhaṇḍaṁ katvā vā kāretvā vā yathākataṁ vā paṭilabhitvā tassa vikkayo. Sattavaṇijjāti manussavikkayo. Maṁsavaṇijjāti sūnakārādayo viya migasūkarādike posetvā maṁsaṁ sampādetvā vikkayo. Majjavaṇijjāti yaṁ kiñci majjaṁ yojetvā tassa vikkayo. Visavaṇijjāti visaṁ yojetvā saṅgahetvā vā tassa vikkayo. Tattha satthavaṇijjā paroparodhanimittatāya akaraṇīyā vuttā, sattavaṇijjā abhujissabhāvakaraṇato, maṁsavisavaṇijjā vadhahetuto, majjavaṇijjā pamādatthānatoti veditabbā.

Kā vipattīti yā tasseva sīlassa ca ājīvassa ca vipatti bhedo kopo pakopo ca, ayamassa vipatti. Apica yāya esa caṇḍālo ceva hoti malañca paṭikuṭṭho ca, sāpissa vipattīti veditabbā. Te ca atthato assaddhiyādayo pañca dhammā honti. Yathāha—

"Pañcahi bhikkhave dhammehi samannāgato upāsako upāsakacaṇḍālo ca hoti upāsakamalañca upāsakapaṭikuṭṭho ca. Katamehi pañcahi? Assaddho hoti, dussīlo hoti, kotūhalamaṅgaliko hoti, maṅgalaṁ pacceti, no

kammam, ito ca bahiddhā dakkhineyyam pariyesati, tattha ca pubbakāram karotī"ti¹.

Ettha ca **upāsakapaṭikuṭṭho**ti upāsakanihīno. Buddhādīsu kammakammaphalesu ca saddhāvipariyāyo assaddhiyam micchādhimokkho, yathāvuttena assaddhiyena samannāgato **assaddho.** Yathāvuttasīlavipattiājīvavipattivasena **dussīlo.** "Iminā diṭṭhādinā idam nāma maṅgalam hotī"ti evam bālajanaparikappitakotūhalasaṅkhātena diṭṭhasutamutamaṅgalena samannāgato **kotūhalamaṅgaliko. Maṅgalam paccetī**ti diṭṭhamaṅgalādibhedam maṅgalameva pattiyāyati. **No kamman**ti kammassakatam no pattiyāyati. **Ito bahiddhā**ti ito sabbaññubuddhasāsanato bahiddhā bāhirakasamaye. **Dakkhiņeyyam pariyesatī**ti duppaṭipannam dakkhiṇārahasaññī gavesati. **Pubbakāram karotī**ti dānamānanādikam kusalakiriyam paṭhamataram karoti. Ettha ca dakkhineyyapariyesanapubbakāre ekam katvā pañca dhammā veditabbā.

Kā sampattīti sāva tassa sīlasampadā ca ājīvasampadā ca sampatti, ye cassa ratanabhāvādikarā saddhādayo pañca dhammā. Yathāha—

"Pañcahi bhikkhave dhammehi samannāgato upāsako upāsakaratanañca hoti upāsakapadumañca upāsakapuṇḍarīko ca. Katamehi pañcahi? Saddho hoti, sīlavā hoti, na kotūhalamaṅgaliko hoti, kammaṁ pacceti, no maṅgalaṁ, na ito bahiddhā dakkhiṇeyyaṁ pariyesati, idha ca pubbakāraṁ karotī"ti¹.

Ettha ca catunnampi parisānam ratijananaṭṭhena upāsakova ratanam upāsakaratanam, guṇasobhākittisaddasugandhatāhi upāsakova padumam upāsakapadumam, tathā upāsakapuṇḍarīko ca veditabbo. Sesamettha vipattiyam vuttavipariyāyena viñneyyam. Evamidam "ko upāsako"ti-ādikam pakiṇṇakam vitthārato veditabbam. Imassa pana pakiṇṇakassa idha vitthāretvā avacane kāraṇam dassento āha "tam atibhāriyakaraṇato"ti-ādi.

Ādimhīti-ādi-atthe. Koṭiyanti pariyantakoṭiyam. Vihāraggenāti ovarakakoṭṭhāsena, "imasmim gabbhe vasantānam idam panasaphalam pāpuṇātī"ti-ādinā tamtamvasanaṭṭhānakoṭṭhāsenāti attho. Ajjatanti ajja icceva attho. Pāṇehi upetanti iminā tassa saraṇagamanassa āpāṇakoṭikatam dassento "yāva me jīvitam pavattatī"ti-ādīni vatvā puna jīvitenapa'ham¹ vatthuttayam paṭipūjento saraṇagamanañca rakkhāmīti uppannam tassa brāhmaṇassa adhippāyam vibhāvento "ahañhī"ti-ādimāha. Pāṇehi upetanti hi yāva me pāṇā dharanti, tāva saraṇam upetam, upento na vācāmattena na ekavāram cittuppādanamattena, atha kho pāṇānam pariccajanavasena yāvajīvam upetanti evamettha attho veditabbo.

Adhivāsetūti sādiyatu, tam pana sādiyanam manasā sampaṭiggaho hotīti āha "sampaṭicchatū"ti. Kāyaṅganti kāyameva aṅganti vadanti, kāyassa vā aṅgam sīsādi kāyaṅgam, sīsādi sarīrāvayavanti vuttam hoti. Vācaṅganti "hotu sādhū"ti evamādivācāya aṅgam avayavam. Vācaṅgassa copanam vācāya pavattanamevāti veditabbam. Abbhantareyevāti attano cittasantāneyeva. Khantim cāretvāti khantim pavattetvā, rucim uppādetvāti vuttam hoti. "Khantim dhāretvā"tipi pāṭho, uppannam rucim abbhantareyeva dhāretvā vacībhedena apakāsetvāti vuttam hoti.

Katham pana veranjo brāhmaņo bhagavato adhivāsanam annāsi. Na hi tena sakkā bhagavato cittappavatti paccakkhato vinnātum, tasmā "bhagavato adhivāsanam viditvā" ti kasmā vuttanti ce? Kincāpi tena na sakkā cittappavatti paccakkhato vinnātum, tathāpi ākārasallakkhaņakusalatāya anvayabyatirekavasena anumānato annāsīti dassento āha "sace me samaņo gotamo" ti-ādi. Ākārasallakkhaņakusalatāyāti cittappavatti-ākāravijānane chekatāya, adhippāyavijānane kusalatāyāti vuttam hoti.

Dasanakhasamodhānasamujjalanti dvīsu hatthesu dasannaṁ nakhānaṁ samodhānena ekībhāvena samujjalantaṁ. Añjalinti hatthapuṭaṁ. Paṭimukhoyevāti abhimukhoyeva, na bhagavato piṭṭhiṁ dassetvāti attho. Vanditvāti pañcapatitthitena vanditvā.

Upāsakattapaţivedanākathā niţţhitā.

Dubbhikkhakathā

16. Susassakālepīti sampannasassakālepi. Atisamagghepīti atisayena appagghepi, yadā kiñcideva datvā bahum pubbaṇṇāparaṇṇam gaṇhanti, tādise kālepīti attho. Sāli-ādi dhaññam pubbaṇṇam, muggamāsādi aparaṇṇam. Dvidhā pavattam īhitam etthāti dvīhitikāti majjhapadalopībāhiratthasamāsoyamīti dassento āha "dvidhā pavatta-īhitikā"ti. Īhanam īhitanti īhitasaddoyam bhāvasādhanoti āha "īhitam nāma iriyā"ti. Tattha iriyāti kiriyā. Kassa panesā kiriyāti āha "citta-iriyā"ti, cittakiriyā cittappayogoti attho. Tenevāha "citta-īhā"ti. Katham panettha īhitassa dvidhā pavattīti āha "lacchāma nu kho"ti-ādi. Tattha lacchāma nu khoti idam duggatānam vasena vuttam. Jīvitum vā sakkhissāma nu kho, noti idam pana issarānam vasena vuttanti veditabbam. Bhikkhamānāti yācamānā. "Duhitikā"tipi pāṭho. Tatthāpi vuttanayenevattho veditabbo. Dvi-saddassa hi du-saddādesenāyam niddeso hoti. Dukkham vā īhitam ettha na sakkā koci payogo sukhena kātunti duhitikā, dukkarajīvitappayogāti attho.

Du-sadde vā ukārassa vakāram katvā dvīhitikāti ayam niddesoti āha "atha vā"ti-ādi. Byādhi rogoti etāni "āturatā"ti imassa vevacanāni. Tena setaṭṭikā nāma ekā rogajātīti dasseti. So pana rogo pāṇakadosena sambhavati. Eko kira pāṇato nāḷamajjhagatam gaṇṭhim vijjhati, yena viddhattā nikkhantampi sālisīsam khīram gahetum na sakkoti. Kenāha "pacchinnakhīran"ti-ādi.

Vuttasassanti vapitasassam. Tatthāti verañjāyam. Salākāmattam vuttam etthāti salākāvuttā, purimapade uttarapadalopenāyam niddeso. Tenāha "salākā eva sampajjatī"ti. Yam tattha vuttam vāpitam, tam salākāmattameva ahosi, phalam na jāyatīti attho. Sampajjatīti ca iminā "salākāvuttā"ti etthāyam vuttasaddo nipphatti-atthoti dasseti. Salākāyāti veļuvilīvatālapaṇṇādīhi katasalākāya. Dhaññavikkayakānam santikanti dhaññam vikkiṇantīti dhaññavikkayakā, tesam samīpanti attho. Kayakesūti dhaññagaṇhanakesu. Kiṇitvāti gahetvā. Dhaññakaraṇaṭṭhāneti koṭṭhāgārassa samīpaṭṭhāne, dhaññaminanaṭṭhāneti vuttam

hoti. Vaṇṇajjhakkhanti kahāpaṇaparikkhakam. Nasukarā uñchena paggahena yāpetunti paggayhatīti paggaho, patto. Tena paggahena pattenāti attho, pattam gahetvā bhikkhācariyāya yāpetum na sakkāti vuttam hoti. Tenevāha "paggahena yo uñcho"ti-ādi. Nasukarāti sukarabhāvo ettha natthīti nasukarā. Piṇḍāya caritvāti piṇḍāya caraṇahetu. Hetu-atthepi hi tvāsaddameke icchanti.

Uttarāpathato āgatā, uttarāpatho vā nivāso etesanti uttarāpathakāti vattabbe niruttinayena "uttarāhakā"ti vuttam. Tenāha "uttarāpathavāsikā"tiādi. "Uttarāpathakā"icceva vā pāļipāṭho veditabbo. Keci pana "uttaram visiṭṭham bhaṇḍam āharantīti uttarāhakā, uttaram vā adhikam aggham nentīti uttarāhakā"ti-ādinā aññena pakārena attham vaṇṇayanti. Assānam uṭṭhānaṭṭhāneti assānam ākaraṭṭhāne. Verañjanti verañjāyam. Bhummatthe hetam upayogavacanam. Mandiranti assasālam. Assamaṇḍalikāyoti paññāyimsūti parimaṇḍalākārena katattā assamaṇḍalikāyoti pākaṭā ahesum. Evam katānañca assasālānam bahuttā bahuvacananiddeso kato. Dasannam dasannam assānam vasanokāso ekekā assamaṇḍalikātipi vadanti. Addhānakkhamā na hontīti dīghakālam pavattetum khamā na honti, na cirakālappavattinoti vuttam hoti.

Gaṅgāya dakkhiṇā disā appatirūpadeso, uttarā disā patirūpadesoti adhippāyenāha "na hi te"ti-ādi. Gaṅgāya dakkhiṇatīrajātā dakkhiṇāpathamanussā. "Amhākaṁ buddho"ti evaṁ buddhaṁ mamāyantīti buddhamāmakā. Evaṁ sesesupi. Paṭiyādetunti sampādetuṁ. Niccabhattasaṅkhepenāti niccabhattākārena. Pubbaṇhasamayanti idaṁ bhummatthe upayogavacananti āha "pubbaṇhasamayeti attho"ti. Accantasaṁyoge vā idaṁ upayogavacananti dassetuṁ yathā accantasaṁyogattho sambhavati, tathā atthaṁ dassento āha "pubbaṇhe vā samayan"ti-ādi. Evanti evaṁ pacchā vuttanayena atthe vuccamāne. Nanu ca vihāre nisīdantāpi antaravāsakaṁ nivāsetvāva nisīdanti, tasmā "nivāsetvā"ti idaṁ kasmā vuttanti āha "vihāranivāsanaparivattanavasenā"ti-ādi. Vihāranivāsanaparivattanañca vihāre nisinnakāle nivatthampi puna gāmappavesanasamaye

cāletvā ito cito ca saṇṭhapetvā sakkaccaṁ nivāsanamevāti veditabbaṁ. Tenevāha "na hi te tato pubbe anivatthā ahesun"ti. Pattacīvaramādāyāti pattañca cīvarañca gahetvā. Gahaṇañcettha na kevalaṁ hattheneva, atha kho yena kenaci ākārena dhāraṇamevāti dassento yathāsambhavamatthayojanaṁ karoti "pattaṁ hatthehī"ti-ādinā.

Gatagataṭṭhāneti assamaṇḍalikāsu sampattasampattaṭṭhāne. Udukkhale koṭṭetvā koṭṭetvā paribhuñjantīti ettha kasmā pana te bhikkhū sayameva evam katvā paribhuñjanti, kimevam laddham kappiyakārakehi yāgum vā bhattam vā pacāpetvā sayam vā pacitvā paribhuñjitum na vaṭṭatīti āha "therānam koci kappiyakārako natthī"ti-ādi. Kappiyākappiyabhāvam anapekkhitvā bhikkhūnam evam kātum sāruppam na hotīti vatvā puna akappiyabhāvampi dassento āha "na ca vaṭṭatī"ti. Bhājanādipariharaṇavasena bahubhaṇḍikatāya abhāvato vuttam "sallahukavuttitā"ti. Sakam sakam paṭivīsanti attano attano koṭṭhāsam. Appossukkāti samaṇadhammato aññattha nirussāhā. Tadupiyanti tadanurūpam. Pisatīti cuṇṇeti. Puññañāṇavisesehi kattabbakammassa manāpatā hotīti āha "puññavatā"ti-ādi. Nanti nam patthapulakam. "Na tato paṭṭhāyā"ti vacanato tato pubbe bhagavato piṇḍāya caraṇampi dassitanti veditabbam.

Laddhāti labhitvā. "Laddho"ti vā pāṭho, upaṭṭhākaṭṭhānaṁ neva laddhoti attho. Kadā pana thero upaṭṭhākaṭṭhānaṁ laddhoti? Vuccate¹—ekadā kira bhagavā nāgasamālattherena saddhiṁ addhānamaggappaṭipanno dvedhāpathaṁ patto. Thero maggā ukkamma "bhagavā ahaṁ iminā maggena gacchāmī"ti āha. Atha naṁ bhagavā "ehi bhikkhu, iminā gacchāmā"ti āha. So "handa bhagavā tumhākaṁ pattacīvaraṁ gaṇhatha, ahaṁ iminā gacchāmī"ti vatvā pattacīvaraṁ chamāyaṁ ṭhapetuṁ āraddho. Atha bhagavā "āhara bhikkhū"ti vatvā pattacīvaraṁ gahetvā gato. Tassapi bhikkhuno itarena maggena gacchato corā pattacīvaraňceva hariṁsu, sīsañca bhindiṁsu. So "bhagavā dāni me paṭisaraṇaṁ, na añňo"ti cintetvā lohitena gaļantena bhagavato santikaṁ āgami. "Kimidaṁ bhikkhū"ti ca vutte taṁ pavattiṁ ārocesi.

Atha nam bhagavā "mā cintayi bhikkhu, etam kāraṇamyeva te nivārayimhā"ti vatvā samassāsesi.

Ekadā pana bhagavā meghiyattherena saddhim pācīnavamsamigadāve jantugāmam agamāsi. Tatrāpi meghiyo jantugāme pindāya caritvā nadītīre pāsādikam ambavanam disvā "bhagavā tumhākam pattacīvaram ganhatha, aham etasmim ambavane samanadhammam karomī"ti vatvā bhagavatā tikkhattum nivāriyamānopi gantvā akusalavitakkehi anvāsatto paccāgantvā tam pavattim ārocesi. Tampi bhagavā "idameva te kāranam sallakkhayitvā nivārayimhā"ti vatvā anupubbena sāvatthim agamāsi. Tattha gandhakutiparivene paññattavarabuddhāsane nisinno bhikkhusamghaparivuto bhikkhū āmantesi "bhikkhave idānimhi mahallako, ekacce bhikkhū 'iminā maggena gacchāmā'ti vutte aññena gacchanti, ekacce mayham pattacīvaram bhūmiyam nikkhipanti, mayham nibaddhupatthākam bhikkhum jānāthā"ti. Bhikkhūnam dhammasamvego udapādi. Athāyasmā sāriputto utthāya bhagavantam vanditvā "aham bhante tumheyeva patthayamāno satasahassakappādhikam asankhyeyyam pāramiyo pūresim, nanu mādiso mahāpañño upatthāko nāma vattati, aham upatthahissāmī"ti āha. Tam bhagavā "alam sāriputta, yassam disāyam tvam viharasi, asuññayeva sa¹ disa, tava ovado buddhanam ovadasadiso, na me taya upatthākakiccam atthī"ti patikkhipi. Etenevupāyena mahāmoggallānam ādim katvā asītimahāsāvakā utthahimsu. Sabbe bhagavā patikkhipi.

Ānandatthero pana tuṇhīyeva nisīdi. Atha naṁ bhikkhū āhaṁsu "āvuso bhikkhusaṁgho upaṭṭhākaṭṭhānaṁ yācati, tvampi yācāhī"ti. Yācitvā laddhaṭṭhānaṁ nāma āvuso kīdisaṁ hoti, kiṁ maṁ satthā na passati, sace rocessati, "ānando maṁ upaṭṭhātū"ti vakkhatīti. Atha bhagavā "na bhikkhave ānando aññena ussāhetabbo, sayameva jānitvā maṁ upaṭṭhahissatī"ti āha. Tato bhikkhū "uṭṭhehi āvuso ānanda, uṭṭhehi āvuso ānanda, dasabalaṁ upaṭṭhākaṭṭhānaṁ yācāhī"ti āhaṁsu. Thero uṭṭhahitvā cattāro paṭikkhepe ca catasso ca āyācanāti aṭṭha vare yāci.

Cattāro paţikkhepā nāma "sace me bhante bhagavā attanā laddham paṇītam cīvaram na dassati, piṇḍapātam na dassati, ekagandhakuṭiyam vasitum na dassati, nimantanam gahetvā na gamissati, evāham bhagavantam upaṭṭhahissāmī"ti vatvā "kam panettha ānanda ādīnavam addasā"ti vutte āha "sacāham bhante imāni vatthūni labhissāmi, bhavissanti vattāro 'ānando dasabalena laddham paṇītam cīvaram paribhuñjati, piṇḍapātam paribhuñjati, ekagandhakuṭiyam vasati, ekanimantanam gacchati, etam lābham labhanto tathāgatam upaṭṭhāti, ko evam upaṭṭhahato bhāro'ti". Ime cattāro paṭikkhepe yāci.

Catasso āyācanānāma "sace bhante bhagavā mayā gahitam nimantanam gamissati, sacāham tiroratthā tirojanapadā bhagavantam datthum āgataparisam āgatakkhane eva bhagavantam dassetum lacchāmi, yadā me kankhā uppajjati, tasmimyeva khane bhagavantam upasankamitum lacchāmi, tathā yam bhagavā mayham parammukham dhammam deseti, tam āgantvā mayham kathessati, evāham bhagavantam upatthahissāmī"ti vatvā "kam panettha ananda anisamsam passasi"ti vutte aha "idha bhante saddha kulaputtā bhagavato okāsam alabhantā mam evam vadanti 'sveva bhante ānanda bhagavatā saddhim amhākam ghare bhikkham ganheyyāthā'ti. Sace bhagavā tattha na gamissati, icchitakkhaneyeva parisam dassetum kankhanca vinodetum okasam na lacchami, bhavissanti vattaro 'kim anando dasabalam upatthāti, ettakampissa anuggaham bhagavā na karotī'ti. Bhagavato ca parammukhā mam pucchissanti 'ayam āvuso ānanda gāthā idam suttam idam jātakam kattha desitan'ti. Sacāham tam na sampāyissāmi, bhavissanti vattāro 'ettakampi āvuso na jānāsi, kasmā tvam chāyā viya bhagavantam na vijahanto dīgharattam ciram vicarī'ti. Tenāham parammukhā desitassapi dhammassa puna kathanam icchāmī"ti. Imā catasso āyācanāyāci. Bhagavāpissa adāsi. Evam ime attha vare gahetvā nibaddhupatthāko ahosi.

Tasseva ṭhānantarassa atthāya kappasatasahassaṁ pūritānaṁ pāramīnaṁ phalaṁ pāpuṇi, pāpuṇitvā ca upaṭṭhākānaṁ aggo hutvā bhagavantaṁ upaṭṭhahi. Thero hi upaṭṭhākaṭṭhānaṁ addhakālato paṭṭhāya bhagavantaṁ duvidhena udakena tividhena dantakaṭṭhena pādaparikammena piṭṭhiparikammena gandhakuṭipariveṇasammajjanenāti evamādīhi kiccehi upaṭṭhahanto "imāya nāma velāya satthu

idam nāma laddhum vaṭṭa idam nāma kātum vaṭṭatī"ti cintetvā tam tam nipphādento mahatim daṇḍadīpikam gahetvā ekarattim gandhakuṭipariveṇam nava vāre anupariyāyati. Evañhissa ahosi "sace me thinamiddham okkameyya, bhagavati pakkosante paṭivacanam dātum nāham sakkuṇeyyan"ti. Tasmā sabbarattim daṇḍadīpikam hatthena na muñcati, evametassa nibaddhupaṭṭhākaṭṭhānassa aladdhabhāvam sandhāya vuttam "no ca kho upaṭṭhākaṭṭhānam laddhā"ti. Nibaddhupaṭṭhāko nāma natthīti niyatupaṭṭhāko nāma natthi. Aniyatupaṭṭhākā pana bhagavato paṭhamabodhiyam bahū ahesum, te dassento āha "kadāci nāgasamālatthero"ti-ādi. Ñāti ca so pasatthatamaguṇayogato seṭṭho cāti ñātiseṭṭho. Evarūpesu ṭhānesu ayameva patirūpoti āpadāsu āmisassa abhisaṅkharitvā dānam nāma ñātakeneva kātum yuttataranti adhippāyo.

Mārāvaṭṭanāyāti mārena katacittāvaṭṭanāya, mārānubhāvena sañjātacittasammohenāti vuttaṁ hoti. Tenevāha "āvaṭṭetvā mohetvā"ti-ādi. Tiṭṭhantu -pa- tampi māro āvaṭṭeyyāti phussassa bhagavato kāle katupacitassa akusalakammassa tadā laddhokāsavasena upaṭṭhitattā. Vuttañhetaṁ apadāne—

"Phussassāham pāvacane, sāvake paribhāsayim¹. Yavam khādatha bhuñjatha, mā ca bhuñjatha sālayo.

Tena kammavipākena, temāsam khāditam yavam. Nimantito brāhmanena, veranjāyam vasim tadā"ti².

Pariyuṭṭhitacittoti pariyonaddhacitto, abhibhūtacittoti attho.

Āvaṭṭitapariyosāne āgamiṁsūti mārena āvaṭṭetvā gate pacchā āgamiṁsu.

Avisahatāyāti asakkuṇeyyatāya. Abhihaṭabhikkhāyāti pacitvā
abhihariyamānabhikkhāya. Nibaddhadānassāti "ettakaṁ kālaṁ bhagavato
dassāmā"ti niccabhattavasena paricchinditvā ṭhapitadānassa.

Appitavatthassāti "idaṁ buddhassa catupaccayaparibhogatthan"ti vihāraṁ
netvā dinnavatthuno. Na visahatīti na sakkoti. Abhihaṭabhikkhāsaṅkhepenāti

abhihaṭabhikkhānīhārena. **Byāmappabhāyā**ti samantato byāmamattāya pabhāya. Ettha ca anubyañjanānam byāmappabhāya ca nippabhākaraṇam antarāyoti daṭṭhabbam. Tenevāha "candimasūriyadevabrahmānampi hī"tiādi. Anubyañjanānam byāmappabhāya ekābaddhattā vuttam "anubyañjanabyāmappabhāppadesam patvā"ti. Sabbaññutaññāṇassa antarāyo nāma ñeyyadhammesu āvaraṇam.

Assosi kho bhagavā udukkhalasaddanti kim sayameva uppannam udukkhalasaddam assosīti ceti āha "patthapatthapulakam koṭṭentānan"ti-ādi. Atthasañhitanti payojanasādhakam. Anatthasañhiteti anatthanissite vacane. Ghātāpekkham bhummavacanam. Yasmiñca yena ghāto nipphādīyati, tasseva tena ghāto kato nāma hotīti āha "maggeneva tādisassa vacanassa ghāto samucchedoti vuttam hotī"ti. Sāmi-atthe vā bhummavacananti maññamāno evamāhāti daṭṭhabbam. Vacanassa ca samugghāto tammūlakilesānam samugghātenāti veditabbam.

Ākaroti attano anurūpatāya samariyādam saparicchedam phalam nipphattetīti ākāro kāraṇanti āha "ākārehīti kāraṇehī"ti. Aṭṭhuppattiyuttanti paccuppannavatthum nissāya pavattam. Tāyapucchāya vītikkamam pākaṭam katvāti "saccam kira tvam bhikkhū"ti-ādipucchāya tena bhikkhunā katavītikkamam pakāsetvā, vītikkamappakāsananca kimatthamidam sikkhāpadam paññapetīti anujānanattham.

Natthi kiñci vattabbanti pubbe vuttanayattā na kiñci ettha apubbam vattabbamatthīti dasseti. Tenāha "pubbe vuttameva hī"ti-ādi. Sādhu sādhūti idam pasamsāyam āmeḍitavacananti āha "āyasmantam ānandam sampahamsento"ti. Dvīsu ākāresūti dhammadesanasikkhāpadapaññattisankhātesu dvīsu kāraņesu. Ekam gahetvāti dhammam vā desessāmāti evam vuttakāraņam gahetvā. Evamdubbhikkheti evam dukkhena labhitabbā bhikkhā etthāti evamdubbhikkhe kāle, dese vā. Dullabhapiṇḍeti etasseva atthadīpanam. Bhājanādipariharaṇavasena bahubhaṇḍikatāya abhāvato vuttam "imāya sallahukavuttitāyā"ti. Ettakameva alam yāpetunti uttari patthanābhāvato pana "iminā ca sallekhenā"ti vuttam. Dubbhikkham vijitanti ettha hi

bhikkhānam abhāvo dubbhikkham "nimmakkhikan" ti-ādīsu viya.

Bhikkhābhāvoyeva hi tamnimittacittavighātānam abhāvato

bhikkhūhi vijito vase vattito. Lobho vijitoti āmisahetu ratticchedavassacchedasamuṭṭhāpako lolukuppādopi¹ tesam nāhosīti āmisalolatāsankhāto lobho vijito. Icchācāro vijitoti "āmisahetu aññamaññassa uttarimanussadhammappakāsanavasena guṇavaṇijjam katvā jīvikam kappessāmā"ti evam pavatta-icchācārassa abhāvato yathāvutto icchācāro vijito. Cittuppādamattassapi anuppannabhāvam sandhāya "cintā vā"ti vuttam. Punappunānusocanavasena pana cittapīļāpi nāhosīti dassanattham "vighāto vā"ti vuttam.

Ratticchedo vāti sattāhakaraṇīyavasena gantvā bahi aruṇuṭṭhāpanavasena ratticchedo vā na kato sattāhakiccavasenapi katthaci agatattā. Sattāhakiccavasena vippavāsañhi sandhāya ratticchedoti aṭṭhakathāvohāro, tatoyeva ca vassūpanāyikakkhandhakavaṇṇanāyaṁ² "ayaṁ panettha pāṭimuttakaratticchedavinicchayo"ti vatvā "dhammassavanatthāya animantitena gantuṁ na vaṭṭatī"ti-ādinā sattāhakaraṇīyameva vibhattaṁ. Mahā-aṭṭhakathāyampi vuttaṁ "sattāhakiccena gantvā ekabhikkhunāpi ratticchedo vā na kato"ti. Evañca katvā ratticchedo nāma sattāhakaraṇīyavasena hoti, na aññathāti ratticchedalakkhaṇañca kathitanti daṭṭhabbaṁ. Ettha ca paccayavekallasaṅkhāte vassacchedakāraṇe sati ratticchedassapi vuttattā yattha vassacchedakāraṇaṁ labbhati, tattha sattāhakiccena gantumpi vaṭṭatīti siddhanti cūṭagaṇṭhipade majjhimagaṇṭhipade ca vuttaṁ, taṁ suvuttaṁ vassūpanāyikakkhandhake vassacchedādhikāre—

"Tena kho pana samayena aññatarasmim āvāse vassūpagatānam bhikkhūnam gāmo corehi vuṭṭhāsi. Bhagavato etamattham ārocesum. Anujānāmi bhikkhave yena gāmo tena gantun"ti³—

ettha "sace gāmo avidūragato hoti, tattha piṇḍāya caritvā vihārameva āgantvā vasitabbam. Sace dūragato, sattāhavārena aruṇo uṭṭhāpetabbo. Na sakkā ce hoti, tattheva sabhāgaṭṭhāne vasitabban"ti⁴ iminā aṭṭhakathāvacanenapi samsandanato. Tathā hi gāme

^{1.} Lobhuppādopi (Syā)

^{3.} Vi 3. 207 pitthe.

^{2.} Vi-Ţtha 3. 351 pitthe.

^{4.} Vi-Ttha 3. 352 pitthe.

vuṭṭhite bhikkhāya abhāvato vassacchedepi anāpattiṁ vadantena bhagavatā "anujānāmi bhikkhave yena gāmo tena gantun"ti¹ vuttattā bhikkhāya abhāvo vassacchedakāraṇaṁ. Tattha "sace dūragato, sattāhavārena aruṇo uṭṭhāpetabbo"ti² idaṁ aṭṭhakathāvacanaṁ vassacchedakāraṇe sati sattāhakiccena gantumpi vattatīti imamatthaṁ sādheti.

Yam pana vuttam kenaci—

"Ratticchedoti sattāhakiccam sandhāya vutto, sattāhakaraņīyena gantvā ratticchedo vā vassacchedo vā ekabhikkhunāpi na katoti vuttam kira mahā-aṭṭhakathāyam, tasmā vassacchedassa kāraņe sati sattāhakiccam kātum vaṭṭatīti eke. Vinayadharā pana na icchanti, tasmā atthakathādhippāyo vīmamsitabbo"ti,

tam pana sayam sammūļhassa paresam mohuppādanamattam. Na hi vinayadharānam anicchāya kāraṇam dissati aṭṭhakathāya virujjhanato yutti-abhāvato ca. Yañhi kāraṇam vassacchedepi anāpattim sādheti, tasmim sati vinā vassacchedam sattāhakiccena gantum na vaṭṭatītikā nāma yutti. "Pacchimikāya tattha vassam upagacchāmā"ti idam tesam bhikkhūnam anurūpaparivitakkanaparidīpanam, na pana visesatthaparidīpanam. Tathā hi dubbhikkhatāya vassacchedakaraṇasabbhāvato purimikāya tāva vassacchedepi anāpatti. Pacchimikāyam anupagantukāmatāya gamanepi natthi doso pacchimikāya vassūpanāyikadivasassa asampattabhāvato.

Na kismiñci maññantīti kismiñci guņe sambhāvanavasena na maññanti. Pakāsetvāti paṭiladdhajjhānādiguṇavasena pakāsetvā. "Pacchā sīlaṁ adhiṭṭhaheyyāmā"ti vuttanayena kucchipaṭijaggane sati tathāpavatta-icchācārassa aparisuddhabhāvato ājīvasuddhiyā ca abhāvato puna vāyamitvā saṁvare patiṭṭhātabbanti āha "pacchāsīlaṁ adhiṭṭhaheyyāmā"ti.

Kim idanti garahaņavasena vuttam. Sālitaņdulehi sampāditam mamsena upasittam odanam sālimamsodanam. Atimaññissatīti avaññātakaraņavasena atikkamitvā maññissatī, lāmakam nihīnam katvā maññissatīti vuttam

hoti. Tenāha "oññātaṁ avaññātaṁ karissatī"ti. Heṭṭhā katvā nihīnaṁ katvā ñātaṁ oññātaṁ. Avaññātanti tasseva vevacanaṁ. Svāyanti so ayaṁ janapado. Imāya paṭipattiyāti verañjāyaṁ pūritāya sudukkarāya paṭipattiyā. Tumhe nissāyāti tumhākaṁ imaṁ appicchapaṭipadaṁ nissāya. Sabrahmacārīsaṅkhātāti chabbaggiyādayo vuttā. Tumhākaṁ antare nisīditvāti tumhākaṁ majjhe nisīditvā, tumhehi saddhiṁ nisīditvāti vuttaṁ hoti. Omānanti atimānaṁ. Atimānoyeva hettha nihīnatāya "omānan"ti vutto, na pana hīļetvā maññanaṁ. Tumhehi ānanda sappurisehi vijitaṁ sālimaṁsodanaṁ pacchimā janatā atimaññissatīti evamettha pāḷiṁ yojetvā atthaṁ vaṇṇayanti. Idaṁ vuttaṁ hoti—yaṁ laddhaṁ, teneva tussitvā sālimaṁsodanaṃ pacchimā janatā tattha patthanaṁ chindituṁ asamatthatāya atimaññissatīti.

Dubbhikkhakathā niṭṭhitā.

Mahāmoggallānassa sīhanādakathā

17. Āyasmāti vā devānampiyāti vā bhadrabhavanti vā piyasamudācāro esoti āha "āyasmāti piyavacanametan"ti. Viññujātikā hi param piyena samudācarantā "bhavan"ti vā "devānampiyā'ti vā "āyasmā"ti vā samudācaranti, tasmā sammukhā sambodhanavasena āvusoti, tirokkham āyasmāti ayampi samudācāro. Tayidam piyavacanam garugāravasappatissavasena vuccatīti āha

"garugāravasappatissādhivacanametan"ti. Guṇamahattatāya mahāmoggallāno, na cūļamoggallānassa atthitāyāti āha "mahā ca so guṇamahantatāyā"ti. Pappaṭakojanti pathavīsandhārakam udakam āhacca thite mahāpathaviyā heṭṭhimatale samuṭṭhitam udakoghena ajjhotthaṭe bhūmippadese sañjātakaddamapaṭalasadisam atimadhurapathavīmaṇḍam. Na metam assa patirūpanti tam anāpucchā karaṇam na me anucchavikam bhaveyyāti attho. Anāpucchā karontena ca yathā bhagavā icchiticchitam kiñci anāpucchā karoti, evamahampīti bhagavatā samānam katvā attānam mānena katam viya

bhavissatīti āha "yugaggāho viya bhagavatā saddhim kato bhaveyyā"ti. Parena hi saddhim attānam yugam yugaļam samānam katvā gāho, tassa mama vā ko visesoti gahaṇam yugaggāho.

Sampannanti sampattiyuttami. Sā panettha rasasampatti adhippetā sāmaññajotanāya visese avaṭṭhānato. Tenāha "sampannanti madhurami sādurasanti attho"ti. Tividhañhi sampannami paripuṇṇasamaṅgīmadhuravasena. Tattha—

"Sampannam sālikedāram, suvā bhuñjanti kosiya. Pativedemi te brahme, na ne vāretumussahe"ti¹—

idam **paripunnasampannam** nāma. Paripunnampi hi samantato pannam pattanti sampannanti vuccati. "Iminā pātimokkhasamvarena upeto hoti samupeto upagato samupagato sampanno samannāgato"ti² idam samangīsampannam nāma. Samangīpi hi sammadeva panno gato upagatoti sampannoti vuccati. "Tatrassa rukkho sampannaphalo ca upapannaphalo cā"ti³ idam **madhurasampannam** nāma. Tattha madhurasampannam idhādhippetanti veditabbam. **Upapannaphalo**ti bahuphalo. **Assā**ti pathaviyā hetthimatalassa. **Opammanidassanatthan**ti upamāya nidassanattham. Anīlakanti niddosam. Niddosatā cettha makkhikādirahitatāyāti āha "nimmakkhikan"ti-ādi. Natthi ettha makkhikāti nimmakkhikam. Makkhikāsaddena cettha makkhikandakampi sāmaññato gahitanti vadanti. Teneva tīsupi ganthipadesu vuttam "nimmakkhikanti imassevattham pakāsetum nimmakkhikandakanti vuttam, makkhikāhi tāsam andakehi ca virahitanti attho''ti. Ayam panettha amhākam khanti "makkhikānam andāni makkhikandani, natthi ettha makkhikandanīti nimmakkhikandanti. Iminā makkhikānam andehi rahitatā vuttā, 'nimmakkhikan'ti iminā pana makkhikānamyeva abhāvo vutto"ti. Etam kira madhūti khuddakamakkhikāhi katamadhu. Sabbamadhūhīti mahāmakkhikabhamaramakkhikādikatehi. Agganti uttamam. Setthanti pasatthatamam. Surasanti sobhanarasam. Ojavantanti accantamojasampannam.

Āyācanavacanametanti iminā sampaṭicchanasampahaṁsanādi-atthaṁ nivatteti. Ekaṁ hatthanti ekaṁ pāṇitalaṁ. "Abhinimminissāmī"ti vuttamatthaṁ pakāsetuṁ "pathavīsadisaṁ karissāmī"ti vuttaṁ. Ayaṁ nu kho pathavī, udāhu na ayanti

iminā nimmitapathaviyā pakatipathaviyā ca sandissamānattā "esā nu kho amhākam pathavī, udāhu aññā"ti uppajjamānakukkuccam dasseti. Nibaddhavipulāgamo gāmo nigamo, pavattitamahā-āyo mahāgāmoti vuttam hoti. Na vā esa vipallāsoti pubbapakkham nidasseti. Kasmā panesa vipallāso na hotīti āha "acinteyyo hi iddhimato iddhivisayo"ti. Iddhibaleneva tesam sattānam tādiso vipallāso na bhavissatīti adhippāyo. Idāni aññathā vipallāsappaṭilābham dassento āha "evam panā"ti-ādi. Garahantāti sammukhā garahantā. Upavadantāti parammukhā akkosantā.

Nanu ca uttarakurum pindāya gamanam patisedhetvā vipallāsampi sattā patilabheyyunti kāranam na vuttam, tasmā kimettha kārananti āha "tattha kiñcāpī"ti-ādi. Yadipi na vuttam, tathāpi "vipallāsampi sattā patilabheyyun"ti pubbe adhikatattā teneva kāranena pindāya uttarakurugamanampi bhagavatā patisiddhanti viññāyati, tasmā tadeva kāraņam idhāpi gahetabbanti dassento āha "pubbe vuttanayeneva gahetabban"ti. Vipallāsampi sattā patilabheyyunti idam idha avuttampi ānetvā sambandhitabbanti adhippāyo. Atthopi cassa vuttasadisameva veditabboti. "Evam pana vipallāsam patilabheyyun" ti-ādinā pacchā vuttameva atthavikappam sandhāya vadati. Yam pana tattha vuttam "te guņe nibbattetvā dubbhikkhakāle pathavim parivattetvā pappatakojam paribhuñjimsū"ti, tam apanetvā te gune nibbattetvā dubbhikkhakāle uttarakurum gantvā piņdāya caritvā paribhuñjimsūti evamettha yojanā kātabbā. **Ekena padavītihārenā**ti ettha padassa vītiharanam nikkhipanam padavītihāro, padanikkhepo, tasmā ekena padanikkhepenāti vuttam hoti. Ekena padavītihārena atikkamitabbatthānañca samagamanena dvinnam padānam antare mutthiratanamattam, tasmā. Mātikāmattam adhitthahitvāti mutthiratanappamānam mātikāmattam adhitthāyāti attho.

 $Nitthit\bar{a}\ mah\bar{a}moggall\bar{a}nassa\ s\bar{\imath}han\bar{a}dakath\bar{a}.$

Vinayapaññattiyācanakathā

18. **Vinayapaññattiyā**ti pubbe apaññattasikkhāpadam sandhāya vuttam. Thero hi paññattasikkhāpadāni ṭhapetvā idāni paññapetabbasikkhāpadāni pātimokkhuddesañca sandhāya "etassa bhagavā kālo, etassa sugata kālo, yam bhagavā sāvakānam sikkhāpadam paññapeyya, uddiseyya pātimokkhan"ti¹ āha. Bhagavatāpi—

"Ko nu kho bhante hetu, ko paccayo, yena pubbe appatarāni ceva sikkhāpadāni ahesum, bahutarā ca bhikkhū aññāya saṇṭhayimsu. Ko pana bhante hetu, ko paccayo, yena etarahi bahutarāni ceva sikkhāpadāni honti, appatarā ca bhikkhū aññāya saṇṭhahantīti. Evametam bhaddāli hoti, sattesu hāyamānesu saddhamme antaradhāyamāne bahutarāni ceva sikkhāpadāni honti, appatarā ca bhikkhū aññāya saṇṭhahantīti. Na tāva bhaddāli satthā sāvakānam sikkhāpadam paññapeti, yāva na idhekacce āsavaṭṭhānīyā dhammā saṃghe pātubhavantī"ti—

imasmim bhaddālisutte² viya ekaccesu paññattesupi tato param paññapetabbāni sandhāya "na tāva sāriputta satthā sāvakānam sikkhāpadam paññapetī"ti vuttam. Idheva ca aṭṭhakathāyam "sāmampi pacanam samaṇasāruppam na hoti, na ca vaṭṭatī"ti³ vacanam "ratticchedo vā vassacchedo vā na kato"ti⁴ vacanañca pubbe paññattasikkhāpadānam sabbhāve pamāṇanti daṭṭhabbam. Sesasikkhāpadānamceva pātimokkhuddesassa ca therassa āyācanena paññattattā "mūlato pabhuti nidānam dassetun"ti āha. Rahogatassāti raho janavivittam ṭhānam upagatassa. Tena gaṇasaṅgaṇikābhāvena therassa kāyavivekamāha. Paṭisallīnassāti nānārammaṇacārato cittassa nivattiyā paṭi sammadeva nilīnassa tattha avisaṭacittassa. Tena cittasaṅgaṇikābhāvenassa pubbabhāgiyam cittavivekamāha. Ciranti kālāpekkham accantasaṃyoge upayogavacanam. Cirāti cirakālayuttā ṭhiti abhedena vuttā.

^{1.} Vi 1. 10 pitthe.

^{3.} Vi-Ttha 1. 145 pitthe.

^{2.} Ma 2. 108 pitthe.

^{4.} Vi-Ttha 1. 148 pitthe.

Etaṁ na sakkotīti etaṁ vinicchinituṁ na sakkoti. Aṭṭhakathāyaṁ vuttanayaṁ dassetvā idāni theravādaṁ dassento āha "mahāpadumatthero panā"ti-ādi. Aṭṭhakathāyampi "na sakkotī"ti idaṁ yasmā jānamānopi sammadeva paricchindituṁ na sakkoti, tasmā vuttanti vadanti. Soļasavidhāya paññāya matthakaṁ pattassāti majjhimanikāye anupadasuttantadesanāya¹—

"Mahāpañño bhikkhave sāriputto, puthupañño bhikkhave sāriputto, hāsapañño bhikkhave sāriputto, javanapañño bhikkhave sāriputto, tikkhapañño bhikkhave sāriputto, nibbedhikapañño bhikkhave sāriputto"ti—

evamāgatā mahāpaññādikā cha, tasmimyeva sutte āgatā navānupubbavihārasamāpattipaññā, arahattamaggapaññāti imāsam seļasappabhedānam paññānam sāvakavisaye ukkaṭṭhakoṭippattassa.

Kasmā panettha bhagavā vipassī-ādīnam sattannamyeva buddhānam brahmacariyassa ciraṭṭhitikāciraṭṭhitikabhāvam kathesi, na buddhavamsadesanāyam viya pañcavīsatiyā buddhānam, tato vā pana bhiyyoti? Yesam sammāsambuddhānam paṭivedhasāsanam ekamsato nicchayena ajjāpi dharati, na antarahitam, te eva kittento vipassī-ādīnamyeva bhagavantānam brahmacariyassa ciraṭṭhitikāciraṭṭhitikabhāvam idha kathesi. Tesamyeva hi sāvakā tadā ceva etarahi ca suddhāvāsabhūmiyam ṭhitā, na aññesam parinibbutattā. Siddhatthatissaphussānam kira buddhānam sāvakā suddhāvāsesu uppannā uppattisamanantarameva imasmim sāsane upakādayo viya arahattam adhigantvā na cirasseva parinibbāyimsu, na tattha tattha sāvakā yāvatāyukam aṭṭhamsūti vadanti. Apubbācarimaniyamo pana aparāparam samsaraṇakasattāvāsavasena ekissā lokadhātuyā icchitoti na tenetam virujjhatīti daṭṭhabbam.

19. Asādhāraņo hetu, sādhāraņo paccayoti evamādivibhāgena idha payojanam natthi, vipassī-ādīnam pana brahmacariyassa aciraṭṭhitikatāya ciraṭṭhitikatāya ca kāraṇapucchāparattā codanāyāti āha "hetu paccayoti ubhayametam kāraṇādhivacanan"ti. Hinoti

tena phalanti hetūti karaṇasādhanoyaṁ hetusaddoti āha "tena tassa phalan"ti-ādi. Kattusādhanopi hetusaddo no na yujjati hinoti phalassa hetubhāvaṁ upagacchatīti hetūti. Taṁ paṭicca eti pavattatīti taṁ kāraṇaṁ paticca tassa phalaṁ eti pavattati nibbattatīti attho.

Kilāsuno ahesunti appossukkā ahesum, nirussāhā ahesunti attho. Sā pana nirussāhatā na ālasiyavasenāti āha "na ālasiyakilāsuno"ti, ālasiyavasena kilāsuno nāhesunti attho. Tattha kāraṇamāha "na hī"ti-ādi. Ālasiyam vāti iminā thinamiddhavasappavattānam akusalānam abhāvamāha. Osannavīriyatā vāti iminā pana "ālasiyābhāvepi antamaso annabhāranesādānampi sakkaccamyeva dhammam desetī"ti vacanato yassa kassacipi dhammadesanāya nirussāhatā natthīti dīpeti sabbesam samakeneva ussāhena dhammadesanāya pavattanato. Tenāha "buddhā hī"ti-ādi. Osannavīriyāti ohīnavīriyā, appossukkāti attho. Ussannavīriyāti adhikavīriyā, mahussāhāti attho. Vegenāti javena. Dhamme garu etesanti dhammagaruno. Dhamme gāravametesanti dhammagāravā. Vipassissa bhagavato kāle asīti vassasahassāni āyuppamāṇam sikhissa sattati vassasahassāni, vessabhussa saṭṭhi vassasahassāni āyuppamāṇamti āha "tesam kira kāle dīghāyukā sattā"ti. Abhisamentīti paṭivijjhanti.

Niddosatāyāti vītikkamadosassa abhāvato. "Imasmim vītikkame ayam nāma āpattī"ti evam āpattivasena apaññapetvā "pāṇātipātam pahāya pāṇātipātā paṭivirato hotī"ti-ādinā¹ dhammadesanāvasena ovādasikkhāpadānamyeva paññattattā vuttam "sattāpattikkhandhavasena āṇāsikkhāpadam apaññattan"ti. Channam channam vassānam accayenāti pāṭhaseso daṭṭhabbo. Atha vā channam channam vassānam osānadivasam apekkhitvā "sakim sakin"ti vuttattā tadapekkhamidam sāmivacanam. Sakalajambudīpe sabbopi bhikkhusamgho ekasmimyeva ṭhāne uposatham akāsīti sambandho. Katamam tam ṭhānanti āha "bandhumatiyā rājadhāniyā"ti-ādi.

Isipatanam tena samayena khemam nāma uyyānam hoti, migānam pana abhayavāsatthāya dinnattā migadāyoti vuccati. Tam sandhāya vuttam "kheme migadāye"ti.

Abbokinnāni dasapi vīsatipi bhikkhusahassāni vasantīti visabhāgapuggalehi asamsatthāni dasapi vīsatipi bhikkhūnam sahassāni vasanti. **Dīghanikāyatthakathāyam** pana "te sabbepi dvādasasahassabhikkhuganhanakā mahāvihārā abhayagiricetiyapabbatacittalapabbatayihārasadisā ca ahesun"ti vuttam. Uposathārocikāti uposathārocanakā. Tā kira devatā ekamhi vasse nikkhante tattha tattha gantvā ārocenti "nikkhantam kho mārisā ekam vassam, pañca dāni vassāni sesāni, pañcannam vassānam paccayena bandhumatī rājadhānī upasankamitabbā pātimokkhuddesāyā"ti. Tathā dvīsu vassesu nikkhantesu "nikkhantāni kho mārisā dve vassāni, cattāri vassāni sesāni, catunnam vassānam accayena bandhumatī rājadhānī upasankamitabbā pātimokkhuddesāyā"ti ārocenti. Imināva nayena tīsu catūsu pañcasu vassesu atikkantesu ārocenti. Tena vuttam "mārisā ekam vassam atikkantan" ti-ādi. Sānubhāvāti iddhānubhāvena sānubhāvā. Te kira bhikkhūti ye devatānubhāvena gacchanti, te sandhāya vadati. Pācīnasamuddanteti pācīnasamuddassa samīpadese. **Gamiyavattan**ti gamikehi kātabbam senāsanapatijagganādivattam. **Uposathaggan**ti uposathakaranatthānam. Gatāva hontīti devatānubhāvena gatā eva honti. Teti attano attano ānubhāvena devatānubhāvena ca gatā sabbepi.

Khantī paramanti-ādīsu¹ parūpavādam parāpakāram sītuņhādibhedanca guņoparodham khamati sahati adhivāsetīti khanti. Sā pana sīlādīnam paṭipakkhadhamme savisesam tapati santapati vidhamatīti paramam uttamam tapo. Titikkhanam khamanam titikkhā. Khantiyāyevetam vevacanam. Akkharacintakā hi khamāyam titikkhāsaddam vaṇṇenti, tasmā evamettha attho daṭṭhabbo "titikkhāsaṅkhātā adhivāsanakhanti nāma uttamam tapo"ti. Nibbānam paramam vadanti buddhāti bhavena bhavantaram vināti bhavanikantibhāvena samsibbati, sataṇhasseva vā āyatim punabbhavabhāvato phalena saddhim kammam vināti

^{1.} Dī-Ṭṭha 2. 69; Dhammapada-Ṭṭha 2. 154 piṭṭhesupi passitabbam.

samsibbatīti vānanti sankhyam gatāya tanhāya nikkhantam nibbānam tattha tassā sabbaso abhāvato. Tam nibbānam pana santapanītanipunasivakhemādinā sabbākārena paramanti vadanti buddhā.

Na hi pabbajito parūpaghātīti vo adhivāsanakhantirahitattā param upaghāteti bādhati vihimsati, so pabbajito nāma na hoti pabbājetabbadhammassa apabbājanato. Catutthapādo pana tatiyapādasseva vevacanam anatthantaratta. "Na hi pabbajito"ti etassa hi "na samano hoti"ti vevacanam. "Parūpaghātī"ti etassa "param vihethayanto"ti vevacanam. Atha vā parūpaghātīti sīlūpaghātī. Sīlanhi uttamatthena "paran"ti vuccati parasaddassa setthavācakattā "puggalaparoparaññū"ti-ādīsu viya. Yo ca samano param yam kañci sattam vihethayanto parūpaghātī hoti attano sīlavināsako, so pabbajito nāma na hotīti attho. Atha vā yo adhivāsanakhantiyā abhāvā parūpaghātī hoti, param antamaso damsamakasampi jīvitā voropeti, so na hi pabbajito. Kim kāranā? Pāpamalassa apabbājitattā anīhatattā. "Pabbājayamattano malam, tasmā pabbajitoti vuccatī"ti¹ idañhi pabbajitalakkhanam. Yopi naheva kho upaghāteti na māreti, apica dandādīhi vihetheti, sopi param vihethayanto samano na hoti. Kimkāranā? Vihesāya asamitattā. Samitattā samaņoti vuccatīti idañhi samaņalakkhaņam. "Samitattā hi pāpānam, samaņoti pavuccatī"ti² hi vuttam.

Apica bhagavā bhikkhūnam pātimokkham uddisanto pātimokkhakathāya ca sīlappadhānattā sīlassa ca visesato doso paṭipakkhoti tassa niggaṇhanavidhim dassetum ādito "khantī paramam tapo"ti āha. Tena aniṭṭhassa paṭihananūpāyo vutto, titikkhāggahaṇena pana iṭṭhassa, tadubhayenapi uppannam aratim uppannam ratim abhibhuyya viharatīti ayamattho dassito. Taṇhāvānassa vūpasamanato nibbānam paramam vadanti buddhā. Tattha khantiggahaṇena payogavipattiyā abhāvo. Tathā khantiggahaṇena parāparādhasahatā, titikkhāggahaṇena paresu anaparajjhanā dassitā. Evam kāraṇamukhena anvayato pātimokkham dassetvā idāni

byatirekato tam dassetum "na hī"ti-ādi vuttam. Tena yathā sattānam jīvitā voropanam param pāṇileḍḍudaṇḍādīhi viheṭhananca "parūpaghāto param viheṭhanan"ti vuccati, evam tesam sāpateyyāvaharaṇam parāmasanam visamvādanam aññamaññabhedanam pharusavacanena mammaghaṭṭanam niratthakavippalāpo parasantakābhijjhānam ucchedacintanam micchābhinivesanañca upaghāto paraviheṭhanañca hotīti yassa kassaci akusalassa kammapathassa kammassa ca karaṇena pabbajito samaṇo ca na hotīti dasseti.

Dutiyagāthāya sabbapāpassāti sabbākusalassa sabbassapi dvādasākusalassa sabbacittuppādasaṅgahitassa sāvajjadhammassa. Akaraṇanti anuppādanaṁ. Karaṇañhi nāma tassa attano santāne uppādananti tappaṭikkhepato akaraṇaṁ anuppādanaṁ. Kusalassāti catubhūmikakusalassa. "Kusalassā'ti hi idaṁ "etaṁ buddhāna sāsanan'ti vakkhamānattā ariyamaggadhamme tesañca sambhārabhūte tebhūmikakusale dhamme bodheti. Upasampadāti upasampādanaṁ. Taṁ pana atthato tassa kusalassa samadhigamo paṭilābho. Sacittapariyodapananti attano cittassa jotanaṁ cittassa pabhassarabhāvakaraṇaṁ sabbaso parisodhanaṁ. Taṁ pana arahattena hoti. Ettha ca yasmā aggamaggasamaṅgino cittaṁ sabbaso pariyodapīyati nāma, aggaphalakkhaṇe pana pariyodapitaṁ hoti puna pariyodapetabbatāya abhāvato, tasmā pariniṭṭhitapariyodapanataṁ sandhāya vuttaṁ "taṁ pana arahatthena hotī"ti. Iti sīlasaṁvarena sabbapāpaṁ pahāya lokiyalokuttarāhi samathavipassanāhi kusalaṁ sampādetvā arahattaphalena cittaṁ pariyodapetabbanti etaṁ buddhānaṁ sāsanaṁ ovādo anusiṭṭhi.

Tatiyagāthāya anupavādoti vācāya kassaci anupavadanam.
Anupaghātoti kāyena manasā ca kassaci upaghātākaraṇam manasāpi paresam anatthacintanādivasena upaghātakaraṇassa vajjetabbattā.
Pātimokkheti yam tam pa-atimokkham atipamokkham uttamam sīlam, pāti vā sugatibhayehi mokkheti duggatibhayehi, yo vā nam pāti, tam mokkhetīti pātimokkhanti vuccati, tasmim pātimokkhe ca. Samvaroti sattannam āpattikkhandhānam avītikkamalakkhaņo samvaro. Mattaññutāti bhojane mattañnutā paṭiggahaṇaparibhogavasena pamāṇañnutā. Pantañca sayanāsananti janasaṅghaṭṭavirahitam nijjanasambādham vivittam senāsananca. Ettha

dvīhiyeva paccayehi catupaccayasantoso dīpitoti veditabbo paccayasantosasāmaññena itaradvayassapi lakkhaṇahāranayena jotitabhāvato¹. **Adhicitte ca āyogo**ti vipassanāpādakaṁ aṭṭhasamāpatticittaṁ adhicittaṁ, tatopi ca maggaphalacittameva adhicittaṁ, tasmiṁ yathāvutte adhicitte āyogo ca, anuyogoti attho. **Etaṁ buddhāna sāsanan**ti etaṁ parassa anupavadanaṁ anupaghātanaṁ pātimokkhe saṁvaro paṭiggahaṇaparibhogesu mattaññutā vivittasenāsanasevanaṁ adhicittānuyogo ca buddhānaṁ sāsanaṁ ovādo anusiṭṭhi.

Imā pana sabbabuddhānam pātimokkhuddesagāthā hontīti veditabbā. Tenāha "eteneva upāyenā" ti-ādi. Yāva sāsanapariyantāti dharamānakabuddhānam anusāsanapariyantam sandhāya vuttam, yāva buddhā dharanti, tāva uddisitabbatam āgacchantīti vuttam hoti. Ovādapātimokkhañhi buddhāyeva uddisanti, na sāvakā. pathamabodhiyamyeva uddesamāgacchantīti sambandho. Pathamabodhi cettha vīsativassaparicchinnāti mahāganthipade vuttam. Tañca hetthā atthakathāyameva "bhagavato hi pathamabodhiyam vīsativassantare nibaddhupatthāko nāma natthī"ti kathitattā "pathamabodhi nāma vīsativassānī''ti gahetvā vuttam. Ācariyadhammapālattherena pana "pañcacattālīsāya vassesu ādito pannarasa vassāni pathamabodhī"ti vuttam. Evañca sati majjhe pannarasa vassāni majjhimabodhi, ante pannarasa vassāni pacchimabodhīti tinnam bodhīnam samappamānatā siyāti tampi yuttam. Pannarasattikena hi pañcacattālīsa vassāni pūrenti. Atthakathāyam pana pannarasavassappamānāya pathamabodhiyā vīsativassesuyeva antogadhattā "pathamabodhiyam vīsativassantare"ti vuttanti evampi sakkā viññātum.

Nanu ca kānici sikkhāpadāni paññapetvāpi na tāva āṇāpātimokkhaṁ anuññātaṁ pacchā therassa āyācanena anuññātattā, tasmā kathemetaṁ vuttaṁ "sikkhāpadapaññattikālato pana pabhuti āṇāpātimokkhameva uddisīyatī"ti, yadipi kānici sikkhāpadāni paññapetvāva āṇāpātimokkhaṁ na anuññātaṁ, tathāpi apaññatte sikkhāpade āṇāpātimokkhaṁ natthi, kintu paññatteyevāti imamatthaṁ dassetuṁ "sikkhāpadapaññattikālato pana pabhutī"ti vuttaṁ. Pubbārāmeti

sāvatthiyā pācīnadisābhāge katattā evamladdhavohāre mahāvihāre. **Migāramātupāsāde**ti migāraseṭṭhino mātuṭṭhāniyattā migāramātāti saṅkhyam gatāya visākhāmahā-upāsikāya kārite pāsāde. **Aṭṭhānan**ti hetupaṭikkhepo. **Anavakāso**ti paccayapaṭikkhepo. Ubhayenapi kāraṇameva paṭikkhipati. **Yan**ti yena kāraṇena.

Tesanti bhikkhūnam. Sammukhasāvakānam santike pabbajitāti sabbantimānam subhaddasadisānam sammukhasāvakānam santike pabbajite sandhāya vadati. Khattiyakulādivaseneva vividhā kulāti sambandho. Uccanīca-uļāruļārabhogādikulavasena vāti uccanīcakulavasena uļāruļārabhogādikulavasena vāti yojetabbam. Tattha khattiyabrāhmaņavasena vā khattiyabrāhmaņagahapatikānam vasena vā uccakulatā veditabbā, sesānam vasena nīcakulatā. Uļāruļārabhogādikulavasena vāti uļārataratama-upabhogavantādikulavasena. Uļāratisayajotanatthañhi puna uļāraggahaṇam "dukkhadukkhan"ti-ādīsu viya. Ādi-saddena uļārānuļārānam gahaṇam veditabbam.

Brahmacariyam rakkhantīti vuttamevattham pakāsetvā dassento āha "ciram pariyattidhammam pariharantī"ti. Apaññattepi sikkhāpade yadi samānajāti-ādikā siyum, attano attano kulānugatagantham viya na nāseyyum. Yasmā pana sikkhāpadampi apaññattam, ime ca bhikkhū na samānajāti-ādikā, tasmā vināsesunti imamattham dassetum "yasmā ekanāmā -pa- tasmā aññamaññam vihethentā"ti-ādi vuttam. Yadi evam kasmā ciratthitikavārepi "nānānāmā"ti-ādi vuttanti? Satipi tesam nānājaccādibhāve sikkhāpadapaññattiyā eva sāsanassa cirappavattīti dassanattham vuttam. Sikkhāpadapaññattivaseneva sāsanassa cirappavatti. Yasmā buddhā attano parinibbanato uddhampi vinetabbasattasambhave sati sikkhapadam paññapenti, asati na paññapenti, tasmāti veditabbo¹. Yathā kāyavacīdvārasankhātam vinnattim samutthāpetvā pavattamānampi cittam tassāyeva viññattiyā vasena pavattanato "kāyavacīdvārehi pavattan"ti vuccati, evamsampadamidam datthabbam. Yathā tanti ettha tanti nipātamattam. Vaggasangahapannāsasangahādīhīti sīlakkhandhavaggamahāvaggādivaggasangahavasena mūlapannāsamajjhimapannāsādipannāsasangahavasena. Ādi-saddena samyuttādisangaho veditabbo.

Evam vitakketha, mā evam vitakkayitthāti ettha evanti yathānusitthāya anusāsaniyā vidhivasena patisedhanavasena ca pavattitākāraparāmasanam, sā ca sammāvitakkānam micchāvitakkānanca pavatti-ākāradassanavasena pavattati atthanisamsassa ādīnavassa ca vibhāvanattham. Tenāha "nekkhammavitakkādayo tayo vitakke vitakkethā"ti-ādi. Ettha ādi-saddena abyāpādavitakka-avihimsāvitakkānam gahanam veditabbam. Tattha nekkhammam vuccati lobhato nikkhantattā alobho, nīvaraņehi nikkhantattā pathamajjhānam, sabbākusalehi nikkhantattā sabbo kusalo dhammo, sabbasankhatehi nikkhantatta nibbanam, upanissayato sampayogato ārammanakaranato ca nekkhammena patisamyutto vitakko nekkhammavitakko, sammāsankappo. So asubhajihānassa pubbabhāge kāmāvacaro hoti, asubhajjhāne rūpāvacaro, tam jhānam pādakam katvā uppannamaggaphalakāle lokuttaro. Byāpādassa patipakkho abyāpādo, kañcipi na byāpādenti etenāti vā abyāpādo, mettā. Yathāvuttena abyāpādena pațisamyutto vitakko abyāpādavitakko. So mettājhānassa pubbabhāge kāmāvacaro hoti, mettābhāvanāvasena adhigate pathamajjhāne rūpāvacaro, tam jhanam padakam katva uppannamaggaphalakale lokuttaro. Vihimsaya patipakkhā, na vihimsanti vā etāya satteti avihimsā, karunā. Tāya patisamyutto vitakko avihimsāvitakko. So karunājhānassa pubbabhāge kāmāvacaro, karuņābhāvanāvasena adhigate pathamajjhāne rūpāvacaro, tam jhānam pādakam katvā uppannamaggaphalakāle lokuttaro.

Nanu ca alobhādosāmohānam aññamaññāvirahato nesam vasena uppajjanakānam imesam nekkhammavitakkādīnam aññamaññam asankarato vavatthānam na hotīti? No na hoti. Yadā hi alobho padhāno hoti niyamitapariṇatasamudācārādivasena, tadā itare dve tadanvāyikā bhavanti. Tathā hi yadā alobhappadhāno nekkhammagaruko cittuppādo hoti, tadā laddhāvasaro nekkhammavitakko patiṭṭhahati. Tamsampayuttassa pana adosalakkhaṇassa abyāpādassa vasena yo tasseva abyāpādavitakkabhāvo sambhaveyya, sati ca abyāpādavitakkabhāve kassacipi aviheṭhanajātikatāya avihimsāvitakkabhāvo ca sambhaveyya. Te

itare dve tasseva nekkhammavitakkassa anugāmino sarūpato adissanato tasmim sati honti, asati na hontīti anumāneyyā bhavanti. Evameva yadā mettāpadhāno cittuppādo hoti, tadā itare dve tadanvāyikā bhavanti. Yadā karuṇāpadhāno cittuppādo hoti, tadā itare dve tadanvāyikā bhavanti.

Kāmavitakkādayoti ettha ādi-saddena

byāpādavitakkavihimsāvitakkānam gahaņam veditabbam. Tattha kāmapatisamyutto vitakko kāmavitakko. Ettha hi dve kāmā vatthukāmo ca kilesakāmo ca. Tattha vatthukāmapakkhe ārammanavasena kāmehi patisamyutto vitakko kāmavitakko, kilesakāmapakkhe pana sampayogavasena kāmena patisamyuttoti yojetabbam. Byāpādapatisamyutto vitakko byāpādavitakko. Vihimsāpatisamyutto vitakko vihimsāvitakko. Tesu dve sattesupi sankhāresupi uppajjanti. Kāmavitakko hi piye manāpe satte vā sankhāre vā vitakkentassa uppajjati, byāpādavitakko appiye amanāpe satte vā sankhāre vā kujihitvā olokanakālato patthāya yāva vināsanā uppajjati, vihimsāvitakko sankhāresu nuppajjati. Sankhāro hi dukkhāpetabbo nāma natthi, "ime sattā haññantu vā ucchijjantu vā vinassantu vā mā vā ahesun"ti cintanakāle pana sattesu uppajjati. Atha kasmā vuttam "sankhāro dukkhāpetabbo nāma natthī"ti, nanu ye dukkhāpetabbāti icchitā sattasañnitā, tepi atthato sankhārā evāti? Saccametam, te pana indriyabaddhā saviññānakatāya dukkham patisamvedenti, tasmā te vihimsāvitakkassa visayā icchitā sattasaññitā. Ye pana na dukkham patisamvedenti vuttalakkhanāyogato, te sandhāya "vihimsāvitakko sankhāresu nuppajjatī"ti vuttam.

Anupādāya āsavehi cittāni vimuccimsūti ettha āsavehīti kattu-atthe karaṇaniddeso, cittānīti paccattabahuvacanam, vimuccimsūti kammasādhanam, tasmā āsavehi kattubhūtehi anupādāya ārammaṇavasena aggahetvā cittāni vimuccitānīti¹ evamettha attho gahetabboti āha "tesam hi cittānī"ti-ādi. Yehi āsavehīti etthāpi kattu-atthe eva karaṇaniddeso. Vimuccimsūti kammasādhanam. Na

te tāni gahetvā vimuccimsūti te āsavā tāni cittāni ārammaṇavasena na gahetvā vimuccimsu vimocesum. Ettha hi cittānīti upayogabahuvacanam, vimuccimsūti kattusādhanam. Anuppādanirodhena nirujjhamānāti āyatim anuppattisankhātena nirodhena nirujjhamānā āsavā. Aggahetvā vimuccimsūti ārammaṇakaraṇavasena aggahetvā cittāni vimocesum. Vitasitacittā ahesunti sātisayañāṇarasmisamphassena samphullacittā ahesum. Purimavacanāpekkhanti "aññatarasmim bhimsanake vanasaṇḍe"ti vuttavacanāpekkham. Tenāha "yam vuttam aññatarasmim bhimsanake vanasaṇḍeti, tatrā"ti. Katanti bhāvasādhanavāci idam padanti āha "bhisanakatasmim hoti, bhimsanakakiriyāyā"ti. Bhimsanassa karaṇam kiriyā bhimsanakatam, tasmim bhimsanakatasmim.

Idāni aññathāpi atthayojanam dassento āha "atha vā"ti-ādi. Imasmim atthavikappe bhimsayatīti bhimsano, bhimsano eva bhimsanako, tassa bhāvo bhimsanakattanti vattabbe ta-kārassa lopam katvā "bhimsanakatan"ti vuttanti dassento āha "bhimsanakatasminti bhimsanakabhāveti attho"ti-ādi. Yebhuyyaggahaṇam lomavantavasenapi yojetabbam, na lomavasenevāti āha "bahutarānam vā"ti-ādi.

Purisayugavasenāti purisakālavasena, purisānam āyuppamāṇavasenāti vuttam hoti. "Sabbapacchimako subhaddasadiso"ti tīsupi gaṇṭhipadesu vuttam. Tasmim kāle vijjamānānam dvinnam parisānam āyuparicchedam sakalameva gahetvā "satasahassam -pa- aṭṭhāsī"ti vuttam. Dveyeva purisayugānīti ettha purisānam yugappavattikālo purisayugam. Abhilāpamattameva cetam, atthato pana purisova purisayugam. Dharamāne bhagavati ekam purisayugam, parinibbute ekanti katvā "dveyeva purisayugānī"ti vuttam. Parinibbute pana bhagavati ekameva purisayugam asītiyeva vassasahassāni brahmacariyam aṭṭhasīti veditabbam.

20. **Sāvakayugānī**ti sāvakā eva sāvakayugāni. **Asambhuṇantenā**ti apāpuṇantena. **Gabbhaṁ gaṇhāpentassā**ti sabbaññutaññāṇassa vijāyanatthaṁ ñāṇagabbhaṁ gaṇhāpentassa.

21. Ko anusandhīti pubbāparakathānam kim anusandhānam, ko sambandhoti attho. Sikkhāpadapaññattiyācanāpekkhanti yācīyatīti yācanā, sikkhāpadapaññattiyeva yācanā sikkhāpadapaññattiyācanā, tam apekkhatīti sikkhāpadapaññattiyācanāpekkham bhummavacanam, yāciyamānasikkhāpadapaññatti-apekkham bhummavacananti vuttam hoti. Yācanavisiṭṭhā sikkhāpadapaññattiyeva hi "tatthā"ti iminā parāmaṭṭhā, teneva vakkhati "tattha tassā sikkhāpadapaññattiyā"ti. Yam vuttanti "sikkhāpadam paññapeyyā"ti iminā yam sikkhāpadapaññapanam vuttam, yācitanti attho. Tattha tassā sikkhāpadapaññattiyāti tassam yāciyamānasikkhāpadapaññattiyanti attho. Akālanti sikkhāpadapaññattiyā akālam.

Āsavaṭṭhānīyāti ettha adhikaraṇe anīyasaddoti āha "āsavā tiṭṭhanti etesū"ti-ādi. Ke pana te āsavā, ke ca dhammā tadadhikaraṇabhūtāti āha "yesu diṭṭhadhammikasamparāyikā"ti-ādi. Diṭṭhadhammikā parūpavādādayo, samparāyikā āpāyikā apāyadukhavisesā. Te āsavanti tena tena paccayavasena pavattantīti āsavā. Nesanti parūpavādidi-āsavānam. Teti vītikkamadhammā. Asati āsavaļānīye dhamme sikkhāpadapaññattiyam ko doso, yenevam vuttanti āha "yadi hi paññapeyyā"ti-ādi, vītikkamadosam adisvā yadi paññapeyyāti adhippāyo. Parammukhā akkosanam parūpavādo, parehi vacanesu dosāropanam parūpārambho, sammukhā garahanam garahadoso.

Kathañhi nāma paliveṭhessatīti sambandho, kathaṁsaddayoge anāgatappayogo daṭṭhabbo. Anvāyikoti anuvattako. Bhogakkhandhanti bhogarāsiṁ. "Amhākamete"ti ñāyantīti ñātī, pitāmahapituputtādivasena parivaṭṭanaṭṭhena parivaṭṭo, ñātīyeva parivaṭṭo ñātiparivaṭṭo. Ghāsacchādanaparamatāya santuṭṭhāti ghāsacchādane paramatāya uttamatāya santuṭṭhā, ghāsacchādanapariyesane sallekhavasena paramatāya ukkaṭṭhabhāve saṇṭhitāti attho. Ghāsacchādanameva vā paramaṁ paramā koṭi etesaṁ na tato paraṁ kiñci asāmisajātaṁ pariyesanti paccāsīsanti cāti ghāsacchādanaparamat, tesaṁ bhāvo ghāsacchādanaparamatā, tassaṁ ghāsacchādanaparamatāya santuṭṭhā. Tesu nāma koṭi

yathāvuttaguṇavisiṭṭhesu tesu bhikkhūsu ko nāma. Lokāmisabhūtanti lokapariyāpannaṁ hutvā kileseti āmasitabbattā lokāmisabhūtaṁ.

Pabbajjāsaṅkhepenevāti "pāṇātipātā veramaṇī"ti-ādinā pabbajjāmukheneva.

Etanti methunādīnaṁ akaraṇaṁ. Thāmanti sikkhāpadānaṁ paññāpanakiriyāya sāmatthiyaṁ. Balanti yāthāvato sabbadhammānaṁ paṭivedhasamatthaṁ ñāṇabalaṁ. Kuppeyyāti kuppaṁ bhaveyya.

Etassevatthassa pākaṭakaraṇaṁ na yathāṭhāne tiṭṭheyyāti, paññattiṭṭhāne na tiṭṭheyyāti attho. Akusaloti tikicchituṁ yuttakālassa aparijānanato akusalo acheko. Avuddhi anayo, byasanaṁ dukhaṁ. Paṭikaccevāti gaṇḍuppādanato paṭhamameva. Sañchaviṁ katvāti sobhanacchaviṁ katvā. Bālavejjoti apaṇḍitavejjo. Lohitakkhayañca maṁ pāpetīti vibhattivipariṇāmaṁ katvā yojetabbaṁ.

Akālaṁ dassetvāti sikkhāpadapaññattiyā akālaṁ dassetvā. Rogaṁ vūpasametvāti¹ phāsuṁ katvā. Sake ācariyaketi ācariyassa bhāvo, kammaṁ vā ācariyakaṁ, tasmiṁ attano ācariyabhāve, ācariyakamme vā. Nimittatthe cetaṁ bhummavacanaṁ. Viditānubhāvoti pākaṭānubhāvo.

Vipulabhāvenāti pabbajitānam babubhāvena. Sāsane ekacce āsavaṭṭhānīyā dhammā na uppajjantīti yasmā senāsanāni pahonti, tasmā āvāsamacchariyādihetukā sāsane ekacce āsavaṭṭhānīyā dhammā na uppajjanti. Iminā nayenāti etena padasodhammasikkhāpadādīnam saṅgaho datthabbo.

Lābhaggamahattanti cīvarādilabhitabbapaccayo lābho, tassa aggam mahattam paṇītatā bahubhāvo vā. Bahussutassa bhāvo bāhusaccam. Ayoniso ummujjamānāti anupāyena abhinivisamānā, viparītato jānamānāti attho. Rasena rasam samsanditvāti sabhāvena sabhāvam samsanditvā, anuñnātapaccattharaṇādīsu sukhasamphassasāmannato upādinnaphassarasepi anavajjasannitāya anupādinnaphassarasena upādinnaphassarasam samsanditvā, samānabhāvam upanetvāti attho. Uddhammam

ubbinayam satthusāsanam dīpentīti "tathāham bhagavatā dhammam desitam ājānāmī"ti-ādinā¹ satthusāsanam uddhammam ubbinayam katvā dīpenti.

Imasmim attheti "nirabbudo hi sāriputta bhikkhusamgho"ti² evam vuttabhikkhusamghasaññite atthe. Katham pana dussīlānam corabhāvoti āha "te hi assamaṇāva hutvā"ti-ādi. Kāļakadhammayogāti dussīlatāsankhātapāpadhammayogato. Pabhassaroti pabhassarasīlo. Sāroti vuccantīti sāsanabrahmacariyassa sārabhūtattā sīlādayo guṇā "sāro"ti vuccantī.

Sabbaparittaguņoti sabbehi nihīnaguņo, appaguņo vā. So sotāpannoti ānandattheram sandhāya vadati. Sotam āpannoti maggasotam āpanno. Paṭipakkhadhammānam anavasesato savanato pellanato soto ariyamaggoti āha "sototi ca maggassetam adhivacanan"ti. Sotāpannoti tena samannāgatassa puggalassāti iminā maggasamangī sotāpannoti vatvā tamevattham udāharaņena ādhetvā idāni idhādhippetapuggalam niddhāretvā dassento āha "idha panā"ti-ādi. Idha āpannasaddo "phalasacchikiriyāya paṭipanno"ti-ādīsu³ viya vattamānakālikoti āha "maggena phalassa nāmam dinnan"ti. Maggena hi attanā sadisassa aṭṭhaṅgikassa vā sattaṅgikassa vā phalassa sototi nāmam dinnam, atītakālikatte pana sarasatova nāmalābho siyā. Maggakkhaņe hi maggasotam āpajjati nāma, phalakkhaņe āpanno.

Virūpam sadukkham sa-upāyāsam nipātetīti vinipāto, apāyadukkhe khipanako. Dhammoti sabhāvo. Tenāha "na attānam apāyesu vinipātanasabhāvo"ti. Atha vā dhammoti apāyesu khipanako sakkāyadiṭṭhiādiko akusaladhammo. Yassa pana so akusaladhammo natthi sabbaso pahīnattā, so yasmā apāyesu attānam vinipātanasabhāvo na hoti, tasmā vuttam "na attānam apāyesu vinipātanasabhāvoti vuttam hotī"ti. Kasmāti avinipātanadhammatāya kāraṇam pucchati. Apāyam gamentīti apāyagamanīyā. Vinipātanasabhāvoti uppajjanasabhāvo. Sammattaniyāmena maggenāti

sammā bhavaniyāmakena paṭiladdhamaggena. **Niyato**ti vā heṭṭhimantato sattamabhavato upari anuppajjanadhammatāya niyato. **Sambodhī**ti uparimaggattayasaṅkhātā sambodhi. Sambujjhatīti hi¹ sambodhi, ariyamaggo. So idha paṭhamamaggassa adhigatattā avasiṭṭho eva adhigantabbabhāvena icchitabboti. Tenāha "uparimaggattayaṁ avassaṁ sampāpako"ti. Uparimaggattayaṁ avassaṁ sampāpuṇātīti sampāpako, sotāpanno.

Vinayapaññattiyācanakathā nitthitā.

Buddhācinnakathā

22. **Anudhammatā**ti lokuttaradhammānugato dhammo. **Anapaloketvā**ti padassa vivaranam "anāpucchitvā"ti. Janapadacārikam pakkamantīti ettha iti-saddo gamyamānatāya na vutto, evam aññatthāpi īdisesu thānesu. Tattha janapadacārikanti janapadesu caranam, caranam vā cāro, so eva cārikā, janapadesu cārikā janapadacārikā. Tam pakkamanti, janapadagamanam gacchantīti attho. Pakkamantiyevāti avadhāraņena no na pakkamantīti dasseti. "Janapadacārikam pakkamantī"ti ettha thatvā bhagavato cārikāpakkamanavidhim dassento āha "janapadacārikam carantā cā"ti-ādi. Cārikā ca nāmesā² duvidhā turitacārikā ceva aturitacārikā ca. Tattha dūrepi bodhaneyyapuggalam disvā tassa bodhanatthāya sahasā gamanam turitacārikā nāma, sā mahākassapattherapaccuggamanādīsu datthabbā. Bhagavā hi mahākassapattheram paccuggacchanto muhuttena tigāvutamagamāsi, ālavakassatthāya timsayojanam, tathā angulimālassa, pukkusātissa pana pañcacattālīsayojanam, mahākappinassa vīsayojanasatam, dhaniyassatthāya sattayojanasatāni agamāsi, dhammasenāpatino saddhivihārikassa vanavāsītissasāmaņerassa tigāvutādhikam vīsayojanasatam agamāsi, ayam turitacārikā. Yam pana gāmanigamanagarapaṭipāṭiyā devasikam yojana-addhayojanavasena pindapātacariyādīhi lokam anugganhantassa gamanam, ayam aturitacārikā nāma. Imam pana cārikam caranto bhagavā mahāmandalam majjhimamandalam antimamandalanti imesam tinnam

maṇḍalānaṁ aññatarasmiṁ carati. Tattha "janapadacārikan"ti vuttattā aturitacārikāva idhādhippetā. Tameva vibhajitvā dassento āha "mahāmandalaṁ majjhimamandalan"ti-ādi.

Tattha antimamandalanti khuddakamandalam, itaresam vā mandalānam antogadhattā antimamandalam, abbhantarimamandalanti vuttam hoti. Imesam pana mandalānam kim pamānanti āha "tattha mahāmandalam navayojanasatikan"ti-ādi. Navayojanasatikampi thānam majjhimadesapariyāpannameva, tato param nādhippetam turitacārikāvasena agamanato. Yasmā nikkhantakālato patthāya gatagatatthānassa catūsu passesu¹ samantato yojanasatam ekakolāhalam hoti, purimam purimam āgatā nimantetum labhanti, itaresu dvīsu mandalesu sakkāro mahāmandalam osarati, tattha buddhā bhagavanto tesu tesu gāmanigamesu ekāham dvīham vasantā mahājanam āmisapatiggahena anugganhanti, dhammadānena ca vivattūpanissitam kusalam vaddhenti, tasmā vuttam "gāmanigamādīsu mahājanam āmisapatiggahena anugganhantā"ti-ādi. Samathavipassanā tarunāhontīti ettha tarunā vipassanāti sankhāraparicchedane ñānam kankhāvitarane ñānam sammasane ñānam maggāmagge ñānanti catunnam ñāṇānam adhivacanam. Samathassa tarunabhāvo pana upacārasamādhivasena veditabbo. "Sace pana antovasse bhikkhūnam samathavipassanā tarunā hontī"ti idam nidassanamattanti datthabbam. Aññenapi majjhimamandale veneyyānam ñānaparipākādikāranena majjhimamandale cārikam caritukāmā cātumāsam vasitvāva nikkhamanti.

Pavāraṇāsaṅgahaṁ datvāti anumatidānavasena datvā. Māgasirassa paṭhamadivaseti māgasiramāsassa paṭhamadivase. Idañcetarahi pavattavohāravasena kattikamāsassa aparapakkhapāṭipadadivasaṁ sandhāya vuttaṁ. Tesanti tesaṁ buddhānaṁ. Tehi vinetabbattā "tesaṁ vineyyasattā"ti vuttaṁ. Vineyyasattāti ca cārikāya vinetabbasattā. Māgasiramāsampi tattheva vasitvā phussamāsassa paṭhamadivaseti idampi nidassanamattanti daṭṭhabbaṁ. Catumāsavutthānampi buddhānaṁ vineyyasattā aparipakkindriyā honti, tesaṁ indriyaparipākaṁ āgamayamānā aparampi ekamāsaṁ vā dviticatumāsaṁ vā tattheva vasitvā mahābhikkhusaṁghaparivārā nikkhamitvā purimanayeneva lokaṁ

anuggaņhantā sattahi vā chahi vā pañcahi vā catūhi vā māsehi cārikaṁ pariyosāpenti. Veneyyavasenevāti avadhāraņena na cīvarādihetu carantīti dasseti. Tathā hi imesu tīsu maṇḍalesu yattha katthaci cārikaṁ carantā na cīvarādihetu caranti, atha kho ye duggatabālajiṇṇabyādhikā, te''kadā tathāgataṁ āgantvā passissanti, mayi pana cārikaṁ carante mahājano tathāgatadassanaṁ labhissati, tattha keci cittāni pasādessanti, keci mālādīhi pūjessanti, keci kaṭacchubhikkhaṁ dassanti, keci micchādassanaṁ pahāya sammādiṭṭhikā bhavissanti, taṁ nesaṁ bhavissati dīgharattaṁ hitāya sukhāyā''ti evaṁ lokānukampāya cārikaṁ caranti.

Apica catūhi kāraņehi buddhā bhagavanto cārikam caranti jaṅghavihāravasena sarīraphāsukatthāya, aṭṭhuppattikālābhikaṅkhanatthāya, bhikkhūnam sikkhāpadapaññāpanatthāya, tattha tattha paripākagatindriye bodhaneyyasatte bodhanatthāyāti. Aparehipi catūhi kāraņehi buddhā bhagavanto cārikam caranti buddham saraṇam gacchissantīti vā, dhammam, saṃgham saraṇam gacchissantīti vā, mahatā dhammavassena catasso parisā santappessāmāti vā. Aparehipi pañcahi kāraṇehi buddhā bhagavanto cārikam caranti pāṇātipātā viramissantīti vā, adinnādānā, kāmesumicchācārā, musāvādā, surāmerayamajjapamādaṭṭhanā viramissantīti vā. Aparehipi aṭṭhahi kāraṇehi buddhā bhagavanto cārikam caranti paṭhamam jhānam paṭilabhissantīti vā, dutiyam -panevasaññānāsaññāyatanasamāpattim paṭilabhissantīti vā. Aparehipi aṭṭhahi kāraṇehi buddhā bhagavanto cārikam caranti sotāpattimaggam adhigamissantīti vā, sotāpattiphalam -pa- arahattaphalam sacchikarissantīti vāti.

Pupphāni ocinantā viya carantīti iminā yathā mālākāro bahum pupphagaccham disvā tattha cirampi ṭhatvā pupphāni ocinitvā pupphasuñām gaccham disvā tattha papañcam akatvā tam pahāya aññattha gantvā pupphāni ocinanto vicarati, evameva buddhāpi yattha gāmanigamādīsu vineyyasattā bahū honti, tattha cirampi vasantā te vinetvā vineyyasuññagāmādīsu papañcam akatvā tam pahāya aññattha bahuvineyyakesu gāmādīsu vasantā vicarantīti dasseti. Tatoyeva ca atikhuddakepi antimamandale upanissayagantānam bahubhāvato tāva bahumpi kālam sattamāsapariyantam cārikam caranti.

Santasabhāvattā kilesasamaṇahetutāya vā santaṁnibbānaṁ, sukhakāraṇatāya ca sukhanti āha "santaṁ sukhaṁ nibbānamārammaṇaṁ katvā"ti. Dasasahassacakkavāļeti jātikkhettabhūtāya dasasahassilokadhātuyā. Idañca devabrahmānaṁ vasena vuttaṁ, manussā pana imasmiṁyeva cakkavāļe bodhaneyyā honti.

Bodhaneyyasattasamavalokananti¹ paṭhamaṁ mahākaruṇāya pharitvā pacchā sabbaññutaññāṇajālaṁ pattharitvā tassa anto paviṭṭhānaṁ bodhaneyyasattānaṁ samolokanaṁ. Buddhā kira mahākaruṇāsamāpattiṁ samāpajjitvā tato vuṭṭhāya "ye sattā bhabbā paripākañāṇā ajjayeva mayā vinetabbā, te mayhaṁ ñāṇassa upaṭṭhahantū"ti cittaṁ adhiṭṭhāya samannāharanti. Tesaṁ saha samannāhārā eko vā dve vā bahū vā tadā vinayūpagā veneyyā sabbaññutaññāṇassa āpāthamāgacchanti, ayamettha buddhānubhāvo. Evaṁ āpāthamāgatānaṁ pana nesaṁ upanissayaṁ pubbacariyaṁ pubbahetuṁ sampativattamānañca² paṭipattiṁ olokenti. Veneyyasattapariggaṇhanatthañhi samannāhāre kate paṭhamaṁ nesaṁ veneyyabhāveneva upaṭṭhānaṁ hoti. Atha "kiṁ nu kho bhavissatī"ti saraṇagamanādivasena kañci nipphattiṁ³ vīmaṁsamānā pubbupanissayāni olokenti.

Otiņņeti ārocite, parisamajjham vā otiņņe. Dvikkhattunti ekasmim samvacchare dvikkhattum. Buddhakāle kira ekekasmim samvacchare dve vāre bhikkhū sannipatanti upakaṭṭhavassūpanāyikakāle ca pavāraṇākāle ca. Upakaṭṭhāya vassūpanāyikāya dasapi vīsampi timsampi cattālīsampi paññāsampi bhikkhū vaggavaggā hutvā kammaṭṭhānatthāya āgacchanti. Bhagavā tehi saddhim sammoditvā "kasmā bhikkhave upakaṭṭhāya vassūpanāyikāya vicarathā"ti pucchati. Atha te "bhagavā kammaṭṭhānattham āgatamha, kammaṭṭhānam no dethā"ti yācanti. Satthā tesam cariyavasena rāgacaritassa asubhakammaṭṭhānam deti, dosacaritassa mettākammaṭṭhānam, mohacaritassa "uddeso paripucchā kālena dhammassavanam kālena dhammasākacchā idam tuyham sappāyan"ti ācikkhati. Kiñcāpi hi mohacaritassa ānāpānassatikammaṭṭhānam sappāyam, kammaṭṭhānabhāvanāya pana bhājanabhūtam kātum

^{1.} Bovaneyyasattasamolokananti (Sī, Syā)

^{3.} Kiccanipphattim (Sī)

^{2.} Sampattim vattamānanca (Sī)

sammohavigamāya pathamam uddesaparipucchādhammassavanadhammasākacchāsu niyojeti. Vitakkacaritassa ānāpānassatikammatthānam deti. Saddhācaritassa visesato purimā cha anussatiyo sappāyā, tāsam pana anuyunjane ayam pubbabhāgapatipattīti dassetum pasādanīyasuttantena buddhasubodhitam dhammasudhammatam samghasuppatipattiñca pakāseti. Nānacaritassa pana maranassati upasamānussati catudhātuvavatthānam āhārepatikūlasaññā visesato sappāyā, tesam upakāradhammadassanattham aniccatādipatisamyutte gambhīre suttante katheti. Te kammatthānam gahetvā sace sappāyam hoti, satthu santike eva vasanti. No ce hoti, sappāyam senāsanam pucchantā gacchati. Tepi tattha vasantā temāsikam patipadam gahetvā ghatentā vāyamantā sotāpannāpi honti sakadāgāminopi anāgāminopi arahantopi. Tato vutthavassā pavāretvā satthu santikam gantvā "bhagavā aham tumhākam santike kammatthānam gahetvā sotāpattiphalam patto -pa- aham aggaphalam arahattan"ti patiladdhagunam ārocenti, upari anadhigatassa adhigamāya kammatthānañca yācanti. Tena vuttam "pure vassūpanāyikāya ca kammatthānaggahanattham -pa- upari kammatthānaggahanatthañcā"ti.

Āyāmāti ettha ā-saddo "āgacchā"ti iminā samānatthoti āha "āyāmāti āgaccha yāmā"ti, ehi gacchāmāti attho. Ānandāti bhagavā santikāvacarattā theram ālapati, na pana tadā satthu santike vasantānam bhikkhūnam abhāvato. Pancasataparimāno hi tadā bhagavato santike bhikkhusamgho. Thero pana "ganhathāvuso pattacīvarāni, bhagavā asukaṭṭhānam gantukāmo"ti bhikkhūnam āroceti. "Atha kho bhagavā āyasmantam ānandam āmantesī"ti vuttattā "bhagavato paccassesī"ti idha bhagavatoti sāmivacanam āmantanavacanameva sambandhī-antaram apekkhatīti iminā adhippāyena "bhagavato vacanam paṭi-assosī"ti vuttam. Bhagavatoti pana idam patissavasambandhena sampadānavacanam yathā "devadattassa paṭissuṇotī"ti. Paccassosīti ettha paṭi-saddo abhimukhavacanoti āha "abhimukho hutvā suṇī"ti. Bhagavato mukhābhimukho hutvā adhivāsetvā suṇi, na udāsino hutvāti adhippāyo.

Tassa pāṭihāriyassa āgantukavasena katattā vuttam "nagaradvārato paṭṭhāyā"ti. Suvaṇṇarasapiñjarāhi rasmīhīti ettha rasa-saddo udakapariyāyo, piñjara-saddo hemavaṇṇapariyāyo, tasmā suvaṇṇajaladhārā viya suvaṇṇavaṇṇāhi rasmīhīti attho. Samujjotayamānoti obhāsayamāno. Assāti verañjassa brāhmaṇassa. Bhagavantam upanisīditukāmoti bhagavantam upagantvā nisīditukāmo, bhagavato samīpe nisīditukāmoti vuttam hoti.

Brāhmaṇa tayā nimantitā vassamvutthā amhāti pāļiyam sambandho veditabbo. Dātabbo assāti dātabbo bhaveyya. No asantoti neva avijjamāno, kintu vijjamānoyevāti dīpeti. Vinā vā lingavipallāsenettha attho daṭṭhabboti āha "atha vā"ti-ādi. Iminā sāmaññavacanato ettha napumsakalinganiddesoti dasseti. No natthīti no amhākam natthi. Noti vā etassa vivaraṇam natthīti. Kesam adātukāmatā viyāti āha "yathā"ti-ādi. Pahūtavittūpakaraṇānanti ettha vittīti tuṭṭhi, vittiyā upakaraṇam vittūpakaraṇam, tuṭṭhikāraṇanti attho. Pahūtam

dhanadhaññajātarūparajatanānāvidhālaṅkārasuvaṇṇabhājanādibhedaṁ vittūpakaraṇametesanti pahūtavittūpakaraṇā, tesaṁ pahūtavittūpakaraṇānaṁ maccharīnaṁ yathā adātukāmatā, evaṁ no adātukāmatāpi natthīti sambandho. **Taṁ kutettha labbhā**ti ettha **tan**ti taṁ kāraṇaṁ, taṁ kiccaṁ vā. **Etthā**ti gharāvāse. Dutiye pana atthavikappe **tan**ti deyyadhammassa parāmasanaṁ. **Etthā**ti imasmiṁ temāsabbhantareti attho. **Yan**ti yena kāraṇena, kiriyāparāmasanaṁ vā. Dutiye pana atthavikappe **yan**ti yaṁ deyyadhammanti attho.

Alam gharāvāsapalibodhacintāyāti saññāpetvāti brāhmaņa netam gharāvāsapalibodhena katam, atha kho mārāvaṭṭanenāti brāhmaṇam saññāpetvā. Taṅkhaṇānurūpāyāti yādisī tadā tassa ajjhāsayappavatti, tadanurūpāyāti attho. Tassa tadā tādisassa vivaṭṭasannissitassa ñāṇaparipākassa abhāvato kevalam abbhantarasannissito¹ eva attho dassitoti āha "diṭṭhadhammikasamparāyikam attham sandassetvā"ti, paccakkhato vibhāvetvāti attho. Kusale dhammeti tebhūmake

^{1.} Abibhudayanissito (Sī), abbhudayanissito (Syā), abbhudassa nissito (Ka)

kusale dhamme. **Tatthā**ti kusaladhamme yathāsamādapite. **Nan**ti brāhmaṇam. **Samuttejetvā**ti sammadeva uparūpari nivesetvā puññakiriyāya tikkhavisadabhāvam āpādetvā. Tam pana atthato tassa ussāhajananam hotīti āha "sa-ussāham katvā"ti. Evam puññakiriyāya sa-ussāhato evarūpaguṇasamangitā ca niyamato diṭṭhadhammikādi-atthasampādananti evam sa-ussāhatāya aññehi ca tasmim vijjamānaguṇehi sampahamsetvā sammadeva hatthatutthabhāvam āpādetvā.

Yadi bhagavā dhammaratanavassam vassi, atha kasmā so visesam nādhigacchi? Upanissayasampattiyā abhāvato. Yadi evam kasmā bhagavā tassa tathā dhammaratanavassam vassīti? Vuccate—yadipi tassa visesādhigamo natthi, āyatim pana nibbānādhigamatthāya vāsanābhāgiyā ca sabbā purimapacchimadhammakathā ahosīti daṭṭhabbā. Na hi bhagavato niratthakā dhammadesanā atthi. **Temāsikopi deyyadhammo**ti temāsam dātabbopi deyyadhammo. **Yam divasan**ti yasmim divase.

23. Buddhapariṇāyakanti buddho pariṇāyako etassāti buddhapariṇāyako, bhikkhusamgho. Tam buddhapariṇāyakam, buddhajeṭṭhakanti attho. Yāvadattham katvāti yāva attho, tāva bhojanena tadā katanti adhippāyo. Dātum upanītabhikkhāya paṭikkhepo nāma hatthasaññāya mukhavikārena vacībhedena vā hotīti āha "hatthasaññāyā"tiādi. Onītapattapāṇinti ettha onīto pattato pāṇi etassāti onītapattapāṇīti bhinnādhikaraṇavisayoyam saddo¹ bāhiratthasamāsoti āha "pattato onītapāṇin"ti-ādi. "Onittapattapāṇin"tipi pāṭho, tassattho onittam nānābhūtam vinābhūtam āmisāpanayanena vā sucikatam pattam pāṇito assāti onittapattapāṇi, tam onittapattapāṇim, hatthe ca pattañca dhovitvā ekamante pattam nikkhipitvā nisinnanti attho. Pattuṇṇapaṭṭapaṭe cāti pattuṇṇapaṭe ca paṭṭapaṭe ca. Tattha pattuṇṇapadese bhavā pattuṇṇā, kosiyavisesātipi vadanti. Paṭṭāni pana cīnapaṭāni. Āyogādīsu āyogoti paṭiāyogo, aṁsabaddhakam pattatthavikādīsu. Bhesajjatelānanti bhesajjasampākena sādhitatelānam.

Tumbānīti cammamayatelabhājanāni. Ekamekassa bhikkhuno sahassagghanakaṁ telamadāsīti sambandho.

Mahāyāgam yajitvāti mahādānam datvā. Saputtadāram vanditvā nisinnamti puttadārehi saddhim vanditvā nisinnam. Temāsanti accantasamyoge upayogavacanam. "Temāsam sotabbadhammam ajjeva suņissāmī"ti nisinnassa tam ajjhāsayam pūretvā desitattā vuttam "paripuņņasankappam kurumāno"ti. Anubandhitvāti anugantvā.

Buddhānaṁ anabhiratiparitassitā nāma natthīti āha "yathājjhāsayaṁ yathārucitaṁ vāsaṁ vasitvā"ti. Abhirantaṁ abhiratīti hi atthato ekaṁ. Abhirantasaddo cāyaṁ abhirucipariyāyo, na assādapariyāyo. Assādavasena ca katthaci vasantassa assādavatthuvigamanena siyā tassa tattha anabhirati, tayidaṁ khīṇāsavānaṁ natthi, pageva buddhānaṁ, tasmā abhirativasena katthaci vasitvā tadabhāvato aññattha gamanaṁ nāma buddhānaṁ natthi, vineyyavinayanatthaṁ pana katthaci vasitvā tasmiṁ siddhe vineyyavinayatthameva tato aññattha gacchanti, ayamettha yathāruci. Soreyyādīni anupagammāti mahāmaṇḍalacārikāya vīthibhūtāni soreyyanagarādīni anupagantvā. Payāgapatiṭṭhānanti gāmassapi adhivacanaṁ titthassapi. Gaṅgaṁnadinti gaṅgaṁ nāma nadiṁ. Tadavasarīti ettha tanti karaṇatthe upayogavacananti āha "tena avasari tadavasarī"ti.

Buddhācinnakathā nitthitā.

Samantapāsādikāyāti samantato sabbaso pasādam janetīti samantapāsādikā, tassā samantapāsādikāya. Tatridam samantapāsādikāya samantapāsādikattasminti ettha tatrāti purimavacanāpekkham, idanti vakkhamānakāraņavacanāpekkham. Tatrāyam yojanā—yam vuttam "samantapāsādikāya vinayasamvaṇṇanāya"ti, tatra yā sā samantapāsādikāti samvaṇṇanā vuttā, tassā samantapāsādikāya samvaṇṇanāya samantapāsādikattasmim samantapāsādikabhāve sabbaso pasādajanakatte idam hoti. Kim hotīti āha "ācariyaparamparato"ti-ādi.

Ācariyaparamparatoti "upāli dāsako"ti-ādinā¹ vuttaācariyaparamparato. Nidānavatthuppabhedadīpanatoti nidānappabhedadīpanato vatthuppabhedadīpanato ca. Tattha bāhiranidānaabbhantaranidānasikkhāpadanidānadassanavasena nidānappabhedadīpanaṁ veditabbaṁ, theravādappakāsanaṁ pana vatthuppabhedadīpanaṁ. Parasamayavivajjanatoti "sakāya paṭiññāya mettiyaṁ bhikkhuniṁ nāsethā"ti-ādīsu² micchāpaṭipannānaṁ paresaṁ laddhinirākaraṇato, tatoyeva ca attano samayapatiṭṭhāpanena sakasamayavisuddhito.

Byañjanaparisodhanatoti pāṭhasodhanena byañjanaparisodhanaṁ veditabbaṁ, saddasatthānusārena vā nibbacanaṁ dassetvā padanipphattidassanaṁ byañjanaparisodhanaṁ.

Vibhanganayabhedadassanatoti "tisso itthiyo"ti-ādipadabhājanassa anurūpavasena nayabhedadassanato. Sampassatanti ñāṇacakkhunā sammā passantānam, upaparikkhantānanti attho. Apāsādikanti appasādāvaham. Etthāti samantapāsādikāya. Sampassatam viññūnanti sambandho. Tasmā ayam samvaṇṇanā samantapāsādikātveva pavattāti yojetabbam. Kassa kena desitassa samvannanāti āha "vinayassā"ti-ādi.

Iti samantapāsādikāya vinayatthakathāya sāratthadīpaniyam

Verañjakandavannanā samattā.

Pathamo bhāgo nitthito.

Sāratthadīpanīṭīkāya paṭhamabhāge

Samvannitapadānam anukkamanikā

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Akamsu	21	Aṅguliveṭhakamuttā	ā 162
Akaraṇaṁ	443	Acinteyyāni	91
Akālaṁ	449	Accantam	14
Akālo	55	Accāraddham	58
Akiriyam	342	Accāraddhavīriyam	399
Akuppadhammatam	350	Acchariyāni	108
Akusalapariyāpanno	357	Acchare	411
Akusalo	450	Acchijjamānam	111
Akosallasambhūtaṭṭhena	347	Ajavīthi	262
Akkamitvā	140	Ajātasattu	56
Akkharam	328	Aj ā naṁ	403
Akkhāyati	414	Ajjhagā	65
Agatim gantum	49	Ajjhāsayo	75
Agati	307	Ajjhiṭṭho	153
Agadaharītakam	124	Ajjhesanam	19
Agadāmalakam	124	Ajjhogāļho	252
Agamāsi	179	Ajjhosānam	309
Agārāni	284	Ajjilosanam Añjalim	425
Aggam	436	Anjanni Aññaṁ	405
Aggadakkhiņeyyattā	224		
Aggahesi	293	Aññataravihārasam	
Aggiṁ	138	paridīpanam	204
Agginā	278	Aññadatthu	150
Aggo	339	Aññāṇaṁ	219, 338, 411
Aghassa	414	Aññāṇatāya	191
Angapaccange	83	Aññātaṁ	131

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Aññāya	340	Attakilamathānuyoga-	
Aṭṭhakathā	20, 21	vivajjanam	207
Aṭṭhaṅgasamannāgataṁ	385	Attanā	90
Aṭṭhasatataṇhāvicaritāni	310	Attapaccakkhavacanam	26
Aṭṭhānaṁ	445	Attasanniyyātanam	417
Aṭṭhitassa	16	Attānaṁ	91
Atthuppattiyuttam	432	Attham	83
Aḍḍhuḍḍhāni	153	Atthaṅgatā	368
Addhe	401	Atthajātaṁ	80
Aṇimā	311	Atthato	195, 196
Ataccham	238	Atthapadam	292
Atikkamitvā	400	Atthapadāni	328
Aticchatha	119	Atthaparisuddhatāya	337
Aticchāto	403	Attharasassa	299
Atidukkarāni	7	Atthavaṇṇanā	366
Atidhāvanto	91	Atthavikappe	366
Atinijjhāyitattam	399	Atthānam	69
Atimaññissati	434	Atthānurūpam	80
Atimāno	302	Atthābhisamayā	197
Atirocatha	149	Atthāvaham	335
Atilīnavīriyam	399	Atthitā	249
Ativiya parisuddho	312	Attho	197
Atisamagghe	426	Atha	206
Atisayanirodho	377	Adantā	290 133
Atiharatha	127	Adāsi Adinnādānaṁ	344
Atītaṁsañāṇaṁ	410	Adukkhamasukham	379
Atītasatthukam	32	Adesisum	153
Atītā	409	Adosanissandayuttattā	401
Aturitacārikā	452	Adosanissandayuttatta Addasa	182
Atulitacalika	432	Auuasa	102

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Addhaniyam	34	Anatthasamhitam	238
Addhānaṁ	337	Anantaram	392
Addhānakkhamā	427	Anantāni	277
Addhānaparicchedo	382	Anantena	277
Addhānamaggo	42	Anayo	172, 450
Adhammo	44	Anavakāso	445
Adhi	350	Anavajjo	421
Adhikaraṇam	115, 309	Anavaññattimado	304
Adhikaraṇattho	199	Anāgatā	409
Adhikāpi	73	Anāgate	409
Adhigatarūpadassanam	124	Anādikālappavattam	218
Adhigamabyattito	334	Anāpatti	107
Adhiccasamuppannikā	147	Anābhogarasā	374
Adhiṭṭhahitvā	168, 437	Anālayā	111
Adhippāyo	79	Aniccatādipaṭisaṁyuttāya	a 54
Adhimuttatam	208	Aniccatāvasam	115
Adhimutti	250	Anibbisam	65
Adhivāsetu	425	Animittavimokkho	313
Adhivāsetvā	120	Aniyamaniddesavacanam	n 195
Adhisayitāni	350	Anīļakaṁ	436
Adho	122	Anu	341
Adhomukhaṭhapitam	412	Anu-acchariyā	341
Anaññaneyyatāya buddł	no 296	Anu-abhāvaṁ gatā	341
Anabhibhūto	214	Anukampāya	160
Anamataggasamsāravaṭṭ	am 218	Anukkhipanto	340
Anamataggiyam	153	Anugantvā anugantvā	389
Anattamano	120	Anuttaram	64, 323
Anattukkamsanato	412	Anuttarena maggena	349
Anatthakāmā	403	Anuttaro purisadammasā	rathi 320

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Anudeva	389	Anusandhi	449
Anudhammatā	452	Anusandhikkamo	323
Anupagamma	459	Anusayappahānam	76
Anupaghāto	443	Anusayā	75
Anupaparikkhatam	83	Anusāsati	292
Anupabbajito	140	Anusiṭṭhikarānaṁ	188
Anuparivattanti	138	Anussariyamānasukhako	337
Anupavādo	443	Anekatūriyasamghuttham	179
Anupādā cittassa	193	Anekabhedo	357
Anupādā parinibbānatthā	iya 193	Anekavidham	389
Anupādāya	58	Anekavihitam	161
Anupādisesāya	28	Anekālaṅkārapatimaṇḍitai	in 179
Anupubbādigatena	353	Anekehi	337
Anupubbena	185	Anejamasokam	414
Anuppatto	183	Antarā	62
Anuppādanirodhena	448	Antarāyikā	88
Anubandhanto	160	Antare	28, 67
Anubandhitvā	459	Antānantikā	144
Anubuddho	232	Antimamandalam	453
Anubyañjanasankappanā	355	Antimavayam	338
Anumajjanam	359	•	127
Anumatikappo	112	Antepuram	20
Anumatiyā	49	Antogadhatheravādam	
Anumānādipaţikkhepo	323	Anvāyiko	449
Anuyuñja	58	Apasakkanto	171
Anurādhapuram	185	Apaṇṇakasuttaṁ	134
Anurūpam	130	Apatamāne	414
Anulomato	232	Apadesāraho	363
Anulomiko	92	Apadesena	223
Anusaṭaṁ	350	Apanamatu	171

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Aparam	342	Apphotanehi	179
Aparagoyānam satta-		Abbāhimsu	140
sahassayojanam	273	Abbudam	114, 138
Aparaṇṇaṁ	426	Abbhaññāsim	352
Aparavambhanato	412	Abbhatthaṅgatā	368
Aparipatantam	204	Abbhantare	425
Aparibyattakiccato	374	Abbhācikkhati	91
Apalibuddham	396	Abbhuggato	215
Apāyagamanīyā	451	Abbhutadhammam	103
Apāyesu	414	Abyāpādavitakko	446
Apāsādikaṁ	460	Abyāpārapaccupaṭṭhānā	374
Api	24	Abhavo	11
Apunabbhavabhūtā	349	Abhikkantataro	411
Appam	323	Abhikkantā	411
Appaţikūlam	415	Abhikkantena	72, 294
Appațimo	289	Abhijappā	399
Appațisamam	350	Abhijjhā	346
Appaṇihitavimokkho	313	Abhiññā	235, 323
Appannapāne	401	Abhiññātā	71
Appamādena	137	Abhiññāpakkhe	353
Appamādo	131	Abhiññāpādakam	141, 383
Appameyyam	6	Abhiññeyyam	230
Apparajakkhe	251	Abhiññeyyato	229
Appavattim	408	Abhiññeyye	229
Appavatti	231	Abhidhamme	72
Appātaṅkaṁ	337	Abhinandanā	308
Appābādham	337	Abhinandantānam	340
Appitā	368	Abhinīharim	389
Appesi	178	Abhinīhārakkhamam	386
Appossukkā	428	Abhibhavati	288

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Abhimukho	456	Ayujjhapurānam	270
Abhirūpe	401	Ayoniso	450
Abhilāpamattabhedo	202	Aravāļadahapiţţhiyam	150
Abhilakkhitā	72	Araham	225, 320
Abhivādanam	170	Arahattappattim	59
Abhivādanādiraho	339	Arahattā	225
Abhivādeti	338	Arānaṁ	224
Abhivinaye	72	Ariyavihāro	313
Abhisankhāramāro	310	Ariyasamgham	13
Abhisamayattho	198	Ariyasamgho	13
Abhisamayo	198	Ariyūpavādova	403
Abhisamenti	440	Arīnaṁ	216
Abhisekam datvā	182	Arūpabhavo	232
Abhisekena	163	Are	183
Abhihaṭabhikkhāsaṅkhep	ena 431	Alaṁ	32
Abhūtam	238	Alagaddagavesī	82
Amaccā	127	Alagaddatthiko	82
Amatam padam	131	Alagaddūpamā	81
Amataṭṭho	313	Alagaddapariyesanam	82
Amatosadham	162	Alaṅkaritvā	161
Amathitakappo	112	Alaṅkārāpetvā	185
Amanasikāro	398	Alobhanissandayuttattā	401
Amanussapurisā	291	Avaññāte	401
Amarāvikkhepikā	145	Avadhī	294
Amohanissandayuttattā	401	Avassikova	123
Ambare	155	Avahasantam	57
Ambalaṭṭhikā	62	Avicāretvā	348
Ambunā	17	Avijjā	394
Amhe	91	Avijjādikilesajāla-	
Ayā	406	viddhamsino	11

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Avijjāmūlakattam	218	Asammussanarasā	375
Avinayo	45	Asammohato	80
Avippațisāro	193	Asammohalakkhaṇam	375
Avibhūtapaccupaṭṭhānā	379	Asallīnam	354
Aviruļhidhammattā	341	Asahamāno	150
Avisahatāya	431	Asādhāraṇahetumhi	205
Avisahanto	138	Asilokabhayena	225
Avisiṭṭhaṁ	73	Asuttamayikam	124
Avisesena	203	Asambhuṇantena	448
Avihimsāvitakko	446	Asammutthā	354
Avedi	242	Asurabhavanam	270
Avokkamitvā	24		
Avoca	178	Asurasadisam	407
Asamkiliṭṭham	376	Asekkhapaṭisambhidāppa	
Asakkonto	122	Asesayitvā	24
Asaṅkhataṭṭho	313	Asokaraññā	163
Asaṅgītaṁ	67	Asokārāme	132
Asajjamānā	292	Assa	25
Asajjamāno	237	Assaddhiyena	385
Asaññībhavo	232	Assamaṇḍalikāyo	427
Asaññīvādā	147	Assādasaññito	407
Asaddhamme	413	Assāso	139
Asaddho	424	Ahitāya	84
Asabbaguṇadāyakattā	351	Ahogaṅgapabbataṁ	138
Asaniyo	150	Ahosi	111
Asanto	457		
Asamasamo	288	[Ā]	
Asamo	288	Ākaṅkhanti	394
Asambudham	10	Ākaṅkhāmi	40
Asammissam	16	Ākārato	223

Padānukkamo	Piṭṭhaṅko	Padānukkamo	Piṭṭhaṅko
[Ā]		[Ā]	
Ākārasallakkhaṇa-		Ānayanaṁ	359
kusalatāya	425	Ānayitvā	125
Ākārā	392	Ānubhāvena	15, 259
Ākāro	329	Ānubhāvo	390
Ākāsagaṅgā	257	Āpāthaṁ	125
Ākāse	139	Āpātharamaṇīyate	412
Ākāsena	59	Āpādite	337
Ākhyātapadam	329	Āpanno	451
Āgacchatha	140	Ābhataṁ	406
Āgataphalo	167	Āmantayāmi	66
Āgantvā	59	Āmantesi	60
Āgamabyattito	335	Āmalakaṁ	162
Āgamāsi	175	Āyassa	406
Āgamimsu	133	Āyācanā	430
Ācariyake	450	Āyāma	456
Ācariyaparamparato	460	Āyūhanaṁ	371
Ācariyaparamparā	109	Āyūhanaṭṭho	312
Ācariyupajjhāyānam	132	Āyūhanā	222
Ācāragocarakusalatā	189	Āyogo	194, 458
Ācikkhi	122	Ārakattā	216
Āciṇṇakappo	112	Ārakkhaṁ	153
Ājīvo	422	Ārakkhapaccupaṭṭhānā	375
Āṇākkhettaṁ	278	Ārakkhādhikaraṇaṁ	309
Āṇācakkaṁ	57	Ārakkho	309
Āṇārahena	74	Āraddhappakāradassana	tthe 390
Ādikalyāṇādippakāram	323	Ārammaṇato	374
Ādikalyāņo	325	Ārammaṇādīhi	73
Ādiccam	138	Ārāmo	197
Ādhipateyyaṭṭho	313	Ārogyamado	303
Āneñjappatte	385	Āropesi	154

Padānukkamo	Piṭṭhaṅko	Padānukkamo	Piṭṭhaṅko
[Ā-I]		[I - Ī]	
Ārohantassa	391	Icchitam patthitam	312
Ārohamado	305	Ijjhanti	403
Ālapanamattaṁ	213	Iñjati	385
Ālokapariggahena	396	Iţţhāniţţhaviparītānu-	
Ālokitaṁ	129	bhavanalakkhaṇā	379
Āvajjesi	58	Iti	332
Āvaṭṭagaṅgā	257	Itivādappamokkhānisams	sā 83
Āvatthikam	297	Ito	356
Āvāsakappo	112	Itthattāya	409, 410
Āvijji	176	Itthambhūtākhyānatthe	214
Āviñchanti	340	Iddhipādakabhāvūpa-	
Āvibhāvattham	403	gamanena	387
Āvuso	32	Iddhippattā	166
Āsanāraham	58	Iddhimado	304
Āsannaṁ	166	Iddhiy ā	294, 411
Āsannataram	336	Idha	22
Āsabhim	339	Iriyam	364
Āsayaposanam	357	Iriy ā pathamado	304
Āsavaṭṭhānīyā	449	Iriyāpathavihāro	203
Āsavā	306, 449	Isi	153
Āsavehi	58	Isivātapaţivātā	151
Āsāvatī	269	Issariyam	311
Āhananaṁ	359	Issā	301
Āhāraṭṭhitikā	241	Īsitā	311
Āhārā -	242		
Āhiṇḍanto -	136	[U]	222
Āhiṇḍasi _	171	Ukkaṭṭhaparicchedato	323
Āhitaṁ	354	Ukkaṭṭhaparicchedavaser	
Icchācāro	433	Ukkujjeyya	413
Ācchāvacarānam	386	Ukkoṭeyya	50

Padānukkamo	Piṭṭhaṅko	Padānukkamo	Piṭṭhaṅko
[U]		[U]	
Ukkhipitvā	183	Udānagāthaṁ	66
Uggaņhāpesi	142	Udikkhati	178
Uggatā	259	Uddānasaṅgaho	107
Ugghāṭeyya	412	Uddisīyati	392
Uccakulatā	445	Uddesakkamena	377
Uccāvacāni	127	Uddeso	392
Uccinatu	45	Uddhaṁ	122
Uccinitena	50	Uddhaccāya	58
Ucchedadiţţhim	397	Uddhammaṁ	450
Ucchedavādā	148	Upakaṭṭhā	54
Uññāte	401	Upakārabahulatam	208
Uṭṭhānaṭṭhāne	427	Upakkilissati	384
Uṭṭhitassa	124	Upagaccheyya	375
Uṇhīsaṁ	162	Upagamanam	222
Uttaradvārato	184	Upacārena	363
Uttarābhimukham	58	Upacitam	401
Uttarābhimukho	338	Upaññāso	26
Uttaritaro	339	Upaṭṭhāpetvā	170
Uttarimanussadhamme	41	Upaṭṭhāpesi	123
Uttānapadato	412	Upaṭṭhitā	354
Uttānīkaraṇaṁ	328	Upadhiviveko	313
Uttānīkaraṇapaññāpanā	ni 328	Upanāho	300
Uttāreti	293	Upanijjhāyati	363
Utrastarūpā	184	Upanisā	193
Udakaṁ	169	Upanisīditukāmo	457
Udakadantaponam	123	Upanissayasampattim	293
Udake	294	Upapattim	371
Udakena	285	Upapattito	369
Udaggudaggo	115	Upapattiyā	392
Udapādim	392	Upapattivasena	340

Padānukkamo	Piṭṭhaṅko	Padānukkamo	Piṭṭhaṅko
[U]		[U]	
Upapannaphalo	436	Upehi	163
Upaparikkhanti	83	Uposathaggaṁ	441
Upapāte	395	Uposathārocikā	441
Upabrūhanam	361	Uposatho	112
Uparibrahmalokūpapatt	iyā 114	Uppajjamāno	208
Upavattane	28	Uppajji	161
Upavadantā	437	Uppatitvā	139
Upavasanti	112	Uppannam	357, 377
Upasaggapadam	329	Uppannalatā	161
Upasaṅkami	336	Uppannasaddho	124
Upasamam	119	Uppātapāṭhakā	168
Upasamaparibāhirena	127	Uppādam	371
Upasampajja	364	Uppilam	399
Upasampadā	131, 443	Ubbinayam	451
Upādānam	196, 222	Ubhay ā ni	67
Upādānakkhandhā	243	Ubhinnam	231
Upādāya	113	Umaṅgagaṅgā	257
Upādinnaphasso	87	Ummujjamānā	450
Upāyena	63	Uyyānaṁ	168
Upārambhānisamsā	83	Uraga	271
Upāsakattam	163	Ussannadhātukam	55
Upāsakapaṭikuṭṭho	424	Ussannavīriyā	440
Upāsakapadumam	424	Ussāhena	350
Upāsakapuṇḍarīko	424	Uļāro	138
Upāsakaratanam	424	-	
Upāsako	422	[E]	100
Upekkham	373	Ekakanipātādisaṅgaho	108
Upekkhā	369	Ekakolāhalam	179
Upekkhāsatipārisuddhi-		Ekakkhaṇavasena	374
bhāvena	384	Ekadivasameva	133

Padānukkamo	Piṭṭhaṅko	Padānukkamo	Piṭṭhaṅko
[E]		[0]	
Ekanikāyampi	92	Oññātaṁ	435
Ekaninnādam	180	Otaranti	187
Ekantanikkileso	296	Otiņņe	455
Ekamātikam	123	Odagyaṁ	361
Ekarajjābhisekam	123	Onītapattapāņim	458
Ekaladdhike	142	Opammanidassanattham	436
Ekavokārabhavo	232	Opammasampaṭipādanar	in 352
Ekasataṁ	123	Obhāsaṁ	399
Ekasataputtā	123	Obhāsakaraņaṭṭhena	394
Ekasālako	197	Obhāsagataṁ	385
Ekāyanamaggaṁ	296	Obhāsayam	294, 411
Ekā latāyaṭṭhi	161	Omānaṁ	435
Ekībhāvam	336	Olujjati	48
Ekekapaduddhārena	231	Olokento	338
Eko	107	Olokesim	339
Etam	91	Ovaditvā	137
Etadatthā	193	Osannavīriyā	440
Etamattham	141	Ohīļite	401
Ettāvatā	134	Oļārikaṅgappahānena	375
Ettha	351	Oļārikaṭṭhena	360
		Oļārikattā	375
Erāvaņo	267	[Ka]	
Evamdubbhikkhe	432	Kamsapātim	113
Evarūpe	400	Kakusandho	176
[0]		Kañcikālam	149
Okāsaloko	241	Kaññaṁ	162
Oghā	307	Kaññāsatehi	178
Ocinantā	454	Kaṇṭakaṁ	138
Ojavantaṁ	436	Kaṇṇasukhato	412

Padānukkamo	Piṭṭhaṅko	Padānukkamo	Piṭṭhaṅko
[Ka]		[Ka]	
Kaṇhagaṅgā	257	Kasiņāni	231
Katakiccā	114	Kasiņārammaņūpa-	
Katapuñño	58	nijjhāyanato	363
Katabuddhakicce	27	Kasmīragandhāra	151
Kattikachaṇapūjaṁ	182	Kassapo	177
Kattikapuṇṇamāyaṁ	169	Kahāpaṇampi	113
Katvā	137	Kākaṇḍakaputto	112
Kathā	193	Kāmaṁ	17
Kathādoso	58	Kāmacchandoyeva	357
Kanakagirisikharam	125	Kāmadhātu	355
Kantāram	362	Kāmabhavo	231
Kantāro	293	Kāmarāgapaṭipakkhato	356
Kanditvā	184	Kāmavitakko	447
Kapaṇapuriso	348	Kāmasukhallikānuyoga-	
Kappakoţīhi	6	vivajjanupāyadassanari	n 207
Kappati	111	Kāmā	355
Kappo	390	Kāmesu	357
Kammakkhame	384	Kāyakammavacīkamma-	
Kammakkhayakaram	218	vipphanditavinayanam	188
Kammāravaņņam	178	Kāyaṅgaṁ	425
Kayakesu	426	Kāyacittapassaddhivasen	a 354
Karakavassam	150	Kāyaduccaritam	342
Karuṇā	9	Kāyavivekādayo	356
Karuṇāvipphāram	349	Kāyaviveko	313, 356
Karuṇāvihārena	199	Kāyo	403
Karuṇāsītalato	412	Kāraņena	336
Karoți	271	Kāruņiko	9
Karonto	7	Kālattho	199
Kalaho	309	Kāliṅgakulāni	183
Kalyāņo	215	Kālo	199

Padānukkamo	Piṭṭhaṅko	Padānukkamo	Piṭṭhaṅko
[Ka]		[Ka]	
Kāsāvapajjotā	151	Kusalattikānam	13
Kāsāvavasano	150	Kusalassa	443
Kāļakadhammayogā	451	Kusalādīhi bhedehi	312
Kāļakūṭaṁ	255	Kusalādhippāyo	140
Kāļapakkhacātuddasī	413	Kusale	457
Kiccam	58	Kūṭaṁ	65
Kiñci mantam	120	Kūṭāgārasālā	112
Kiñjakkhāni	161	Ke	120
Kiņitvā	426	Keṭubham	121
Kiriyākappavikappo	121	Kelāsakūṭaṁ	256
Kilāsuno	440	Kevalaparipuṇṇam	335
Kilesānam	76	Koṭippattaṁ	408
Kilesakālussiyassa	368	Koṭiyaṁ	425
Kilesaparinibbanam	173	Koṇāgamano	177
Kilesamāro	310	Kotūhalamaṅgaliko	424
Kilesavasena	408	Kotūhale	411
Kilesā	12	Kodhe	411
Kilesārayo	217	Kodho	300
Kukkuccapakatānam	191	Kontaputtatissatthero	135
Kukkuccakesu	189	[Kha]	
Kudālapiṭakaṁ	73	Khaṇe	196
Kupito	120	Khaṇo	196, 200
Kuppeyya	450	Khaṇḍaṁ	56
Kummaggo	413	Khaṇḍiccādibhāvam	337
Kurundī	20	Khaṇḍaphullapaṭi-	
Kulavamsappatiṭṭhāpakar	m 42	saṅkharaṇaṁ	56
Kulasamudācārakamman	in 342	Khattiyo	284
Kulūpaghātaṁ	48	Khanati	91
Kusalattikavasena	374	Khanti	441

Padānukkamo	Piṭṭhaṅko	Padānukkamo	Piṭṭhaṅko
[Kha]		[Ga]	
Khandhakāni	67	Gataṁ	65
Khandhapaṭipāṭi	393	Gatagataṭṭhāne	428
Khandhaparinibbānam	173	Gatim	371
Khandhamāro	310	Gati	189
Khandhasangahavasena	374	Gato	7
Khamanīyam	336	Gantvā	140
Khamanīyādīni	336	Ganthā	307
Khamanti	83	Gandhakuṭiyā	54
Kharabhāvo	352	Gandhamādanakūṭam	255
Khassa	314	Gabbham	353, 448
Khāyati	161	Gabbhaggahaṇakālo	353
Khīṇā	409	Gabbhato	348
Khīṇāsavasaṅkhātena b		Gabbhaseyyā	349
Khīravirecanam	55	Gamanena	240
Khuraggeyeva	128	Gamiyavattam	441
Khettam	13	Gambhīratthato	412
Khedam	7	Gambhīrā	331
Kho	32	Garahadoso	449
	32	Garahantā	437
[Ga]		Garahāyam	412
Gaganatalam	125	Garukāramado	303
Gaggarāya	293	Gavakkhajālasadisam	179
Gacchāmi	414	Gahaṭṭhānuggahakaraṇan	n 206
Gajamuttā	162	Gahetvā	60
Gaṇanānupubbato	363, 368	Gāmantarakappo	112
Gaṇhāti	90	Gāravayutto	297
Gaṇhāpetvā	353	Gāravādhivacanam	299
Gaṇhiṁ	104	Gāhayitum	378
Gaṇhitvā	140	Guṇaparidhamsanena	403

Padānukkamo	Piṭṭhaṅko	Padānukkamo	Piṭṭhaṅko
[Ga - Gha]		[Ca]	
Guṇādhigamanato	412	Caritvā	427
Guttam	127	Cātuddasīdivase	186
Geham	65	Cāretvā	425
Gehe	119	Cittam	92
Gocaram	363	Cittato	374
Gocaro	189	Cittarūpam	139
Gottamado	303	Cittalatāvanam	268
Gottavasena	213	Cittaviveko	313
Goyūthāni	206	Cittasampahamsanattham	n 216
Govīthi	262	Cittāni	447
Ghātena	384	Cittekaggatatthāni	380
Ghāsacchādanaparamat	āya 449	Cittehi nayehi	19
[C ₂]		Citrakūṭaṁ	255
[Ca]	26	Cintesi	160
Ca	26	Ciram	438
Cakkavāļasiluccayo	260	Ciraṭṭhitikaṁ	34
Caṅkamati	128	Cirā	438
Caṅkamena	58	Cīvare	36
Caṇḍikkabhāve	120	Cutipațisandhivasena	393
Catutthe divase	185	Cutiyā	395
Caturaṅgasamannāgatar	in 353	Cūļavedallam	103
Caturāsīti	104	Cetakattherena	55
Candamaṇḍalaṁ	260	Cetanāham	141
Cando	264	Cetayitvā	141
Caramāno	82	Cetaso	366
Carasi	48	Cetiyagirimhi	169, 171
Carahi	134	Cetiyapaţimaṇḍitāni	132
Caritam	250	Cetokhilāni	308
Cariyā	75	Cetopariyakovidā	166

Padānukkamo	Piṭṭhaṅko	Padānukkamo	Piṭṭhaṅko
[Ca]		[Ja]	
Cetovinibandhā	308	Jar ā maraṇapariyantattaṁ	219
Celukkhepasatasahassān	ni 179	Jalaṁ	294
Codetā	131	Jalogī	112
Codetvā	151	Jātakaṁ	103
Corakantāram	293	Jātarūparajatam	112
	_, _	Jātiṁ	390
[Cha]		Jātikantāro	293
Chadditapatita-uklāpā	56	Jātikkhettam	278, 390
Chaṇatthaṁ	154	Jātimado	303
Chaṇavesam	140	Jātimahallakatāya	337
Chaddantadahato	124	Jātibrāhmaņe	337
Chandarāgaparibhogo	342	Jātivasena	340
Chandarāgo	309, 355	Jātisamudāgatam	213
Chandā	49	Jātisampannakulehi	185
Chandagamanam	49	Jānaṁ	403
Chando	309	Jānato	409
Chambhitattam	398	Jānantova	294
	369	Jānāti	224
Chalangupekkhā		J <u>a</u> nitum	120
Chaļabhiññā	41	Jānissanti	120
Chātapabbatapāde	160	Jālam	12
Chinnabhinnapaṭadharo	150	Jigucchati	347
[Ja]		Jigucchi	403
Jaggitv ā	128	Jiṇṇe	338
Janapadac ā rikam	452	Jiyam	160
Janapado	174	Jīvakambavane	63
Jambudīpe	149	Jīvaloko	11
•		Jīvitamado	303
Jambusirivhaye	111	Jegucchitam	347
Jammim	115	Jettho	353

Padānukkamo	Piṭṭhaṅko	Padānukkamo	Piṭṭhaṅko
[Ja]		[Ta]	
Jotayitvā	111	Taṁ	16
[Th]		Taṁkammārammaṇaṁ	402
[Jha]		Tam vacanam	339
Jhānaṅgapaccanīkāni	357	Taṅkhaṇaññeva	128
Jh a napaṭipakkhato	357	Taṅkhaṇānurūpāya	457
Jhānapaṭilābhapaccanīkā	nam 386	Tacchakānam	71
Jhānamado	304	Taṇham paṭicca	308
Jhānāni	232, 235	Taṇhākāyā	308
Jhānupekkhā	373	Taṇhāmūlakā	308
Jhāpeti	363	Taņhāsamkilesassa	76
-	202	Tatiyam	183
[Ña]		Tatonidānam	83
Ñatvā	224	Tatramajjhattupekkhā	373
Ñāṇacakkhu	396	Tathattāya	325
Ñaṇapharasum	218	Tathāgatassa	340
Ñāṇambuniddhotamalāsa	avā 17	Tathāgatā	339
Ñānena	395	Tathārūpānam	335
Ñātaṭṭhena	224	Tadaṅgappahānaṁ	76
	449	Tadaññaṁ	92
Natiparivațio		Tadatthajotanattham	199, 201-2
Ñāto ~	21	Tadatthadīpakam	368
Ñāpetukāmo	59	Tadatthaparinipphādana	.m 211
Ñāyehi	298	Tadadhigamāya	369
[Ṭha]		Tadantaresu	276
	54	Tadavasari	112
Ţhapetvā		Tadahu	112
Ţhapesi	182	Tadupiyam	428
Ţhānam	32, 408	Tantikkamam	24
Ţhitatt ā	385	Tannissaraṇam	355
Ţhite	16	Таро	441

Padānukkamo	Piṭṭhaṅko	Padānukkamo	Piṭṭhaṅko
[Ta]		[Ta]	
Tapparāyaṇatā	417, 418	Tividhamalāni	305
Tabbiparīte	401	Tividhavitakkā	305
Tambapaṇṇidīpaṁ	155	Tividhavisamāni	305
Tambapaṇṇiyaṁ	161	Tividhasamkilesā	305
Tambapaṇṇiyā	149	Tividhasaññā	305
Tammūlakattā	390		
Taraṅgā	366	Tissakumārassa	135
Taruṇā	453	Tihatthavikkhambham	179
Tāpasam	141	Tīraṇaṁ	375
Tārāgaṇa	125	Tīretvā	115
Tāreti	293	Tuṭṭhiṁ	103
Tālāvatthukatā	340	Tumbāni	459
Tāvatimsabhavanam		Turitacārikā	452
dasasahassayojanam		Turite	411
Tāvadeva	171	Tejodhātum	137
Tikacchedo	107	•	
Tikkhatā	352	Tejosamvaţţo	390
Tikkhindriye	251	Temāsam	459
Titikkhā	441	Temāsiko	458
Titthiyā	392	Telamiva	189
Tipañcayojanakkhandh		Tevijjā	166
parikkhep ā	259	Tevijj a dibhede	46
Tipiṭakasabbapariyattip	-		
bhedadhare	45	[Tha]	
Tipeṭako	149	Thambho	302
Tibhavarathe	218	Thāmam	450
Tiyaggalapokkharaṇī	257	Thāmagatāya	369
Tiracchānapurisā	290	Thāvarakammam	50
Tivaggasaṅgahāni	91	Thinamiddham	398
Tividhākusalamūlam	305	Thutijappehi	179
Tividhaduccaritāni	305	* * *	
Tividhapapañcā	305	Thūpapatiṭṭhānabhūmim	174

Padānukkamo	Piṭṭhaṅko	Padānukkamo	Piṭṭhaṅko
[Tha]		[Da]	
Theravādam	135	Diţţhisīlasāmañña-	
Therassa	137	saṅkhātasaṅghāto	211
Therim	184	Ditthe	197
Thero	140	Ditthosi	65
[Da]		Dippati	45
Dakkhiṇāpathamanussā	427	Dibbacakkhunā	410
Dakkhineyyam	424	Dibbañca	124
Daţţhabbasāramaṇdo	57	Dibbavihāravasena	396
Dattheyyam	240	Dibbavihārasannissitattā	396
Daṇḍādānaṁ	309	Dibbavihāro	203, 313
Datvā	132	Dibbasadisattā	395
Dantam	127	Dibbena cakkhunā	400
Dantakhacitam	58	Diyaḍḍhasataṁ	92
Dameti	290	Diyaddhasahassam	153
Dalidde	401	Divase	132, 182
Dasa akusalakammapath	nā 309	Disā	411
Dasanakhasamodhāna-		Dīgharattaṁ	84
samujjalam	425	Dīpaṁ	149
Dasabhātikasamākulam	169	Dīpakatittiro	141
Dasasahassacakkavāļe	455	Dukkham	408
Dasasahassayojanam	267	Dukkhamanubhavamāne	
Dassanaṭṭhena	397	Dukkhassa	197
Dassanațtho	313	Dukkhādīsu	219
Dāyādo	134	Dukkhāya	84
Ditthadhammanibbanav		Dukkhogāham	80
Ditthadhammikā	449	Dukkhogāhā	78
Ditthiasacco	155 138, 309	Duggahitam	90
Ditthigatāni Ditthisamkilesassa	76	Duggahitā	81
Ditthisīlasaṅghātena	415	Duccaritam	403
Diffinishasanghatena	413	Duccarnani	403

Padānukkamo	Piṭṭhaṅko	Padānukkamo	Piṭṭhaṅko
[Da]		[Da]	
Duccaritasamkilesassa	76	Dvattimsākārā	231
Duttham	151	Dvāraṁ	54
Dutthassa	378	Dvāresu	137
Duṭṭhullaṁ	399	Dvikkhattum	455
Dutiyadivase	55, 59		
Dubbanne	401	[Dha]	
Dubbiññeyyā	378	Dhajūpamehi	18
Dubbuṭṭhikā	172	Dhaññakaraṇaṭṭhāne	426
Dubbhikkhakantāram	293	Dhammam	83
Durabhisambhavam	115	Dhammakkhandho	107
Dullabhapinde	432	Dhammagaruno	400
Dussīlo	424	Dhammagāravā	400
Duhitikā	426	Dhammacakkam	27
Devatākulāni	182	Dhammacakkhum	151
Devatāhi	392	Dhammacintam	91
Devadundubhiyo	179		
Devadūtehi	151	Dhammajātam	80
Devaputtamāro	310	Dhammaṭṭhitiñāṇam	221
Devamanussanayana-		Dhammadasā	415
vihaṅgānaṁ	57	Dhammadesanābhiyogo	207
Devalokagabbhasampatti	-	Dhammadhātum	349
Devasikam	124	Dhammappadīpassa	21
Devā	127	Dhammaratanam	299
Desanā	73	Dhammavarassa	12
Desanāvilāpasappatto	349	Dhammavaro	12
Desito	32	Dhammasabhāyam	59
Desesim	163	Dhammānurūpam	80
Doṇamattā	178	•	
Doṇamukham	273	Dhammābhilāpo	79
Dosanāsanato	412	Dhammābhisamayo	151
Dvaṅgulakappo	111	Dhammāmatam	153

Padānukkamo	Piṭṭhaṅko	Padānukkamo	Piṭṭhaṅko
[Dha]		[Na]	
Dhammikasukhāpariccāg	ga-	Navappāyā	48
nimittaṁ	208	Navasattapātubhāvadiṭṭhi	i 397
Dhamme	197	Navahatthaparikkhepam	178
Dhammesu	80	Navānupubbavihārā	41
Dhammo	12, 21	Nassanti	173
Dhātu-oropanatthāya	174	Nahutāni	252
Dhātuparinibbānam	173	Naļeru	205
Dhātupūjādivasesu	54	Nāgamāhaṭaṁ	162
Dhāretu	422	Nāgarājānam	125
Dhāressasi	34	Nāgavīthi	262
Dhīti	189	Nāgā āgantvā	184
Dhīro	197	Nātho	8
Dhuram	60	Nānattasaññā	399
Dhuraggāho	111	Nānābaddha-avikopanari	n 381
Dhuvabhattāni	131	Nānāratanavicittam	179
Dhenupago	375	Nānāvajjane	377
		Nānāvidhakusuma-	
[Na] Nakhasikhā	351	samākiņņam	179
	155	Nānubhonti	84
Nagamuddhani		Nāmapadam	329
Nagavhayā	259	Nālakasuttam	96
Natthitā	249	Nāvā	140
Nandanavanam	268	Nāvāsaṅghāṭaṁ	140
Nandā	268	Nāsanā	338
Nandiyāvaṭṭaṁ	162	Nikanti	222
Nappahoti	60	Nikāye	149
Namassaneyyam	14	Niketamiva	57
Namassamāno	14	Nikkujjitam	413
Navakammādhiṭṭhāyaka		Nikkhamantānam	351
Navakā	115	Nikkhamitvā	139
Navappabhedam	92	Nikkhitto	406

Padānukkamo	Piṭṭhaṅko	Padānukkamo	Piṭṭhaṅko
[Na]		[Na]	
Nigaṇṭho	127	Nibbānadhātuyā	28
Nigamo	437	Nibbāyimsu	111
Niggaṇhāti	192	Nibbidā	193
Nigrodhattherassa	137	Nimittam	371
Nighaṇḍu	120	Nimittasaṅkappanā	355
Niccabhattasankhepena	427	Niyato	452
Nijjhānaṁ	83	Niyy ā naṭṭho	313
Niṭṭhitaṁ	58	Nirāmisā	391
Nittāreti	293	Nirujjhati	121
Nittharaṇatthāya	335	Nirujjhissati	121
Nitthusakaņe	124	Nirutti	330, 332
Nidassitā	92	Nirupakkilesato	335
Nidānakosallattham	27	Nirupalepanam	208
Nidānaṭṭho	312	Nirodhato	239
Nidānavatthuppa-		Nirodhappajānanā	231
bhedadīpanato	460	Nirodhasamāpatti	380
Nidānena	324	Nirodhūpāyato	239
Niddese	356	Nivāte	205
Niddeso	330	Nivāsam	389
Niddosatāya	440		
Niddhamatha	150	Nisīdītipi	59
Niddhametvāna	153	Nissaraṇaṭṭho	312
Niddhotāni	17	Nissaraṇatthā	81
Nipaccakārāraham	338	Nissāya	190
Nipātapadam	329	Nīcakulatā	445
Nibaddhadānassa	431	Nīlavaṇṇayogato	366
Nibaddhavattam	128	Nīlavattham	366
Nibbattim	371	Nīvaraṇavikkhambhanato	325
Nibbattikam	408	Nīvaraṇāni	308
Nibbasanāni	36	Nīvaraņe paţisankhā	371
Nibbānam	351	Nuppajjissati	121

Padānukkamo	Piṭṭhaṅko	Padānukkamo	Piṭṭhaṅko
[Na]		[Pa]	
Nekkhammam	356, 446	Paccekagaṇīhi	187
Nemittikam	297	Pacceti	424
Nevasaññānāsaññābhavo	232	Pacchā	196
Nevasaññīnāsaññīvādā	147	Pacchimo tatiyabhāgo	337
Nosuttanāmikā	97	Pajjarakena	172
Nosulabhūpamehi	18	Pañcadasavaggapariggah	o 92
[Pa]		Pañcadasavaggasaṅgahār	ni 92
Pakkamantiyeva	452	Pañca raṭṭhāni	153
Pakkham	32	Pañcavokārabhavo	232
Paguṇaṁ	415	Pañcātape	138
Paggaṇhiṁsu	138	Paññatti	79, 328
Paggahitam	353	Paññattipathānurūpam	80
Paggahena	427	Paññattīsu	80
Paccatthike	192	Paññatto	32, 33
Paccanīkadhamme	363	Paññā	13
Paccanīkapaţipakkha-		Paññajananato	412
bhāvadassanato	357	Paññāyiṁsu	427
Paccayadassanattham	378	Paññāvadātato	412
Paccayādīnam	216, 225	Paññāveyyattiyam	166
Paccayānam	384	Paţikacceva	450
Paccayo	219	Patikkhepā	430
Paccarī	20	Patijaggāpetvā	178
Paccavekkhaṇam	392	Patiniddeso Patiniddeso	195
Paccavekkhaṇañāṇa-	44.0	Patinivattantassa	391
pariggahitam	410	Patipakkhabhūtam	379
Paccavekkhantena ·	64	Patipajjim	35
Paccassosi	456	Paṭipaṭṭiyā	334
Paccāgamimsu	115	Patipanno	326
Paccuttheti	338	Patibhānamado	304
Paccuppannānā-	410	Paṭimukhoyeva	425
gataṁsañāṇaṁ	410	i aminuknoyeva	423

Padānukkamo	Piṭṭhaṅko	Padānukkamo	Piṭṭhaṅko
[Pa]		[Pa]	
Paṭiyāditabhattato	119	Patiṭṭhāya	218
Paṭiyādetum	427	Patițțhitam	16
Paṭiyādesum	140	Patițțhito	149
Pațiladdhattā	396	Patimānesi	339
Pațiladdharasānubhavan	nam 362	Patirūpam	435
Pațilābhatuțțhi	361	Patti	311
Paṭivasati	197	Pattuņņapaţţapaţe	458
Paṭivijjhitvā	349	Patteyyam	240
Pațividdhākuppo	85	Patvā	408
Pațivedesi	415	Padam	131
Pațivedesum	57	Padattho	348
Paṭisandhiṁ	119	Padālatā	283
Paṭisallīnassa	438	Padena	402
Paṭissuṇitvā	115	Padhānam	58
Paṭhamaṁ	75	Padhānagharam	140
Paṭhamaṁ māsaṁ	56	Padhānānuyogassa	395
Paṭhamapāṭipadadivase	183	Pana	366
Paṭhamamahāsaṅgīti	27	Pantam	443
Paṭṭhapesi	123	Pannabhārā	114
Paṇipāto	417	Pabbajitakālato	135
Paṇītabhāvūpagamanena	a 387	Pabbajitānuggahakaraṇan	in 207
Paṇītena	168	Pabbajito	442
Paṇḍukambalasilā	268	Pabbajjā	131
Paṇḍukassa	158	Pabbajjāpurekkhārā	178
Paṇṇāni	133	Pabbajjāsankhepeneva	450
Paṇṇāsakasaṅgaho	108	Pabbato	254
Patanti	205	Pabhassaro	451
Patāreti	293	Pabhuti	135
Patiṭṭhahissati	168	Pamāṇaṁ	71
Patiṭṭhātu	171	Pamādalekham	22

Padānukkamo	Piṭṭhaṅko	Padānukkamo	Piṭṭhaṅko
[Pa]		[Pa]	
Pamādo	131, 305	Pariyattibhedam	74
Pamocanam	240	Pariyattibhedo	81
Payatto	312	Pariyattiyā	335
Payassahārī	271	Pariyatto	50
Payāgapatiṭṭhānaṁ	459	Pariyāpuṇanti	83
Payirupāsanam	414	Pariyāyaṁ	342
Payogasuddhi	357	Pariyāyehi	337
Parato	202	Pariyāyo	339
Parappavādam	148	Pariyāhananam	359
Paramam	441	Pariyuţţhānappahānam	76
Parasamayavivajjanato	460	Pariyuţţhitacitto	431
Parāyaṇaṁ	413	Pariyesati	424
Parikammam	389, 395	Pariyesanā	308
Parikkhipitvā	260	Pariyosānakalyāņo	325
Pariggaņhi	126	Pariyosāpehi	131
Pariggaho	309	Parivāramado	303
Paricayena	359	Parivitakko	195
Paricaranti	138	Pariveņam	56
Pariññātakkhandho	85	Pariveņaţţhāne	187
Pariññeyye	230	Parisuddham	335
Pariņāmakālo	353	Parisuddhabhāvādīsu	385
Pariṇāhamado	305	Parissayānam	310
Paridīpanā	74	Parihāyamāno	390
Paridevittha	32	Parūpaghāti	442
Parinibbāne	28	Parūpavādo	449
Paripākasithilabandhana	ṁ 339	Parūpārambho	449
Paripuṇṇagabbhā	128	Palibodhaṭṭho	312
Paribbājako	62	Palujjanti	48
Paribbhamanam	360	Pallaṅkaṁ	120
Paribhāvitāni	350	Pallankena	137

Padānukkamo	Piṭṭhaṅko	Padānukkamo	Piṭṭhaṅko
[Pa]		[Pa]	
Pavajjimsu	184	Paļinā	155
Pavattam	371	Pākaṭabhāvato	362
Pavattaphalabhojano	391	Pākatikaṁ	404, 405
Pavattitam	389	Pākammaṁ	311
Pavattino	104	Pācīnamahāsālamūle	182
Pavanam	196	Pācīnasamuddante	441
Pavāraṇāsaṅgahaṁ	453	Pāṭaliputtadvāre	171
Pavāretvā	169	Pāṭihāriyaṁ	133
Pavicayo	375	Pāṇātipāto	342
Paveņī	85	Pāṇo	342
Pasamsāyam	411	Pātimokkhāni	67
Pasamsāvacanam	394	Pātimokkhe	443
Pasatamattam	136	Pātubhavanti	66
Pasannabhāvo	353	Pādāni	294
Pasannākāram	413	Pānakaṁ	124
Pasavati	71	Pāpakānam	386
Pasādacakkhu	396	Pāpabhikkhū	32
Pasāde	411	Pāmojjaṁ	193, 337
Pasāraṇaṁ	129	Pāmojjajāto	135
Pasāretvā	337	Pāyesi	153
Pasīditvā	120	Pāragū	120
Passato	183	Pārappattaṁ	300
Paharaṇavuṭṭhiyo	150	Pāricchattako	268
Pahātabbe	230	Parijuññena	214
Pahānaṁ	76	Paripūrimado	305
Pahānakkamo	376	Pārisuddhupekkhā	373
Pahitam	55	Pālanaṁ	364
Pahīnakileso	85	Pāvacanam	32
Pahūtavittūpakaraņānam	457	Pāvāya	42
Paļāso	301	Pāsādiko	205

Padānukkamo	Piṭṭhaṅko	Padānukkamo	Piṭṭhaṅko
[Pa]		[Pa]	
Pāļinayānurūpam	19	Pubbaṇṇaṁ	426
Piṭakasampadānena	73	Pubbabhāgato	353
Piṭakesu	81	Pubbācariyānubhāvam	17
Piṇḍapātikamado	304	Pubbācariyāsabhehi	17
Pisati	428	Pubbārāme	444
Pisuṇavācā	345	Pubbe	92
Pisuņā	345	Pubbe katam	113
Pīti	193	Pubbenivāsānussati	387
Pītipāmojjam	134	Purato	155
Pītipharaņena	377	Puratthimena	171
Pītivipphāraparipuņņa-		Purimakammabhavasmin	
gattacitto	411	Purimataṇhā	231
Pītisukham	363	Purimasmim	366
Pīnanarasā	361	Purimena	356
Pīļanaṭṭho	197, 312	Purisadammasārathi	290
Puggalato	374	Purisayugavasena	448
Puggalena	375	Pure	294
Puggalo	339	Purekkhāramado	303
Pucchanto	336		303 44
Pucchi	141	Pure dippati	
Pucchitvā	120	Pūjāvisesānam	225
Puññappabhāvanibbattar	in 125	Pūjite	72
Puttānam	135	Pūrāpetvā	137
Puthujjanā	45	Pekkhamānā	139
Punadivasepi	169	Petavatthum	168
Puppham	161	Pemam	129
Pupphanāmo	149	Peyyālasaṅgaho	108
Pupphāni	454	Pesitacittassa	395
Pupphūpahāro	58	Pesitena	163
Pubbakattikapavāraņādi	vase 182	Pokkharaṇiyo	137
Pubbakāram	424	Pothujjanikena	133

Padānukkamo	Piṭṭhaṅko	Padānukkamo	Piṭṭhaṅko
[Pa - Pha]		[Ba]	
Porāṇā	202	Bindusāro	126
Pharaṇarasā	361	Bījanim	60
Pharitvā	73	Buddhakkhettam	390
Pharusavācā	345	Buddhacakkhu	155
Pharusā	345	Buddhañca	163
Phalanti	150	Buddhato	104
Phalimsu	179	Buddhattā	232
Phārusakavanañca	268	Buddhadhammā	175
Phāsukā	65	Buddhadhammānam	300
Phāsuvihāro	337	Buddhanisevitam	10
Phuṭattā	376	Buddhapariṇāyakam	458
Phullam	56	Buddhavacanam	123
[D. 1		Buddhasirivhayo	20
[Ba]	1.71	Buddhasubodhitāya	325
Bandhanā	151	Buddho	10, 109
Bandhitvā	140	Bojjhangupekkhā	370
Balam	337, 450	Bodhimaņde	218, 353
Balikammam	124	Bodhimaṇḍo	218
Bahum vā	323	Byañjanaṁ	329
Bahukārattā	46	Byañjanaparisuddhatāya	337
Bahujanasukhāya	209	Byañjanasampattiyā	326
Bahujanahitāya	209	Byañjanāni	348
Bahalagaṅgā	257	Byantīkatā	368
Bālabhāvo	357	Byasanam	172, 450
Bālavejjo	450	Byākatā	155
Bāhāya	83	Byādhipaṭikammattham	136
Bāhirakapāsaņḍam	126	Byāpādavitakko	447
Bāhirato	140	Byāpādo	346
Bāhusaccam	450	Byāmappabhāya	432
Bindusārassa	123	Brahā	253

Padānukkamo	Piṭṭhaṅko	Padānukkamo	Piṭṭhaṅko
[Ba]		[Bha]	
Brahmam	212	Bhave vā	391
Brahmacariyam	332, 334	Bhavo	11
Brahmalokasampattim	220	Bhavokkamanatthāni	380
Brahmavihārupekkhā	370	Bhāgī	298
Brahmavihārā	203, 313	Bhāge	319
Brahmānaṁ	179	Bhāgyam	300
Brāhmaṇabhatto	126	Bhāgyavā	298
Brāhmaṇānaṁ	127	Bhāriyaṁ kammaṁ	403
[Bha]		Bhāvanāpāripūriyā	387
Bhagavati	111	Bhāvitamaggam	114
Bhagavā	109, 320	Bhāvetabbam	230
Bhagavāti vacanam	297	Bhavetabbe	230
Bhagī	298	Bhāveti	73
Bhaggā	65	Bhāvenabhāvalakkhaṇatth	o 199
Bhajanam	414	Bhāsantarameva	23
Bhajī	298	Bhāsitamattam	341
Bhaṇḍāgārikapariyatti	81	Bhimsanakam	150
Bhaṇḍu	150	Bhimsanakāni	150
Bhattavissaggakaraṇatth	nāya 120	Bhikkhamānā	426
Bhaddanāmo	149	Bhikkhācāravattena	136
Bhaddapīṭhakesu	127	Bhikkhuto	104
Bhantamigappaṭibhāgo	129	Bhikkhusamghena	42
Bhayam	150	Bhikkhusamudāyo	111
Bhayabheravam	150	Bhikkhusahassaparivāram	140
Bhaye	41	Bhiṅgāraṁ	162
Bhavantago	298	Bhusā vātā	150
Bhavā	231	Bhūtam	373
Bhavābhavam	11	Bhūmattharaṇasaṅkhepena	a 168
Bhavābhavo	307	Bhūmiṁ	40

Padānukkamo	Piṭṭhaṅko	Padānukkamo	Piṭṭhaṅko
[Bha]		[Ma]	
Bhūmito	374	Mattamaññāsi	46
Bhūmipappaṭako	283	Madanayuta	271
Bheravam	150	Mado	302
Bhesajjatelānam	458	Maddanto	148
Bhesajjamattā	55	Madhum	124
Bhesajjassa	137	Manam	135
Bhogakkhandham	449	Manussā	291
Bhogamado	304	Manussūpacāram	400
Bhoge	82	Manomayiddhiyā	235
Bhojjayāgu	30	Mantanā	193
		Mandiram	427
[Ma]	150	Mamaccayena	33
Makkham		Mamāti	75
Makkho	300	Malam	138
Maggam	54	Mahatā	42
Maggapaṭipanne	338	Mahatthā	271
Maggassa	313	Mahaddhane	401
Maggo	351	Mahantam	402
Maṅgalaṁ	424	Mahallako	403
Maccuno	131	Mahākaruņā	9
Maccumāro	310	Mahākassapo	29
Macchariyam	301, 309	Mahākāruņikassa	8
Majjavaņijj ā	423	Mahākāruņiko	9
Majjhekalyāņo	325	Mahāgaņţhipade	7, 8, 22
Maṇḍanakajātiyo	347	Mahāgatikattā	396
Maṇḍapo	57	Mahāgocaram	50
Maṇḍūko	294	Mahājano	54
Matimaccajantā	21	Mahājutikattā	396
Matta	212	Mahādānam	132
Mattaññutā	443	Mahānubhāvā	46

Padānukkamo	Piṭṭhaṅko	Padānukkamo F	Piṭṭhaṅko	
[Ma]		[Ma]		
Mahāpuriso	339	Migāramātupāsāde	445	
Mahābodhiviyogadukkh	ito 184	Micchattā	308	
Mahābodhisamāruļhā	183	Micchācāro	344	
Mahāmaṇḍalaṁ	453	Micchādiţţhi	347	
Mahāmūlā	179	Micchādiţţhikammasamād	ānā 405	
Mahāmeghavanuyyānan	n 169	Micchādiţţhigahana-		
Mahāyāgam	459	pațicchannam	413	
Mahāvamse	169	Micchamaggo	413	
Mahāvanam	112	Milātamālākacavaram	54	
Mahāvivādo	173	Missakapabbatam	155	
Mahāvīro	171	Mukhatuṇḍakam	351	
Mahāsaṅgīti	27	Mukhamattanidassanam	196	
Mahāsamayo	196	Muccāma	48	
Mahāsamuddatalam	184	Muṭṭhassatinā	353	
Mahāsammato	284	Mudindriye	251	
Mahimsakamandalam	150	Mudukammaññabhāvena	385	
Mahimā	311	Mudukā	35	
Mahejavatthu	171	Musā	344	
Mahesayo	188	Musāvādo	344	
Māgasiramāsassa	183	Mūlaṁ	340	
Māgasirassa	453	Mūlakāraņabhāvena	231	
Mātikā	25	Mūlasatena	179	
Mātikāmattam	437	Me	337	
Mātulabhāgineyyānam	176	Meghavanam	168	
Mānābhisamayā	197	Mettam	220	
Māno	302	Methunam dhammam	284	
Māyā	301	Mehanassa	314	
Mārāvaṭṭanāya	431	Moggaliputtattherassa	134	
Māsakarūpam	113	Moggalibrāhmaņassa	114	
Migavam	139, 160	Moghapurisā	83	

Padānukkamo	Piṭṭhaṅko	Padānukkamo I	Piṭṭhaṅko	
[Ya]		[Ra]	[Ra]	
Yam	32	Rattaññumado	304	
Yakkhānam	179	Ratticchedo	433, 434	
Yajitvā	459	Rathayaṭṭhippamāṇā	160	
Yattha kāmāvasāyitā	312	Ramaṇīyo	205	
Yathāṭhāne	54, 450	Rasapathavī	283	
Yathādhammam	75, 79	Rasena rasam	450	
Yathānulomam	75	Rasmīhi	457	
Yathānusiṭṭhaṁ	151, 414	Raho	225	
Yathābhuccaguṇādhigato	312	Rahogatassa	438	
Yathābhūtam	224	Rāgavirāgoti	414	
Yathābhūtañāṇadassanan	n 193	Rāgo	355	
Yathāvuḍḍham	59		162	
Yathāvuttena	73	Rājakakudhabhaṇḍāni		
Yamakasālānam	28	Rājagaham	56	
Yasamado	304	Rājagahanagaraparivattak		
Yasasā	294, 411	Rājaṅgaṇena	127	
Yahim	74	Rājaparivaṭṭe	337	
Yāpanīyaṁ	337	Rājabhavanabhūtim	57	
Yāvadattham	458	Rājā	284	
Yogā	307	Rājāgārake	62	
Yojaniya-ārāmesu	187	Rājābhirājā	72	
Yojemi	58	Rājiddhiyo	124	
Yobbanamado	303	Rukkho	351	
[Ra]		Rūpadassanena	400	
Rajatayatthī	161	Rūpabhavo	231	
Rajjam	139	Rūparasā	340	
Rajjantānam	340	Rūpāni	399	
Rañño	123	Rogam vūpasametvā	450	
Ratanam	14	Rohitamigarūpam	160	

Padānukkamo	Piṭṭhaṅko	Padānukkamo	Piṭṭhaṅko
[La]		[La]	
Lakkhaṇīyattā	73	Lokānukampāya	209
Lakkhaṇūpanijjhāyanato	363	Lokāmisanirapekkhato	335
Laggetvā	120	Lokāmisabhūtam	450
Laghimā	311	Lokiyasarikkhakānam	311
Lacchasi	171	Lokuttaradhammo	129
Lacchāma	170	Loke	208
Lajjīsu	189	Lobhanissandayuttattā	401
Latā	161	Lolabhāvo	357
Laddham	153	Lohapāsādaṭṭhānaṁ	187
Laddhā laddhā	103	Lohitakkhayañca	450
Labhitvā	135	[Vo 1	
Lahuṭṭhānaṁ	337	[Va]	85
Lābhaggamahattam	450	Vamsānurakkhaņatthāya	
Lābhamado	303	Vaggasaṅgaho	108
Lābhasakkāro	138	Vacanasiliṭṭhatāya	350
Lābho	309	Vacanānamattham	24
Lokam	240	Vacīduccaritam	344
Lokajeţţhakakammam	347	Vacchapālako	294
Lokatanti	347	Vijito	433
Lokadhammā	246	Vajjayitvāna	22
Lokanirodham	240	Vajjāvajjam	131
Lokantagū	240	Vajjīsu	112
Lokantarikanirayā	276	Vaṭaṁsakaṁ	162
Lokabyūhā	279	Vaţţakhāņubhūtam	350
Lokarāmaņeyyakam	57	Vaḍḍhamānaṁ	162
Lokavidū	240, 287	Vaḍḍhāpento	132
Lokavivaraņam	133	Vaḍḍhetvā	122
Lokasannivāse	351	Vaṇṇajjhakkhaṁ	427
Lokassantam	240	Vaṇṇamado	304
Lokahitāya	7	Vaṇṇādīhi	392

Padānukkamo	Piṭṭhaṅko	Padānukkamo	Piţţhaṅko
[Va]		[Va]	
Vaṇṇena	294, 411	Viggahajātā	173
Vata	48	Viggaho	309
Vatthakoṭikaṁ	162	Vicāresi	185
Vatthārammaṇādi-		Vicikicchā	398
sāmaggiyaṁ	340	Vijitāvino	111
Vatthukāmappahānam	207	Vijj ā	231
Vatthukāmehipi	356	Vijjācaraņasampanno	320
Vanantam	362	Vijjāhi	235
Vantam	314	Viññāṇaṭṭhitiyo	243
Vantitv a	425	Viññūnam	71
Vami	319	Vitakkanam	358
Vayadhammā	66	Vitakkavicārapalibodhā-	
Vayham	140	bhāvena	366
Varabhūrimedhaso	351	Vitti	457
Vavatthapetabbo	25	Vitthāramaggañca	23
Vasitā	311	Viditānubhāvo	450
Vasībhāvappatte	384	Viddhamsakāni	357
Vassasataparinibbute	111	Vidhunantā	351
Vassūpanāyikā	54		348
Vā	391	Vinayam Vinayati	361
Vākyena	19	Vinayati	
Vācaṅgaṁ	425	Vinayapaññattiyā	438
Vācesum	149	Vinayapaññattiyācana-	107
Vāṇijako	129	hetubhūto	195
Vātena	286	Vinayapariyattim	190
Vādo	225	Vinayapiṭakaṁ	123
Vārigocaro	294	Vinayo	21
Vāļakantāram	293	Vinicchayam	24
Vikasitacittā	448	Vinicchayo	309
Vikkhambhanappahānan	in 76	Vinipātanasabhāvo	451
Vigatadaratho	354	Vinipāto	451

Padānukkamo	Piṭṭhaṅko	Padānukkamo	Piṭṭhaṅko	
[Va]		[Va	[Va]	
Vineyyasattā	453	Vilokitaṁ	129	
Vipatti	422, 423	Vivaṭṭaṭṭhāyī	278, 285	
Vipariņāmo	197	Vivațțo	277, 285, 390	
Vipariṇāmaṭṭho	312	Vivaraṇaṁ	328	
Viparītadassanā	405	Vivaraṇavibhajanār	ni 327	
Vipassanāñāṇassa	353	Vivaritvā	54	
Vipassanāpādakam	383, 407	Vivasā	406	
Vipassanupekkhā	372	Vivādamūlāni	308	
Vipulabhāvena	450	Vivādo	309	
Vipulāya	369	Viviccitvā	355	
Vipphāravā	360	Vivekajam	363	
Vibhange	356	Vivekaţţho	313	
Vibhajanam	328	Vivekā	361	
Vibhajjavādī	148	Visaṅkhataṁ	65	
Vibhāvanā	74	Visaṅkhāraṁ	65	
Vibhavane	338	Visajjesi	137	
Vibhūtim	134, 184	Visadāya	369	
Vibhūtiyā	185	Visamāsanupatāpo	377	
Vimaddakkhamato	412	Visayakkhettam	278	
Vimanavatthum	168	Visayato	80	
Vimuccimsu	447	Visavaņijjā	423	
Vimucci	58	Visavitāya buddho	296	
Vimutti	13, 193	Visahati	431	
Vimuttiñāṇaṁ	13	Visākhapuṇṇamāya	m 164	
Vimuttiñāṇadassanaṁ	193	Visārado	191	
Vimuttirasam	64	Visuddhavijj ā paṭisa	mbhidehi 17	
Vimuttirasassa	299	Vissatthā	57	
Vimokkhantikañāṇavas	ena 295	Vissattho	46, 139	
Vimokkho	193	Vissutā	113	
Virāgo	193	Vissutāsu	20	

Padānukkamo	Piṭṭhaṅko	Padānukkamo	Piṭṭhaṅko
[Va]		[Va]	
Vihāraggena	425	Vedanupekkhā	372
Vihāramahapūjāya	134	Vedānam	120
Vihimsāvitakko	447	Vedehiputtena	63
Vīciyo	184, 366	Veneyyavaseneva	454
Vītikkamappahānam	76	Veneyyānam	334
Vīmamsiyamānahitato	412	Verañjaṁ	427
Vīriyapariggahitam	385	Verañjā	202
Vīriyapādehi	218	Veramaņiyo	423
Vīriyabhāvanābalanibba	attam 396	Vevacanappakāsakam	120
Vīriyasamatam	58	Vesālikā	111
Vīriyupekkhā	370	Vesālī	112
Vuṭṭhahati	338	Vokāro	232
Vuḍḍhataro	404	Voharati	191
Vuḍḍhapabbajito	29	r C- 1	
Vuḍḍhimanto	73	[Sa]	251
Vuḍḍhimariyādappatte	337	Sam	351
Vuttatthā	80	Samkilesavatthuppahān	
Vuttavipariyāyena	407	Samghatthero	28
Vuttasassam	426	Samghapatimānanam	382
Vuttim	364	Samghamajjhe	191
Vutto	21	Samyuttasangaho	92, 108
Vusitabrahmacariyo	240	Samyogaṭṭho	312
Vūpasantā	368	Samvaṭṭati	390
Vūpasamā	364	** ** *	7, 285, 390
Vūpasametum	138	Samvaṭṭasīmā	390
Vegena	440	Samvațțo	277, 284
Vejayantaratho	267	Samvaḍḍhabhāvam	208
Vejayanto	267	Samvaṇṇanā	19
Veṭhakaṁ	162	Samvaņņitam	389
Vedam	103	Samvaṇṇito	19

Padānukkamo	Piṭṭhaṅko	Padānukkamo Piṭṭṭh	aṅko
[Sa]		[Sa]	
Samvarāsamvaro	75	Saṅkhārupekkhāsu	371
Samvaro	443	Saṅkhepavasena	374
Samsanditvā	450	Saṅkhepo	221
Samsāracakkam	218	Saṅkhyāyapi	211
Samhato	415	Saṅgīti	26
Sa-uppattikam	334	Sacittapariyodapanam	443
Sa-ussāham	458	Saccasamyuttañca	168
Sakakavaca-issariyā-		Sacchikātabbe	230
nuppadānena	42	Sacchikā paññatti	298
Sakaraṇīyo	46	Pañchavim	450
Sakalanavaṅgasatthusā	sana-	Sañjhāppabhā	125
pariyattidhare	45	Saññāpetvā	54
Sakiñcano	213	Saññāpesi	139
Sake	450	Saññābhāvanānam	300
Sakkā	120	Saññino	75
Sakkāram	137	Saññībhavo	232
Sakkāramado	303	Saññīvādā	147
Sakkhati	141	Saṇṭhahantaṁ	391
Sakkhasi	135	Saṇṭhaheyya	340
Sakyaputtassa	163	Saṇṭhānamado	305
Sakyaputto	214	Satapuññajalakkhaṇadharassa	310
Saṅkapparāgo	355	Sati	189
Saṅkappo	355	Satisīsena	379
Saṅkampi	108	Sattadivasena	139
Saṅkhaṁ	162	Sattamaṁ	260
Saṅkhataṭṭho	197, 312	Sattaloko	241
Saṅkhāraloko	241	Sattavaņijj ā	423
Saṅkhārā	219	Sattavassāni	119
Saṅkhārānaṁ	219	Sattāhaparinibbuto	29
Saṅkhārupekkhā	371	Satte	293

Padānukkamo	Piṭṭhaṅko	Padānukkamo	Piṭṭhaṅko
[Sa]		[Sa]	
Satto	342	Santuṭṭhā	449
Satthavaņijjā	423	Sandassetvā	151
Satthādānam	309	Sandhāvissam	65
Satthā devamanussānam	320	Sannipatitā	59
Satthupakkosanam	382	Sannirumbhitvā	293
Satthusāsanam	138	Sannivāsena	130
Satthe	293	Sannisajjaṭṭhānaṁ	57
Sattho	292	Saputtadāram	459
Sadā	390	•	136
Sadevakam	323	Sappim	
Saddanayena	300	Sabbakiccasādhakari	
Saddhammavamsakovid	o 149	Sabbangapaccangasi	
Saddhammavimukham	413	Sabbaññutaññāṇaṁ	351
Saddhammasamvanna-		Sabbaññutāya buddh	
nakovidehi	18	Sabbatāļāvacare	170
Saddhammā	235	Sabbadarathapariļāha	akilesa-
Saddhā	163	satasahassāni	310
Saddhājananato	412	Sabbadassāvitāya	296
Saddhādīhi	385	Sabbadhammānam	229, 232
Saddhāpaţilābhena	334	Sabbanagarehi	133
Saddhāpariggahitam	385	Sabbaparittaguņo	451
Saddhāhatthena	218	Sabbapariyāyesu	341
Sanighaṇḍukeṭubhā	121	Sabbapāpassa	443
Sanidānam	334	Sabbamadhūhi	436
Santam	455	Sabbasamussayehi	407
Santappetvā	168	Sabbākārato	224
Santā	368	Sabbākāraparipūrā	312
Santāpaṭṭho	312	• •	
Santāpo	197	Sabyañjanam Sabyañjanata	330, 332, 335
Santiṭṭhanā	371	Sabyañjanato	412
Santindriyam	128	Sabhāyam	137

Padānukkamo	Piṭṭhaṅko	Padānukkamo	Piṭṭhaṅko
[Sa]		[Sa]	
Sabhāvaparicchinnattā	73	Samārakaṁ	323
Samam	369	Samāsayitvā	23
Samaṇamuṇḍikāputto	197	Samāhari	378
Samatikkamma	183	Samiñjanaṁ	129
Samathavipassanā	453	Samitā	368
Samathavipassanāsukhāv	va-	Samitāvī	240
hanato	325	Samucchedappahānam	76
Samadhikāni	153	Samujjotayamāno	457
Samanake	240	Samuṭṭhāpikā	231
Samantato	153	Samuttejetvā	151, 458
Samantapāsādikāya	459	Samudayato	239
Samantabhaddakattā	324	Samuddatīre	185
Samantā yojanam	184	Samuddasālavatthusmim	
Samayam	142	Samussitadhajapaṭākam	179
Samayappavādako	197	Samūhattho	199
Samayena	153	Sampakampi	108
Samayo	196, 198	Sampajānāti	375
Samavāye	196	Sampațicchā	139
Samavāyo	200	Sampațipādento	351
Samasamatthapanena	41	Sampatijāto	338
Samassāsetum	55	Sampatti	424
Samādhi	13, 193	Sampadam	405
Samāno	13, 193	Sampannam	436
	363	Sampanna-iriyāpatham	128
Samāpajjatīti		Sampannattā	235
Samāpajjanam	381	Samparāyikā	449
Samāpajjanti	381	Samparāyiko	197
Samāpajjitvā	137	Sampavedhi	108
Samāpatti	347	Sampassatam	460
Samāyojitam	218	Sampahamsetvā	458

Padānukkamo	Piṭṭhaṅko	Padānukkamo	Piţţhaṅko
[Sa]		[Sa]	
Sampāpakam	408	Sarasaramsijāla-	
Sampāpako	452	vissajjanakena	178
Sampāpuņimsu	115	Sarasalakkhaṇapaṭivedhei	na 408
Sampiṇḍanam	369	Saritabbabhāvato	337
Sampiṇḍitaṁ	57	Sarīram	128
Sampiyāyanalakkhaņā	ā 361	Sarīradhātuyo	170
Samphappalāpo	346	Sarūpena	195
Sambuddhavaranvaye	ehi 19	Sallekhiyam	18
Sambuddho	229	Sallekho	18
Sambodhi	452	Sassaghātam	48
Sambhāvanatthe	350	Sahatthā	168
Sammattaniyāmena	451	Sahassāni	104
Sammanni	60	Sākkharappabhedā	121
Sammā	229, 237, 350	Sāṭheyyaṁ	301
Sammāpaṭipattiyā	238	Sāṇasambhūto	113
Sammāvāyāmasaṅkhā		Sāṇāni	36
•	170, 229, 320	Sāṇipākāram	142
Sammāsambodhim	64	Sātalakkhaṇam	361
Sammukhā	114	Sāttham	326, 332
Sammodanīyam	166	Satthato	412
Sammodamyam	336	Sādhāraṇaparibhogena	36
Sayanāsanam	443	Sādhāraṇavacanena	356
Saraṇam	413, 415	Sādhu	115
Saraṇagamanam	416	Sādhukīļanam	53
Saraṇagamanāni Saraṇagamanāni	415	Sādhukīļanadivasesu	53
Saraṇalakkhaṇā	375	Sānubhāvā	441
Saraṇavaṇṇanato	422	Sāmaṁ	229
Saranti	394	Sāmisā Sāranīvam	391 337
		Sāraṇīyaṁ Sāraddhakāyana	
Sarasaramsijālam	183	Sāraddhakāyena	353

Padānukkamo	Piṭṭhaṅko	Padānukkamo Piṭṭhaṅko	
[Sa]		[Sa]	
Sārapāmaṅgaṁ	162	Sīlakkhandhādipāripūrim 84	
Sārambho	302	Sīlaṅgāni 133	
Sāretā	131	Sīlaguņenapi 288	
Sāro	127	Sīlapathaviyam 218	
Sāroti	451	Sīlamado 304	
Sālaṁ	128	Sīlādipañcadhammakkhandha-	
Sālavane	28	yuttato 335	
Sāli	283	Sīhapañjare 127, 128	
Sālino	124	Sīhaļadīpakena 19	
Sāvakapāramiñāṇaṁ	352	Sīhaļo 19	
Sāvakayugāni	448	Sīhokkantavasena 394	
Sāvakā	393	Sukarā 427	
Sāvajjo	421	Sukkhavipassakā 45	
Sāsanaṁ	16, 34	Sukham 193, 361	
Sāsanassa	134	Sukham somanassassa 379	
Sāsane	124	Sukhapāramippatte 376	
Sikkhākāmesu	189	Sukhasamphassāni 87	
Sikkhāpadapaññatti-	10)	Sukhasayitabhāvam 168	
yācanāpekkham	449	Sukhādighātena 379	
Sikkhāpadaññattihetum	201	Sukhābhisaṅgena 376	
Sikkhāya	135	Sukhāvaham 335	
Sikkhitabbakadhammo	131	Sukhumattā 375	
Siṅgīloṇakappo	111	Sukhumā 378	
Sitam katvā	294	Sukhokkanto 377	
	305	Sugatigate 401	
Sippamado	503 57	Sugato 237, 238, 320	
Siriyā		Sucaritakammanibbattam 396	
Sirīsena Sēmania	260	Suññatavimokkho 313	
Sīmam	140	Suṇantassa 294	
Sīlam	13	Suṇanto 167	
Sīlakūṭamhi	155	Sutamado 304	

Padānukkamo	Piṭṭhaṅko	Padānukkamo	Piţţhaṅko
[Sa]		[Sa]	
Suttantam	167	Settham	436
Suttantikānam	24	Setthehi	334
Suttasabhāgam	71	Settho	339, 353
Sutvā	168	Setā	161
Sudassanakūṭaṁ	255	Senaṅgesu	364
Sudhammā	269	Senāsammuti	364
Suniggahitam	192	Sevan a	414
Sundaram	335	Soke	411
Supaṇṇarūpena	184	Socittha	32
Subhavitattano	298		
Subhāvitattā	384	Soņuttarā	153
Subhena māṇavena	55	Sotam	451
Sumanapupphapaṭam	124	Sotāvadhānaṁ	193
Sumuttā	32	Sodhāpetvā	184
Sumedho	240	Sobhanam	237
Suyyamānasukhato	337, 412	Somanassamayañāṇena	66
Surasam	436	Soreyyādīni	459
Suvaṇṇarasapiñjarāhi	457	Sositā	368
Suvaṇṇasaṅkha-		Soļasaparivārā	67
likabandhanam	124	Soļasavassuddesiko	120
Suvaṇṇe	401	Svākāre	251
Suviññāpaye	251		
Susanthitassa	16	[Ha]	44.5
Susassakāle	426	Haṭṭhapahaṭṭho	115
Susunāgaputto	112	Hatattā	216
Sūcanato	69	Hatantarāyo	15
Sūrabhāvo	353	Hatthapuñchanam	162
Sūriyappabhāvibhavā	379	Hatthā	351
Sūriyamaṇḍalaṁ	260	Hatthinagena	139
Sūriyo	264, 282	Hatthe	82, 130
Sekkho	46	Hadayaṅgamato	412

Padānukkamo	Piṭṭhaṅko	Padānukkamo	Piṭṭhaṅko
[Ha]		[Ha]	
Hayamuttā	162	Hīļite	401
Harati	204	Heṭṭhāmukhajātaṁ	412
Haricandanam	162	Hetu-attho	313
Haritum	122	Hetudāharaṇayuttato	334
Harītakaṁ	162	Hetuphale	78
Hāse	411	•	128
Hi	26, 292	Hetusampadam	
Hinkārehi	179	Hetū	78
Hitvā	23	Hessati	24
Himavalāhakagabbham	178	Homi	134
Himavā	254	Homa	32